



U d/of OTTAWA



39003003327847









OEUVRES COMPLÈTES

P. de Ronsard

OEUVRES COMPLÈTES

DE

P. de Ronsard

GENÈRES COMPTES

P. de Ronsard

OEUVRES COMPLÈTES  
DE  
P. de Ronsard

---

NOUVELLE ÉDITION  
REVISÉE, AUGMENTÉE ET ANNOTÉE

PAR  
PAUL LAUMONIER

---

TOME TROISIÈME



PARIS  
LIBRAIRIE ALPHONSE LEMERRE  
23-33, PASSAGE CHOISEUL, 23-33

---

1914-1919

438/180

PQ  
1674  
.A2  
1919  
v.3

LES QVATRE PRE-  
MIERS LIVRES DE  
LA FRANCIADE.

AV ROY TRES-CHRESTIEN, CHARLES

NEVFIESME DE CE NOM.



L'AVTHEVR PARLE.

*Vn list ce liure pour apprendre,  
L'autre le list comme enuieux :  
Il est aisé de me reprendre,  
Mais malaisé de faire mieux.*

DE LVY-MESME.

*Les François qui ces vers liront,  
S'ils ne sont & Grecs & Romains,  
En lieu de mon liure ils n'auront  
Qu'un pesant faix entre les mains.*



# ARGVMENS DES LIVRES DE LA FRANCIADE

DE PIERRE DE RONSARD,

Par Amadis Iamin, Secretaire de la Chambre du Roy.

---

## ARGUMENT DV PREMIER LIVRE.

En ce laborieux ouvrage de la Franciade, l'Autheur s'est proposé la façon d'escrire des Anciens, & sur tous du diuin Homere : combien qu'en ce premier liure il ait principalement imité Homere & Virgile, si est-ce que l'embarquement de Francus est à l'imitation d'Apolloine Rhodien. Il ressemble à l'abeille, laquelle tire son profit de toutes fleurs pour en faire son miel : aussi sans iurer en l'imitation d'un des Anciens plus que des autres, il considere ce qui est en eux de meilleur,



dequoy il enrichit (comme tousiours il a esté heureux) nostre langue Françoisse. Or pour venir à ce premier liure, qui est comme le fondement & proiect du reste du bastiment, l'argument est tel. Apres que Francus fut retourné du long voyage, où son oncle Helenin l'auoit énuoyé en diuerses nations pour en apprendre les mœurs & façons, & par telle cognoissance se rendre sage, ruzé & pratiq Capitaine, ce qu'Helenin auoit fait, ne voulant qu'il fust recognu pour enfant d'Hector entre les Grecs, lesquels pensoient pour certain que Pyrrhe fils d'Achille l'eust fait mourir, le precipitant du feste d'une tour : Iupiter qui l'auoit fauué du fac de Troye, & en lieu du corps vray auoit baillé une feinte de luy à ses ennemis, se resouuenant du destin, pour lequel il l'auoit garenti de si cruelle mort, & se repentant de la destruction de Troye, enuoye Mercure messager des Dieux vers Helenin, oncle paternel dudit Francus, à fin qu'il l'aduertisse quelles sont les destinées de Francion son neveu, lequel depuis un an laissoit éneruer sa ieunesse d'oisiueté, sans souci de releuer sus l'honneur de ses ayeuls. Helenin apres auoir ouy le commandement de Iupiter (aussi que son esprit prophetique auoit preuoyance des destins, & presageoit la grandeur de son neveu fils d'Hector) luy fit equipper quelque nombre de nauires, dans lesquelles il s'embarqua, laissant Buthrote ville d'Epire, où il faisoit sa demeure avec son oncle & sa mere Andromache. Le Poete luy donne compagnie d'hommes guerriers par une belle & gentille inuention : car le iour du mandement de Iupiter, tous les Troyens banis estoient assemblez par le congé des Princes de la Grece, desquels

ils estoient esclaves, pour choumer la feste de Cybele leur Déesse, tous equippez d'armes telles que fouloient porter les Corybantes & Curetes, quand ils celebrient les honneurs de la Mere des Dieux. Iunon se courrouce, voyant que la gloire des Phrygiens doit refloir. Cybele & Mars fauorisoient Francion, & luy enflamment le cœur du desir de louange & de vertu. Helenin luy enseigne sommairement quel chemin il doit tenir sur la mer pour venir de Crete à l'emboucheure du Danube.

## ARGVMENT DV SECOND LIVRE.

Neptune gardant encor son courroux contre les Troyens, à raison du pariure Laomedon, employe (oultre ses forces) la puissance de Iunon, d'Iris, & d'Eole, pour se vanger sur Francus, voulant enseuelir luy & ses destins souz la mer. Francion tourmenté des tempestes, & ayant perdu tous ses vaisseaux, fut poussé contre des rochers de l'isle de Crete, en laquelle vn Roy nommé Dicee le reçoit avec toute courtoise liberalité. Ce Roy courant vn cerf, rencontre d'auenture ces Troyens endormis sur le riuage, recreuz de travail & lassitude. Cybele auoit enuoyé à ce Roy le Dieu du Somne en songe, pour luy donner enuie d'aller à la chasse ce mesme iour. Francion fait entendre à Dicée son nom, son pays & sa ville, & l'occasion de son nauigage, & son naufrage. Les fantômes

de ses compagnons, que la tempeste auoit engloutis, se presentent à luy la nuit suiuite : auxquels il dresse des tombeaux vuides, appelez *κεντάφια*, & leur fait des obseques. Apres il supplie la Déesse Venus qu'elle le vueille garder & fauoriser. Venus enuoye son enfant Amour pour bleffer & rendre amoureuses les deux filles du Roy Dicée, nommées l'une Clymene, & l'autre Hyante, au mesme instant que Francion arriueroit au chasteau. Il se fait vn festin, où Terpin chancre tres-excellent chante vn bel Hymne d'amour. Dicée triste conte à Francion la cause de sa tristesse, & comme son fils Orée est detenu prisonnier souz la tyrannie du Gean Phouére. Francion s'offre à combattre le Gean : ce qu'il fait de si magnanime courage, & avec telle prouesse & dexterité, qu'il le tue, & retire Orée de sa captiuité. Dicée bien ioyeux embrasse le veinqueur, & chante son honneur.

## ARGUMENT DV TROISIESME LIVRE.

Ce liure contient les amours d'Hyante & de Clymene. Clymene, au commencement par grand artifice, & par belles & comme iustes remonstrances s'efforce d'arracher l'affection amoureuse du cuer d'Hyante sa sœur, afin que toute seule elle puisse iouyr de l'amour du Prince Troyen. Ces deux sœurs vont au temple pour sacrifier aux Dieux, afin qu'ils destournent toute mauuaise passion de leurs esprits. Le fils

d'Hector va sur le riuage de la mer, où il adresse sa priere à Apollon. Leucothoé fille de Protée luy prophétise ses fortunes à venir, & Dicée offre au seigneur Troien sa fille Hyante en mariage, lequel le remercie, s'excusant sur le destin. Orée fils du Roy immole vne hecatombe aux Dieux. Terpin chante vn bel Hymne à la Deesse Victoire. Venus changée en la vieille prestresse d'Hecate, vient au cheuet d'Hyante, & enuironne le liét de sa ceinture pleine d'esfrange vertu. Francus celebre les funerailles d'vn Capitaine son cher amy. Clymene furieuse, par le conseil de sa nourrice, tasche de flechir Francion par vne lettre amoureuse. Cybele transformée en Turnien, compaignon de Francus, l'admoneste de courtizer Hyante magicienne, pour apprendre & sçauoir d'elle les Roys, lesquels doiuent sortir de son sang: la mesme Deesse s'en-vole apres en l'antré de la Ialousie. La Ialousie infecte de son venin la poitrine de Clymene. En fin Clymene poursuiuant son faux Demon transformé en la figure d'vn sanglier, s'eslance dedans le goufre de la mer. Les Dieux en font vne Deesse marine.

## ARGVMENT DV QVATRIESME LIVRE.

Dicée se courrouce, sçachant la mort de sa fille Clymene, & pense comme il doit punir Francion, qu'il soupçonnoit en estre cause. Ce Prince Phrygien fait entendre à Hyante l'amour qu'il luy porte. Hyante &

Francus vont le lendemain au temple : vne Corneille parle, & aduertit Amblois de n'accompagner Francion. Ce Prince supplie Hyante de luy monstrier les Roys qui sortiront de son estoc. Hyante discourt si elle doit aimer ou non. Elle commande à Francion d'apprester vn sacrifice aux esprits des enfers, & se parfumer d'encens masle, & autres semblables suffumigations. Il obeit à ce commandement. Le Poëte décrit vne fosse & horrible descente aux enfers. Apres que Francus a immolé la victime, & inuoqué toutes les puissances de l'empire de Pluton, Hyante vient toute tremblante & folle de fureur, laquelle prophetise audit Francus son voyage és Gaules. Elle predit le songe du fantosme qui doit apparoirre à Marcomire, & ce que fera Marcomire ayant en son armée trois cens Capitaines. Apres elle discourt comme les ames viennent & reuont en nouveaux corps, & dequoy tout ce qui est viuant en ce monde, prend sa naissance : Que deuient les ames le corps mourant, quelle punition elles endurent aux enfers pour leurs pechez, & comment elles s'en purgent, & par quel espace de temps. Francion sacrifie de rechef aux Deitez infernales, & les ames sortent incontinent pour boire du sang de la victime. Lors il demande à Hyante, qui sont ceux qu'il voit : & par ce moyen apprend sommairement l'un apres l'autre les noms des Rois de France, les actes infames des vicieux, & les gestes magnanimes des vertueux. Bref, ce liure est des plus beaux, pour estre diuisé en quatre parties : La premiere est d'Amour, la seconde de Magie, la troisieme de la Philosophie Pythagorique, dite μεταμύωσις. L'Auteur se sert expres de ceste faulse opinion, à fin que

cela luy soit comme vn chemin & argument plus facile pour faire venir les esprits de nos Roys en nouveaux corps: car sans telle inuention, il eust fallu se monstrier plustost Historiographe que Poëte. La quatrième partie consiste au narré de la premiere generation des Monarques de France iusques à Pepin, duquel commence la seconde generation.





*Tu n'as, Ronsard, composé cest ouvrage,  
Il est forgé d'une royale main :*

CHARLES sçauant, victorieux & sage  
*En est l'Autheur, tu n'es que l'escriuain.*







## LE PREMIER LIVRE

DE LA FRANCIADE.

---

AV ROY TRES-CHRESTIEN, CHARLES

NEVFIESME DE CE NOM.

*Muse, l'honneur des sommets de Parnasse,  
Guide ma langue & me chante la race  
Des ROIS FRANÇOIS yssus de Francion  
Enfant d'Hector Troyen de nation,  
Qu'on appelloit en sa ieunesse tendre  
Astyanax & du nom de Scamandre.*

*De ce Troyen conte moy les trauaux,  
Guerres, conseils, & combien sur les eaux  
Il a de fois (en despit de Neptune  
Et de lunon) surmonté la Fortune,  
Et sur la terre eschappé de peris  
Ains que bastir les grans murs de Paris.*

CHARLES mon Prince enflez-moy le courage,  
Pour vostre honneur i'entrepren cet ourage :  
Soyez mon phare & gardez d'abyssmer  
Ma nef qui flotte en si profonde mer.

Desia vingt ans auoyent franchi carriere  
Depuis le iour que la Grece guerriere  
Auoit brulé le mur Neptunien :  
Quand du haut ciel le grand Saturnien  
Baissa les yeux & vit Troye deserte,  
De meinte tombe & meint buisson couuerte,  
Se courrouçant sa perruque esbranla,  
Puis au conseil tous les Dieux appella.

Du ciel d'airain les fondemens tremblèrent  
Deffous le pied des Dieux qui s'assemblerent  
Tous marchans d'ordre en leur siege appresté :  
Lors Iupiter pompeux de maïesté,  
Les surmontant de puissance & de gloire,  
Se vint assoir en son throne d'yuoire  
Le sceptre au poing, puis fronçant le sourci,  
Renfrongné d'ire, aux Dieux parloit ainsi.

Jamais au cœur ie n'eu telle tristesse  
Ny pour mortel pour Dieu ny pour Deesse,  
Que i'eu la nuit qu'on bruloit Ilion :  
Quand le cheual preignant d'un million  
D'hommes guerriers, de sa vouë fermée  
Versa dans Troye vne moisson armée  
D'espieux d'escus de lances & de dars  
Branlez és mains des Argiues soudars.  
Non seulement les Dolopes gendarmes  
Passoyent les corps par le tranchant des armes,  
Mais nos maisons, sacrileges, pilloyent  
Et de leurs Dieux les autels despouilloient,  
Qui reuerez par la ville Troyenne  
Fumoyent tousiours d'une odeur Sabéenne.

Là forcenoyent deux tygres sans merci  
Le grand Atride & le petit aussi  
Ioyeux de sang : le carnacier Tydide,  
Et le superbe heritier d'Eacide :  
Là l'Ithaquois chargé du grand bouclair  
Qui ne fut sien brillant comme un esclair  
Qui ça qui là s'esclatte de la nue,  
Gros de vengeance ensanglantoit la rue  
D'un peuple au lit surprins & déuëstu,  
Du fer ensemble & du feu combatu.  
Ainsi qu'on voit une fiere lionne,  
Que la fureur & la faim espoinçonne,  
Assassiner le debile troupeau :  
Entre les dents sanglante en est la peau,  
Qui pend encore en sa machoire teinte :  
Le pasteur fuit qui se pàsme de crainte !

Ainsi les Grecs detailloyent & brisoient  
Le peuple nu : Les feux qui reluisoyent  
Sur les maisons à flames enfumées,  
Donnoient lumiere aux Princes des armées  
Au meurtre au sang : un si cruel effort  
Monstroït par tout l'image de la mort.

Et toy Iunon dessus la porte assise,  
Hastois les Grecs ardans à l'entreprise  
Auec Pallas, qui sur le haut sommet  
Du premier mur (horrible en son armet  
Que la Gorgone asprist de mainte escaille)  
A coups de pique esbranloit la muraille  
Bouffante d'ire, & d'une forte vois  
Comme un tonnerre appelloit les Gregeois,  
Les animant à la vengeance pronte :  
Esprits malins, qui n'avez point de honte  
D'auoir destruit un royaume si beau,  
Fait qu'llion n'est plus qu'un grand tombeau,

*Et que Priam Monarque de l'Asie,  
Piteux spectacle! a respandu sa vie  
Sur ses enfans, qui auoit surmonté  
Tous les mortels en iustice & bonté.*

*Ce Roy pleurant son estat miserable  
En cheueux gris en barbe venerable,  
Du cruel Pyrrhe extremement pressé,  
Sur mon autel me tenoit embrassé:  
Quand il receut en sa gorge frappée  
De l'Achillin le tranchant de l'espée,  
Qui d'un grand coup le chef luy decolla:  
Bien loin la teste en sautellant alla!  
Le corps sans nom sans chaleur & sans face  
Comme un grand tronc broncha dessus la place.*

*Cet arrogant qui les Dieux despitoit,  
Qui de fureur son pere surmontoit,  
Non seulement d'une fureur maistresse  
Le fer au poing tuoit la tourbe épaisse,  
Mais outrageoit le sexe feminin  
Qui de nature est courtois & benin.  
Il poursuinoit au trauers de la flame,  
Du preux Hector Andromache la femme,  
Qui déplorant pour-neant son destin,  
Escheuclée, auoit à son tetin  
Pressé son fils, en qui le vray image  
Du pere sien estoit peint au visage.  
D'entre ses bras ie desrobay le fils:  
Lors en sa place une feinte ie fis,  
Que ie formay poitrissant une nue,  
Qui fut des Grecs en son lieu recognuë  
Du tout semblable à l'heritier d'Hector,  
Mesmes cheueux crespeluz de fin or,  
Les mesmes yeux le front mesme & la taille:  
Puis cette feinte à la mere ie baille*

Pour la donner à Pyrrhe : & tout soudain  
Cachant l'enfant dans les plis de mon sein,  
Le le sauuy de l'espée homicide :  
Le vain sans plus fut proye d'Æacide !

Le l'aduerti d'aller trouuer apres  
Son fils au temple, où deux cheualiers Grecs  
L'une sur l'autre amonceloyent la proye,  
Tout l'or captif de Priam & de Troye,  
Femmes enfans & vieillars enchainez,  
De leurs maisons par les cheueux trainez :  
Et qu'il auroit pour merque manifeste  
L'ardant esclair-d'une flame celeste  
Au haut du chef, vray signe qu'il seroit  
Pasteur de peuple, & qu'un iour il seroit  
Naistre des Rois, à qui la destinée  
Auoit la terre en partage donnée.

Le n'auois dit, que tout soudain voici  
Pyrrhe venir, qui raut tout ainsi  
L'image feint hors des bras de la mere,  
Qu'un loup le fan d'une biche legere.  
Il le porta sur le haut d'une tour,  
D'où le roüant & tournant de maint tour  
En tourbillons, d'un bras armé le rue  
Pied contre-mont au trauers de la rue.

Ainsi tomba par trançons decoupé  
Le vain abus dont le Grec fut trompé :  
Car Francus vit & maugré toute enuie  
De ses poumons va respirant la vie  
Dedans Buthrote, en ces champs où la vois  
Vit prophetique és chesnes Dodonois,  
Pres Helenin & sa mere Andromache  
Qui sans honneur par les tourbes le cache.

Desia la fleur de son âge croissant  
Va d'un poil d'or son menton iaunissant,

Et tout son cœur bouillonne de ieunesse :  
 Je ne veux plus qu'il languisse en paresse  
 Comme incognu sans sceptre & sans honneur,  
 Mais tout rempli de force & de bon-heur,  
 Je veux qu'il aille où son destin l'appelle  
 Tige futur d'une race si belle :  
 Sans plus en vain consommer son loisir  
 Parte de là : tel est nostre plaisir.

Il dist ainsi : les Dieux qui s'eleuerent,  
 Tous d'un accord sa parole approuuerent  
 En murmurant comme flots de la mer  
 De qui le front commence à se calmer,  
 Quand Aquilon assoupit son orage,  
 Et l'onde bruit doucement au riuage.

Au departir Mercure il appella :  
 Pour obeïr Mercure s'en-alla,  
 Prompt messager à la plante legere,  
 Deuant le thrône où l'appelloit son pere.  
 Vole, mon fils, où Francus est nourri,  
 Huche les vents : dy que ie suis marri  
 Contre sa mere & ceux qui sans louange  
 Trompent son âge en vne terre estrange.  
 Je ne l'ay pas du massacre sauué  
 Pour estre oisif de paresse agraué,  
 Vn fay-neant en la fleur de son âge :  
 Mais i'esperoy que d'un masle courage  
 Iroit vn iour des Gaules surmonter  
 Le peuple rude & fascheux à donter,  
 Chaud à la guerre & ardant à la proye,  
 Pour y fonder vne nouvelle Troye.  
 Pource desloge, & le fais en-aller.

« Le temps perdu ne se peut r'appeller.  
 A peine eut dit que Mercure s'appreste,  
 Sa capeline affubla sur sa teste,

*De talonniers ses talons assortit,  
D'un mandillon son espaule vestit,  
Prist sa houssine à deux serpens ailée:  
Puis à chef bas enfonçant sa volée,  
Ores à pointe, ores d'un grand contour  
Hachoit menu tout le ciel d'alentour:*

*Ainsi qu'on voit aux riuës de Meandre  
L'aigle \* foudrier au haut de l'air se pendre,  
Puis auisant sa proye entre les joncs,  
Canars Herons & Cygnes aux cols longs,  
Raude à l'entour, & tournoyant ombrage  
D'un corps plumeux tout le hault du riuage.  
Après qu'il eut de ciel en ciel volé  
Viste courrier de son talon ailé,  
Se vint planter au pied d'une vallée,  
Où Andromache estoit ce iour allée  
Auec son fils, pour repaistre ses yeux  
Des jeux sacrez à la mere des Dieux.*

\* Foudrier,  
qui porte  
la foudre:  
comme Har-  
quebuser,  
qui porte la  
harquebuse:  
Archer, qui  
porte l'arc.

*Ce iour estoit la feste solennelle  
Que tous les ans on choumoit à Cybelle  
Au mois d'Auril, saison où la rigueur  
De son Atys luy eschauffa le cueur,  
Que les Troyens auoyent en reuerance,  
De fils en fils l'honorant par vsance.*

*Or' ces captifs par la Grece espandus,  
De tous costez aux jeux s'estoyent rendus  
Par le congé des Princes de la Grece,  
Pour celebrer le iour de leur Deesse.  
Eux equippez de bouclairs & de dars  
Contre-imitoyent les antiques soudars  
Les Corybans qui d'une espesse bande  
Dansoyent autour de Cybelle la grande.  
Là les vieillars d'un baston secourus,  
Là les garçons estoyent tous accourus,*



*Femmes, maris, leur souuenant encore  
D'Ide & de Troye, où la Mere on adore.*

*A l'impourueu Mercure est arriué,  
Qui Helenin discourant a trouué  
(Bien loin du bal pres le riuage humide)  
Sur les destins de Francus Hectoride.  
Le resueillant d'un profond pensement  
Ce Dieu luy dit : Oÿ le commandement  
De Iupiter, qui courroucé m'enuoye  
Parler à toy par la celeste voye.*

*Va (m'a-t-il dit) où Francus est nourri :*

• Huche,  
vieil mot  
François,  
qui signifie  
appeller.  
De là vient  
vn Huchet,  
c'est vn cor-  
net, duquel  
on appelle  
les chiens &  
les oiseaux  
à la chaffe.

*\* Huche les vents : dy que ie suis marri  
Contre sa mere, & ceux qui sans louange  
Cachent ce Prince en une terre estrange.  
Ie n'ay Francus du massacre sauué  
Pour estre ainsi de paresse agraué,  
Vn fay-neant en la fleur de son âge :  
Mais i'esperoy que d'un masle courage  
Iroit vn iour des Gaules surmonter  
Le peuple rude & fascheux à donter,  
Chaud à la guerre, & ardent à la proye,  
Pour y fonder une nouuelle Troye,  
Dont la memoire en tous temps floriroit,  
Et par le feu iamais ne periroit.*

*Pource Helenin, & toy mere Andromache,  
N'amollissez en paresse si lâche  
L'enfant d'Hector, à qui les cieux amis  
Ont tant d'honneur & de sceptres promis :  
Qui doit hausser la race Priamide,  
Doit abaisser la grandeur Aëzonide,  
Doit veindre tout, & qui doit une fois  
Estre l'estoc de tant de Rois François,  
Et par sus tous d'un CHARLES, qui du monde  
Doit en la main porter la pomme ronde.*

Fay-le equipper d'hommes & de vaisseaux,  
 Fay-le marcher sur l'eschine des eaux  
 Aux lieux promis, où son destin le meine.  
 « L'honneur s'achepte aux despens de la peine.

Il n'auoit dit, que plustost qu'un esclair,  
 Porté du vent s'esuanouist en l'air,  
 Et se meslant dans l'obscur de la nûe,  
 Laisa la mere en esmoy detenüe,  
 Et son mary de frayeur tout transi,  
 Voyant vn Dieu qui les tançoit ainsi.

En-ce-pendant la ieunesse Troyenne  
 Haut inuoquant la Berecynthienne,  
 D'encens fumeux honoroit son autel,  
 Chantant maint hymne à son nom immortel.  
 Les vns auoyent leurs perruques couuertes  
 De nouveau pampre aux larges feuilles vertes,  
 A longs cheueux des Zephyres soufflez:  
 Les vns battoient les tabourins enflez,  
 Les vns au son de la flute percée  
 Baloyent armez vne danse insensée,  
 Et rechantans des hynnes tour-à-tour  
 Faisoyent sonner les riues d'alentour.

Les bons vieillars à testes grisonnées,  
 Les iouuenceaux aux plaisantes années,  
 De pieds de mains & de voix respondoyent,  
 Et leurs chansons aux flutes accordoyent.  
 Le Prestre orné d'une Sotane blanche,  
 Ceint d'une boucle au dessus de la hanche,  
 Mitré de pin la troupe deuançoit  
 Et les honneurs de Cybelle dansoit.

Enten du ciel tes loüanges, Cybelle,  
 Mere des Dieux, Berecynthe la belle,  
 Qui as le chef de citez attourné,  
 Qui as ton char en triomphe tourné

*Par deux lions, quand toy Mere honorée  
Montes au ciel à la voûte dorée,  
Pour aller voir tes fils & tes neveux,  
Et t'abreuuer du Nectar avec eux.*

*Sois nous propice ô tres-grande Deesse,  
Romps de tes mains le lien qui nous presse,  
Et de captifs mets nous en liberté :  
Ia par vingt ans ton peuple est arresté  
Serf sous les pieds de ceste Argiue audace.  
Donne qu'un iour quelcun de nostre race  
Refonde Troye, & qu'il repousse encor  
Au ciel natal le noble sang d'Hector :  
Redonne nous un Royaume & r'assemble  
En un monceau tous les Troyens ensemble :  
A fin qu'aimez du destin le plus fort  
Nous reuiuions heureux de nostre mort.*

*Ainsi priant fist redoubler la dance :  
Le peuple suit le Prestre à la cadance !  
Le temple en bruit ! Cybelle qui ouist  
La voix Troyenne au ciel s'en resjouist.*

*Pendant ce fait la prompte Renommée  
Au front de vierge à l'eschine emplumée,  
A voix ferrée, auoit ja respandu  
Que Mercure est du haut ciel descendu,  
Et qu'il auoit d'une voix courroucée  
Par Iupiter Andromache tancée,  
Et par sus tous Helenin qui sçauoit  
L'arrest certain que le destin auoit  
Escrit au ciel pour celuy qu'on appelle  
Astyanax, qui sans honneur recelle  
Son âge en vain sur le bord estrange,  
Sans du malheur les Troyens reuanger.*

*Ceste Deesse à bouche bien ouuerte,  
D'oreilles d'yeux & de plumes couuerte,*

Semoit par tout qu'Astyanax estoit  
Enfant d'Hector, & qu'on luy apprestoît  
Mainte nauire au combat ordonnée,  
Pour aller suiure ailleurs sa destinée,  
Prince fatal, & que sa main feroit  
Que le Troyen du Grec triompheroit :  
Et qu'il falloit que la ieunesse actiue,  
Qui par la Grece est maintenant captiue,  
Suiuist Francus futur pere des Rois,  
Qui s'en alloit dedans le camp Gaulois  
Replanter Troye & la race Hectorée,  
Pour y regner d'éternelle durée.

Ainsi disoit la Fame : ce-pendant  
Helenin fut songeant & regardant  
Au mandement que Iupiter luy donne :  
De cent discours en soy-mesme raisonne  
Or' plein de ioye, ores plein de douleur :  
Mais ce conseil luy sembla le meilleur.  
C'est d'obeir au grand Pere celeste,  
Donner Francus au destin : & au reste  
Faire apprestier & nauires & gens  
Sur terre & mer actifs & diligens,  
Non engourdis de paresse ocieuse,  
Mais qui poussez d'une ame industrieuse,  
Sçauront prudens les perils euitier,  
Et par traual louange meriter.

Comme il pensoit, auisa d'auenture  
En l'air serain le bon-heur d'un augure  
S'offrant à luy pour signe tres-heureux.  
Fut le combat d'un Faucon genereux,  
Qu'un grand Vautour prouoquant à la guerre  
Plus fort de bec, d'estomac & de serre,  
Qui çà qui là par le ciel le battoit,  
Tournoit, viroit, suiuoit & tourmentoit,

Ne luy donnant ny repos ny haleine  
 De s'eschapper par la celeste plaine.  
 Luy pour-neant au combat s'animoit :  
 Car le vautour desia le déplumoit,  
 Quand Iupiter, miracle, le transforme  
 Incontinent en la hagarde forme  
 D'un aigle noir d'audace reuestu.  
 Comme un rasoir luy fit le bec pointu,  
 Aigu courbé, & ses serres tortues  
 Plus que deuant fit dures & pointues.  
 Lors ombrageant d'un grand ombre les champs,  
 Prist en ses pieds aiguisez & trenchans  
 Le grand vautour, qu'en ses ongles il tue,  
 Et fait veinqueur s'en-vola sus la nue.

Le bon augure auenu dextrement  
 Fut du Profete entendu promptement :  
 Si que soudain en esprit delibere,  
 Prenant l'aduis d'Andromache la mere,  
 Et des Deuins & des Peres grisons,  
 Luy apprester des venteuses maisons  
 Pour nauiguer à rames mesurées  
 Dessus le dos des ondes azurées,  
 Et s'en aller au gré de Iupiter.  
 « Contre le ciel on ne peut resister !

Incontinent par toute Chaonie  
 Se respandit vne tourbe infinie  
 De bucherons, pour renuerſer à bas  
 Maint cheſne vieil toffu de large bras.  
 Par les forests s'escarte ceste bande,  
 Qui ore un pin ore un ſapin demande.  
 Guignant de l'œil les arbres les plus beaux,  
 Et plus duiſans à tourner en vaiſſeaux.  
 Contre le tronc ſonne mainte congnée  
 D'un bras nerueux à l'œuure embefongnee,

*Qui mainte playe & mainte redoublant  
Coup dessus coup contre l'arbre tremblant,  
A chef branlé d'une longue trauerse  
Le fait tomber tout plat à la renuerse  
Avec grand bruit. Le bois estant bronché  
Fut par le fer artizan detranché,  
Fer bien denté bien aigu qui par force  
A grands esclats fit enleuer l'escorce  
Du tronc du pin sur la terre estendu,  
En longs carreaux & en poutres fendu.*

*Pleine de bois la charrette attellée  
Va haut & bas par mont & par vallée,  
Qui gemissant enroué sous l'effort  
Du pesant faix le versoit sur le bord.*

*Le manouurier ayant matiere preste,  
Or' son compas, ore sa ligne appreste  
Songneux de l'œuvre, & congnañt à grands coups  
Dedans les aiz une suite de clous,  
D'un art maistrer les vieux sapins transforme,  
Et de vaisseaux leur fait prendre la forme  
Au ventre creux, & d'artifice prompt  
D'un bec de fer leur aguise le front.*

*L'un allongeant le chanure à toute force  
Pli dessus pli entorse sus entorse,  
Menant la main ores haut ores bas  
Fait le cordage, & l'autre pend au mas  
A double ranc des ailes bien-venteuses  
Pour mieux voler sus les vagues douteuses,  
Et pour passer sur l'échine de l'eau  
Plustost que l'air n'est coupé d'un oiseau.*

*Incontinent qu'accompli fut l'ouurage,  
Deuant la prouë on beche le riuage  
Comme un fossé large & creux pour passer  
Les nefs qu'on veut dans le haure pousser.*

Là maints rouleaux à la course glissante  
Joins l'un à l'autre au milieu de la sente  
Sont estendus, afin qu'en se suivant  
Les grands vaisseaux glissaient en avant  
Desur le bois qui craquetant se vire  
En rond, chargé du faix de la navire.

Les matelots à la peine indontez,  
Deçà delà rangez des deux costez  
En trepignant du pied contre la place,  
De mains de bras d'espaules & de face  
Poussoient les nefs pour les faire rouler.  
Vne sueur ne cesse de couler  
Du front moiteux : vne pantoise haleine  
Bat leurs poumons, tant ils avoient de peine  
A toute force en hurtant d'esbranler  
Ces gros fardeaux paresseux à couler.  
Mais à la fin les navires poissées  
Dedans la mer tomberent eslancées :  
La mer son ventre en s'ouvrant leur presta,  
Puis l'anchre croche au bord les arresta.

Il estoit nuict, & le charme du somme  
Silloit par tout les paupieres de l'homme,  
Qui demy mort par le repos lié  
Avoit du iour le travail oublié.  
Tous animaux, ceux qui dans l'air se pendent,  
Ceux qui la mer à coups d'échine fendent,  
Ceux que les monts & les bois enfermoient,  
Pris du sommeil à chef baissé dormoient.  
Mais Helenin, qui discourant ne cesse  
De repenser, pour le somme n'abaisse  
L'œil au dormir, ains veillant & resuant,  
Or se couchant & ores se levant  
Mille discours discourt en sa pensée.  
Du Dieu courrier la parole annoncée



*Le presse tant qu'à toute heure en tous lieux  
Il a Mercure au deuant de ses yeux,  
Et en l'esprit la belle destinée,  
Qui pour Francus au ciel est ordonnée,  
De qui le sang & Troyen & Germain  
Doit enfermer le monde dans sa main.*

*Incontinent que l'Aube aux doigts de roses  
Eut du grand Ciel les barrières decloses  
Prompt hors du lit ce bon Prince sortit,  
Sa camifole & son pourpoint vestit,  
Puis son sayon puis sa cape tracée  
A fils d'argent sur l'espaule a troussée,  
Prist son espée au pommeau cizelé.  
Ainsi vestu hors la porte est allé  
Le dard au poing commandant qu'on assemble  
Grans & petits au conseil tous ensemble.*

*Lors les Heraux claire-voix ont sonné  
De toutes parts le conseil ordonné :  
Le peuple né pour nouvelles apprendre  
Droit en la place à foule se vint rendre :  
Luy de son sceptre au milieu s'appuya,  
Puis de tels mots sa langue deslia.*

*Peuple Troyen, Dardanienne race,  
Ce iouuenceau qui par la populace  
Vit sans honneur Astyanax nommé,  
Est fils d'Hector que tant auez aimé,  
Qui magnanime en si longues batailles  
Dix ans entiers a gardé vos murailles,  
Qui le rampart contre terre rua  
Des Grecs tremblans, qui Patrocle tua,  
Et retourna pompeux dedans la ville  
Le dos vestu du corselet d'Achille.*

*Or ce grand Roy qui seul commande aux Dieux,  
Qui honora Hector & nos ayeux,*

*La nuit que Troye estoit vn grand carnage,  
Sauua l'enfant par vne feinte image :  
Sans maïesté, priué ie l'ay tenu  
De peur qu'il fust des Gregeois reconnu.  
Ie l'ay transmis par vne longue voye  
Tantost vers Thebe', & tantost deuers Troye,  
Voir le tombeau de son pere & aussi  
Les noirs enfans de Memnon, qui d'ici  
Sont eslongnez, noble race Hectorée,  
Et de l'Aurore habitent la contrée.  
En maint país ie l'ay fait voyager :  
Il a cognu maint peuple & maint danger,  
Cognu les mœurs des hommes pour se faire  
Guerrier pratiq' en toute grande affaire.*

*Depuis vn an ce Prince est de retour  
Sans action mangeant en vain le iour,  
Vn fait-neant déuoyé de la trace  
De sa tref-noble & vertueuse race,  
Bien qu'il soit braue & sous bon astre né,  
Et pour hauts faits hautement destiné.  
Tousiours pour luy ce grand Prince me tance,  
Prince de l'air qui les foudres eslance,  
Dequoy si tard ie le retiens ici  
Sans de son bien auoir autre souci :  
Encor hier (sa puissance i'atteste)  
Que par le Ciel en clairté manifeste  
Ie vy Mercure arriuer deuers moy,  
Qui me tança de la part de son Roy.*

*Si tu n'as soin, dit-il, de ta lignée,  
Si la vertu de l'heur accompagnée  
N'esmeut ton cœur à voyager plus loin,  
Au moins conçois en l'esprit quelque soin  
De ton neveu, & n'estouffe perduë  
Sa ieune gloire à qui la Gaule est deuë,*

*De qui doit naistre vn million de Rois,  
Grands Empereurs & Monarques François.*

*Pource, Troyens de race magnanime,  
Si la vertu natale vous anime,  
Suiuez ce Duc du destin attiré.  
Voici le iour tant de fois désiré,  
Où vous romprez le seruage si rude  
Qui vostre col serre de seruitude :  
Courage amis : c'est maintenant qu'il faut  
( Vous dont le sang est genereux & chaud )  
Accompagner ceste belle entreprise  
Que le destin dextrement fauorise.  
C'est plus d'honneur en liberté mourir,  
Et par son sang la franchise acquerir,  
Que de languir en honte si vilaine.  
« Vn beau mourir orne la vie humaine !  
Il dist ainsi : puis se leuant de là  
Pressé du peuple en son palais alla.*

*Mars qui aimoit Hector durant sa vie,  
De secourir Francion eut enuie :  
En sa faueur fit son coche atteler,  
Puis fouëttant ses chevaux parmi l'air,  
Qui à bouillons souffloyent de leurs narines  
Flames de feu ardantes & diuines,  
Vint s'abaisser sous le pied d'un rocher  
Pres du riuage, où faisant destacher  
Ses beaux coursiers le long d'une verdure,  
Trefle & sain-foin leur donna pour pasture.  
Puis comme vn trait roidement s'eslança  
Dedans Buthrote où sa forme laissa,  
Et prist le corps l'alleure & le visage  
D'un vieil Troyen qu'on estimoit tressage,  
Lequel suiuoit en sa ieunesse Hector.  
Celuy portoit la grande targe d'or*

De cest Héros, quand pour garder sa terre  
Sa main estoit plus crainte qu'un tonnerre.

Or ce vieillard auoit tousiours esté  
Par les Troyens en grande autorité.  
En son semblant ce Dieu guerrier se change,  
Autour du front des cheveux blancs arrange,  
Se laboura de rides tout le front,  
Marche au baston comme les vieillars font,  
Et d'une voix toute caduque & rance  
Francus aborde & en ce point le tance.

Vraye Troyenne & non Troyen, as-tu  
Desia d'Heçtor oublié la vertu,  
Qui t'engendra pour estre l'exemplaire  
Comme il estoit, du labeur militaire ?  
Futur honneur des peuples & des Rois ?  
As-tu, couïard, oublié ton harnois  
Pour (alleché d'ocieuses plaisances)  
Vser ta vie en festins & en danses ?  
Faire l'amour, & tout le iour en vain  
Pleines tourner les coupes en la main ?  
Honte & vergongne, où estes-vous allées !  
Ne vois-tu pas que les ondes salées  
Pour t'en-mener se couurent de vaisseaux ?  
Dresse l'oreille, enten les iouuenceaux  
Qui bande à bande au riuage se rendent,  
Et tous armez Capitaine t'attendent.

Toy sang trop froid pour un ieune guerrier,  
Tout engourdi demeure le dernier  
Serf de ta mere, & te fraudes toy-mesmes  
Du haut espoir de tant de diadèmes,  
Et du destin qui t'appelle aux honneurs  
Pour commander aux plus braues Seigneurs.  
« Rien n'est si laid que la froide ieunesse  
« D'un fils de Roy, qui se roüille en paresse.

*Tel n'estoit pas Hector le pere tien,  
Qui des Troyens fut iadis le soutien :  
Armes, chevaux, & toute guerre active  
Furent ses jeux, & non la vie oisive,  
Qui te charmant d'un somme t'a lié,  
Ayant ta ville & ton pere oublié,  
Que la vertu, la vaillance & la gloire  
Ont illustré d'éternelle memoire.*

*Monstre à ce peuple au cœur morne & peureux,  
Que tu es fils d'un pere genereux.*

*« L'homme ne peut signaler sa noblesse,  
« S'il n'a le sang eschaufé de prouesse !*

*Disant ainsi ce grand Dieu belliqueur  
De Francion enflama tout le cœur,  
Luy arracha le bandeau d'ignorance,  
Et le remplit d'audace & d'assurance.  
Puis il luy souffle un horreur sur le front,  
Plus que d'avant aux armes le fist prompt,  
Et tellement sa ieunesse r'allume,  
Qu'il apparut plus grand que de coutume :  
Si que marchant au milieu des plus forts,  
Haut releué de la teste & du corps  
Les surpassoit, comme ce Dieu surpasse  
Sur le bord d'Hebre, ou sur les monts de Thrace  
Tous les soldats, quand d'ardeur animé  
Parmi la presse apparoit tout armé,  
Couvert de poudre, & se plante à l'encontre  
D'un meschant Roy, que sa lance rencontre  
Pour le punir d'avoir contre equité  
Vendu les loix & trahi sa cité.*

*Tel fut Francus : apres ce Dieu se mesle  
Par les Troyens amassez pesle-mesle,  
Et les tançant dans le cœur leur pouffoit  
Un aiguillon mordant qui les pressoit,*

*A la vertu r'eschaufoit leur courage.*

*Quoy, voulez-vous en vergongneux seruage  
Viure tousiours, & sans langue & sans cœurs  
Tousiours souffrir l'orgueil de ces veinqueurs ?  
Rompez froissez d'une allegresse preste  
Le ioug cruel qui vous presse la teste,  
Sans plus seruir de passetemps ici  
A ces Seigneurs qui vous brauent ainsi.  
Ressemblez-vous par une belle audace  
Du premier sang de vostre noble race :  
Enflez-vous d'ire, & vous souuienne encor'  
Des faictz guerriers du magnanime Hector,  
Qui fut iadis la crainte des plus braues  
De ces Gregeois qui vous tiennent esclaves :  
Vn seul de vous en vaille un million,  
Et par la mer emportez Ilion.*

*Encore Dieu qui regarde vos peines,  
Dieu qui a soin des affaires humaines,  
Comme les Grecs ne vous est outrageux :  
« La fortune aide aux hommes courageux.*

*Tel aiguillon leur versa dedans l'ame  
Vne fureur une ardeur une flame  
De liberté de vaincre & de s'armer,  
Et d'emporter Ilion par la mer.  
Tandis maint peuple en armes effroyables  
( Aussi espais que neiges innombrables  
Que l'air glueux à bas fait trebucher,  
Venant nos champs de farine cacher )  
Va fremissant au bord de la marine.  
Dessous le pas du peuple qui chemine  
Vole une poudre, & sous le pied qui fuit  
Pour s'embarquer la terre fait un bruit :  
Fils ne maisons ces hommes ne retardent :  
Tristes de loin les femmes les regardent !*

Ils s'assembloyent d'un pied ferme rangez,  
De dards d'escus & de piques chargez,  
Faisant un bruit sur les riuës chenuës,  
Ainsi qu'on voit les bien-volantes Grues  
Crier aigu quand passer il leur faut  
La mer pour viure en un país plus chaud.

Autant qu'on voit d'oiseaus de tous plumages  
Au mois d'Auril hostes des marescages  
S'amonceler pour pondre & pour couuer :  
L'un à fleur d'eau ses plumes vient lauer,  
L'autre sous l'eau tient ses ailes plongées,  
Et l'autre pesche à friandes gorgées,  
Et l'autre tourne à l'entour de son ny,  
Peuple emplumé innombrable infini,  
Qui en volant sur les riuës cognües  
Se presse ensemble aussi espais que nües :  
Autant venoyent le corselet au corps  
D'hommes à foule au premier front des bords.  
La terre tremble & les flancs qui emmurent  
Les flots salez deffous le pied murmurent  
De tant de gens au riuage arrestez,  
Tous herissez de morions crestez.

Comme un pasteur du bout de sa houlette,  
Sous la clairté de Vesper la brunette  
Au premier soir, separe les cheureaux  
Des boucs cornus, des beliers les aigneaux :  
Ainsi Francus d'une prompte allegresse  
Trioit à part la gaillarde ieunesse  
Au sang hardy, & laissoit d'autre part  
Vieilles vieillards & enfans à l'escart,  
Qui froids n'auoyent ny teste ny poitrine  
Pour supporter la guerre & la marine,  
Peuple sans nerfs & sans ardeur que Mars  
N'enrolle plus au rang des bons soldars.



*Francus vestu d'armes toutes dorées  
Des mains d'un maistre artizan labourées,  
Comme le feu d'un tonnerre luisoit,  
Et si grand peuple en ordre conduisoit,  
Monstrant guerrier sa taille bien formée,  
Tel qu'on voit Mars au milieu d'une armée.*

*Les morions les piques des soldars,  
Et les harnois fourbis de toutes pars,  
Et l'emery des lames acérées,  
Frappez menu des flammes etherées,  
Et du rebat du Soleil radieux,  
Vne lumiere enuoyoient dans les cieux,  
De qui l'esclair d'étincelles menües  
En tremblottant s'esclattoit dans les nües,  
Ainsi que luit sous l'ardente clairté  
Mainte bluette au plus clair de l'esté.*

*Adonc Francus qui seul maistre commande  
En se brauant au milieu de sa bande,  
Voulant sa main d'une lance charger,  
D'Astyanax en Francus fit changer  
Son premier nom en signe de vaillance,  
Et des soldats fut nommé porte-lance,  
Pheré-enchos, nom des peuples vaincus  
Mal prononcé, & dit depuis Francus :  
Lance qui fut à nos François commune  
Depuis le temps que la bonne fortune  
Fit aborder en Gaule ce Troyen  
Pour y fonder le mur Parisien.*

*Comme il estoit sur le bord de la riue  
Tout esclatant d'une lumiere viue,  
Ainsi qu'un astre au rayon esclairci,  
Voici venir Andromache, & aussi  
L'oncle Helenin, qui Augure & Profete  
Estoit des Dieux veritable interprete.*

*Ceste Andromache, à qui l'estomac fend  
D'aïse & de crainte, accolloit son enfant  
A plis serrez comme fait le lierre  
Qui bras sur bras les murailles enferre.*

*Mon fils, disoit, que tout seul i'ay conçu,  
Autre que toy concevoir ie n'ay sceu  
Du grand Hector : Ilihye odieuse  
De maint enfant m'a esté enuieuse.  
Pource le soin que mere ie devois  
Mettre en plusieurs en toy seul ie l'auois,  
Ie te pendoy petit à ma mammelle,  
Ie t'ourdissoy quelque robe nouvelle,  
Seul tu estois mon plaisir & ma peur,  
Enfant, mary, seul mon frere & ma sœur,  
Seul pere & mere, & voyant la semence  
De tous les miens germer en ton enfance,  
Me consoloy de t'avoir enfanté  
Me restant seul de toute parenté.  
Du Grec vainqueur la furieuse guerre  
Toute ma race a mise sous la terre.*

*Pour toy la vie & le iour me plaisoit :  
Si quelque ennuy lamenter me faisoit,  
En te voyant i'allegeoy ma tristesse,  
Comme soutien de ma foible vieillesse.  
Las ! ie pensoy qu'au iour de mon trespas,  
Quand l'esprit vole, & le corps va là bas,  
Que tu ferois mes obseques funebres,  
Cloüant mes yeux enfermez de tenebres,  
Me lauerois le corps froid de tiede eau,  
Et de gazon me ferois vn tombeau  
Pour m'enterrer au bord de ce riuage,  
Car aux bannis il n'en faut d'avantage,  
Serrant ensemble en vn mesme repos  
De mon mary les cendres & les os.*

O Iupiter si la pitié demeure  
Là haut au ciel, ne permets que ie meure  
Ains qu'il se face en armes un grand Roy,  
Et que le bruit en vole iusqu'à moy !

Donne, grand Dieu, qu'au milieu de la guerre,  
Puisse ruer ses ennemis par terre  
Mordants la poudre à chef bas renuersez  
D'une grand playe en l'estomac persez :  
Que des citez la puissante muraille  
Trebuche à bas en quelque part qu'il aille,  
Soit à cheual soit à pied guerroyant,  
Et que quelqu'un s'escrie en le voyant  
(Favorisé de fortune prospere)

Le fils vaut mieux aux armes que le pere.

Disant ainsi, pour present luy donna  
Vn riche habit que sa main façonna,  
Où fut portraite au vif la grande Troye  
En filets d'or ioints à filets de soye,  
Auec ses murs ses rampars & ses forts.  
Là Xanthe erroit passémentant les bords  
Des plis tortus de sa lente riuiera.  
Là s'esleuoit la cyme forestiere  
D'Ide pineuse, où sourçant sauteloit  
Maint vif ruisseau qui en la mer couloit.  
Au pied du mont fut en riche peinture  
Le beau Troyen, qui chassoit d'auenture  
Vn cerf au bois où Iupiter le vit,  
Qui par son aigle en proye le rait.

Ce ieune enfant emporté dans les nuës  
Tendoit en vain vers Troye les mains nues.  
Ses chiens en l'air qui pendu le voyoient,  
L'ombre de l'aigle & les vents aboyoient.  
Hector auoit ceste robe portée  
Le iour qu'Helene en triomphe abordée

*Entra dans Troye, & depuis ne l'auoit  
Mise : sans plus de parade seruoit  
Au cabinet, où les plus cheres choses  
De ce grand Prince estoient toutes encloses.*

*La luy donnant, Prenez, dit-ell', mon fils,  
Ce beau present que de mes mains ie fis,  
Pour gage seur d'amitié maternelle,  
Ayant de moy souuenance eternelle.*

*Ainsi pleurant, Francus elle accolla.  
Le corps tout seul au logis s'en alla,  
L'ame demeure en son fils attachée :  
Puis sur vn liët ses seruans l'ont couchée  
Pour la donner au sommeil adoucy  
Qui des mortels enchante le soucy.*

*En ce pendant Helenin prend la corne  
D'un grand toreau au col pesant & morne,  
Au large front, & sans aucun effort  
De son bon gré l'amenoit sur le bort :  
Puis vn grand coup de maillet luy defferre  
Entre les yeux : le toreau tombe à terre  
Sur les genoux à chef bas estendu !  
Il l'esgorgea : le sang s'est respandu  
A longs filets dans le creux d'une tasse :  
Parmy le sang qu'à bouillons il amasse,  
Mesla du vin, par trois fois l'escoula  
Dessus la mer, puis Neptune appella.*

*Pere Neptun', Saturnien lignage,  
A qui par sort la mer vint en partage,  
Que le Soleil n'a peu iamais tarir  
Pour te laisser toutes choses nourrir,  
Enten ma voix : donne que la nauire  
De ce Troyen fillonne ton empire  
Sous ta faueur, & cesse le courroux  
Que dès long temps tu gardes contre nous.*

Neptune ouyt la Troyenne priere  
A chef haussé sur l'onde marinere,  
Et se plaignant encore d'Ilion,  
Vne partie ottroye, & l'autre non.  
Il ottroya que la flotte Troyenne  
Pourroit aller dessus l'onde Egéenne:  
Mais ne voulut l'autre part ottroyer  
D'y seiourner long temps sans la noyer.  
Lors Helenin adresse sa parole  
A son neuveu, & ainsi le console.

Courage, Prince, il te faut endurer:  
Tu dois long temps maint fillon mesurer  
De la grand' mer, avant que tu arriues  
Fatalement aux Pannoniques riuies.  
Tous n'irez pas: c'est l'arrest du destin.  
Mais pour cela ne fauls à ton chemin,  
Que ie te veux non tout du long apprendre,  
De peur qu'un Dieu ne m'en vienne reprendre.

Sortant du port, gaigne la grande mer,  
Fay ta galere à tour de bras ramer  
(Ta main ne soit du labeur affoiblie)  
Entre Coryce & l'isle Aegialie.  
Quand tu seras au flot Laconien  
Pren à main dextre, & sage auisse bien  
De ne heurter au rocher de Malée,  
Où l'onde en l'onde est asprement meslée.  
Là maint serpent & maint grand chien marin  
Mange les nefes, & d'un gosier malin  
Hume la mer, que beant il reiette  
Plus roide au ciel qu'une viste sagette:  
Par tourbillons la vague qui se suit,  
Contre les bords abaye d'un grand bruit.

De là poussant tes nauires armées  
Outre la mer des Cyclades semées,

Revoirras Troye & les funebres lieux  
Pleins des tombeaux de tes nobles ayeux.  
De là singlant à rames vagabondes  
Par le destroit des homicides ondes,  
Voirras le Pas où se noya la Sœur  
Pendue aux crins de son belier mal-seur.  
Tu feras voile au Thracian Bosphore,  
Où l'Inachide estant vestue encore  
D'un poil de bœuf, à coups d'ongles passa  
En lieu de rame, & son nom luy laissa.  
Puis approchant du grand Danube large,  
Qui par sept huiz en la mer se descharge,  
Viendras à l'isle, à laquelle les Pins  
Donnent le nom : là sçauras tes destins  
L'un apres l'autre, hoste de la riuere  
De qui la corne est si braue & si fiere.  
Ce fleuve ayant sur la teste un rouzeau,  
Et sous l'aisselle un vase remply d'eau,  
Et du menton versant une fontaine,  
Te dira tout d'une bouche certaine.  
A tant se teut : lunon qui descendit,  
En le tançant la voix luy defendit.

Tandis la troupe au trauail non oisue,  
Le toreau mort renuerse sur la riue :  
Ils ont le cuir en tirant escorché,  
Puis estripé, puis menu déhaché  
A morceaux crus : ils ont d'une partie  
Sur les charbons fait de la chair rostie,  
Embroché l'autre, & cuite peu à peu  
De tous costez à la chaleur du feu,  
L'ont débrochée, en des paniers l'ont mise,  
L'ont decoupée, & sur la table assise,  
Ont pris leur siege, ont detranché le pain,  
Ont fait tourner le vin de main en main,

Boiuant de rang à tasses couronnées  
 D'un cœur ioyeux l'un à l'autre données.  
 Apres qu'ils ont du boire & du manger  
 Osté la faim, ils s'allèrent loger  
 Au premier front de la riue mouillée  
 Sur des lits faits d'herbes & de fueillée,  
 Où toute nuit iouyrent du repos  
 Ronflant le somme au murmure des flos.

Au decoucher de l'Aurore nouvelle  
 Le vieil Vandois du siflet les appelle  
 (Qui seul estoit le Pilote ordonné)  
 Voyant le vent en poupe bien tourné.  
 Vn bruit se fait par les bancs du nauire,  
 Puis à sa tasche vn chacun se retire.  
 Soudain Francus le siflet entendit:  
 Lors tout armé sa main dextre estendit  
 Dessus la terre, & ses yeux vers la nuë  
 Estant debout dessus la riue nuë  
 Prioit ainsi: O grand Patarean,  
 A l'arc d'argent, tire-loin, Thymbrean,  
 Garde, Apollon, entiere ceste troupe,  
 Dieu d'embarquage, & permets que ie coupe  
 Sous heureux sort la \* commande qui tient  
 Ma nef au bord. A peine eut dit, qu'il vient  
 Hors du fourreau tirer sa large espée:  
 Du coup la corde en deux parts fut coupée,  
 Qui la nauire au riuage arrestoit  
 Ferme attachée à vn tronq, qui estoit  
 D'un chesne vieil foudroyé du tonnerre  
 De quatre pieds esleué sur la terre:  
 Puis vers le vent adressa son parler.

Vent, le balay des ondes & de l'air,  
 Qui de la nue en cent sortes te ioues,  
 Qui ce grand Tout éuentes & secoues,

\* Com-  
 mande, est  
 la grosse  
 corde qui  
 tient le ba-  
 teau.



*Qui peux cent bras & cent bouches armer,  
Vien-t'en poupier ton haleine enfermer  
Dedans ma voile, afin que sous ta guide  
l'aille tenter ce grand Royaume humide.*

*Dieu qui le ciel regis de ton sourcy,  
Si des humains ta nature a soucy,  
Enten ma voix : Donne, pere celeste,  
En ma faueur un signe manifeste :  
Tu le peux faire : on dit que quelquefois  
Tu fis voler deux pigeons par ces bois :  
L'un fut donné à l'ason pour escorte :  
Donne moy l'autre, afin qu'heureux ie porte  
De mon salut le signe tres-certain,  
Estant couuert du secours de ta main.*

*Comme il prioit, des Dieux le pere & maistre  
Fit par trois fois tonner à main senestre :  
Et ce pendant les rudes matelots,  
Peuple farouche, ennemy du repos,  
D'un cry naual hors du riuage proche  
Démaroient l'ancre à la machoire croche,  
Guindoient le mast à cordes bien tendu.  
Chaque soldat en son banc s'est rendu  
Escheu par sort : de bras & de poitrine  
Ils s'efforçoient : la nauire chemine !  
Les cris les pleurs dedans le ciel voloient  
Dessous l'adieu de ceux qui s'en alloient !*

*A tant Francus s'embarque en son nauire,  
Les auirons à double ranc on tire :  
Le vent poupier qui fortement soufla  
Dedans la voile à plein ventre l'enfla,  
Faisant siffler antennes & cordage :  
La nef bien loin s'escarte du riuage !  
L'eau sous la poupe aboyant fait un bruit,  
Qu'un train d'escume en tournoyant poursuit.*

*Qui vit iamais la brigade en la danse  
Frappier des pieds la terre à la cadance  
D'un ordre egal d'un pas iuste & conté,  
Sans point faillir d'un ni d'autre costé,  
Quand la ieunesse aux danses bien apprise  
De quelque Dieu la feste solennise :  
Il a peu voir les auirons egaux  
Frappier d'accord la campagne des eaux.  
Ceste nauire egaleement tirée  
S'alloit trainant dessus l'onde azurée  
A dos rompu, ainsi que par les bois  
(Sur le printemps au retour des beaux mois)  
Va la chenille errante à toute force  
Avec cent pieds sur les plis d'une escorce.  
Ainsi qu'on voit la troupe des cheureaux  
A petits bonds suyure les pastoureaux  
Deuers le soir au son de la Musette :  
Ainsi les nefes d'une assez longue traite  
Suinoient la nef de Francus, qui deuant  
Coupoit la mer sous la faueur du vent  
A large voile à my-cercle entonnée,  
Ayant de fleurs la poupe couronnée.*

*L'eau se blanchist sous les coups d'auirons :  
L'onde tortue ondoye aux enuiron  
De la carene, & autour de la prouë  
Maint tourbillon en escumant se rouë :  
La terre fuit, seulement à leurs yeux  
Paroist la mer & la voute des cieux.*

FIN DV PREMIER LIVRE.





## LE SECOND LIVRE

DE LA FRANCIADE.

---

*Des puissans Dieux la plus gaillarde troupe  
Estoit plantée au sommet de la croupe  
Du mont Olympe, où Vulcan à l'escart  
Fit de chacun le beau palais à part,  
Qui contemploient la Troyenne ieunesse  
Fendre la mer d'une prompte alegresse:  
Flot dessus flot la nauiure voloit  
Vn trac d'escume à bouillons se rouloit  
Sous l'auiron qui les vagues entame:  
L'eau fait vn bruit luitant contre la rame!  
Tout le troupeau des Nymphes aux yeux pers  
Menant le bal dessus les sillons vers,  
A chef dressé regardoient estonnées  
Les pins sauter sur les vagues tournées:  
Vn seul Neptun' couuoit au fons du cueur  
Contre Ilion une vieille rancueur  
Gros de despit, du iour que mercenaire  
( Dieu fait maçon ) demanda son salaire*

*A Lomedon Prince de nulle foy.  
Il demandoit iustement à ce Roy  
L'argent promis d'avoir de sa truelle  
Fait des Troyens la muraille nouvelle,  
Quand se rouloient d'eux mesmes les cailloux  
Sous son marteau : le Roy plein de courroux  
Luy denia sa promesse, & pariure  
En le frappant le paya d'une iniure.  
Pource Neptune en rage se tournoit  
D'ire bouffi quand il s'en souvenoit :  
Or' voyant Troye en ces eaux esclancée  
Disoit tels mots furieux de pensée.*

*Hà pauvre Dieu vaincu par les mortels !  
Dequoy me sert la pompe des autels  
Frere à lupin, race Saturnienne,  
Si malgré moy la cendre Phrygienne,  
Le demourant d'Achille, est triomphant,  
Et, qui plus est, conduit par un enfant  
Qui me défie, & sans craindre mon ire  
De ses bateaux sillonne mon empire ?  
Dequoy me sert le trident en la main,  
Avoir l'Egide armure de mon sein,  
Tel qu'à mon frere, avoir pour heritage  
La grande mer du Tout second partage,  
Si ie ne puis d'un mortel me venger ?  
Il ne faut plus me laisser outrager  
Sans chastier ceste race infidelle.  
« La vieille iniure appelle la nouvelle.  
Le ciel vengeur a banny sur mes eaux  
Ces Phrygiens coupables des trauaux  
Que ie receu, quand au port de Sigée  
Les Grecs pressoient leur muraille assiegée,  
Et qu'Ilion par le cours de dix ans  
Fournit de meurtre aux freres Atreans,*

*Je m'efforçay d'une brigue contraire  
De fond en comble à les vouloir desfaire :  
Mais le destin ne le voulut souffrir,  
Qui maintenant ces bannis vient offrir  
A ma puissance & changé me conuie  
De me venger aux despens de leur vie.*

*Disant ainsi, fit son char atteler,  
Que deux dauphins font vistement rouler  
A dos courbé, à queue tortillées,  
Fendant du sein les vagues esmaillées.  
Luy dessus l'onde en son siege porté  
Comme un grand Prince orné de maïesté,  
Guide son char : le char qui va sans peine,  
Fier de son Roy sur les vagues le meine :  
Triton le suit, & l'amoureux troupeau  
Des Nymphes sœurs qui dansent à fleur d'eau :  
Lors du Troyen deuant la nauire,  
Les vents appelle, & ainsi leur va dire.*

*Vents, la terreur des cieux & de la mer,  
Ce n'est pas moy qui vous fis enfermer  
En voz rochers, où detenus en crainte  
Dessous un Roy languissez par contrainte :  
Vn seul lupin le fit contre mon sçeu :  
A son pouuoir resister ie n'ay peu,  
Car c'est un Dieu de puissance inuincible :  
Ainsi que luy ie ne vous suis terrible,  
Vous caressant & prestant ma maison,  
Quand dechaisnez sortez hors de prison,  
Non à un seul, mais à tous quatre ensemble,  
La renuersant ainsi que bon vous semble.*

*Pource, Aquilon, ne souffre plus parmy  
Mon flot salé ce bagage ennemy,  
Mais d'un grand vol retourne vers Eole :  
Dy luy qu'il tienne aujourdhuy sa parole,*

\*Hercule,  
n'est autre  
chose que le  
Soleil, que  
les vents  
semblent  
desconfire,  
quand es-  
pessant  
l'air de  
nuées ils  
offusquent  
sa clarté.

*Et le serment qu'en la dextre il me fit,  
Quand par mon aide \*Hercule il desconfit.  
Que de son sceptre il face vne ouuerture  
Aux vents enclos en leur cauerne obscure :  
Qu'il les destache, & portez d'un grand bruit  
Chargez d'esclair de tempeste & de nuit,  
Par tourbillons enflent la mer de rage,  
Et ces Troyens accablent d'un orage :  
Dy luy qu'il rompe au trauers des rochers,  
Pour me venger, nauires & nochers.  
Ah, digne n'est telle gent pariurée  
De voir longtemps la lumiere etherée :  
Assez & trop malgré nous a vescu  
Ce sang maudit par tant de fois veincu.*

*A peine eut dit, qu'il vit la messagere  
Iris voler d'une plume legere  
Sortant de l'eau, laquelle reuenoit  
De voir Tethys, & au ciel retournoit  
Grosse d'humeurs. Ce Dieu s'approcha d'elle,  
Luy tend la main, la caresse & l'appelle.*

*Honneur de l'air, va conter à lunon  
Que les Troyens ennemis de son nom  
Frappent la mer à rames retournées,  
Enforcelez de fausses destinées.  
Si le courroux boult encor' en son cueur,  
Si le despit d'une vieille rancueur  
Son estomac encores espoinçonne,  
C'est maintenant que le destin luy donne  
De se venger le temps & le moyen,  
Perdant Francus & tout le nom Troyen.  
Dy que soudain mette la main à l'œuvre,  
Que sa puissance en l'air elle descœure,  
Brassant contre eux un amas pluuieux.*

*A tant se teut : Iris remonte aux cieux,*

*Tirant vn arc dessus les ondes perses  
Tout bigarré de cent couleurs diuerses :  
Puis sous le trosne à lunon se coucha,  
Et de biais à ses pieds se pancha  
Ainsi qu'un chien, qui craintif & fidelle  
Oyant aux bois le veneur qui l'appelle,  
( Cerfs & sanglers & buissons oubliez )  
Vient à son maistre, & s'endort à ses pieds.*

*Incontinent maintes troupes de nuës  
Sont pesle-mesle à leur Royne venues,  
Comme troupeaux qui bêlent à l'entour  
De leur pasteur, quand la poincte du iour  
Et la rosée aux herbes les conuie.  
Et lors lunon d'un tel amas suiuite  
Les presse ensemble, & en son giron prest  
Leur forme vn corps tout ainsi qu'il luy plaist :  
L'une elle enflloit de monstrueux images,  
L'autre de pluye & de venteux orages :  
L'autre en bruyant sur l'autre se rouloit,  
L'autre blasarde & noirastre couloit  
Ayant d'azur la robe entre-semée,  
Et l'autre estoit de feu toute allumée.*

*Tandis les vents auoient gaigné la mer,  
Qu'à gros bouillons ils faisoient escumer,  
La renuersant du fond iusques au feste :  
Vne importune outrageuse tempeste  
Sifflant bruyant grondant & s'esleuant  
A monts bossus sous le souffler du vent,  
Branle sur branle & onde dessus onde,  
Entre-ouuroit l'eau d'une abyssme profonde :  
Tantost enflée aux astres escumoit,  
Tantost baissée aux enfers s'abyssmoit,  
Et forcenant d'une escumeuse rage  
De flots armez couuroit tout le riage :*



*Vn sifflement de cordes & vn bruit  
D'hommes s'esleue: vne effroyable nuit  
Cachant la mer d'une poisseuse robe,  
Et iour & mer aux matelots desrobe.  
L'air se creua de foudres & d'esclairs,  
A longue pointe estincelans & clairs,  
Drus & menus, & les pluyes tortues  
Par cent pertuis se creuerent des nuës.  
Maint gros tonnerre ensoufré s'esclattoit,  
De tous costez la mort se presentoit  
A ces Troyens: lors d'une froide crainte  
En tel danger Francus eut l'ame atteinte:  
De larges pleurs il arrosa ses yeux,  
Puis gemissant tendit les mains aux cieux.*

*S'il te souuient de nos humains seruices,  
Grand Iupiter, n'oublie les sacrifices  
Du pere mien, qui fus tous les mortels  
De boucs sanglants a chargé tes autels.  
Ha tu deuoies en la Troyenne guerre  
Faire couler mon cerueau contre terre,  
Sans me sauuer par vne feinte ainsi  
Pour me trahir à ce cruel souci!  
L'eusse eu ma part aux tombeaux de mes peres,  
Où ie n'atten que ces vagues ameres  
Pour mon sepulchre, abusé de l'espoir  
Que tes destins me firent concevoir.*

*Comme il disoit, les tempestes troublées  
Ont contre luy leurs forces redoublées:  
L'air creuassé d'un tonnerre grondant  
Et d'une pluye en tortis descendant,  
Suivy d'esclairs tombez de l'air en presse  
Lechoit la mer d'une lumiere espesse  
A feu menu qui sur l'eau s'eslançoit,  
Et des nochers les yeux esblouissoit:*

*Des vieux patrons la parole esbandue  
Sans estre ouye en l'air estoit perdue :  
L'un court icy, l'autre court d'autre part,  
Mais pour neant : le mal surmonte l'art !  
Si estonnez qu'ils n'ont pour toutes armes  
Que les sanglots, les souspirs & les larmes,  
Les tristes vœux, extreme reconfort  
Des mal-heureux attendus de la mort.*

*Aucunefois une bourrasche fiere  
Heurte la prouë, & la tourne en arriere :  
Aucunefois la tempeste du vent  
Single la poupe & la pousse en auant,  
Rompt la carene, & de forte secousse  
En l'eschouant à costé la repousse  
Auec grand bruit : le vaisseau soufleté  
Diffoult, se créue où le vent l'a heurté.*

*Entre les feux, le tonnerre & la pluye,  
La nuit, la gresle, une ardente furie  
D'orage emporte à l'abandon de l'eau  
Six grands vaisseaux eslongnez du troupeau.  
Mais à la fin la bonasse fortune  
(Tousiours ne vit le courroux de Neptune)  
Loin les aborde au riuage incognu  
De la Prouence, où le Rhosne cornu  
Entre rochers roulant sa vifte charge  
Pres Aigue-morte en la mer se descharge.  
Là ces Troyens sur le sable arriuez  
Furent long temps d'hostelage priuez  
Sans maçonner une muraille neuue :  
Touchez apres de la beauté du fleuve,  
Loing d'Illion planterent à Tournon  
De leur patron les armes & le nom,  
Braue guerrier, qui gros de renommée  
loignit depuis à Francus son armée.*

Sept autres nefs contraintes par l'effort  
Des souflemens impetueux du Nort,  
Pirouétant dessus la vague perse  
Du haut en bas sentent à la renuerse  
Tomber le mast : l'antenne qui le suit,  
Broncha dessus : les cordes font un bruit  
Comme un pin tombe avecques ses racines,  
Quand un torrent des montaignes voisines  
Le fait broncher, fracassant & courbant  
Tous les buissons qu'il rencontre en tombant.

Deux tourbillons en ont deux aualées  
A gorge ouverte en leurs ondes salées,  
Piteux regard ! Pallas branlant és mains  
Ses feux, terreur des Dieux & des humains,  
Lance un esclair dedans l'autre nauiре :  
Le feu mangeard qui se tourne & se vire  
En tourbillons, courant de part en part,  
De banc en banc de rampart en rampart,  
Prist le Pilot, le massacre & le tuë,  
Et my-brulé sur les vagues le ruë,  
Ayant encor' le timon dans le poing,  
Tant en mourant de son art il eut soing.

L'autre nauiре opposant l'artifice,  
De la tempeste euitoit la malice,  
De toutes parts en doute résistant.  
Ainsi qu'on voit un hardi combatant  
Dessus le mur de la ville assiegée  
Se planter ferme en sa place rangée  
Pour l'ennemy du rampart décrucher,  
En fin luy-mesme est contraint de broncher,  
De ses genoux les forces luy defaillent :  
Car entre mille & mille qui l'assaillent,  
Un par sur tous le plus brusque & gaillard  
Tout armé saute au dessus du rampart

L'enseigne au poing, & en donnant passage  
A ses soldats leur donne aussi courage.  
Ainsi de mille & mille flots voutez,  
Qui assailloient la nef de tous costez  
Vn le plus haut & le plus fort s'avance,  
Et d'un grand heurt sur le tillac s'eslance  
Victorieux, puis les autres espais  
Qui çà qui là l'entre-suiuant de pres,  
Rompent les bords, les bancs & la carene,  
Et la navire enfondrent sous l'arene.  
L'un vers le ciel pour secours de son mal  
Tendoit les mains, l'autre comme à cheual  
Flottoit dessus une antenne cassée :  
Là des Troyens la richesse amassée  
Par tant de Rois, sur les ondes rouïoit,  
Servant aux vents & aux flots de iouët :  
Armes, bouclairs, robes de riche ourage  
Nageoient sur l'eau, la proie du naufrage.  
Trois fois la Lune, & trois fois le Soleil  
S'estoient couchez, que l'hyuer nompareil  
Armé d'esclairs & de vagues profondes  
N'auoit cessé de tourmenter les ondes :  
Sans plus la nef de Francus resistoit  
Haute sur l'eau, qui encores s'estoit  
Seule sauvée & des eaux & des flames,  
Ayant perdu ses voiles & ses rames,  
Quand vn fort vent suiuy de tourbillons,  
Et de l'horreur des humides fillons,  
En la singlant d'une bien longue traite  
La chasse au bord du riuage de Crete.  
Vn banc estoit de sablon amassé  
Voisin du bord où Francus fut chassé,  
Haut de falaize & de bourbe attrainée :  
Là pour mourir la fiere destinée

L'auoit conduit : de tous costez le bort,  
Le banc, la mer luy presentoient la mort.  
Comme il pleuroit sur le haut de la poupe,  
Il s'aduisa d'eslire de sa troupe  
Vint cheualiers qui depuis ont esté  
(Ainsi estoit dans le ciel arresté)  
Tiges & chefs des familles de France :  
Les choisissant tout le dernier s'eslance  
Dedans l'esquif, aimant trop mieux perir  
Au bord, qu'en mer vilainement mourir.  
Leurs pieds n'estoient à peine en la nacelle,  
Que le courroux d'une vague cruelle  
Les fit par force au riuage approcher,  
Et leur nacelle empreint contre un rocher,  
Rocher qui dur espineux & sauuage  
De son grand dos ramparoit le riuage,  
Ayant du vent tousiours le chef batu,  
Les pieds du flot aboyant & tortu.

Là le Demon qui preside à la vie,  
En tel danger leur fit naistre une enuie  
De s'attacher à ces rochers bossus,  
Et s'efforcer à gagner le dessus.  
Comme ils vouloient avecques la main croche  
D'ongles aigus grimper contre la roche,  
Le premier flot qui les auoit lancez,  
Les recula en arriere poussez  
S'en retournant : la mer qui se courrouce,  
D'un flot second encores les repousse  
Contre les bords raboteux & trenchans.

Là ces Troyens aux cailloux s'accrochans  
De pieds de mains s'aheurtent & se bandent,  
Et en grim pant contre le roc se pendent,  
Se deschirans les longues peaux des dois :  
L'un s'attachoit aux racines d'un bois,

L'autre essayoit d'empoigner vne branche,  
Puis main sur main, & hanche desur hanche,  
Coude sur coude, en haletant d'effort  
Par les cailloux montoient contre le bord.  
L'eau de la mer des cheueux goute à goute  
Depuis le front iusqu'au pied leur degoute  
Blanche d'escume, & leurs membres souflez  
De tant de vents, se boufrent enflez :  
Les flots salez de la gorge vomirent,  
Esuanouis leurs esprits se perdirent  
De tant de maux debiles & laschez  
Comme corps morts sur la riue couchez  
Sans respirer, sans parler : mais à l'heure  
Que le toreau qui tout le iour labeure,  
Franc du collier retourne à la maison,  
Ces corps sortis de longue pamaison  
Baissent la terre & la riue venteuse.

Quiconque sois, Terre, sois nous heureuse,  
(Ce disoient-ils) & loin de tous dangers  
Sauue en ton sein ces pauvres estrangers,  
Qui ont souffert mainte dure fortune  
Par le courroux des vents & de Neptune.

Comme ils prioient, le dormir ocieux  
Chasse-soucy leur vint filler les yeux,  
Et l'une à l'autre attachant la paupiere  
Leur desroba le soin & la lumiere.

Tandis Cybelle en son courage ardoit  
Dequoy Neptun' son Francus retardoit :  
Car elle aimoit (comme estant Phrygienne)  
L'enfant d'Hector & la race Troyenne :  
Pource soudain son char elle attela,  
Bat ses lions, & vers le Somne alla.

Le Dieu vieillard qui aux songes preside,  
Morne habitoit dans vne grotte humide :

Deuant son huis maint pauot fleurissoit,  
 Mainte herbe à laiët que la nuit choisissoit  
 Pour en verser le ius dessus la terre,  
 Quand de ses bras tout le monde elle enserre.  
 Du haut d'un Roc un ruisseau s'escouloit  
 Remply d'oubly qui rompu se rouloit  
 Par les cailloux, dont le rauque murmure  
 Des yeux flatez resserroit l'ouuerture.

Somme, dit ell', le doux sorcier des yeux,  
 Le cher mignon des hommes & des Dieux,  
 Par qui le mal tant soit mordant s'oublie,  
 Par qui l'esprit loin du corps se deslie,  
 Va (ie le veux) en ceste isle où souloient  
 Iadis sauter les hommes qui baloient  
 Au son du cistre, & de cliquantes armes  
 S'entre-choquant, auantureux gendarmes,  
 D'œil vigilant en l'autre Dictéen

\* Bers,  
 Berceau,  
 mot Ven-  
 domois.

Gardoient le\* bers du grand Saturnien,  
 Terre fertile, anciennes retraites  
 Des Corybans, Dactyles & Curètes :  
 Là de leur race est encor aujourd'huy  
 Vn Coryban le soutien & l'appuy  
 De tout honneur, de science semblable  
 Au vieil Chiron Centaure venerable.  
 Quand il auoit le sang plus genereux,  
 En sa ieunesse il deuint amoureux :  
 Si qu'en pressant à sa chere poitrine  
 Par amitié vne Nymphe marine,  
 D'elle conceut deux filles & un fils.  
 Les filles sont ainsi que deux beaux lis,  
 En la maison de leur pere croissantes,  
 En âge, en grace, en beauté florissantes.  
 Le fils captif languit depuis un an  
 En la prison d'un barbare Gean,



Qui les mortels à son Dieu sacrifie,  
 Et d'un maillet leur desrobe la vie :  
 Puis sur sa porte, où distille le sang,  
 Le test des morts il attache de rang.  
 Ce Roy remply d'honneur & de richesse  
 Tient sa maison ouuerte de largesse  
 Aux estrangers, tant il a grand desir  
 Entre un millier d'en pouuoir un choisir  
 Qui le reuanche, & son fils luy redonne  
 Seul heritier de sa noble couronne.

Va-t'en vers luy, & en te transformant  
 Presente luy quand il sera dormant,  
 Autour du lit cent formes espanduës,  
 Piqueurs veneurs trompes au col pendues,  
 Lesses & chiens bocages & forests,  
 Grandes espieux, cordages & filets,  
 Limiers ardans, cerfs suiuis à la trace,  
 Et tout le meuble ordonné pour la chasse :  
 Presente luy des hommes incognus  
 En longs habits à sa riue venus,  
 Sous qui son fils les armes doit apprendre,  
 Et par leurs mains sa liberté reprendre.

D'un mesme vol affublé de la nuit,  
 Fantaume vain, porte toy sur le lit  
 Où va dormant l'une & l'autre pucelle :  
 Fay leur sembler qu'une estoile nouvelle  
 Viue d'esclairs, d'un voyage lointain  
 Passant la mer vient loger en leur sein,  
 Et rayonnée en flames bien esprises  
 Baise leur chair sans ardre leurs chemises.  
 Va-t'en apres au bord où les Troyens  
 Dorent recreus des flots Neptuniens :  
 Dessus leur teste arreste ta volée,  
 Leur ame soit en songeant consolée

*Sans avoir peur des habitans du lieu :  
Car ia Mercure enuoyé du grand Dieu,  
Des citoyens a flechy le courage  
Pour en bon-heur conuertir leur dommage.*

*A tant se teut, & le Roy du sommeil  
Tout chassieux ennemy du resueil,  
D'un chef panché que lentement il cline,  
Et du menton refrappant sa poitrine,  
Se ressecouë, & sorty de son lit  
Le mandement de Cybelle accomplit.*

*Incontinent que l'Aube aux doigts de roses  
Eut du grand ciel les barrieres declofes,  
Le Roy Dicé' (de tel nom se nommoit  
Ce Coryban qui la iustice aimoit)  
Riche d'honneur, de terres & de race,  
Dresse l'apprest d'une aboyante chasse :  
Son palefroy à gros bouillons fumeux  
Remaschant l'or de son frein escumeux  
Est à la porte, où à foule se rendent  
Ieunes piqueurs qui deuisant l'attendent :  
Maint chien courant couple à couple les suit :  
De tous costez la meute fait un bruit !*

*Par bois fueillus, par monts & par valée,  
Pleine de cris ceste chasse est allée.  
Maint gros sangler de dents croches armé,  
Maint cerf craintif au large front ramé  
Estoit ia mort, quand au vueil de Cybelle  
Vn cerf poussé par embusche nouvelle  
Tournant, virant, haletant & mourant  
De soif pantoise, alla viste courant  
Vers le riuage : & le pere Dicée  
Suiuant ses pas par la poudre tracée,  
Comme le cerf à la riue aborda,  
Où ces grands corps incognus regarda.*

Lors les Troyens en sursault s'esueillèrent,  
Qui de le voir au cueur s'esmerueillèrent :  
Luy plein d'effroy en pasmaison deuint,  
Et de son songe à l'heure luy souuint.

D'où estes-vous (dit-il) de quelle place,  
Quels sont vos noms, & quelle est vostre race?  
Quelle fortune, ou quelle mer sans foy  
Vous a trahis ? hostes respondes moy.  
Car à vous voir (bien que pleins de miseres)  
N'estes mauuais, ny fils de mauuais peres.

Alors Francus baignant ses yeux de pleurs,  
Et souspirant aigrement ses douleurs  
Luy respondit : Si iamais les merueilles  
Des Phrygiens ont frappé tes oreilles,  
La longue guerre & les dix ans d'assaux,  
Le fier Achille autheur de tant de maux,  
Le sac, la prise & la flame funeste  
Du brazier Grec, nous en sommes le reste.  
Là pour sauuer maisons, temples & Dieux,  
Femmes, enfans, moururent nos ayeux,  
L'un sur le mur, l'autre au milieu des armes.  
Hector honneur des valeureux gendarmes  
Qui m'engendra, ayant cent mille fois  
Trempé le sable au meurtre des Gregeois,  
Gardant son pere & sa mere & sa ville,  
Y fut tué par la traison d'Achille.  
Comme vn sapin par le fer abatu,  
Son corps broncha de ses armes vestu,  
Faisant vn bruit sur la poudre Troyenne :  
Où du veinqueur la rouë Aemonienne  
(Aëte vilain & plein d'impieté)  
Trois fois le traine autour de la cité.  
Je fus sauué de la flame cruelle  
(Miracle grand!) pendant à la mammelle :

*P'ay du veinqueur flechi deffous la loy,  
Nourry sans nom, bien que germe de Roy.*

*Ceux que tu vois d'un visage si blefme  
Couchez icy, ont eu fortune mesme,  
De mesme ville, issus de mesme part,  
Mes alliez de sang & de hazard.*

*Quand sans honneur sans grandeur sans enuie  
D'estre cognu, i'allois trainant ma vie  
En Chaonie aux pieds de mes parens,  
Voicy d'enhaut des signes apparens :  
Voicy Mercure enuoyé du grand Pere  
Tancer mon oncle & menacer ma mere,  
Dequoy forçant le ciel & la saison  
Ils enfermoient ma gloire en la maison,  
Et que des Dieux les hautes destinées  
Auoient pour moy les Gaules ordonnées,  
Ia dans le ciel pere des Roys receu :  
Mais le destin & les Dieux m'ont deceu.  
Croyant en vain leur promesse menteuse,  
Prompt ie me donne à la vague venteuse,  
Armant en mer quatorze grands vaisseaux,  
De viures pleins & de forts iouuenceaux,  
Dont i'esperois d'une braue entreprise  
Donter sous moy ceste Gaule promise.  
« Malheureux est qui desdaigne le sien  
« Pour l'estranger : en lieu de tant de bien,  
Couronne, sceptre & royal mariage,  
P'ay la mer seule & les vents en partage,  
Qui d'esperance & de biens m'ont cassé,  
Et de quatorze vn vaisseau m'ont laissé  
Qui pres ce bord sans mast & sans antene  
Demy-rompu s'embourbe sous l'arene,  
Où tout mon bien i'auois fait enfermer,  
« Si c'est du bien ce qui flotte en la mer.*

« Du bout du haure on doit veoir la marine :

« Malheureux est qui sur la mer chemine.

Après auoir trois iours entiers erré,  
D'astres certains & de voye esgaré,  
Tousiours pendu sur la vague meurtriere,  
Vn bon Demon esmeu de ma priere  
Me secourant d'hommes & d'armes nu,  
M'a fait grimper à ce bord incognu,  
Proye des loups & des bestes sauvages :  
Nous ignorons les mœurs & les courages  
Des habitans, si apres les dangers  
Ils ont le cueur piteux aux estrangers,  
S'ils craignent Dieu, s'ils aiment la iustice,  
Ou s'ils sont pleins de sang & de malice :  
Pource, benin aye pitié de nous.

Sois homme ou Dieu, i'embrasse tes genous :  
Si tu es Dieu, tu sçais bien nostre peine :  
Si tu es homme, vne douceur humaine  
Doit esmouuoir ton cueur à passion,  
Ayant horreur de nostre affliction.

Il dit ainsî : le vertueux Dicée  
Contre-respond : Ceste terre embrassée  
Des flots marins, comme tu vois icy,  
Porte vn bon peuple & vn mauvais aussi :  
Mais à ce coup ta fortune meilleure  
T'a fait surgir où la vertu demeure :  
Pource tu sois, hôte, le bien-venu.  
Qui est celuy qui par bruit n'a cognu  
L'honneur Troyen, & pour garder sa terre  
Les faits d'Hector vn foudre de la guerre ?  
Il me souuient qu'un iour Idomené  
Me discouroit, de nouueau retourné  
( Il retournoit nouuellement de Troye  
Chargé d'honneur, de vaillance & de proye )

Qu'après qu'Hector les Grecques nautz brusla,  
Que vers Priam ambassadeur alla  
Traiter la paix, mais il ne la peut faire,  
Ayant Pâris capital aduersaire :  
Par courtoisie il logea chez Hector,  
Qui l'honora d'une grand' coupe d'or,  
Riche present, où viuoit entaillée  
Sous le burin la Baleine escaillée  
A gueule ouuerte, & maistresse des bors  
Faisoit semblant de deuorer le corps  
De la pucelle Hefione attachée  
Contre vn rocher : la mer estoit couchée  
Au pied du roc, qui de flots repliez  
De la captiue alloit baignant les pieds.  
Persée estoit sur le haut de la roche,  
Ayant au poing sa Cimeterre croche,  
Pendû en l'air, qui l'Ourque menassoit,  
Et des liens l'Infante delassoit.

Idomené me donna ceste coupe,  
Que ie tien chere entre vne riche troupe  
D'autres vaisseaux, dont ie cheris mes yeux,  
Quand ie banquete aux festes de nos Dieux.  
Il estimoit d'Hector la courtoisie,  
Les vaillans faits, les vertus & la vie,  
Et ennemy son honneur n'abaissoit,  
Ains iusqu'au ciel ses louanges pouffoit.

Pource ie croy que vostre bien-venue  
Est par le vueil des bons Dieux auenue,  
Et que le ciel qui de nous a soucy,  
Pour mon support le permettoit ainsi.  
Vous ne pressez vne terre estrangere :  
C'est, ô Troyens, vostre ancienne mere  
Crète, dont Teucre autrefois est issu,  
De qui le nom pour tiltre auez receu :

Encore Ida la montagne Troyenne  
 S'esleue icy, la demeure ancienne  
 De vos ayeux, & pource ostez du cueur  
 Comme assurez, le soupçon & la peur,  
 Et desormais r'appellez l'esperance  
 Surgis au lieu qui fut vostre naissance.

De peu de gens ce Prince environné  
 En son palais pensif est retourné :  
 D'où liberal il enuoye au riuage  
 Douze moutons, un bœuf de grand corsage  
 Gras bien charnu, & six barreaux de vin,  
 Coupes habits & chemises de lin,  
 Pour festoyer & courir ceste bande  
 A qui la faim outrageuse commande.  
 « Rien n'est meilleur pour l'homme joulager  
 « Apres le mal, que le boire & manger !  
 Eux affamez ces viandes rauirent,  
 Qui d'une autre ame au besoin leur seruirent  
 Rauigorant la force de leurs corps.

« Car le manger rend les hommes plus forts !  
 Tandis la nuit à la robe estoilée  
 Auoit la terre espaisement voilée  
 D'un manteau noir ombreux & paresseux,  
 Lors que voicy les fantaumes de ceux  
 Dont la grand mer en vagues departie  
 Auoit les corps & la vie engloutie,  
 Enflez, boufis, escumeux & ondeux,  
 Aux nez mangez, aux visages hideux,  
 Qui pepiant d'une voix longue & lente  
 (Comme poulets cherchans leur mere absente)  
 De mains, de pieds figurans leur mechef,  
 De Francion environnoient le chef.

Enfant d'Heçtor (disoient-ils) nous ne sommes  
 Plus ces corps vifs, mais feinte de ces hommes,



Que bien armez & prompts à tous hazars,  
En tes vaisseaux tu choisis pour soldars,  
Sur qui les vents au fort de la tempeste  
Ont renuersé cent gouffres sur la teste:  
Nos corps flotans apastent les poissons,  
Nos esprits (las!) en cent mille façons  
Déprisonnez de l'humaine closture,  
Dessus les flots errent à l'auenture:  
Fay nous au moins sur le bord de ces eaux  
Le triste apprest de quelques vains tombeaux:  
Ne permets plus qu'absens de sepulture,  
Sans pleurs, sans tombe errions à l'auenture,  
Ains pour auoir Caron plus adoucy,  
Fay nous honneur dessus ce bord icy,  
En attendant que les eaux poissonneuses  
Repousseront aux riuës sablonneuses  
De nos corps morts le vieil moule défait  
Pour leur bastir vn sepulcre parfait.  
A tant s'enfuit la troupe naufragiere  
Ainsi qu'on voit vne poudre legiere  
S'esuanouir, tournoyant & suiuant  
Les tourbillons qui annoncent le vent.

Si tost que l'Aube à la face rosine  
Eut le Soleil tiré de l'eau marine,  
Francus s'esleue, & prenant des gazons  
Fit des tombeaux, funerales maisons:  
Puis respandant vne fiole pleine  
De sang sacré en leur demeure vaine,  
Haut appelloit les ames qui venoient,  
Et sur l'obsequë espaißes se tenoient,  
Faisant tel bruit, que font en leur nichée  
Les arondeaux attendans la bechée:  
Et tels qu'on voit au milieu de l'esté  
Sous la plus viue & brulante clarté

*Errer espais des mouchérons ensemble,  
Et tournoyer d'un escadron qui tremble,  
Gresle, menu, volant de lieux en lieux,  
Et si petits qu'ils nous trompent les yeux.*

*Bien que vos corps (disoit Francus aux ames)  
Ne soient enclos sous ces herbeuses lames,  
En attendant un tombeau plus certain,  
Contentez-vous de cest office vain,  
Et frequentez en longue patience  
Ces logis pleins de nuit & de silence.  
Esprits malins, ne nous suiuez iamais  
Ou soit en guerre, ou soit en temps de paix :  
Ne nous troublez de peurs ny de mensonges,  
N'effroyez point de fantaumes nos songes,  
Ne nous donnez ny terreur ny soucy,  
Et sans nous suiure arrestez vous icy.*

*Disant ces mots, plein d'un soin qui le presse,  
Seul sur la rive eslongné de la presse,  
Poussant du cœur un long soupir amer  
Prioit ainsi la fille de la mer.*

*Enten ma voix, Paphienne Erycine,  
Si tu nasquis de l'escume marine,  
Ne souffre plus que tes flots maternels  
Me soient auteurs de tourmens eternels.  
Alme Venus, mets en ta fantasie  
Le souuenir de ceste courtoisie  
Dont l'oncle mien te preferant usa  
Lors que la pomme à Pallas refusa,  
Et à lunon qui encores dolente  
D'un tel refus en tous lieux nous tourmente :  
Et s'il est vray qu'autrefois as laissé  
Le ciel vouté du pied des Dieux pressé,  
Et les citez sous ton pouuoir gardées  
Pour habiter les montagnes Idées,*

Prise d'amour d'un pasteur Phrygien,  
 Aye pitié du mesme sang Troyen :  
 Tu gardas bien & l'ason & Thesée,  
 Cueurs desireux d'affaire mal-aisée,  
 Et s'ils n'auoient ( les sauuant de peris )  
 Tant fait pour toy que mon oncle Pâris :  
 Comme eux ie trace vne affaire bien haute,  
 Et si ie faux au destin soit la faute,  
 Et non à moy de rien ambitieux,  
 Qui n'ay suiuy que l'oracle des Dieux.

Priant ainsi, Venus la mariniere  
 D'oreille prompte entendit la priere :  
 Elle vestit ses somptueux habis,  
 Orna son chef flamboyant de rubis,  
 Prist ses aneaux de superbe engraneure,  
 Haussa le front composa son alleure,  
 Se parfuma s'oignit & se leua :  
 Puis vers Amour son cher mignon s'en-va.

L'enfant Amour escarté de la presse  
 Des autres Dieux, sous vne treille espesse  
 Dans le iardin de Iupiter estoit  
 Où Ganymede aux eschets combattoit.  
 Venus de loin commence à luy sou-rire,  
 Flata sa iouë & ainsi luy va dire.

Mon fils ma vie, Amour mon petit Roy,  
 Tu es mon tout, ie ne puis rien sans toy,  
 Mais quand nos traits sont alliez ensemble,  
 Il n'y a Dieu si puissant qui ne tremble :  
 Laisse tout seul iouër ton compaignon,  
 Embrasse moy, baise moy mon mignon,  
 Pens à mon col : mon fils, ie te pardonne  
 Tous les tourmens que ta fleche me donne,  
 Et de nouueau tous les maux infinis  
 Que i'ay receu pour l'amour d'Adonis.

*Si de ton trait tu blesses la pensée,  
L'ame & le cueur des filles de Dicée,  
Pour Francion, Troyen digne d'avoir,  
Tant il est beau, faueur de ton pouuoir :  
le te donray pour te seruir de page  
Le leu mignard qui te ressemble d'âge,  
Fin comme toy, de qui les petits doits  
Tous enfantins porteront ton carquois,  
Et ton bel arc qui le monde conquête :  
Il sera tien si tu fais ma requeste.*

*Adonc Venus le mit en son giron,  
Roses & lis espanche à l'environ  
De sa perruque, & l'endort en sa robe :  
Puis doucement de son fils se desrobe,  
S'en-vole en Cypre, où d'encens Sabéens  
Fument tousiours ses autels Paphiens.*

*A tant Amour du sommeil se secouë,  
Ses blonds cheveux arrangea sur sa iouë,  
Vne double aile à son dos attacha,  
Son beau carquois pendillant décrocha  
Du prochain myrte, il empoigne en la dextre  
L'arc & des Dieux & des hommes le maistre :  
Puis s'eslançant hors la porte des cieux,  
Petites mains, petits pieds, petits yeux,  
Se rue en l'air : le ciel, l'onde & la terre  
Luy font honneur : Zephyre qui desserre  
Sa douce haleine odorante à l'entour,  
Tout amoureux va conuoyant Amour.*

*Or cest enfant qui trompe la ceruelle  
Des plus rusez, prist semblance nouuelle,  
Se herissant en la forme d'un Tan  
( Fier animal ) qui au retour de l'an  
Quand le printemps rameine ses delices,  
Parmi les prez fait courir les genices :*

*Il se fit tel qu'homme ne le peut voir,  
Corps inuisible, & puis alla s'assoir  
Au haut sommet de la porte, où Dicée  
Superbe auoit sa demeure dressée.*

*Tandis Francus secoüant en la main  
Vn iauelot à la pointe d'airain,  
Ayant au col sa targue à mainte houe,  
Vers le chasteau mena sa ieune troupe.  
Venus la belle au departir des bords  
Songneuse d'eux emmantela leurs corps  
D'une nueuse & obscure couronne  
Pour n'estre veus ny cognus de personne.  
Quand au palais Francion arriua,  
Loin de leurs corps l'air espais se creua,  
Et leur figure est propre reuenue  
Comme astres clairs déuêstus d'une nuë.*

*Ce iour Francus à merueille estoit beau,  
Son ieune corps sembloit vn renouueau,  
Lequel estend sa robe bien pourprée  
Dessus les fleurs d'une gemmeuse prée:  
La Grace estoit à l'entour de ses yeux,  
De front de taille egal aux demy-dieux.*

*Deuant la porte estoit vn long espace  
D'une quarrée & spacieuse place,  
Où la ieunesse aux armes s'esbatoit,  
Piquoit cheuaux voltigeoit & lutoit,  
Sautoit courroit defendoit la barriere:  
Haut dans le ciel en voloit la poussiere!*

*En ce-pendant que d'œil prompt & ardent  
Francus alloit le palais regardant,  
Frizes festons guillochis & ouales,  
Dicée orné de dignitez royales  
Accompagné de deux cens iouuenceaux  
D'âge pareils aux mentons damoiseaux,*

*Au doux accueil, d'une courtoise sorte  
Vint caresser Francus outre la porte  
Le bien-veignant, & d'un visage humain  
Le tient, l'embrasse & luy serre la main.*

*Pres de ce Prince en robes solennelles  
Estoit sa femme & ses filles pucelles,  
A qui fuzeaux & fil tout à la fois  
Estoyent de haste escoulez de leurs doigts,  
Tant ell' auoyent un chaud desir en l'ame  
De voir Francus : mainte amoureuse flame,  
Qui de leurs yeux à trauerses voloit,  
Comme venin dans le sang s'escouloit.*

*Tandis le Dieu qui les cœurs nous desrobe,  
Laisa la porte, & se mist sous la robe  
De Francion : puis décochant deux traits,  
L'un plein d'amour, de graces & d'attraits,  
Qui doucement gaigne la fantaisie,  
Et l'autre plein d'ardante ialousie,  
Tirez des yeux du Troyen les poussa,  
Et leur raison ensemble renuersa,  
Troublant leur sang, & remplissant leurs veines,  
Foye & poumons de souspirs & de peines :  
Puis en riant & sautelant, de là  
Ce faux garçon dans le ciel s'en-vola.*

*Dessous le cœur de ces deux damoiselles  
Fumoit la playe à mornes étincelles,  
Les consommant & fondant peu à peu  
Comme une cire à la chaleur du feu :  
De toute chose ont perdu souuenance,  
Perdu raison, parole & contenance,  
Et leur esprit de merueille esblouy  
Bien loin du corps erroit esuanouy.  
De ces deux sœurs l'une auoit nom Hyante,  
L'autre Clymene : Hyante estoit sçauante*

En l'art Magic' : mais Amour le plus fort,  
Qui n'a souci de charmes ny de sort,  
De toutes deux auoit l'ame eschauffée,  
Et de leurs cœurs auoit fait son trofée.

Elles bruloyent à petit feu couuert  
Comme vne estoupe, ou comme vn rameau verd  
Qu'une artizane au point du iour allume :  
Tout en vn coup il entre-brule & fume  
D'un feu caché qui luit obscurément.  
Ainsi Amour coulé secrettement  
Dedans l'esprit de ces Dames blessées,  
Les estouffoit de secrettes pensées :  
Tantost leur iouë en tremblant rougissoit,  
Palle tantost, & tantost blanchissoit,  
Tantost estoit de taches toute pleine,  
Et par la face elles monstroyent leur peine.

A tant Francus entra dans le chasteau,  
Son jaelot posa contre vn rateau  
Où mainte pique en son long estendue  
Contre le mur au croc estoit pendue.  
En ce chasteau par bande fremissoient  
Prompts seruiteurs, dont les uns tapissoient  
D'ourages d'or les superbes murailles,  
Portraits tracez d'anciennes batailles :  
Autres de rang sur la place apportoyent  
Tapis ouurez, les autres apprestoient  
Les lits enflez de couuertes velües,  
Autres dresseoyent les viandes esleües,  
Autres chargeoyent les hauts buffets dorez  
De grans vaisseaux d'histoires decorez.

Sur une esguiere en raboteuse trace  
Des Corybans estoit peinte la race :  
Comme Briare en amour furieux,  
Desesperé de sa Nympe aux beaux yeux,



Alloit tout seul par mont & par bocage  
lettant vn cri comme vn lion sauvage,  
Et fantastique errant par les buissons  
Changeoit son corps en cent mille façons,  
Tant en amour forcenoit sa folie  
Pour mieux iouyr de sa Cymopolie:  
Mais à la fin se changeant en serpent,  
A dos rompu sur le ventre rampant,  
La tint serrée, & l'ayant embrassée  
D'elle conceut les ayeux de Dicée.

Sur vn bassin Saturne estoit graué,  
En cheueux blancs, de vieilleſſe agraué,  
A la grand' faulx, qui auoit la machoire  
Du sang des siens toute relente & noire:  
Sa femme Rhée à l'autre bord estoit,  
Qui pour son fils vn caillou presentoit  
A ce vieillard, les appas de son ventre:  
Dessous ses pieds se herissoit vn antre,  
Ou Iupiter viuoit emmaillotté  
Du lait diuin de la chéure alaitté,  
Craignant Saturne affamé de nature  
Qui ses enfans deuore pour pasture.

Quand tout fut prest, ce Prince pour mieux voir  
Son estrangier, à table le fist seoir  
Droit deuant luy aupres de ses deux filles  
Aux yeux armez d'amoureuses scintilles:  
Puis selon l'ordre & l'âge & les honneurs,  
Qui haut qui bas s'affirent les Seigneurs.  
D'un cœur ioyeux ceste gaillarde bande  
Mit promptement les mains à la viande,  
Et festoyant le Troyen estrangier,  
Le conuioyent doucement à manger.

Incontinent que la soif fut ostée,  
Et de la faim la fureur surmontée,

Ayant le Roy pour office diuin  
A Iupiter versé le dernier vin  
A plein hanap, innoquant sa puissance,  
Toute debout se leua l'assistance  
Loin de la table, enuieuse d'aller  
Après souper deuïser & baller.  
Vn bruit se fait : la gaillarde ieunesse  
Prenant la main d'une belle maïstresse,  
S'offre à danser : maint flambeau qui reluit  
Du plancher d'or, vainc l'ombre de la nuit !  
Le vieil Terpin qui de fleurs se couronne,  
Son dos appuye au flanc d'une colonne  
La lyre au poing, & ioignant à la vois  
Les nerfs frapez par l'accord de ses doigts,  
D'un plaisant son les inuite à la danse :  
Le pied certain rencontre la cadance !

Dieu (disoit-il) qui tiens l'arc en la main,  
Fils de Venus hôte du sang humain,  
Qui dans nos cœurs tes royaumes habites,  
Qui çà qui là de tes ailes petites  
Voles par tout iusqu'au fond de la mer,  
Faisant d'amour les dauphins allumer,  
Dont l'aspre trait a feru la poitrine  
Des Dieux là haut là bas de Proserpine,  
Pere germeux, genial, & qui fais  
Comme il te plaist les guerres & la paix,  
Démon & Dieu nourricier de ce monde,  
Qui du chaos la cauerne profonde  
Ouuris premier, & paroissant armé  
De traits de feu, Phanete fus nommé :  
Double, jumeau, emplumé de vîstesse,  
Porte-brandon, archer que la ieunesse  
Au sang gaillard courtise pour son Roy :  
O grand Démon, grand maïstre, escoute-moy,

Soit que tu sois au milieu de la bande  
 Des plus grans Dieux où ta fleche commande,  
 Soit qu'il te plaise habiter ton Paphos,  
 Soit que ton chef tu laues dans les flos  
 De la fontaine Erycine, ou que vuide  
 De tout souci, de tes vergiers de Gnide  
 Entre les fleurs habites la verdeur,  
 Vien allumer nos cœurs de ton ardeur :  
 De ceste danse eschauffe le courage,  
 Brassant sous main quelque bon mariage.  
 Ainsi chantoit Terpin le bon vieillard :  
 Les balladins haussans le cri gaillard,  
 Les derniers vers du chancre recouperent,  
 Et de leurs voix les solineaux frapperent.

Seul à l'escart appuyé contre vn coin,  
 Veuf de plaisir, plein d'angoisse & de soïn,  
 A sourci bas à poitrine poussée  
 De longs sanglots, estoit le bon Dicée :  
 Vn fleuve espais de ses yeux s'escoula :  
 Francus l'aïse, & ainsi luy parla.

C'est à moy, Prince, à pleurer & à traire  
 Tant de sanglots à qui tout est contraire,  
 A qui la mer l'air la terre & les cieux  
 Sont obstinez ennemis enuieux,  
 Qui m'ont trompé deffous belle apparence.  
 « Il n'est rien pire aux mortels qu'esperance !  
 Mais toy Seigneur si sage & si prudent,  
 En biens citez & peuples abundant,  
 Riche d'honneur & de terre fertile,  
 Riche de femme & de belle famille,  
 Ne deurois estre en ce poinct langoureux,  
 Ains les souspirs laisser aux malheureux.

Dicé' respond, Las ! si ie n'estois pere,  
 Hoste Troyen, ie serois sans misere :

*Vn mien seul fils a causé mon tourment,  
Et s'il te plaist ie te diray comment.*

*Dedans ceste isle habite de fortune  
Vn fier Tyran la race de Neptune,  
Horrible & grand, mais homme en cruauté  
Tant soit cruel ne l'a point surmonté:  
Il fait meurdrir tous ceux qu'il prend en guerre,  
Ceux que la mer iette contre sa terre,  
Dessus l'autel de son pere, & de sang  
Honnit le temple: il attache de rang,  
Piteux regard! sur la porte les testes  
Des assommez, miserables conquestes.  
Le fer ne peut endommager sa peau:  
Il rebondist comme fait vn marteau  
Dessus l'enclume: en vne seule veine  
Pres le talon est sa Parque & sa peine.  
Mille estoient morts par sa cruelle main,  
Quand moy touché d'un naturel humain  
Luy fis scauoir que les bestes sauuages,  
Tigres, lions enuenimez de rages,  
Qui sans raison viuent parmi les bois  
Gros animaux sans pitié ny sans lois  
S'entre-tuoyent & mangeoyent leur semblable:  
Mais l'homme né d'un esprit raisonnable,  
Enfant du ciel ne doit faire mourir  
L'homme son frere ainçois le secourir.*

*Ce grand Gean oyant ceste nouuelle,  
Enfla son fiel de colere cruelle,  
Et bouillonnant escumant & grondant,  
Sans m'aduertir de son courroux ardent,  
Vint de furie au pied de ma muraille  
Me desfier en plein camp de bataille.  
En telle peur soudain armer ie fis  
Mon ieune Orée (ainfi a nom mon fils)*

*L'accompagnant de bien peu de gendarmes  
Mieux equippez de courage que d'armes.*

*Ce iouuenceau à qui le blond coton  
Premiere fleur sort encor du menton,  
Fort & hardi fit auancer sa trope,  
Et le premier assaillit le Cyclope  
Le grand Phouère (hélas ! on nomme ains)  
Ce fier Tyran aux playes endurci)  
Mais pour neant ce ieune enfant s'efforce :  
Car du Gean la monstrueuse force  
Le prist captif au beau milieu des siens,  
Puis attachant de vergongneux liens  
Sa troupe & luy, de son baston les meine  
Comme vn pasteur ses moutons en la plaine.  
Depuis le temps ce malheureux cruel  
De iour en iour a tué sur l'autel  
L'un des captifs pour offrande funeste :  
Ils sont tous morts : hà, ie meurs ! & ne reste  
Sinon mon fils qui sentira demain  
La pesanteur de sa cruelle main.*

*Ainsi disoit versant sous sa paupiere  
De tiedes pleurs vne large riuiera,  
A gros sanglots entre-rompant sa voix :  
Lors que Francus le tige de nos Rois,  
Meu de pitié le console & le flate,  
Et luy respond : l'aurois vne ame ingrate,  
Né d'un rocher ou d'un tigre conceu,  
Si mesurant le bien que i'ay receu  
De toy Seigneur, à ma douleur extrefme,  
Pour te sauuer ie ne t'offrois moy-mesme,  
Et ceste dextre & ce glaiue trenchant  
Affez pointu pour punir vn mechant.  
Fay moy, grand Prince, apprestez sur la place  
Armes cheuaux : ains que demain se passe*

*Il cognoistra qu'un pere valeureux  
A son malheur m'engendra vigoureux,  
Pour ne souffrir regner vne malice  
Sans que mon bras vangeur ne la punisse.*

*A tant Francus à son parler mit fin,  
Puis l'eschançon ayant versé du vin  
A longs filets à l'honneur de Mercure,  
Estant la nuit & profonde & obscure,  
la les Trions commençans à pancher  
Chacun se leue & s'en-alla coucher.*

*Incontinent que l'Aube iour-apporte  
Du grand Olympe eut desbarré la porte,  
Et le Soleil par les heures pressé  
Eut son baudrier en biais retroussé  
Traçant du Ciel la voye coustumiere,  
Au chef coifé d'éclatante lumiere,  
Ce fier Tyran à la muraille alla:  
Vn cheualier au combat appella  
La lance au poing, le morrion en teste,  
Qui bien cresté brilloit comme tempeste  
Que Iupiter elance au mois d'esté  
Sur le sommet d'une iniuste cité.  
Pour son destrier pressoit la forte échine  
D'une cauale: elle auoit la poitrine  
Blanche & le front, le reste de la peau  
Hors le pied gauche, estoit de poil moreau,  
Qu'une Harpye en amour eschaufée  
Conceut du vent dessus le mont Rifée.  
Il se mocquoit en fronçant le sourci  
Du bon Dicée, & luy disoit ainsi.*

*Pour champion ta sottise m'appreste,  
Vieil radoté, la Phrygienne teste  
D'un iouuenceau qui sçauroit mieux ramer  
Comme un forçat, qu'aux batailles s'armer.*

Pour le loyer d'une telle entreprise  
Tu as ta fille à ce Troyen promise,  
Pauvre chetif : ce fer dont il mourra,  
Pour son doüaire un tombeau luy donra.  
Encor dit-on que ce banni se vante  
Que le destin les Gaules luy presente,  
Voire & qu'il erre où le ciel le conduit :  
Le pauvre sôt des oracles seduit,  
Qui ne sçait pas que sus les choses nées  
Ne peuuent rien les vaines destinées !  
Crête est sa Gaule, & mes braues fureurs  
Seront le but de ses longues erreurs.

En moy ne soit la mort renouuellée  
De mon ayeul le superbe Talée,  
Qu'une Medée en sauuant des dangers  
Je ne sçay quels pirates estrangers,  
Enforcela d'un magique murmure.  
Des vains destins de Francus ie n'ay cure :  
Tels sots abus ne me viennent piper :  
Le fer tranchant ne me sçauroit couper,  
Ny Iupiter tuer de son tonnerre :  
S'il regne au ciel ie regne en ceste terre.

De tels propos comme il s'alloit brauant,  
A large pas Francus vint au deuant :  
Je suis celuy que ton orgueil mesprise  
Jeune Troyen autheur de l'entreprise,  
Qui te veux faire auant le soir sentir  
A ton malheur que peut un repentir.  
Approche donc, vien essayer la dextre  
De ce Troyen destiné pour ton maistre :  
Quoy que tu sois au combat dangereux,  
Si seras-tu, Phouère, bien-heureux  
D'aller victime à l'onde Acherontide  
Tué des mains d'un si ieune Hectoride.



Il dist ainsi : Le cruel d'autre part  
Le mesuroit d'un terrible regard  
Le desdaignant, comme fait en sa voye  
Vn grand lion vne petite proye,  
Ne le voyant de corps massif ny fort,  
De fier visage ou d'effroyable port,  
De front seure aux ioustes bien à craindre,  
Ains d'un poil blond qui commençoit à poindre,  
De gresle taille, & d'œil serain & beau,  
De main douillette & de mignonne peau,  
Et d'un regard qui les graces surmonte :  
Il eut le front tout allumé de honte,  
Retint la bride & le tançoit ainsi.

leune garçon, on ne combat ici  
Pour remporter à sa mere la gloire  
D'un verd laurier : le prix de la victoire  
N'est ny Trepied ny Cheual ny Escu,  
Mais bien la vie & le sang du veincu,  
Et la ceruelle en la place espondue,  
Les os semez & la teste pendue,  
Pour estonner par si piteux effroy  
Ceux qui voudroyent combattre contre moy.

Si de mourir tu conçois vne enuie  
Comme ennuyé des malheurs de ta vie,  
« Tu es trompé, le temps viste en son tour  
« Fait & défait la fortune en vn iour :  
Il faut souffrir l'une & l'autre fortune,  
Demain la blanche & aujourd'huy la brune.  
Mais l'homme né d'un courage vaillant  
Doit acheuer sa fin en bataillant.  
Donc s'il te plaist d'une braue esriture  
Et d'un beau tiltre orner ta sepulture,  
Vien au combat, tu n'auras à desdain  
Quand tu mourras d'une si braue main.

*Tandis Francus qui le combat desire,  
Songneux dès l'aube auoit de sa nauire  
Fait apporter le harnois que vestoit  
Troïle à Troye, alors qu'il combattoit  
Contre Pelide, imitant la vaillance  
Du bon Hector, & non pas la puissance,  
Que pour present Helenin luy donna  
Le iour qu'au vent sa voile abandonna,  
Et le pria de garder telle armeure,  
Contre la mort assurance tresseure.  
Quand le Troyen au combat animé  
De teste en pied fut richement armé,  
Le bon Dicée en secret le conseille,  
Et loin à part luy s'acoute en l'oreille.*

*Si de fortune, hoste Troyen, les cieux  
De ce mechant te font victorieux,  
Et qu'à tes pieds tu l'abates à terre,  
Tranche luy tost la veine qui luy serre  
Le mol talon : de telle veine sort  
Non d'autre lieu la source de sa mort.  
Tandis là haut Iupiter qui ordonne  
Les faits humains, la victoire te donne :  
Ia dans le Ciel est filé par Clothon  
Qui de vous deux doit aller chez Pluton.*

*Ces Champions enflamez de colere,  
Ici Francus, de l'autre part Phouère,  
D'armes de taille & de courage grans,  
Donnans l'esprit aux cheuaux par les flancs,  
D'un masle cœur l'un sur l'autre coucherent,  
Et leurs pauois rudement embrocherent :  
Du coup donné le riuage trembla,  
Le mont fremit, le fleuve se troubla :  
Et par esclats les lances acérées  
Furent toucher les voûtes etherées.*

*Dedans les mains leur restoit le tronçon,  
 Qu'eux bien fermez & roides en l'arçon  
 De recourir encores s'auiserent,  
 Et leurs escus par le milieu briserent :  
 A iour ouuert la targe se cassa :  
 Comme vn glaçon le tronçon se froissa,  
 Et d'un tel heurt leurs eschines courberent  
 Que les destriers sur la croupe tomberent,  
 Tant d'un grand coup ils s'allerent choquant :  
 Puis iusqu'au sang leurs cheuaux repiquant,  
 Haussant la bride, en fin les releuerent,  
 Et de la main leurs coutelas trouuerent  
 Bien aiguisez, qui de l'arçon pendoyent,  
 Et de leur trempe vn harnois pourfendoyent.*

*Dessous le fer sifflant comme tempeste  
 Ores leur ioüe, ores sonnoit leur teste,  
 Ore la temple : vn coup qui l'autre suit,  
 Gresle menu descendoit d'un grand bruit,  
 Comme les fleaux qui resonnent en l'aire,  
 Frappans les dons de nostre antique mere.*

*Eux tournoyans & se suiuan de pres,  
 Versoyent des coups plus que la gresle espés,  
 Qui ne tomboyent soit de pointe ou de taille,  
 Sans donner ample ouuerture à la maille,  
 La desnoüant, rompant & descrochant :  
 Acier ne fer à leur glaiue trenchant  
 Ne peut durer, ny boucle ny couraye,  
 Tant de leur main est horrible la playe.*

*Du bon Troyen le cheual fut adroit,  
 Qui sans frayeur tournoit en tout endroit :  
 Et la cauale en crainte estoit frappée  
 Oyant l'effroy du sifflant de l'espée.  
 L'un ressembloit à ce flot \* dizenier,  
 Bouffi des vents, horreur du marinier,*

\* Dizenier.  
 Les Latins  
 l'appellent  
*Vnda decu-*  
*mana* : c'est  
 la dixième  
 vague, la  
 plus horri-  
 ble & dan-  
 gereuse de  
 toutes.

*Qui d'un grand branle en menaçant se vire  
Impetueux sur le bord du navire:  
L'autre sembloit au bon Pilote expert,  
Qui plus d'esprit que de force se sert,  
Ores la proüe ores la poupe il tourne,  
Et vigilant en un lieu ne sejourne,  
Ains adioustant l'experience à l'art  
D'un œil prudent euite le hazard.*

*Ce fier Tyran enorgueilli d'audace,  
Qui de Francus la ieunesse menace,  
Se roidissant sur les estriers, frappa  
Le fin armet du Troyen qu'il coupa  
Deux doigts avant, & l'estonna de sorte  
Que le tomber d'une enclume bien forte  
Seroit legier au prix de ce coup là,  
Qui des arçons chancellé l'esbranla.  
Car il fut tel, que la grand' coutelace  
Fendant l'armet alla dessus la place  
En maint esclat de flammes allumé,  
Laisant le poing du Tyran defarmé.*

*Francus troublé de pasmaison extrême  
Perdit la force en se perdant soy-mesme;  
Perdit raison contenance & couleur,  
Grinçant les dents de rage & de douleur:  
Et ce-pendant son cheual le promeine  
Comme il luy plaist au traugrs de la plaine.*

*Ce fier Gean, qui Francus regardoit,  
Sans se bouger riant le brocardeoit.  
Lors la palleur qui s'enfante de crainte,  
Des regardans auoit la face peinte,  
Et le sang froid qui au cœur s'assembla,  
Fit que Dicée en soupirant trembla.*

*Mais tout ainsi qu'on voit deux colombelles  
Fremir de peur & trembloter des ailes*

Sous l'esperuier aux ongles bien trenchans,  
Qui de leurs nids s'en-volent par les champs  
Cueillir de l'orge & de l'auoine, à paistre  
Leurs doux enfans qui ne font que de naistre :  
Ainsi trembloit en l'estomac de peur  
Le cœur transi de l'une & l'autre sœur,  
Qu'amour bruloit d'une viue flameche,  
Et en leur sang tenoit teinte sa fleche.

Tandis Francus en armes eut loisir  
De se refaire, & la place choisir  
Pour se venger, où le fer le plus rare  
Entre-serroit la gorge du Barbare.  
Trois quatre fois son cheual repiqua,  
Et d'un grand heurt son ennemi choqua,  
Tout furieux de colere & d'audace.  
Puis desgainant sa courbe coutelace,  
Droit contre luy sa face retourna,  
Et de la pointe un estoc luy donna  
Contre la gorge, où la boucle ferrée  
Du gorgerin laschement fut serrée,  
Et my-pasmé sur l'arçon l'abatit.  
Avec le sang l'escume luy sortit  
Loin de la gueule à gros flots ondoyante.  
Francus le prend, le presse & le tourmente,  
Et tellement le courage luy vient,  
Que d'une main & de l'autre le tient,  
Pousse & repousse, & d'un tel nœud le serre,  
Que des arçons tous deux tombent à terre  
Entre-accrochez, tant la fureur les suit :  
Dessus leurs dos le harnois fait un bruit !

Mais aussi tost que la terre ils presserent,  
Plus que deuant au combat s'eslancerent  
Comme lions de puissance indontez :  
Le fer trenchant sacquent de leurs costez,

Qui se cachoit en leur gaine yuoirine,  
Et forcenez s'entament la poitrine.  
Entre l'ardeur, la haine & les efforts  
Vne fureur leur reschauffa le corps.  
Ici la rage, ici la chaude honte  
Des champions le courage surmonte,  
Perd leur raison, si bien qu'à toutes mains,  
A vuides coups, à coups fermes & pleins,  
De pointe taille & de trauers ruerent,  
Et leurs plastrons en cent lieux déclouerent,  
Si que le camp estoit par tout semé  
Du fer jalli de leurs corps desarmé.

Mais à la fin tous deux prennent haleine  
Mattez de coups, de sueur & de peine:  
Puis tout soudain comme deux toreaux font,  
R'entrent de pieds & de bras & de front  
L'un contre l'autre: vne horreur, vne rage,  
Vn fier despit flamboyé en leur visage:  
Tantost petits, tantost ils se font grands,  
Tantost courbez, tantost à demy-flancs,  
Dessus la iambe ores gauche ore dextre  
Contre-auiſoyent où le coup pouuoit estre  
Mieux assené, mais point ne se trompoyent:  
Car tout d'un coup ils paroyent & frappoyent,  
Tous deux grauant au fond de leur memoire  
Le chaud desir de gagner la victoire.

Francus voyant que le iour luy failloit,  
Et que sa main pour neant trauailloit,  
Comme vn Gerfaut qui de roideur se laisse  
Caler à bas ouurant la nuë espaisse  
Dessus vn Cygne amusé sur le bord:  
Ainsi doublant effort dessus effort,  
Sur le grand corps s'eslance de rudesse,  
Adioustant l'art avecques la prouesse:

Sous luy se rue, & de pres l'attacha :  
La gauche main à son col accrocha,  
Et de la dextre en-contre bas le tire :  
Il le tourmente, il le tourne, il le vire,  
Le choque, heurte, & d'un bras bien tendu  
Le tient en l'air longuement suspendu :  
Puis du genou les iambes luy trauerse,  
Et le fist cheoir tout plat à la renuersè.  
Phouère imprime en tombant de son long  
La poudre molle : ainsi tombe le tronc,  
Qu'un vent abat du haut de la montagne,  
Qui tout à plat s'estend sur la campagne.

De bras de teste & d'ongles bien crochus  
Cent fois essaye à se remettre sus,  
Se debatant, mais en vain il s'efforce :  
Car du Troyen la vigoureuse force  
Tient le genou, comme victorieux,  
Sur l'estomac, le poignard sur les yeux.  
Trois quatre fois de toute sa puissance  
L'auoit frappé, quand il eut souuenance  
Que le trespas de ce cruel felon  
Estoit enclos aux veines du talon :  
Pource il se tourne, & promptement assene  
L'endroit certain où treffaillloit la veine :  
Du fer poignant coup sur coup la chercha,  
Et veine & vie ensemble luy trancha.

Le sang qui sort d'une rouge secouffe,  
Bien loin du corps rendit la terre rousse  
A longs filets : ainsi que d'un conduit  
S'eschappe l'eau qui iallissant se suit,  
Et d'une longue & filante rousée  
Baigne la terre à l'entour arrousée :  
Ainsi le sang bouillonnant s'en-alla,  
Et par le sang son ame s'escoula,



*D'horreur de rage & de chagrin suiuite,  
De perdre ainsi la ieunesse & la vie.*

*Ce corps tout froid & affreux se roidit :  
Comme vn glaçon l'estomac luy froidit,  
Et de ses yeux l'une & l'autre prunelle  
Ferma son iour d'une nuit éternelle,  
N'estant plus rien de Phouère, sinon  
Qu'un tronc bronché, sans face ny sans nom.*

*A tant Dicé d'une face ioyeuse  
Vint saluer la main victorieuse,  
Baïsa Francus, le couronna de fleurs :  
Tu as (disoit) effacé mes douleurs,  
Vray heritier de la gloire Héctorée,  
Tuant Phouère, & sauuant mon Orée :  
Le bon Démon qui de nous a souci,  
Pour mon support t'a bien conduit ici,  
Noble Troyen de proïesse l'exemple,  
En corps mortel digne d'auoir vn temple,  
Et comme Hercule adoré des humains,  
Tant a d'honneur la force de tes mains.*

*Comme il chantoit cest Hymne de victoire,  
Voici la nuit à la courtine noire  
Qui vint aux yeux le sommeil espancher :  
Le bal fini chacun s'alla coucher.*

FIN DV SECOND LIVRE.







## LE TROISIESME LIVRE

### DE LA FRANCIADE.

---

*L'humide nuit qui d'un sommeil enferme  
Les Dieux au Ciel les hommes en la terre,  
Laisant couler lentement sur les yeux  
Vne vapeur du fleuve Stygieux,  
Des animaux engluoit les paupieres,  
Trompant le soin des peines journalieres.  
Mais le dormir qui tient les yeux sillez,  
Glissant n'auoit ses presens distilez  
Dessus le chef des deux sœurs esueillées,  
D'espoir de crainte & d'amour trauaillées.  
Adonc Hyante à sa sœur parle ainsi.*

*D'où vient, ma sœur, que ie suis en souci,  
Que ma raison a perdu sa puissance,  
Que mon penser d'un autre prend naissance,  
Que ie m'esgare & qu'un nouuel esmoy  
Me rauit toute & m'en-vole de moy ?  
Ie ne tiens plus de mon cœur que l'escorce :  
En moy se loge vne puissante force*

*Que ie ne puis ny sçauoir ny nommer,  
Si ce n'estoit le mal qu'on dit aimer.  
En mes discours ie m'efforce à comprendre  
D'où vient ma peine, & si ne puis l'entendre :  
Bref ie n'ay peu ny boire ny manger  
Depuis le iour que i'ay veu l'estranger,  
Tousiours pendue en sa blonde ieunesse  
D'œil ou d'esprit : maugré moy ie confesse  
N'auoir iamais senti' telle douleur,  
Qui me fait perdre & sommeil & couleur.*

*Depuis vn iour ie suis toute esperdue,  
Me consommant comme neige fondue.  
Ah ie me meurs ! mon mal pourtant me plaist,  
Et ne puis dire en quelle part il est :  
Sans s'arrester mon esprit est volage :  
De ce Troyen tousiours le beau visage,  
L'honneur la grace en l'ame me reuient :  
Tousiours tousiours & tousiours me souuient  
De son combat, & de sa main guerriere  
Qui l'accompagne en sa barbe premiere.  
Pere des Dieux, quelle aimable vertu !  
Quel port il a ! comme il s'est combatu  
Pour le secours de nostre frere Orée !  
Il est vraiment de la race Hectorée !  
Sa main sa force & son cœur genereux  
Monstrent assez qu'il est du sang des Preux.  
Si i'estois libre, & si i'auois puissance  
De viure à moy, ie ferois alliance  
Par mariage à ce ieune Troyen.  
Plustost le feu du grand Saturnien  
Tombé menu sur mon chef me foudroye,  
Plustost la terre en se creuant m'enuoye  
Sous les enfers ma demeure choisir,  
Que mon honneur soit trompé d'un plaisir,*

*Et que peu sage ainsi ie me marie  
Sans le congé de ceux qui m'ont nourrie.*

*A tant se teut : Le cœur luy est failli,  
Comme ruisseaux les larmes ont sailli  
De ses beaux yeux, presages de sa peine,  
Quand d'autre part luy respondit Clymene,  
Qui moins n'ardoit de secrette langueur  
Pour le Troyen qui luy bruloit le cœur.  
Mais plus que l'autre elle estoit auisée,  
Qui ne vouloit vne amour diuisée,  
Ains vouloit seule en toute affection  
Dame iouyr du cueur de Francion :  
Pource en mentant par vn grand artifice  
Luy conseilla que l'amour estoit vice :  
Ainsi son mal par fraude elle cacha,  
Et l'inconstance à sa sœur reprocha.*

*Où sont, ma sœur, ces responces hautaines  
Que tu rendois à tant de Capitaines,  
Princes & Rois, que pour ses gouverneurs  
Crête nourrit en pompes & honneurs ?  
Qui travaillez d'une amoureuse flame  
Tous à l'enui te courtisoyent pour femme ?  
Quoy ? seulement d'un courage endurci  
Ne desdaignois ces maris, mais aussi  
Tu mesprisois les hommes dont l'audace  
Est trop cruelle encontre nostre race.  
Quoy ? disois-tu : comme vn superbe Roy  
L'homme contraint les femmes à sa loy :  
Non seulement les estime inutiles  
A gouverner les sceptres & les villes,  
Mais sans honneurs & sans point commander  
Les fait filer, les laines escarder,  
Ourdir & coudre, & de paroles braues  
En son foyer les tance comme esclaves.*

Qu'heureuse fut Lemnos au temps passé,  
 Où le pouuoir des hommes fut cassé  
 Par la finesse & prouësse des femmes,  
 Si que les noms des hommes estoient blâmes !  
 A labourer les terres ils seruoient  
 Sans autre charge, & les Dames auoyent  
 Entre leurs mains le fait de la police,  
 Le magistrat, les loix, & la iustice.  
 Où sont ces mots ? où est ce cœur si haut ?  
 A ton besoin le courage te faut,  
 Qui maintenant à la premiere veüe  
 D'un estranger as l'ame toute esmeüe,  
 Et veux ton nom sans raison diffamer  
 Pour un pirate un corsaire de mer  
 Qui va cherchant par les ondes sa proye  
 Sous faux-semblant de refaire vne Troye :  
 Et par amour espiant la saison  
 De desbaucher les filles de maison,  
 Au premier vent loin d'amis les emmene  
 Pour les laisser sur quelque froide arene :  
 Car estant soul de son premier plaisir,  
 Et ne voulant que changer & choisir,  
 Les abandonne & sans tenir promesse  
 Marche fuitif où l'orage le presse.

De tel malheur l'exemple encore vit  
 En ce païs, d'Ariadne qui suiuit  
 Maugré Minos, le pariure Thesée,  
 Tant elle fut à prendre bien aisée.  
 Mais tout soudain ce pirate mechant  
 De son serment & d'elle se faschant,  
 La quitta seule au matin endormie,  
 Proye des loups au riuage de Die.  
 Pource, ma sœur, d'un soin prudent & prompt  
 L'honneste honte attache sur le front,

Et sans toy laisse errer à l'avanture  
Des estrangers la teste trop pariure.

Ainsi disoit dissimulant, à fin  
De la tromper : mais Amour le plus fin  
Qui ne se trompe, & qui passoit en elle  
De nerfs en nerfs, de mouëlle en mouëlle,  
La faisoit caute en son mal nompareil,  
Qui ne vouloit ny raison ny conseil.

A tant du iour la lumiere sacrée  
Dedans la chambre estoit par tout entrée,  
Quand ces deux sœurs, ainçois deux beaux printemps  
Sortent du liēt : ils demeurent long temps  
A se peigner, s'atiffer, & à faire  
Par le miroir un visage pour plaire :  
En cent façons ils tordent leurs cheueux  
Ondez crespéz entre-frisez de nœuds,  
Et d'un long art mille beautez s'attachent :  
Puis tout le chef d'un guimple elles se cachent,  
Qui bien plissé iusqu'aux pieds leur pendoit,  
Et un parfum par la chambre espandoit.

Ces belles sœurs en ce poinēt habillées,  
D'un pas superbe au temple sont allées  
Pour consulter à l'oracle des Dieux  
Sur la santé de leur mal ennuyeux :  
Ou s'ils vouloyent d'une main fauorable  
Guarir leur playe aux hommes incurable,  
Ou s'ils vouloyent mespriser sans secours  
Leurs passions diuerset en amours,  
Et sans espoir entretenir leurs flames.

De toutes parts vne suite de Dames  
Les entournoit : elles marchoyent d'un train  
Tel qu'Artemis Deeſſe au large sein,  
A qui la trouſſe & le bel arc ensemble  
Chargent le dos, lors que sa feste assemble



*Vn grand monceau de Nymphes en vn rond  
L'accompagnant : d'espaules & de front  
Elle apparôist plus haute que sa troupe,  
Menant le bal sur la pineuse croupe  
Du mont Taigete, ou sur l'esmail d'un pré  
Du fleuve Eurote à son frere sacré.*

*Or' ces deux sœurs malades & peu sages  
Dedans le temple au deuant des images  
Des puissans Dieux tristes se pourmenoyent :  
Ores les yeux fichez elles tenoyent  
Sur la victime, & courbes & béantes  
Prenoyent conseil des entrailles tremblantes,  
Or' les gestiers decoupez regardoyent,  
Et l'aduenir aux Deuins demandoyent.  
Hâ pauvres sœurs mal-saines de pensées !  
Ny pleurs ny vœux ny offrandes laissées,  
Ny tournoyer des autels à l'entour  
Ne guarit point le mal que fait amour !*

*La belle Hyante auoit en sa main blanche  
Vn vase d'or plein de vin, qu'elle espanche  
Au beau milieu des cornes & du front  
De la victime : & Clymene qui tond  
Le poil sacré de la beste le iette  
Dedans le feu : Comme ce poil craquette,  
Ce disoit-elle, & brule tout en soy,  
Ainsi Francus puisse bruler de moy.  
Mais pour-neant ces deux sœurs abusées  
Prioyent au temple en leurs vœux amusées :  
Les Dieux malins leurs priers n'escoutoyent,  
Ains sans effect les vents les emportoient.*

*Adonc Francus que le souci resueille,  
S'estoit leué deuant l'Aube vermeille :  
Du cuir pelu d'un Ours il se vestit :  
Le dard au poing de la chambre sortit*

*A front baiffé. Vandois, d'où vint la race  
Des Vandomois, le suiuiot à la trace.  
Lors se laissant en larmes consumer,  
S'alla planter sur le bord de la mer:  
Et iettant l'œil sur les eaux Tethyennes,  
Il regardoit si les barques Troyennes  
Venoyent à bord: puis voyant le vaisseau  
Qui le portoit \*échoüé deffous l'eau  
Demi-couuert de falaize & de bourbe,  
Les yeux au ciel sur le riuage courbe  
Poussant du cœur maints sanglots en auant,  
Parloit ainsi aux ondes & au vent.*

\* Mot de  
marinier.

*Heureux trois fois les hommes, que la terre  
En son giron, mere commune, enserre  
D'un eternal & paisible sommeil:  
Si comme nous ils n'ont part au Soleil,  
Ils n'ont aussi le soin qui nous martire,  
Ny le desir de grandeur ny d'empire.  
Ce piquant soin, dont le desir me suit,  
Me fait chercher la Gaule qui me fuit,  
Terre estrangere, & qui ne veut m'attendre,  
Que du seul nom i'ay prise sans la prendre.*

*Je suis (ie croy) la maudisson des Dieux,  
Sans demeurence errant de lieux en lieux,  
De flot en flot, de naufrage en naufrage,  
Ayant le vent & la mer en partage,  
Comme un plongeon, qui en toute saison  
A seulement les vagues pour maison,  
Des flots salez il prend sa nourriture,  
Puis un sablon luy sert de sepulture.*

*Donne Apollon, maistresse Deité  
De ceux qui vont bastir une cité,  
Quelque bon signe, à fin que tu m'ottroyes  
Des murs certains apres si longues voyes.*

*Si ie ne puis les Gaules conquerir,  
Sans plus errer puiffé-ici mourir  
Enuelopé d'une horrible tempeste :  
Aux Dieux marins victime soit ma teste  
Pour sacrifice agreable à la mort,  
D'un peu de sable en-tombé sur ce bord.*

*Il dist ainsi, quand hors des flots humides  
Sortit le Chœur des cinquante Phorcycdes,  
Et tout le front de Glaucque & Melicert,  
Et Palémon à l'habillement verd,  
Le vieil Triton à la perruque bleüe,  
Homme d'enhaut & poisson par la queüe,  
Tenant és mains pour sceptres leurs tridens,  
Poussent la nef de Francus au dedans  
Du prochain port : la nauire poussée  
Ayant la proüe & la poupe froissée  
Alloit à force : ainsi que le serpent  
Qui sur le ventre à peine va rampant,  
Quand un passant du coup d'une houssine  
Luy entre-rompt les ressorts de l'eschine,  
Plis dessus plis en cent ondes retors  
Retraîne tire & retourne son corps,  
Il sifle aigu, son venin il remasche,  
Et renouïer ensemble se retasche :  
Mais pour-neant : car son dos est perclus.  
Ainsi marchoit le bateau de Francus.*

*Hors du troupeau bien loin s'est escartée  
Leucothoé la fille de Protée,  
A qui Phebus pour mieux l'autoriser,  
Donna iadis l'art de prophetiser :  
Ses longs cheveux erroyent sur la marine :  
Haute à fleur d'eau elle auoit sa poitrine :  
Puis regardant le Troyen tout transi,  
De luy s'approche, & le console ainsi.*

Enfant royal, qui dois donner naissance  
« A tant de Rois, la seule patience  
« Rompt la fortune, & mal ne peut s'offrir  
« Qui ne soit doux quand on le veut souffrir.  
« Sois courageux : toute rude auanture  
« Par trait de temps est douce s'on l'endure :  
Pour endurer Hercule se fit Dieu.  
Tu planteras ta muraille au milieu  
Des bras de Seine, où la Gaule fertile  
Te doit donner vne isle pour ta ville,  
Gaule abondante en peuples redoutez,  
Peuples guerriers, aux armes indontez,  
Que telle terre & plantureuse & belle  
Riche nourrit d'une grasse mammelle.

Or puis qu'Amour te veut fauoriser,  
Son beau secours tu ne dois mespriser :  
Va courtiſer la iouuencelle Hyante  
Fille du Roy, qu'Hecate la puissante  
A fait prestresse en son temple sacré.  
Amour qui fait toute chose à son gré,  
La maistrisant luy naure le courage  
D'un poignant trait tiré de ton visage.  
Par sa magie elle peut attirer  
La Lune en bas, le Ciel faire virer  
A reculons, & des fleuves les courses  
Encontre-mont rebrouſſer à leurs sources :  
D'un clair midi elle fait vne nuit,  
Deſſous ſes pieds la terre fait vn bruit  
Quand il luy plaist, & ſon charme commande  
Aux infernaux, & à toute la bande  
De ces eſprits qui deſdaignans les bords  
De l'eau d'Oubli, re-vont en nouveaux corps.  
Elle qui vit de ton amour gaignée,  
Te fera voir ta future lignée,

*Et tous les Rois qui sortiront de toy  
Forts à la guerre & prudens à la loy,  
Qui d'un long ordre en extreme puissance  
Tiendront un iour le beau sceptre de France.*

*Mais ce-pendant que tu pleures en vain  
Rongeant ton cœur d'un genereux desdain  
Sur ceste riue escumeuse & deserte,  
Ah! malheureux tu as fait une perte  
D'un cher ami qui tousiours te suiuoit,  
Et dans son cœur le tien mesme viuoit  
Seur compagnon de ta fortune amere.  
Las! il n'est plus: lunon par sa colere  
L'a fait mourir d'estrange mort, à fin  
Qu'elle empeschast le cours de ton destin,  
Mais elle en vain se roüille de rancune.  
« La destinée est plus que la fortune.*

*Va d'un pied viste, & le fais enterrer:  
Son libre esprit ne laisse plus errer  
Dessus le corps sans auoir sepulture,  
Qu'il ne te soit un malheureux augure.  
Serf sous ta main tout le monde il eust mis,  
Si la Deesse enuieuse eust permis  
Qu'il eust en Gaule ordonné ton armée.  
« L'homme n'est rien qu'une vaine fumée!*

*A tant la Nymphé en parlant deu ala  
Son chef sous l'eau: l'onde qui ça qui là  
Flot dessus flot en se ridant grommelle,  
D'un long tortis l'engloutit dessous elle.*

*Tandis Dicé' que le soin tient rauï,  
De Fracion les pas auoit suiui:  
Deux grans léuriers yssus de bonne race,  
(Fidelle guet) le suiuyoient à la trace.  
En l'abordant d'un visage adouci,  
Luy prist la dextre & le salue ainsi.*

Prince Troyen, dont la vertu premiere  
 Du pere tien efface la lumiere,  
 Quand mon pais en deux ie partirois,  
 Et d'une part honoré ie t'aurois,  
 Encor' beaucoup ie serois redeuable  
 A ta vertu, qui n'a point de semblable.  
 Tu as sauué mon enfant du danger :  
 Seul tu as peu du Tyran me vanger,  
 Monstre cruel, engeance de malice,  
 Mocqueur des Dieux, mespriseur de iustice,  
 Qui m'ahontant de toute indignité,  
 De son harnois estonnoit ma cité.

Ie t'offrirois en lieu de ta proïesse  
 Vn grand amas de pompeuse richesse  
 Bagues, lingots, coupes d'or & vaisseaux :  
 Mais tu ne veux, ô fleur des iouuenceaux,  
 Ta vertu vendre à si fresse despenſe :  
 Le seul honneur te plaist pour recompense.  
 Le seul honneur en l'antique saison  
 Assiſt Theſée, Hercules & Iason  
 Dedans le Ciel, & ie t'ose promettre  
 Que ta proïesse encores te doit mettre  
 Nouvelle estoile aupres de tes ayeux  
 Que la vertu enrolle entre les Dieux.  
 Pource, estranger, la richesse mesprise,  
 Ne rouille point ton cœur de conuoitise,  
 Et comme Prince aux armes bien appris,  
 De tes labeurs louange soit le prix.

Entre les biens que fortune labile  
 M'a concedez, i'ay une chere fille,  
 Qui de beauté ne fait place à Venus,  
 Dont ja les ans accomplis sont venus  
 Qu'elle doit estre en fleur d'âge menée  
 Dessous la loy du nopcier Hymenée.

*Si son printemps ne te vient à desdain,  
loins par serment ta main dedans sa main,  
Et de vous deux alliance se face.  
De tel accord pourra naistre une race  
Grande en honneurs, de ceste terre Rois,  
D'où tes ayeux sont issus autrefois :  
Car si on croit à nostre vieille annale,  
Crete de Teucres est la terre natale.  
Ainsi Dicée en le tentant luy dit,  
Quand Francion luy contre-respondit.*

*Prince Cretois, qui à bon droit te vantes  
D'estre sorti de ces vieux Corybantes,  
Qui par la loy, ame de la cité,  
Gardoyent leur sceptre en tranquille unité :  
Puis qu'il t'a pleu breuement me semondre,  
En peu de mots il me faut te répondre.*

*Vn souuenir viura tousiours en moy  
Pour tant de biens que j'ay receus de toy,  
Qui pauvre & nud, le iouët du naufrage,  
Ne m'as permis seulement ton riuage,  
Mais assurant ma fortune & mon cours,  
M'as présenté ta fille & ton secours.  
Or si j'auois puissance sur ma vie,  
Si du destin elle n'estoit rauie,  
Et si j'estois porté de mon plaisir,  
Je ne voudrois ton royaume choisir :  
Mais au contraire impatient de ioye  
J'irois chercher encor ma vieille Troye,  
Et me plairoit entre les vieux tombeaux  
De mes ayeux bastir des murs nouveaux,  
Et r'habiter la cendre de mes peres :  
Mais les destins auteurs de mes miseres  
Contre mon gré me trainent, & me font  
Enfoncer l'œil & abaisser le front,*



*Et sans gronder souffrir à bouche close  
Tous les malheurs que le ciel me propose !  
Ce fier destin la Gaule me promet,  
Qui seulement marier me permet  
En Germanie, & non en autre place :  
Du sang Troyen mêlé parmi la race  
Du sang Germain, des Rois doiuent sortir,  
Qu'on me promet le monde assuiettir,  
Dont les vertus, triomphes & victoires  
Tout l'univers rempliront de leurs gloires.  
Donne sans plus à ce Prince Troyen  
Des charpentiers, du bois, & le moyen  
De rebastir une flotte nouvelle  
Pour retenter la fortune cruelle,  
Par qui ie suis maugré moy surmonté,  
Faute de force, & non de volonté.*

*Il dist ainsi : Dicée qui prend garde  
A son maintien, tout estonné regarde  
D'yeux & d'esprit ce Troyen qui parloit,  
Et l'admirant pour gendre le vouloit.  
Comme ils disoyent, voici venir Orée,  
Qui pour pomper la victoire honorée,  
Et pour aux Dieux s'acquiter de ses vœus,  
Dedans un parc auoit choisi cent bœufs  
Au large front, agreables offrandes,  
Entiers & sains, victimes les plus grandes :  
Et pres la ville en un bocage saint  
Manoir des Dieux, religieux & craint,  
Les amena (on dit qu'en ceste place  
Minos parloit à lupin face à face,  
Quand il prenoit les loix de ce grand Dieu : )  
Il mit de rang les cent bœufs au milieu  
Du verd bocage, & de gazons il dresse  
A la Victoire un autel d'allegresse.*

Puis d'un pied libre errant en diuers lieux  
Il amusoit son esprit & ses yeux  
A regarder s'il verroit d'auanture  
Quelque grand arbre esgayé de verdure.  
Non gueres loin sur le tertre prochain  
Vit à l'escart un chesne au large sein,  
Aux larges bras, dont les branches fueillues  
D'un chef superbe alloyent iusques aux nues,  
De ses rameaux tout le chesne esbrancha,  
Et sur la cyme en trophée attacha  
Du mort Gean les armes despouillées,  
Cuiffots sanglans, gréues de sang mouillées,  
Maille, plastron, gantelets & brassars,  
Les esperons, le poignard & les dars,  
La dure espée, & l'effroyable creste  
Du morion gardien de la teste.  
Deuant l'autel les bœufs il assomma :  
Le sang qui sort à gros bouillons fuma  
Sous le couteau meurtrier de la poitrine :  
L'un la peau crue arrache de l'eschine,  
L'un les estrippe, & l'autre peu à peu  
Pour les rostir allumoit un grand feu :  
Dedans le ciel en voloit la fumée !  
Quand par le feu l'humeur fut consumée,  
D'ordre en son rang un chacun s'approcha,  
Et pour manger sur l'herbe se coucha :  
Le vin se verse, & l'escumeuse coupe  
De main en main erre parmi la troupe,  
Que de bon cœur s'inuitant receuoient,  
Et la moustache en la tasse lauoyent.

De la cité les Dames honorables  
Sortans dehors en robes venerables,  
Et serenans le ciel de leurs regars,  
Les mains ensemble à petits bons gaillars

*Menoient le bal : Terpin qui les deuance,  
Tout le premier accordoit la cadance,  
Chantant cest Hynne, & mariant sa vois  
Au luth poussé du trembler de ses doigts.*

*Fille du ciel inuincible Victoire,  
Dont les habîts sont pourfilez de gloire,  
D'honneur de pompe, & dont le front guerrier  
Est illustré de pâlme & de laurier :  
Qui dauant toy fais broncher les murailles,  
Qui pens douteuse au milieu des batailles,  
Que la frayeur & l'esperance suit,  
Qui tout le monde estonnes de ton bruit,  
Quand le Renom aux ailes emplumées  
Seme par tout l'effroy de tes armées,  
Lors que chacun en tremblotant du cœur  
Attend suspens qui sera le veinqueur.*

*Le sang, la mort, la cholere acharnée,  
Et des soldats la licence effrenée,  
Et le mespris des grands Dieux immortels  
Suiuent ton char : ce neantmoins tu es  
Mere des Rois des sceptres & des villes :  
Tu fais germer les campagnes fertilles,  
Et foisonner les coutaux de raisins,  
Honneur des tiens crainte de tes voisins.*

*Deuant ton char que la Crainte enuironne,  
Marche Enyon & la fiere Bellonne,  
Et la leunesse au sang chaud & vermeil,  
Et le Peril qui n'a point de conseil.*

*Sans ton secours Mars ne pourroit rien faire,  
Des fiers Titans tu fus seule aduersaire,  
Lors que ta mere vn harnois te donna :  
Pource lupin d'honneur la couronna,  
Et ne voulut par promesse asseurée  
Que desormais son eau fust pariurée.*

*Escoute moy vieille race des Dieux :  
 Du bon Francus les faits laborieux  
 Engraue au ciel à lettres immortelles :  
 En sa faueur romp le vol de tes ailes,  
 Et le sauuant de honte & de mechef,  
 Suy-le tousiours, & luy pens sur le chef.*

*Il dist ainsi : la ioyeuse assemblée  
 A iusqu'au ciel la chanson redoublée :  
 Tous les coutaux & les bords d'alentour  
 Ne resonnoient qu'alegresse & qu'amour.*

*Finis les vœux qu'on rendoit à Victoire,  
 Voicy Venus à la paupiere noire,  
 Qui du haut ciel precipitant la nuit,  
 Vint des deux sœurs enuironner le lit.  
 Elle se change en la vieille prestresse  
 Qui sous-ministre auoit de la Déesse  
 Autels & temple en venerable soin :  
 Tousiours au guet elle escoutoit de loin  
 L'abboy des chiens, qui d'Hecate cornue  
 Es carrefours annonçoient la venue,  
 Quand à trois fronts affreuse elle arriuoit  
 Dedans son temple, où l'effroy la suiuiot.*

*En se couchant sur le cheuet d'Hyante  
 Luy dist ainsi : D'un chesne d'Erymante  
 Ou d'un rocher le rampart de la mer,  
 Daignes-tu bien ta poitrine enfermer ?  
 As-tu succé des ourses la mammelle ?  
 As-tu le cueur d'une louue cruelle,  
 Cueur sans amour, sans grace ny mercy ?  
 Qui du Troyen n'as pitié ny soucy,  
 Pauvre Troyen qui a laissé sa terre,  
 Non comme il dit pour les Gaules conquerre,  
 Mais tout rauy du bruit de ta beauté  
 A de la mer veincu la cruauté*

*Pour voir ta face, & s'il estoit possible,  
Se ioindre à toy d'un lien inuincible:*

*Et toutefois fiere de son ennuy*

*Tu vois sa playe & te moques de luy.*

*Disant ainsi, de sa belle ceinture  
Du liect d'Hyante encerna la closture.*

*Ceste ceinture estrangement pouuoit,*

*Que la Nature en se ioüant auoit*

*De sa main propre à filets d'or tissue:*

*Et d'elle en don Venus l'auoit receue,*

*Quand le boiteux Lemnien tant osa*

*Que pour sa femme au ciel il l'espousa,*

*Dont est sorty tout l'estre de ce monde:*

*Tout ce qui nouë au plus profond de l'onde,*

*Ceux qui d'une aile en l'air se font un train,*

*Tout ce qui paist la terre au large sein,*

*Tout animal cazanier & sauuage*

*Fut enfanté de ce grand mariage.*

*Quand la ceinture eut versé sa vertu*

*Dessus le lit, le feu qui n'auoit eu*

*Entier effect au cueur des damoiselles,*

*Se r'enforça de larges estincelles,*

*De nerfs en nerfs, d'os en os prist vigueur,*

*Puis tout soudain se fit roy de leur cueur.*

*Incontinent que la belle iournée*

*Chassant la nuit au ciel fut retournée,*

*Le bon Troyen souspirant sans confort*

*Feit apprestier les obseques du mort.*

*Il se frapport de regret la poitrine,*

*Se souuenant que la Nymphe marine*

*L'auoit enioint dès le iour enterrer*

*Son cher amy, & ne laisser errer*

*Dessus le corps l'esprit à l'auanture,*

*Qu'il ne seruist de malheureux augure.*

« L'esprit humain qui son hoste a laissé,  
« N'est pas heureux si Styx il n'a passé :  
« L'honneur du corps dont la vie est cassée,  
« Est & l'obsequé, & la terre amassée  
« Sur le tombeau qui finit les douleurs,  
« Et des amis les regrets & les pleurs.

Premierement on explane une place  
Large en quarré de cent coudes d'espace,  
Où au milieu on assemble un bucher,  
Puis sur la cyme un lit pour le coucher.  
Par les forests d'une penible traite  
Va haut & bas mainte large charette,  
Qui gemissant sous le faix, apportoit  
Le bois coupé que le fer abatoit :  
Avec les coins le chefne bon à fendre  
Trebuche icy : on laisse là descendre  
Avec grand bruit de la cyme des monts  
Trembles ormeaux & tils aux larges fronts :  
Le sapin tombe & le pin plus utile  
Pour veoir la mer : puis on dresse une pile  
Haute de bois nourrissons des forests.  
Tous les costez sont parez de cyprés,  
Le bas de Tede, & de chefne le feste :  
Dedans le ciel le bucher a la teste !

Sur ceste pile au plus haut du sommet  
Plein de parfums, en larmoyant on met  
Le corps du mort, office charitable !  
Tout ce qu'il eut en sa vie agreable  
Y fut ietté, sa rame & son escu,  
Outils de l'art dont il auoit vescu.  
Francus qui tient une torche fumeuse,  
Boute le feu : la flameche gommeuse  
D'un pied tortu rampant à petit saut  
En se suiuant s'en-vole iusqu'au haut :

Le bois craquette, & la pile allumée  
 Tomba sous elle en cendres consumée,  
 Le vent soufflant du soir iusqu'au matin.  
 Incontinent le vieil prestre Mystin,  
 Qui du corps mort soigneux auoit la garde,  
 Laue la braise & la cendre boiuarde,  
 Choisit les os & les enferme au sein  
 (Sacré repos) d'un vase fait d'airain :  
 Puis arroussa par grand' ceremonie  
 D'une sainte eau trois fois la compagnie :  
 Les derniers mots de l'obsequ acheua,  
 A tant se teut, & le peuple s'en-va.

Francus qui veut sous les ombres descendre,  
 Tond ses cheveux, les iette sur la cendre  
 Du trespassé, cent fois la rebaisant :  
 Cher compaignon, pren de moy ce present,  
 Triste tesmoin de ma fatale perte.  
 Puis à plein poing la cruche il a couuerte  
 De ses cheveux qu'il auoit autrefois  
 Vouez au Dieu qui baigne les François,  
 Blasmant la mort d'une plainte profonde,  
 Qui rien de bon ne laisse viure au monde.

Tandis les sœurs d'un regard tout rauy  
 lettoient les yeux & le cœur à l'enuy  
 Sur ce Troyen, dont les larmes iettées  
 Auoient beaucoup les graces augmentées.  
 Bref le voyant si charitable & fort,  
 Plus que deuant Amour gaigna le fort  
 De leur raison, & sa fleche laschée  
 Non plus aux yeux, ains au cueur fut cachée.  
 Mais plus Clymene au sang elle touchoit,  
 D'autant que plus sa flame elle cachoit.

De toute chose elle perd la memoire :  
 Son esprit plein d'une tristesse noire



*L'effaroucha d'imaginations,  
Troublant son sang d'estranges passions.  
D'un feu couuert elle escoule ses peines  
Aux nerfs, aux os, aux muscles & aux veines,  
Et dans le foye, où la playe se fait  
Grande en douleur, quand Amour de son trait  
Blesse vn amant: si que depuis la plante  
Iusqu'à la nuque, vn soucy la tourmente  
Point frape bat. Elle qui sent parmy  
Ses propres os loger son ennemy,  
Pense & repense & discourt en sa teste:  
Son penser vole & iamais ne s'arreste,  
Deçà delà virant & tournoyant  
Comme l'esclair du Soleil flamboyant  
Qui rebat l'onde à lumiere eslançee  
Dans le giron d'une cuue versée:  
Ce prompt esclair ore bas ores haut  
Par la maison sautelle de maint saut,  
Et bond sur bond aux soliveaux ondoye  
Pirouëtant d'une incertaine voye,  
Ioyeux de voir ses longs rayons espars  
De place en place errer de toutes pars.*

*Ainsi discourt sans arrest de pensée  
De trop d'amour la pucelle offensée:  
Sur vn penser vn autre redoubla,  
Mais cestuy-cy le meilleur luy sembla:  
Ce fut de prendre une chambre segrette,  
Et loin à part pleurer toute seulette.  
Dessus vn coffre à bouche se coucha:  
Puis quand sous l'eau le Soleil se cacha,  
Se iette au lit: le sommeil qui la presse,  
Fit pour vn temps à son mal prendre cesse.  
Mais pour-neant: car le songe trompeur  
Entre-meslant l'esperance en la peur*

*Vint l'effroyer, comme il a de coustume  
D'effroyer ceux de qui la playe fume  
Dessous le cueur, quand le mal chateureux  
Par le sang traine un ulcere amoureux.*

*Elle songeoit pleine d'amour extresme  
Entre-dormant, que Francus de soy-mesme  
Auoit pris bord en Crète pour ofer  
Prier son pere afin de l'espouser,  
Et que la dextre en la dextre ayant mise  
De l'estranger, la luy auoit promise :  
Que par courroux desdit il s'en estoit :  
Que le Troyen pour elle combattoit  
A toute force, & que tout bouillant d'ire  
La trainoit seule en sa creuse nauire  
Bien loin de Crète en la profonde mer,  
Et que son pere ardent faisoit armer  
Mille vaisseaux afin de la poursuiure,  
Et le larron ne laisser ainsi viure :  
Que le riuage estoit remply de feus,  
D'armes de nauz & de peuples esmeus,  
Faisant grand bruit, & ce bruit la resueille.  
Or comme Amour traistrement la conseille,  
Deuant le iour hors du liêt se leua,  
Et de sa chambre à tastons elle va  
Touchant les murs d'une main incertaine,  
Et r'amassa son esprit à grand' peine,  
Que le sommeil du corps luy destacha :  
Puis de rechef au liêt se recoucha,  
D'amour, de peur & de rage frapée,  
Où de rechef le songe l'a trompée.*

*Tousiours au cueur Francus luy reuenoit,  
Et le maintien qu'en parlant il tenoit,  
Quel geste il eut, quel port & quelle face,  
Et quelle fut la douceur de sa grace,*

Quelle sa robe, & quel fut son parler,  
Ses doux regards sa taille & son aller,  
Son menton cresp & sa perruque blonde :  
Elle pensoit qu'il n'y eust Prince au monde  
Pareil à luy : tousiours sa douce voix,  
Ses doux propos & ses deuis courtois,  
Comme pasmée & pleine de merueille,  
Coup dessus coup luy refrapportoient l'oreille.  
Aucunefois elle songeoit errer  
Par les deserts, & seule s'esgarer  
Entre rochers, riuieres & bocages  
Sans compagnie entre bestes sauuages,  
Et que Francus amoureux estranger  
Le fer au poing la sauuoit du danger.  
Aucunefois apres l'auoir vangée  
L'offroit aux loups, afin d'estre mangée,  
Puis derechef de leurs dents la sauuoit,  
Et son secours luy nuisoit & seruoit.  
Toute en sursault elle s'est refueillée :  
Nuds pieds, sans robe, affreuse, escheuillée.  
Puis s'acoudant à la reigle d'un banc,  
Mille souspirs repoussa de son flanc.

Pauurette moy ! comme toute esmayée  
M'ont ceste nuit les songes effrayée !  
L'ame m'en tremble, & le cueur m'en debat :  
Crainte & amour me font vn grand combat.  
Certes ie suis toute autre deuenue  
Que ie n'estois : ie crain que la venue  
De ce Troyen ne m'apporte malheur  
Autant qu'il fait en songeant de douleur !  
Tousiours i'y pense ! heureuse & plus qu'heureuse  
Si forcenant ie n'estois amoureuse,  
Et si iamais pour euitier la mort  
Le fils d'Hector n'eust touché nostre bort.

Comme au printemps on voit vne genice  
Qui n'a le col courbé sous le service  
A bonds gaillards courir parmy les champs,  
A qui le Tan aux aiguillons tranchans  
Pique la peau & la pousse en furie:  
Ny les ruisseaux hostes de la prairie,  
Forest ny fleurs, bocage ny rocher  
Ne la sçauroient engarder de moucher  
De toutes parts vagabonde & courante:  
Ainsi Clymene en son esprit errante  
Court & recourt, sans voir iamais osté  
Le poignant trait qui naure son costé.

Que dois-ie faire? où iray-ie? dit-elle.  
Pour me guarir personne ne m'appelle!  
Je meurs sans aide, & si ie ne veux pas  
Que sœur ny frere entende mon trespas.  
Faut-il qu'en pleurs ie distille ma vie?  
Que de ma sœur ainsi ie me desfie  
Qui seule fut mon conseil autrefois,  
Qui m'aimoit seule & que seule i'aimois?  
Helas il faut que mon mal ie luy conte!  
Et quoy Clymene, auras-tu point de honte  
De confesser qu'Amour soit ton vainqueur,  
Que tu voulois luy arracher du cuer,  
Quand l'autre iour par un fin artifice  
Tu luy prouuois que l'amour estoit vice?  
Il ne m'en chaut elle aura son retour,  
La charité doit surmonter l'amour:  
Et si elle est de Francus amoureuse,  
Me fera lieu me voyant langoureuse.  
Pauvre abuzée! hé ne sçais-tu pas bien  
Que les parens desrobent nostre bien?  
Et que pour eux entier ils le desfrent,  
Loyeux au cuer quand les autres souspirent?

Ce n'est qu'un sang de ma sœur & de moy,  
Elle prendra pitié de mon esmoy !  
« Foy ny pitié ne regnent plus en terre,  
« Et le parent au parent fait la guerre !  
Las ! que feray-je ? il vaut mieux la tenter :  
L'homme est guary qui peut se lamenter.  
Il n'y a beste aux forests tant soit fiere,  
Qui ne soit douce aux pleurs d'une priere :  
Helas on dit en proverbe souuent,  
« Priere & pleurs se perdent comme vent !  
Vray, si lon prie une ame inexorable :  
Mais ma sœur est & douce & pitoyable :  
Au pis aller ie ne scaurois sentir  
En l'essayant que honte & repentir.

En la façon qu'elle estoit habillée  
Nuds pieds sans robe affreuse escheuelee,  
Delibera contre le mal d'amours  
De voir sa sœur & demander secours.  
Elle courut comme son pied la porte,  
Mais aussi tost qu'elle fut à la porte  
Se recula : comme le pelerin  
Qui de fortune a trouué par chemin  
Un long serpent horrible d'une creste,  
Qui sifle escume & s'enfle de la teste,  
Faisant mourir les herbes du toucher :  
Il se recule & n'ose en approcher.

Ainsi tourna la pucelle en arriere :  
Dessus la langue elle auoit la priere,  
La larme à l'œil, le soucy sur le front,  
Dedans l'esprit un pensément profond,  
Et maint sanglot se creuoit en sa bouche,  
Quand trop d'amour qui la touche & retouche,  
Qui compagnon ses pas alloit suiuant,  
Fit auancer ses iambes en auant,

Et derechef la honte les recule,  
 Honte la gele & le desir la brule.  
 Trois fois Amour la voulut faire entrer,  
 Honte trois fois ses pieds vint rencontrer,  
 Trois fois reuint & trois fois s'en retourne :  
 Son pas douteux qui maintenant sciourne,  
 Maintenant va comme Amour le seduit,  
 Porté d'ardeur derechef la conduit,  
 Et derechef la honte la repousse.

Ce Dieu qui bat d'une forte secousse  
 Son cueur douteux, si bien la foruoya,  
 Que dans la chambre en fin la conuoya  
 Pleurant en vain : comme une fiancée  
 Qui dez long temps a donné sa pensée  
 Au iouuenceau qui premier qu'appaiser  
 Sa flame, est mort auant que l'espouser,  
 Elle de dueil & d'amour allumée  
 Lamente seule en sa chambre enfermée  
 En se cachant, de peur que ses regrets  
 Ne soient ouïs des voisins indiscrets  
 Qui de brocards piqueroient la pauurette :  
 Tousiours au cueur son fiancé regrette.  
 D'un cry muet, à bouche close, ainsi  
 Pleuroit Clymene, & cachoit son souci.

Pour raconter sa douleur qui n'a tréue,  
 Ores au bout de sa langue s'esleue  
 La voix poussée, & aux lèvres luy pend,  
 Ores tombée aux poumons redescend  
 Sans nul effet : car le son qui ne touche  
 Qu'un peu les dents, ne defferroit sa bouche :  
 Ainsi qu'on voit les fantaumes de nuit  
 Ourrir la bouche & ne faire aucun bruit.

Or comme Amour en fureur l'importune,  
 Sans declarer à sa sœur sa fortune

*Seule en sa chambre en haste s'en re-va,  
Où de longs pleurs sa poitrine lava.  
A ses souspirs la bride elle destache,  
Rompt ses habits, ses cheveux elle arrache,  
Esgratignée, & d'un esprit transi  
Pensoit douteuse & repensoit ainsi.*

*Que dois-ie faire? hélas en quelle peine  
Me tient Amour! hà chetive Clymene  
Tu vis sans vie, & folle tu n'as soin  
(Cruelle à toy) de toy-mesme au besoin!  
Las! puis qu'Amour ta part ne fauorise,  
Par la fureur conduy ton entreprise.  
« Quand la fortune en se iouant nous pert,  
« Pour la raison souuent la fureur sert.  
Dois-ie prier un homme qui peut estre  
Ne sçait mon mal? si ie luy fay paroistre  
Il trahiroit mon amour sans guerdon.  
Il est yssu du Roy Laomedon  
Prince sans foy, & qui prendroit à gloire  
D'auoir, trompeur, d'une femme victoire.  
Dois-ie me plaindre & ma sœur retenter?  
Cela feroit son ardeur augmenter.  
Car ie sçay bien (Amour m'a fait sçauante)  
Que Francion est amoureux d'Hyante,  
Et que ma sœur ce Troyen aime mieux  
Que ses poumons, son foye, ny ses yeux:  
Ie n'en sçay rien, seulement ie m'en doute:  
« L'amant douteux toute parole escoute.  
Dois-ie par fraude & par dol controuuer  
Qu'au fond du cueur ma sœur laisse couuer  
Vn feu peu chaste & le dire à mon frere?  
En le disant il me seroit contraire:  
Pour vn soupçon ne voudroit vn discord  
Contre celuy qui l'a sauué de mort.*



Je souffre trop sans donner cognoissance  
 De mon travail: la seule patience  
 « Est le remede; vn feu souuentefois  
 « Meurt de son gré quand il n'a plus de bois:  
 Pensez & pleurs apprestent la matiere  
 A mon brazier: il faut que toute entiere  
 En liberté ie me redonne à moy:  
 Vn amoureux sur luy n'a point de loy!  
 Plus fil à fil ses liens il desferre,  
 Et plus Amour à la chaine l'enferre.  
 A tous venans diray-ie mon malheur?  
 « Dire son mal allege la douleur.  
 Non: ny mon sang, mon honneur, ny ma race  
 Ne veulent point que fable ie me face,  
 Et que chacun d'un cueur dissimulant  
 Flatte mon mal, & puis en s'en-allant  
 Me deshonore, & tançant sa famille  
 Par mon malheur face sage sa fille.

Donq que feray-ie? iray-ie en autre part  
 Comme banie? Amour qui tient le dard  
 Dedans mon cueur en si profonde playe,  
 Ne permet point qu'autre pais i'essaye:  
 Puis pour passer maint fleuve & maint rocher  
 Je ne scaurois de mon flanc arracher  
 Ce trait qui met la tristesse en mes veines,  
 Mon cueur en feu, & mes yeux en fontaines:  
 Pour le meilleur, Clymene, il faut mourir,  
 Et par la mort ton amour secourir.

Comme en son cueur elle pensoit la sorte  
 De se tuer, ou d'une sangle forte  
 Pendre son col au bout d'un soliveau,  
 Ou se ietter à chef baissé sous l'eau,  
 Et s'estoufer au plus profond des ondes,  
 Ou s'en-aller par les forests profondes,

*Par les deserts des rochers enfermez  
Seruir de proye aux lions affamez :  
Vne poison luy sembla la meilleure  
Pour destacher son ame tout à l'heure  
Loin de son corps, & du corps le souci.  
D'un pesant pas & d'un pesant sourci  
Melancholique, en passions outrée,  
Elle est pleurant au cabinet entrée,  
Où tout le bien que plus cher elle auoit,  
D'un soin de femme en garde reseruoit.*

*Sur ses genoux elle mit vne quesse,  
Puis mist la clef en la serrure espesse,  
La clef tourna, la serrure s'ouvrit.  
Là, choisissant, entre mille elle prit  
Vne poison qu'on dit que Promethée  
A de son sang autrefois enfantée,  
Quand le vautour tout herissé de faim  
A coups de bec luy deschiroit le sein :  
Le sang coula dessus la terre mere,  
Le Soleil chaud qui toute chose esclaire,  
Luy donna l'estre, accroissance & vigueur :  
Elle a de tige un coude de longueur,  
Rouge la fleur, la fueille un peu noirastre,  
Que la sorciere & la fausse marastre  
Sçauent cueillir de leurs ongles tranchans,  
Disant dessus des mots qui sont meschans :  
Et n'est poison qui si prompte deliure  
Loin de son ame un corps fasché de viure.*

*Quand elle vit telle forte poison,  
S'esuanouyt de longue pamoison,  
Rouiant les yeux, & horriblant la face,  
Et de ses pieds trepigna sur la place :  
Un spasme auoit tous ses nerfs estendus,  
Elle cria : ses cris sont entendus*

De sa nourrice, à qui dez son enfance  
Elle portoit honneur & reuerence.

Or' de fortune à l'huis elle escoutoit:  
Car la pucelle vn peu dauant s'estoit  
A sa nourrice en segret descouuerte.  
Ceste nourrice en doute de sa perte,  
Tousiours en peur de sa fille uiuoit,  
Et pas à pas soigneuse la suiuoit.  
D'un coup de pied la porte elle a poussée,  
Puis en voyant la pucelle pressée  
Des traits de mort, d'un parler redouté  
Luy a l'esperoir dans le cueur rebouté  
La conseillant: O Princeſſe bien née,  
En quel malheur ta vie as-tu tournée?  
Suy la raison: le destin ne peut rien  
« Sur l'homme auteur de son mal & son bien:  
« Nous sommes seuls maiſtres de nos fortunes:  
« Comme il nous plaist ell' sont blanches & brunes,  
« Et le grand Dieu bon pere des humains  
« Le franc arbitre a mis entre nos mains.  
« La destinee à force ne nous meine,  
« Qui ne peut rien sur la prudence humaine  
« Sinon d'autant qu'elle luy donne lieu:  
« Le franc vouloir à l'homme sert de Dieu.  
le ne dy pas que le sort n'ait puissance  
Sur tout cela qui çà bas prend naissance,  
Mais on le peut corriger par conseil,  
Et à la playe apposer l'appareil:  
Chacun y sert à soy-mesme de guide.  
Amour reſemble au ſcorpion homicide  
Qui blesſe, & puis à la playe qu'il fait,  
Luy-mesme sert de remede parfait.  
Donq ne crain point ton malheur faire entendre  
Au beau Troyen bien facile à ſurprendre,

Et qui de race à l'amour est appris,  
Comme neveu de l'amoureux Pâris,  
Iuge courtois, qui vuidant la querelle  
Donna la pomme à Venus la plus belle.  
Tous ses ayeux grands Princes genereux  
Furent iadis des beautez amoureux,  
Troë, Dardan & le beau Ganymede.  
Contre l'amour on trouue assez remede,  
Quand la raison se veut esuertuer,  
Et non ainsi laschement se tuer.  
« L'ame couarde & vilaine s'offense,  
« Tousiours la bonne au mal fait resistance.  
« L'homme est bien sot qui tombe en desespoir :  
« Rien n'est perdu qu'on ne puisse r'auoir :  
« Champs & maisons & bagues bien ouurées  
« A force d'or sont tousiours recourées :  
« Par la fortune on perd le bien mondain,  
« Par elle mesme on le r'acquiert soudain :  
« Mais nos thresors ne rachetent la vie  
« Quand vne fois la Parque l'a rauie.  
Quand elle dort en vn tombeau reclus,  
C'est fait, les Sœurs ne la resilent plus :  
Il faut descendre aux bords Acherontides  
Voir Rhadamanthe & les trois Eumenides,  
Et le palais du frere du Sommeil.  
Donques iouis des rayons du Soleil,  
Et sans descendre en l'abyssme profonde  
Demeure viue hostesse de ce monde.  
Tu es, Clymene, encore en ton printemps,  
Tu n'as d'amour senty les passetemps  
Ny les plaisirs du chaste mariage.  
Garde toy donq pour vn meilleur vsage :  
Tente Francus & fay luy par escrit  
Sçauoir le mal qui lime ton esprit.

De tels propos la fille elle admonneſte.  
 Prompte au conſeil la pucelle fut preſte :  
 Trois fois la plume elle priſt en ſes dois,  
 Et de la main luy tomba par trois fois :  
 Trois fois elle eut la bouche ouuerte & cloſe,  
 Puis ſoupirant ceſte lettre compoſe,  
 Et la voulut de tels mots ordonner.

Salut à toy qui me le peux donner :  
 L'aueugle Archer m'a tellement bleſſee  
 De ton amour le cœur & la penſee,  
 Que ie mourray, ſi guarir tu ne veux  
 D'un prompt ſecours le mal dont ie me deulx :  
 Ce Dieu m'a fait en ce papier t'eſcrire  
 Ce que l'honneur me defendoit de dire,  
 Et i'ay ma bouche ouuerte mille fois,  
 Mais la vergongne a reſſerré ma vois.

A cet eſcrit vueilles donques permettre  
 Ta blanche main : l'ennemy liſt la lettre  
 De l'ennemy, la mienne vient d'aimer  
 Qui de pitié te deuroit enflamer.  
 Si tu t'enquiers en quoy le temps ie paſſe,  
 Songer, reſuer, repenſer en ta grace,  
 Te rechercher, t'engager mon deſir,  
 Eſt mon ſeul bien, mon tout & mon plaſiſr.  
 Soit que le iour de l'Orient retourne,  
 Soit qu'à midy deſſus nous il ſeiourne,  
 Soit que la mer le reçoie à coucher,  
 Ie penſe en toy : & ſi n'ay rien plus cher  
 Que de me paſtre en ta belle figure.  
 Ainſi pour toy cent paſſions i'endure,  
 Et ſans pouuoir ny veiller ny dormir  
 Seule en mon lit ie ne fais que gemir.  
 Ie ne vy plus tant mon ame affollee  
 Laiſſant mon corps en la tienne eſt allée.

*Je suis perdue, & ne me puis trouver :  
l'ay beau les sorts des sorciers esprouver,  
Rien ne me sert ny herbe ny racine :  
Tu es mon mal, tu es ma medecine,  
Tu es mon roy, de toy seul ie depens.  
Je meurs pour toy, & si ne m'en repens.  
Aye pitié d'une fille amoureuse :  
Des voluptez la plus delicieuse  
C'est de cueillir vne premiere fleur,  
Non un bouton qui n'a plus de couleur.  
Tu me diras que ie suis indiscrete  
Comme nourrie en ceste isle de Crète,  
Où Iupiter de tant d'amours épris  
Le premier lait de sa nourrice a pris,  
Et que ie suis d'Ariadne parente  
Fille à Minos, qui d'amour violente  
Osa son pere & son pays changer  
Pour un Thésée, un pariure estrange.  
Certes ce n'est ma terre ny ma race  
Qui me contraint, c'est seulement ta face,  
Et ta ieunesse & ton œil nompareil.  
Malheureux est qui ne voit le Soleil  
Quand il esclaire, & son œil tourne arriere  
Pour ne iouyr de si belle lumiere !  
Oste ton front, oste moy tes beaux yeux,  
Oste ta taille egale aux demy-Dieux,  
Ton entretien, ton maintien, ta parole,  
Et qui plus est, ta vertu qui m'affolle,  
Tu esteindras de mon cueur le flambeau :  
Mais te voyant si vertueux & beau,  
Je t'aimeray d'ardeur insatiable,  
Et si ie faux, tu en es punissable.  
Je ne crains point comme les Dames font,  
De m'appeller femme d'un vagabond,*

Pauvre fuitif, qui n'a maison ny Troye :  
Il ne m'en chaut, te suiuant, que ie soye,  
Pourueu qu'il plaise à ton cueur de m'aimer,  
Soit que tu vueille' espouse me nommer,  
Soit ton esclau, & deussé-ie amusée  
Tourner ton fil autour d'une fusée.  
Labeurs presens & futurs ie reçois,  
Pourueu, Troyen, que ie puisse estre à toy.  
Je ne craindray tes perilleux voyages,  
Terres ny mers tempestes ny orages :  
Ou si i'ay peur, i'auray peur seulement  
De toy mon tout, & non de mon tourment :  
Si ie peris, au moins en ta presence  
Je periray : ou ta cruelle absence  
(Si tu ne veux pour tienne m'acquérir)  
Cent fois le iour me tu'ra sans mourir.

De tels vers fut son epistre acheuée,  
Puis la seella d'une agathe engrauee :  
La mit au sein de la nourrice, & lors  
Vne sueur ruißela de son corps :  
Avec la lettre encor' luy bailla l'ame  
Pour luy porter, & my-morte se pâme.

Tandis Cybelle auoit changé de peau,  
Et transformé son vieil corps en un beau,  
Prenant la face & la voix & la taille  
De Turnien (qui depuis la muraille  
Bastit de Tours, & la ville fonda)  
Lors de tels mots Francion aborda.

Iusques à quand, fils d'Heëtor, sans rien faire  
Nous tiendras-tu sur ce bord solitaire,  
Acagnardez en paresseux seiour,  
A boire, à rire, à demener l'amour ?  
A perdre en vain nos iours par les bocages  
Suiuant les cerfs & les bestes sauuages ?



Que ne fais-tu (sans le temps consommer)  
 Ce que t'a dit la Nympe de la mer ?  
 Courtise Hyante, afin qu'elle te face  
 Voir ces grands Rois qui viendront de ta race :  
 Puis donne voile, & sans plus t'allecher  
 Va-t'en ailleurs ta fortune chercher.

Ce Turnien auoit la face belle,  
 Les yeux le front, compagnon tres-fidelle  
 De Francion, qu'à part il escoutoit,  
 Et ses segrets en priué luy contoït.  
 Il estoit fils de la Nympe Aristine,  
 Qu'Hector auoit sous sa masle poitrine  
 Pressée au bord du fleuve Simois :  
 Ses chers parens en furent resiouïs,  
 Enorgueillis de voir leur fille pleine  
 Du fruit yssu d'un si grand Capitaine.  
 Elle accoucha dessus le bord herbeux  
 Du fleuve mesme, en regardant ses bœufs  
 Qui bien cornus païssoient par le riuage :  
 D'un Prince tel il auoit son lignage.

Ceste Déesse en s'en-volant de là,  
 Bien loin du peuple à l'escart s'en alla  
 Voir la maison toute rance & moisie  
 Où croupissoit la vieille lalousie.

C'estoit un antre à l'entour tapissé  
 D'un gros halier d'espines herissé :  
 Jamais clarté n'y flamboit allumée,  
 Et toutefois ce n'estoit que fumée :  
 Elle estoit louche, & auoit le regard,  
 Parlant à vous, tourné d'une autre part :  
 Sa dent rouillée & son visage blesme  
 Monstroient assez qu'elle mangeoit soy-mesme.  
 Rongeant son cœur de haine & de soucy.  
 D'elle s'approche, & luy a dit ainsi.



*Vieille debout : marche en Crète, & te haste :  
Pren tes serpens, & de Clymene gaste  
Par ta poison les veines & le cueur :  
Dans l'estomac iette luy la rancueur,  
Le desespoir, la fureur & la rage,  
Mesle son sang & trouble son courage :  
Tu le peux faire, & ie veux qu'il soit fait.  
A tant s'en vole, & laisse l'autre infait.*

*Quand lalousie eut la parole ouye  
De la Déesse elle en fut resiouye :  
Puis en frizant de serpens ses cheueux,  
Et s'appuyant d'un baston espineux,  
Alla trouuer en Crète la pucelle  
Que le sommeil couuoit deffous son aile,  
Et dont le cueur qui de dueil se fendoit,  
Entre-dormant nouuelles attendoit.  
Incontinent ceste vieille maline  
De la pucelle assiegea la poitrine,  
D'un froid venin ses léures elle enfla,  
Et la poison haletant luy soufla  
Aux yeux au cueur : & en l'ame renuerse  
Un long serpent, qui en glissant luy perse  
Foye & poumons : & puis en desnoiant  
Ses cheueux tors, elle alla secouant  
Mille lezars au sein de la pauurette,  
Qui la suçoient d'une langue segrette,  
Et lentement les membres luy mordoient,  
Et par les os leur venin espendoient.*

*A tant s'en-va : ce pendant la nourrice  
Espiant l'heure & la saison propice,  
A Francion la lettre presenta,  
Et de parole encores le tenta.  
Francus la prist, & apres l'auoir leuë,  
De honte espris baisse en terre la veue :*

*Le sang vermeil sur le front luy saillit,  
Presque la voix aux poumons luy faillit:  
Puis à la fin d'une langue estonnée  
Telle respon: à la vieille a donnée.*

*Vieille desloge, ou par le fer tranchant  
Je puniray ton acte trop meschant,  
Ou ie feray chastier par le pere  
Vn fait si plein d'horrible vitupere.  
Je ne suis pas en ceste isle venu  
Pour tromper ceux à qui ie suis tenu.  
Le beau Pâris pour Helene rauie  
De mille nauz vit sa faute suiuite,  
Tuer son pere, Ilion embraser,  
Et iusqu'au fond ses murailles raser.  
Je crain des Dieux la vengeance homicide,  
Et Iupiter hostelier qui preside  
Au cueur d'un Roy qui benin veut loger  
Sans le cognoistre un fuitif estrange.  
« Quand l'hoste faut, il voit tousiours sa teste  
« S'escarbouiller d'une iuste tempeste:  
« Car du meschant le payment est contant.  
Or si i'estois de nature inconstant,  
Prompt au plaisir où Venus nous appelle,  
l'aimerois mieux sa sœur Hyante qu'elle:  
« Elle est modeste, & plus que la beauté  
« L'homme en la femme aime l'honesteté.*

*Il dit ainsî: une froide gelée  
S'est par les os de la vieille escoulée  
Tremblant de peur: à la fin elle va  
D'un pied si prompt que Clymene trouua  
Encore au liêt du sommeil assommée:*

*Refueille toy ma fille mieux aimée,  
Ce beau Troyen de ta sœur abusé  
A ton escrit & ton cueur refusé.*

Toute en sursaut, oyant telle parole  
Se refueilla : son esprit qui s'en-vole  
Vers l'estranger emporté du penser,  
Luy fit ainsi ses plaintes commencer.

Donques ma lettre a serui de risée !  
Ha pauvre moy ! i'estois mal-auiyée  
Folle d'amour, d'enuoyer un escrit  
A ce banni, un rocher sans esprit,  
Qui n'a sceu prendre aux cheueux la fortune !  
C'est un niais que la mer importune  
Comme il merite, & qui sotttement pert  
Le bien qu'Amour luy a sans peine offert,  
N'osant cueillir pour crainte de l'espine  
Le beau bouton de la rose pourprine !  
Puis il se vante, ô le braue Empereur !  
Que de la Gaule il sera conquereur,  
Qui n'a sceu veindre une fille veincue !  
L'ay de sa honte & l'ame toute esmeüe  
Et tout le cuer : il n'est du sang des preux,  
Mais d'un pasteur ou d'un piqueur de beufs.  
Son front, ses yeux, son parler & sa grace,  
Son port royal qui les autres surpasse,  
Sont ô Venus, indignes de son corps,  
Laid par dedans & beau par le dehors :  
Ame couarde en un beau corps logée,  
Que ciel, que terre, & que la mer Aegée  
Vont tourmentant : car vray-semblable il est  
Que ta sottise à Iupiter desplaisst.  
Du beau Pâris, dont tu mens ta lignée,  
La beauté fut d'amour accompagnée :  
Helene à luy de bon cuer se rendit,  
Et par combats dix ans la defendit  
Plein de sueur de guerres & de peines,  
Cueur genereux, qui valoit cent Heleines.

Mais tu ne vaux, ieune brigand de mer,  
Qu'à bien ramer, & non à bien aimer.  
Puisse auenir que ma sœur soit trompée,  
Et sans espoir en ses larmes trappée,  
Soit delaissée au front de quelque bort,  
Et qu'elle pleure aux vagues sans confort.  
Quand ce banni par honneste cautelle  
Aura tiré le plaisir qu'il veut d'elle,  
D'un cueur pariure oubli'ra sa beauté :  
Car l'œil fenestre en vain ne m'est sauté.  
Si le destin les Gaules luy ordonne,  
Qu'en ma faueur cent guerres il luy donne  
Ains que bastir les rampars de Paris :  
Voye à ses yeux ses alliez peris,  
Qu'il soit chassé, & que de terre en terre  
En suppliant secours il aille querre :  
Puis par les siens surpris en trahison,  
Soit membre à membre occis en sa maison.

Disant ainsi, de son chef elle arrache  
Ses longs cheueux, qu'en pleurant elle attache  
Contre son liât, signe de chasteté,  
Et que son corps n'auoit iamais esté  
Honni d'amour : puis sa chambre elle baise.

Adieu maison, que i'estois à mon aise  
Auparauant que ce traistre incognu  
A nostre bord naufrage fust venu !

Incontinent la fureur & la rage  
De lalousie emplirent son courage,  
Et tellement la douleur la ferut,  
Que par les champs hurlante elle courut.

C'estoit le iour que les folles Euantes  
Criant Bacchus seules alloient errantes  
(Ayant les corps enuironnez de peaux)  
Par les forests collines & coupeaux,

*Rochers deserts campagnes & bocages,  
Et sur le bord des sablonneux riuages.  
L'air respondoit sous le bruit enroué  
D'Euan, d'Iach, de Bassar, d'Euoé.  
Ce puissant Dieu qui blesse les pensées  
De trop de vin, les auoit insensées :  
En ses liens captives les auoit,  
Et la fureur de raison leur seruoit.*

*Ceste pucelle à qui l'erreur commande,  
S'alla ietter au milieu de la bande  
Escheuelée, & d'un bras forcené  
Branloit un dard de pampre enuironné.*

*Qui la premiere en me suiuant, dit-elle,  
De ce sangler respandra la ceruelle ?  
Et d'un espieu la premiere en son flanc  
Fera la playe, & s'yura de son sang ?  
Marchon couron suiun comme tempeste  
Les pas fourchus de ceste noire beste  
Monstre hideux, qui s'ensuit deuant nous,  
Armon nos mains & l'assommon de coups.*

*Son faux Démon auoit pour couuerture  
Pris d'un sangler la menteuse figure.  
Elle pensant par fausse impression  
Que le sangler fust le vray Francion,  
Pour le tuer la premiere est courue,  
Branlant au poing une fourche cornue :  
Et le sangler sans qu'on le peust toucher  
Alla gagner le feste d'un rocher,  
Qui sous ses pieds tenoit la mer suiette.*

*Là ce Demon à corps perdu se iette  
Dedans le gouffre : elle qui s'auança  
Pour l'enfermer en la mer se lança  
Le poursuiuant : trois fois sous l'eau profonde  
Son corps alla, trois fois reuint sur l'onde,*

*Trois fois le flot le reuint abyssmer.  
Elle mouroit sans les Dieux de la mer,  
Qui souleuant la ialouse tombée,  
Luy ont du corps la Parque desrobée,  
Et luy perdant sa figure & son nom  
L'ont enrollée à la troupe d'Inon  
Et du vieil Glauque à la double naissance :  
Dessus les eaux luy ont donné puissance  
De faire enfler les vagues & le vent,  
Nymphes de mer, qui depuis a souuent  
Contre Francus poussé sa frenesie,  
Dedans la mer gardant sa ialousie.*

FIN DV TROISIESME LIVRE.





## LE QVATRIESME LIVRE

DE LA FRANCIADE.

---

*Quand la nouuelle au pere fut venue,  
D'ardeur & d'ire vne bouillante nue  
Pressa son cueur qui menu sanglotoit:  
De poings serrez l'estomac se battoit  
Pensant songeant & discourant la sorte  
Comme sa fille en la mer estoit morte:  
Il souspiroit, & d'un boubier fangeux  
Des-honoroit sa barbe & ses cheueux:  
Il rompt sa robe, & tout priué de ioye,  
Son fils Orée aux oracles enuoye:  
Auquel (cherchant d'un cueur deuotieux  
Trois iours entiers la volonté des Dieux  
Par mainte offrande en viëtime immolée)  
Telle voix fut du Trepie reuelée.  
Que le vieillard esteigne le tizon,  
Et l'arondelle oste de sa maison.*

*Telle parole en doute respondue  
Fut aisément de ce Prince entendue:*

*C'est de l'amour esteindre le tizon,  
Et l'estranger chasser de sa maison,  
Homme pariure infidelle & sans ame,  
Et du trespas de sa fille le blasme.*

*« En nul pays la foy n'a plus de lieu,  
Disoit ce Prince, & lupin le grand Dieu  
N'a plus de soin de l'humaine malice,  
Et le peché ne craint plus la iustice.  
Cest estranger pauvre chetif & nu,  
Vn vif naufrage à ma riue venu,  
Couuert d'escume & de bourbe & de sable,  
Ah! que i'ay fait compagnon de ma table,  
Que i'ay voulu pour mon gendre choisir,  
Et luy partir ma terre à son plaisir,  
Moque mon sceptre, & masqué de feintise,  
Ma vieille barbe & mes cheveux mesprise!  
Et sous couleur d'un destin ne veut point  
Par foy promise aux femmes estre ioint,  
Second Pâris, pirate qui consomme  
Ses ans sur l'eau: toutefois ce preud'homme  
Fin artisan de cauteleux moyens,  
Comme heritier du malheur des Troyens,  
En toute terre à l'impourueu se ruë,  
Seduit des Rois les filles & les tue:  
Puis en faisant ses galeres ramer,  
Laue le meurdre és vagues de la mer,  
Met voile au vent: le vent qui luy ressemble,  
Pousse sa voile & sa foy tout ensemble:  
Et tu le vois, ô Dieu, viure ça bas,  
Tu le vois bien, & ne le punis pas!  
Or pour souler par vengeance mon ire,  
Je le veux pendre au mast de son nauire  
Couuert de soufre & de salpestre ardent,  
Afin qu'en l'air tournoyant & pendant*



*Vestu de flame, il sente consumée  
Sa triste vie esteinte de fumée.*

*Que dis-je ? où suis-je ? en quelle folle erreur  
Troublé d'esprit me pousse la fureur ?*

*« Il ne faut pas qu'un Prince debonnaire*

*« Du premier coup s'enflame de colere :*

*« Il ne doit croire aux flateurs de leger,*

*« Le commun bruit est tousiours mensonger :*

*« Il doit attendre & sagement cognoistre*

*« La verité que le temps fait paroistre :*

*« L'attendray donq : un Roy ne doit sentir*

*« D'un prompt courroux un tardif repentir.*

*Tandis Francus qui la saison espie,*

*Aborde Hyante, & de tels mots la prie :*

*Vierge sans pair, dont la grace & les yeux*

*Peuvent tenter les hommes & les Dieux,*

*Qui sous tes pieds presses serue ma teste,*

*Qui de mon cueur remportes pour conqueste*

*L'orgueil premier, qui n'auoit point esté*

*D'un autre amour que du tien surmonté :*

*Si la pitié, si l'humble courtoisie*

*Peut des humains gagner la fantasie,*

*Soit de mes pleurs ton courage adoucy,*

*Guery ma playe, & me prens à mercy.*

*Quand ie touchay ton isle de ma dextre,*

*Je ne vins pas en ton palais pour estre*

*Comme ie suis, miserable amoureux,*

*Ains pour chasser le peril dangereux*

*Qui menassoit ma teste du naufrage :*

*Mourir deuoy-je au plus fort de l'orage,*

*Puis que sur terre Amour m'est plus amer*

*Que n'est Neptune au milieu de la mer !*

*« L'homme seroit heureux en toute chose,*

*« S'il ne cachoit au fond de l'ame enclose*

« La passion que nous engendre Amour,  
« Qui de la vie embrunit le beau iour,  
« Et verse au cueur par mauuaise coustume  
« Bien peu de miel & beaucoup d'amertume.  
Heureux trois fois, voire quatre vn rocher,  
Qui sans tendons, sans muscles & sans chair  
Vit insensible, & qui n'a l'ame atteinte  
Ny de douleur ny d'amour ny de crainte :  
le voudrois estre en quelque riue ainsi !  
le viurois dur sans ame & sans souci,  
Où maintenant par trop de cognoissance  
le sens mon mal, & si ie n'ay puissance  
D'admonester mon esprit affligé,  
Tant ie me suis à tes yeux engagé.

Il dit ainsi : mainte larme roulée  
Dessus la ioue en son sein est coulée.

Hyante alors soupirant d'autre part  
Contre-respond : Troyen il est trop tard  
Pour deuïser, & la nuit sommeilleuse  
De noz propos est ce semble enuieuse,  
Chacun nous voit & iette l'œil sur nous :  
« Du fait d'autrui le vulgaire est ialous :  
Allon dormir, la nuit nous le conseille,  
Si le matin dez l'Aurore vermeille  
Te plaist venir au bocage sacré  
Où mes ayeux à costé d'un beau pré  
Ont fait bastir d'Hecate le grand temple,  
Plus priuément en imitant l'exemple  
Des amoureux, tu me diras ton soin,  
Le temple saint nous seruant de tesmoin.

Ainsi disant, les yeux ils abaïssèrent,  
Et tous honteux à regret se laissèrent :  
Mais le souci ne laissa sans gemir  
Les deux amans toute la nuit dormir.

Quand le Soleil perruqué de lumiere  
Eut de Tethys sa vieille nourriciere  
En se leuant abandonné les eaux,  
Et fait grimper contre-mont ses cheuaux,  
Et que l'Aurore à la main safranée  
Eut annoncé la clarté retournée,  
Le soin d'amour qui poignant trauailla  
La belle Hyante, au matin l'esueilla.  
Et pour aller au lieu de la promesse  
Se reuestit d'un habit de Princeesse.

En cent façons son chef elle peigna,  
D'eau de senteurs son visage baigna,  
Prist un collet ouuert à rare voye  
Entre-broché de fils d'or & de soye,  
Rare subtil, à replis bien tissus :  
Puis un beau guimpe asubla par dessus  
Prime dougé filé de main sçauante,  
Qui la couuroit du chef iusqu'à la plante  
Son col d'iuoire enrichit d'un carquan  
Fait en serpent (ouurage de Vulcan)  
D'or & d'esmail, merueille elabouree !  
Qu'il fit iadis pour la Déesse Rhée,  
Et Rhée à Nede en present le bailla.  
De ce serpent tout le dos escailla  
En arc-en-ciel, si bien que la facture  
De l'artisan surmontoit la nature.  
De Nede apres un Corybante l'eut,  
Puis à Dicée en partage il escheut,  
Qui pour garder tel bien à sa famille,  
L'auoit donné dès long temps à sa fille.

Hyante adonq fit son coche atteler,  
D'ardeur de femme enuieuse d'aller  
Au lieu promis : & lors douze pucelles  
De ses segrets ministres plus fidelles,

Qui seules part en ses graces auoient,  
Et dez enfance en tous lieux la suiuoient,  
D'un pied leger dedans l'estable allerent,  
Hastent leurs mains, & le coche attelerent.  
A chaque rouë ils entent un moyeu,  
Douze rayons font passer au milieu  
Iusqu'à la gente, & autour de la gente  
Mettent d'airain vne bande pesante,  
Espaisse & large, où des cloux argentez  
A grosse teste en ordre estoient plantez.  
Au limon d'or couple à couple ils attachent  
Quatre iumens souple-iarrets, qui marchent  
D'un pas venteux, & font dessous leurs piez  
Voler menu les sablons deliez.

Elle monta: vne main tient la bride,  
L'autre le foüet: ses iuments par le vuide  
A bonds legers s'eslançoient en auant:  
Le char rouloit plus vifte que le vent!  
Quand les iuments au temple l'ont rendue,  
Soudain à bas du coche est descendue,  
Osta leur bride: elles non guiere loin  
En hanissant vont paistre le sain-foin,  
Et trefle & Thym: puis de manger faschées  
Se sont sur l'herbe au frais de l'eau couchées.

Le temple estoit d'un bocage entourné,  
De tous costez d'un beau pré couronné,  
Où l'amoureuse apres le sacrifice  
D'un art subtil controuue vne malice:  
Ce fut s'asseoir, & faire d'un grand tour  
Comme elle asseoir ses filles à l'entour.

Il n'est pas temps, cher troupeau que i'honore,  
De retourner à la maison encore:  
Sur l'herbe tendre il vaut mieux seiourner,  
Au frais du iour nous pourrons retourner:

Chanton danſon, que chacune ſ'auance,  
 Et la carole elle meſme commence.  
 Mais ny le bal, ny autres paſſe-temps  
 Ne luy plaiſoient : ſes beaux yeux inſtans  
 Touſiours au guet ſ'eſcartoient en arriere  
 Sur les chemins, pour voir ſi la pouſſiere  
 Deſſous Francus iroit point ſ'eſleuant.  
 A chaque bruit, à chaque flair de vent  
 Elle trembloit, & ſans eſtre aſſeurée  
 D'yeux & d'eſprit erroit toute eſgarée.

De bon matin Francus qui ſ'eſueillla,  
 De ſes habits luy-meſme ſ'habilla :  
 Priſt ſon eſpée à la gaine eſmaillée,  
 Qu'Heſtor auoit à ſon frere baillée  
 Par amitié : car ſur tous il l'aimoit,  
 Et ſa vaillance & ſon art eſtimoit.  
 Or Helenin luy donna ceſte eſpée,  
 Quand il partit, laquelle fut trempée  
 Dans les fourneaux du ſebure Lemnien :  
 Luy donne encore vn poignard Norien  
 Au pommeau d'or, à houpes bien perlées,  
 Que de ſes doigts Helene auoit filées.

Iamais enfant, iamais neuue des Dieux  
 N'eut le maintien, la bouche, ny les yeux  
 Si beaux qu'auoit Francus ceſte iournée :  
 Telle beauté du ciel luy fut donnée,  
 L'œil pour gagner, la bouche pour ſçauoir  
 En diſcourant ſa maiſtreſſe eſmouoir.

A ſon coſté menoit pour compagnie  
 Le vieil Amblois, dont l'ame eſtoit garnie  
 De prophetie, & outre il auoit ſoin  
 De conſeiller ſes amis au beſoin.

Pres le chemin ſur le bord d'une plaine  
 Vn orme fut, dont la cyme eſtoit pleine

De mainte branche où les corbeaux au soir  
 Prenoiert leur perche & se souloient aff'oir.  
 Là de fortune importun aux oreilles  
 Iazoit sous l'ombre vn troupeau de corneilles :  
 L'une se hausse, & comme en se ioüant  
 Coup dessus coup ses ailes secoüant,  
 Et herissant le noir de son plumage,  
 En voix humaine eschangea son langage.

Ahl où vas-tu, vieil prophete insensé,  
 Faux deuineur, qui niais n'a pensé  
 ( Bien que tu sois prudent en toute chose )  
 Que la pucelle aura la bouche close,  
 Et tout le cueur reuesche & rechigné,  
 Si elle voit l'amant accompagné ?  
 Maudit deuin, tourne le pas arriere,  
 Laisse le seul vser de sa priere,  
 Et leur deuis compaignon, ne defens :  
 Tu ne sçais pas cela que les enfans  
 N'ignorent point ? va, iamais Cytherée  
 De sa faueur n'a ton ame inspirée.

Le vieil Amblois qui telle voix ouit,  
 Dedans le cueur soudain s'en resjouit,  
 Et cognut bien que la \* noire esuantée  
 Auoit d'un Dieu la parole empruntée.  
 Pource en tournant sur le trac de ses pas  
 Dist à Francus : Prince amoureux, tu n'as  
 Besoin de guide : vn Dieu qui te supporte,  
 En lieu de moy te sert d'heureuse escorte :  
 De tes souhaits ton cueur sera content :  
 Sans nul refus la pucelle t'attend  
 Obeyssante & preste à te complaire,  
 Par doux propos commence ton affaire :  
 « Sois doux en tout : le desdain genereux  
 « D'une fille aime vn courtois amoureux.

\* La cor-  
 uelle.

Francus luisant de beautez & de grace  
Luy apparut d'une colline basse  
Beau comme Amour : les rayons de ses yeux  
Estoient pareils à cest astre des cieux,  
Qui bien nourry de l'humeur marinier  
Respand au ciel une rousse lumiere,  
Et de rayons redoutables & crains  
Verge la soif & la fièvre aux humains,  
De sa splendeur effaçant chaque estoile.

Elle qui tint dessus sa face un voile,  
Par le trauers du crespse l'apperceut :  
Adonq un trait en l'ame elle receut,  
Le cueur luy bat au fond de la poitrine :  
Ses pieds tenus comme d'une racine  
Ne remuoient ny deçà ny delà :  
Dessus sa ioue une rougeur alla,  
Et tout le corps comme fueille luy tremble.  
Ils sont long temps sans deuier ensemble  
Tous deux muets l'un deuant l'autre assis.  
Ainsi qu'on voit, quand l'air est bien rassis,  
Deux pins plantez aux deux bords du riuage  
Ne remuer ny cyme ny fueillage  
Cois & sans bruit en attendant le vent :  
Mais quand il soufle & les pousse en auant,  
L'un pres de l'autre en murmurant se iettent  
Cyme sur cyme, & ensemble caquettent :  
Ainsi deuoient babiller à leur tour  
Les deux amans dessous le vent d'amour.

Francus venu, la compagnie attainte  
De prompt effroy, se recula de crainte,  
Et se cachant sous le bocage ombreux  
En leur deuils les laisserent tous deux.  
L'amant cognut dez la premiere villade  
Que l'amoureuse au cueur estoit malade :



*Que son esprit cherchoit de s'en-voler :  
Pource il la flate, & commence à parler.*

*Chasse la peur & la rougeur qui monte  
Dessus ton front, tu ne dois auoir honte  
De parler seule à moy seul estranger :  
Ie ne vien pas, vierge, pour t'outrager,  
Mais pour t'aimer : & mon humble courage  
Ne semble point à ceux du premier âge  
Ces rauisseurs, Hercules & Iason,  
Qui desroboient les filles de maison :  
Telle insolence au cueur n'est point entrée  
D'un qui n'a lieu ny terre ny contrée,  
A qui le ciel tout bon-heur va niant.  
Humble ie suis estranger & priant :  
Le grand lupin à telles gens preside,  
Et sous sa main les conserue & les guide,  
Pere commun les defend contre tous :  
Pource au besoin i'embrasse tes genous :  
Imitant Dieu, sois vierge secourable  
A moy fuitif priant & miserable.*

*Iadis Ariadne en ce royaume icy  
Prise d'amour prist Thesee à mercy :  
Victorieux sans danger le renuoye  
Par vn filet qui conduisoit sa voye.  
« Vn gentil cueur aide tousiours autrui !  
Pour tel bienfait elle encore aujourd'huy  
Est vn bel astre, & ses feux manifestes  
Roulent de nuit par les voutes celestes.  
Ie ne requiers richesses ny thresors,  
Ny grand empire enflé de larges bors :  
Ie veux sans plus que ta bonté me face  
Voir ces grands Rois qui naistront de ma race,  
Et par sur tous vn CHARLES DE VALOIS,  
Qui l'uniuers enuoirra sous ses loix.*



le bastiray pour telle recompense  
Maint temple fait de royale despanse  
En ton honneur : & si ie puis iamais  
Aborder Seine, icy ie te promets  
Par ton Hecate & par ses triples testes,  
Que tous les ans en solennelles festes  
A iours certains ie te feray des jeux,  
Où sur la lyre à iamais noz neuveux  
Par vers chantez diront ta renommée :  
Et s'il te plaißt espouse estre nommée  
D'un fugitif, ie te donne la foy  
De n'espouser autre femme que toy.  
Ie te suppli' par ta belle lumiere,  
Qui dans mon cueur flamboye la premiere,  
Par ton regard, par ta ieune beauté,  
Par ton beau port tout plein de royauté,  
Par ton Orée, & par la vieille teste  
Du pere tien, d'accorder ma requeste.

Ainsi disoit Francus en la louant :  
D'aïse qu'ell' eust, son cueur s'alloit iouant.  
« Car volontiers toute femme douée  
« De grand' beauté, desire estre louée.  
Tel qu'un Soleil Francus luy paroïssoit :  
Mais rien au cueur si fort ne la pressoit  
Que le saint nom du promis mariage.  
S'en souuenant elle ardoit d'auantage,  
Et consumoit sa vigueur peu à peu  
Comme la cire à la chaleur du feu.  
Elle vouloit, tant le plaisir l'affole,  
Tout à la fois desgorgier sa parole,  
Et ne pouuoit sa langue démesler,  
Tant tout d'un coup elle vouloit parler.  
Aucunesfois comme un homme qui erre  
D'esprit troublé, deuant ses pieds à terre

Fichoit les yeux demy-clos & honteux,  
Aucunefois de larmes tous moiteux  
Les re-haussoit levant un peu sa face,  
Et rabaissoit soudain contre la place,  
Puis d'un souris & d'un parlant sourcy  
Sans dire mot tesmoignoit son soucy :  
Mais à la fin en telle peine extreme  
Honte la fit consulter à jøy-mesme.

Vn mal au mien ne se trouue pareil,  
En mon malheur i'ay perdu le conseil :  
Vn nouveau soin tient mon ame engourdie :  
« Rien n'est si fort que ceste maladie,  
« Qu'on nomme aimer : ie me travaille en vain  
Et si ne puis l'arracher de mon sein.  
D'un puissant trait ma raison est forcée :  
Oste du cœur la flame commencée  
Si tu le peux, & constante defens  
Que les braziers ne s'allument plus grans !  
Ie guarirois si ie le pouudis faire !  
Vn Dieu plus fort me repousse au contraire :  
Du ciel me vient ce desastre fatal,  
« Ie voy le bien, & ie choisis le mal !  
Le traistre amour me conseille vne chose,  
Et la raison vne autre me propose :  
Sans me resoudre incertaine ie suis,  
Tant ma raison chancelle en mes ennuis !  
Pour mon espoux vn banni dois-je suiure ?  
Et par les vents par les tempestes viure  
Loin de mon pere aueq'un estranger,  
Qui n'a rien seur sinon que le danger ?  
Non, ceste terre où i'ay mon parentage,  
Me peut donner vn riche mariage,  
Et sans me perdre au gré de mon plaisir  
Ie peux en Crète autre mari choisir

Riche de biens, de race noble & forte.  
Ah! ie me trompe, & mon isle ne porte  
Des fils d'Hector, & quand elle en auroit,  
Nul egaler sa vertu ne pourroit  
Ny sa beauté ny sa ieunesse tendre,  
Armes d'amour, qui prise me font rendre.

Vaut-il pas mieux franche me deslier  
De tant d'amour, que mon pere oublier  
Pour un fuitif qui n'a point de demeure?  
O terre, ô ciel! mourir puisse-je à l'heure  
Qu'en destachant de honte le bandeau  
Je presseray de mes pieds son bateau,  
Sans auoir soin des vergongneux diffames  
Que les vieillars, les filles & les femmes  
Me ietteroyent : Hyante pour n'auoir  
Ny iugement ny raison ny sçauoir,  
Brute lasciue amoureuse insensée  
A ses amis & sa terre laissée  
Pour un banni qui n'a maison ny foy!

La par esprit prophete i'apperçoy  
Qu'en tous endroits ira ma renommée  
De bouche en bouche en vergongne semée.  
Je n'oseray par les danses baler :  
Honte & despit retiendront mon parler,  
Et par les lieux où sera l'assemblée  
Des jouuenceaux, i'auray l'ame troublée,  
Fable de tous, des tables le propos :  
Et lors la terre engloutisse mes os!  
Que dis-je hélas! il n'a pas la nature  
D'homme mechant, & si la coniecture  
En regardant son front ne me deçoit,  
La cruauté son beau corps ne reçoit :  
Au fond de l'ame un rocher il ne porte,  
Et ce penser mon trauail reconforte :

« *Au pis aller, c'est un plaisant malheur*  
« *De secourir quelcun en sa douleur !*

*Ainsi pensoit d'amour toute affolée :*  
*Francus vit bien qu'elle estoit esbranlée.*  
*Pource en touchant son menton de rechef*  
*Et ses genoux, l'adiura par le chef*  
*De son Hecate, hostesse familiere*  
*Des bas enfers, d'accorder sa priere.*

*Hyante songe à par-foy longuement*  
*Comme un qui resue & qui n'a sentiment,*  
*Puis en sursaut de son destin pressée*  
*Se resueilla d'une longue pensée :*  
*Lors de son front la honte s'en-alla,*  
*Et prenant cœur ainsi elle parla*  
*Chaude d'amour qui au sang luy commande.*

*Non seulement ie feray ta demande*  
*Nouveau Pâris, & cognoistras par moy*  
*Ces puissans Rois qui sortiront de toy :*  
*Mais qui plus est si tu auois enuie*  
*D'avoir mon sang mes poumons & ma vie,*  
*Mon estomac en deux ie t'ourirois,*  
*Et pour present ie te les offrirois.*  
*Or il te faut pour chose necessaire*  
*Sçavoir deuant cela que tu dois faire,*  
*A fin, Troyen, que les esprits d'embas*  
*Fantosmes vains, ne t'espouuantent pas,*  
*Et que ton ame en rien ne soit attainte*  
*En les voyant, de frayeur ny de crainte.*  
*Sorton d'ici à fin de te monstrier*  
*Où les esprits te viendront rencontrer.*

*Leue les yeux, & regarde à main dextre,*  
*Voy ce vallon tout desert & champestre :*  
*Là tu viendras apres trois iours au soir*  
*Quand le Soleil en l'eau se laisse choir :*

le m'en iray par monts & par valées,  
 Par les forests par les eaux reculées  
 Trois iours entiers loin du regard humain  
 Couper à ieun d'une serpe d'airain  
 Herbes & fleurs bois racines & plantes :  
 Puis inuoquant les Deitez puissantes  
 Pluton, Cerbere, Hecate & tous les Dieux  
 Qui sont seigneurs des manoirs stygieux,  
 Trois iours finis au soir sur la vesprée  
 Dans le vallon en la place monstree  
 l'apparoistray : sois diligent & caut  
 A preparer de ta part ce qu'il faut.

Premièrement arreste en ta memoire  
 De ne venir sans mainte brebis noire  
 Qui soit sterile : ameine à noire peau  
 Vaches & porcs les plus gras du troupeau :  
 Ta robe soit d'une personne veuve :  
 Laue ton corps dans le courant d'un fleuve  
 Par trois matins, & trois fois en priant  
 Et l'Occident regarde & l'Orient.

De masle encens & de soufre qui fume  
 Puant au nez, tout le corps te parfume :  
 Aye le chef de pauot couronné,  
 Et tout le corps de veruene entourné :  
 Masche du sel, & pour quelque lumiere,  
 Qui s'obscurcisse espaisse de fumiere,  
 Ny pour les feux de salpestre fumeux,  
 Ny pour l'aboy des mastins escumeux,  
 Ny pour le bruit des idoles menues  
 Qui sortiront comme petites nues,  
 Ne sois peureux, & sans trembler d'effroy  
 Ne tourne point les yeux derriere toy :  
 Car si craintif tu retournes la face,  
 Tout est perdu : au milieu de la place

Fais vne fosse assez large, où dedans  
Le sang versé des victimes respans  
Tiede & fumeux, & tout ensemble mesle  
Du vin du lait & du miel pesle-mesle.

Quand tu verras que les esprits voudront  
Boire le sang, & qu'espais se tiendront  
Pres de la fosse au sang toute trempée,  
Hors du fourreau tire ta large espée,  
Et fay semblant de les vouloir trancher :  
Car ils ont peur qu'on ne coupe leur chair.  
Adonc ayant l'ame toute grossie  
De la fureur qui vient de prophetie,  
le te monstr'ay la plus grand' part de ceux  
Qui sortiront enfans de tes neuveux.  
le te diray quelque peu de leurs gestes,  
Et non pas tout : les puissances celestes  
Ne veulent point qu'une mortelle vois  
Les faits humains chante tout à la fois.

Or ie sçay bien qu'apres t'auoir monstrée  
Ta race hélas ! tu fuiras ma contrée,  
Comme Thesée abandonnant ta foy :  
A tout le moins Francus souuienne toy  
De ton Hyante & de ta foy promise.  
Quand ie serois entre les ombres mise,  
Maugré la mort maugré toute rigueur  
l'aurois tousiours ton portraiët en mon cueur,  
Et tes beautez dont prise tu me lies.  
Et s'il aduient ingrat que tu m'oublies,  
(Las ie sçay bien qu'un iour tu m'oubliras,  
Et qu'autre part espoux tu te liras ! )  
Puisse du Ciel la plus forte tempeste  
En ma faueur t'escarbouiller la teste  
Pour te punir de ta pariure foy  
D'auoir trahi l'heritiere d'un Roy.

*Ainsi disant pressez s'entr'accolerent,  
Puis au logis par deux chemins allerent :  
Elle en son char monte sans y monter,  
Son foible esprit se laissoit emporter  
Après Francus, & toute froide & blesme  
En son logis retourna sans soy-mesme.*

*Au iour promis Francus ne faillit pas :  
Il a choisi du troupeau le plus gras  
Et le plus grand trois genices vestues  
De noire peau, aux cornes bien tortues,  
Au large front, à l'œil grand & ardent,  
Et dont la queue avoit le bout pendant  
Iusques à terre, & sans coups les amaine :  
Puis trois brebis grosses de noire laine,  
A langue blanche, à qui l'œil tressailloit,  
Offrande entiere où rien ne desailloit,  
Que le belier n'avoit iamais cognues,  
Grasses brebis bien noires & pelues :  
Prist un fuzil & frayant de maints coups  
Le dos du fer encontre les caillous,  
En fist jallir dessus des feuilles seiches  
A pointe viue un millier de flameches :  
Puis en soufflant sur les feuilles un peu,  
De fort genéure allume un petit feu  
Qui devint grand, prenant sa nourriture  
Des pins gommeux qui sont secs de nature.  
L'air d'alentour d'encens il parfuma,  
De maint pauot & d'ache : il alluma  
Trois feux en rond, faisant loin de leurs braisis  
Sortir un flair dont les Démons sont aises :  
Car ils ne vont ny mangeant ny beuvant,  
Nourris en l'air de vapeur & de vent.*

*Sous le vallon s'eleuoit un bocage  
Branche sur branche espoissi de fueillage,*

*Dont les cheueux par le fer non tondus  
S'entr'ombrageoyent l'un sur l'autre espendus :  
Percez n'estoyent ny de l'Aube premiere  
Ny du midi : une chiche lumiere  
D'un iour blafard au dedans pallissoit,  
Et d'ombre triste affreux se herissoit.*

*Pres ce bocage une fosse cauee  
Estoit profonde en abysme creuée,  
Béante au ciel, ouuerte d'un grand tour,  
Qui corrompoit la lumiere du iour  
D'une vapeur noire, grasse & puante,  
Que nul oiseau de son aile volante  
N'eust sceu passer, tant le ciel ombrageux  
S'espoissoit de cendres & de feux,  
Et de vapeurs peste-mesle allumées  
A gros bouillons ondoyans de fumées.  
De là maints cris, maints trainemens de fer,  
Et maint feu sort, le souspirail d'Enfer.*

*Pres cest abysme en horreur desbordée  
Creusa la place en haut d'une coudée,  
De quatre pieds l'eslargissant en rond :  
Puis la victime attira par le front  
Les yeux tournez vers l'Occident, & pousse  
Les noirs toreaux sur le bord de la fousse  
De la main gauche, & le poil qui vestoit  
Le front cornu des bestes, il iettoit  
Dedans le creux de la place, & respanche  
Aueq' du lait, de la farine blanche,  
Du vin, du miel, appellant par grans cris  
Hyante, Hecate, & tous les bas esprits.  
Lors en tirant de sa gaine yuoirine  
Vn long couteau, le fourre en la poitrine  
De la victime, & le cœur luy trencha.  
Dessus sa playe à terre elle broncha*



En trepignant, le sang rouge il amasse  
 Dedans le rond d'une profonde tasse :  
 Puis le renuerse : & s'inclinant le chef  
 Contre la fosse, inuouqua de rechef  
 La Royne Hecate & toutes les familles  
 Du bas Enfer qui de la Nuit sont filles :  
 Le froid Abyssme, & l'ardant Phlegethon,  
 Styx & Cocyt, Proserpine & Pluton,  
 L'horreur, la peur, les ombres, le silence,  
 Et le Chaos qui fait sa demeurance  
 Dessous la terre en la profonde nuit,  
 Voisin d'Erebe où le Soleil ne luit.

Il acheuoit, quand un effroy luy serre  
 Tout l'estomac : un tremblement de terre  
 Se creuassant par les champs se fendit :  
 Vn long abboy des mastins s'entendit  
 Par le bocage, & Hyante est venue  
 Comme un esprit affublé d'une nue.

Voici, disoit, la Deesse venir :  
 Je sens Hecate horrible me tenir  
 Cœur sang & foye, & sa force puissante  
 Tout le cerueau me frappe & me tourmente.  
 Tant plus ie veux alenter son ardeur,  
 Plus d'aiguillons elle me lance au cœur  
 Me transportant, si bien que ie n'ay veine  
 Ny nerf sur moy, ny ame qui soit saine :  
 Car mon esprit qui le Démon reçoit,  
 Rien que fureur & horreur ne conçoit.

A tant retint sa parole esuolée  
 Donnant repos à son ame affolée :  
 Puis tout soudain le Démon luy reprit  
 Le sang le cœur la ceruelle & l'esprit :  
 Plus que deuant vne rage l'allume,  
 Elle apparut plus grand' que de coustume :

De teste en pied le corps luy frissonnoit,  
Et rien d'humain sa langue ne sonnoit.  
Lors en roüant ses yeux à demi-morte  
Deuers Francus luy dist en telle sorte.

Prince Troyen anobli de trauaux,  
Qui sur la mer as souffert mille maux,  
Et qui en dois par longue & longue guerre  
Souffrir encor' de plus grans sur la terre,  
En Gaule iras, mais tu ne voudrois pas  
Y estre allé : mille & mille trespas,  
Mille perils plus aigus que tempeste  
Desja tous prests te pendent sur la teste.  
Comme ton pere en defendant son Fort  
Sentit d'Aïax & d'Achille l'effort,  
L'un d'eux fils d'homme, & l'autre de Déesse :  
Ainsi couuert d'une estrangere presse  
Dois quelque iour sentir à ton malheur  
Mille ennemis d'effroyable valeur :  
Si que le cours de la Gauloise Seine  
Du sang Troyen ondoyra toute pleine,  
Et dans ses eaux pesle-mesle tombez  
Voirra cheuaux & bouclairs embourbez.

Mais par sur tout garde toy que le fleuve  
D'Aïne en ses eaux pour iamais ne t'abreuue,  
Et que Remus sous ombre de vouloir  
Te marier, ne te face douloir.

« La gloire humaine en fin est perissante,  
« Et tousiours meurt toute chose naissante.  
« Pren cœur au reste : avecque la vertu  
« Tu vaincras tout par le glaiue pointu !  
Toy paruenü vers la froide partie  
Où la Hongrie est iointe à la Scythie,  
Tu bastiras pres le bord Istrien  
Seiour des tiens, le mur Sicambrien,

Que tes enfans par long succès de race  
 Tiendront apres pour leur royale place.  
 Le grand Soleil qui voit tout de ses yeux,  
 Voirra tes fils les vns malicieux,  
 Les autres bons : la Nature n'assemble  
 Toutes vertus en vne race ensemble :  
 Mais en meslant le bien avecq' le mal,  
 Tient la balance entre-deux à l'egal :  
 Tous neantmoins honorez de trofées  
 Auront de Mars les ames eschaufées.  
 Par mainte guerre en maints lieux donteront  
 Huns, Gots, Alains, & au chef porteront  
 Mille lauriers en signe de victoire,  
 Que leurs voisins feront place à leur gloire.

La deux mille ans auront fini leur tour,  
 Quand ta Sicambre & les champs d'alentour  
 Seront quittez de ta race Germaine  
 Conduite en sort par vn grand Capitaine,  
 Qui sous l'obscur des ombres de la nuit  
 Verra dormant vn fantosme en son lit :  
 « ( De Dieu certain çà bas viennent les songes,  
 « Et Dieu n'est pas artizan de mensonges. )  
 Ce grand fantosme aura trois chefs diuers,  
 L'un de choïan aux yeux ardans & pers,  
 L'autre d'un aigle, & l'autre la figure  
 D'un grand lion à la machoire dure :  
 Puis tous ces trois en vn s'assembleront,  
 Et ces trois corps vn homme sembleront,  
 Qui murmurant se voudra faire entendre :  
 Mais Marcomir' ne le pourra comprendre.

Lors amassant son peuple & le rangeant  
 Sous trois cens Ducs, hautain ira chargeant  
 L'ardeur des siens de guerrieres audaces,  
 Et tous leurs corps de fer & de cuiraces :

*Mars en leurs cœurs sera si bien entré,  
Qu'ils laisseront leurs maisons de bon gré,  
Prenant congé des vieux Dieux de leur terre :  
Loin deuant eux courra la triste guerre !*

*Des laboureurs les champs abandonnez  
Deffous leurs pieds trembleront estonnez,  
Et des ruisseaux les courses azurées  
N'estancheront leurs gorges alterées  
Presque espuisez iusqu'au profond des eaux  
Ou soit par eux, ou soit par leurs cheuaux,  
Peuple inuincible en toutes sortes d'armes,  
Vaillans pietons, cheualeureux gendarmes,  
Fiers, courageux, au cœur gros & ardent,  
Qui d'Orient iusques à l'Occident  
Victorieux espandront leurs armées.*

*Les champs de Tyr, les terres Idumées  
Les cognoistront, & toy fleuue qui fuis  
Dedans la mer desgorgé par sept huis :  
Et d'Apollon la roche inaccessible  
Cognoistra d'eux la puissance inuincible :  
Voire tous Rois se verront surmonter,  
Si les Gaulois ne sont de leurs costez.*

*Or à la fin de troupe plus espaisse  
Que n'est la neige, ou la gresle que presse  
Le vent d'hyuer, qui bond à bond se suit,  
Et sur le toit des maisons fait vn bruit :  
Et plus espais que feuilles d'un bocage  
Du Rhin venteux gaigneront le riage :  
Puis surmontant par l'effort du harnois  
Phrysons, Gueldrois, Zelandois, Holandois,  
Verront la Meuse, & par forte puissance  
De leurs voisins prendront obeissance,  
De toutes parts aimez & redoutez,  
Comme guerriers aux armes indontez,*

*Terreur des Rois, & des fortes murailles.*

*Sous Marcomire auront longues batailles  
A leurs voisins : & de ce Duc ie veux  
De pere en fils te monstrier les neveux,  
Et les enfans yssus de ta lignée,  
Par qui la Gaule vn iour sera gaignée,  
Et qui tiendront (sang Troyen & Germain)  
Le sceptre entier laissé de main en main.*

*A tant la vierge vn petit se repose,  
Et Francion luy demande autre chose.*

*Vierge l'honneur des Dames & de moy,  
Toute diuine heureux germe de Roy,  
Ie te suppli prophete veritable,  
Sage en conseil, dy moy s'il est croyable  
Que les esprits qui sont sortis dehors  
De leurs vieux corps, r'entrent en nouveaux corps ?  
Quelle fureur ? quelle maudite enuie  
Les tient ainsi de retourner en vie ?  
Et d'où leur vient ce furieux amour  
Que de reuoir encore vn coup le iour,  
Se reuestant de muscles & de veines  
Pour re-souffrir tant de nouvelles peines ?  
Et quand doit l'homme esperer vn repos,  
Si despouillé de chair de nerfs & d'os,  
Mesme au tombeau le repos il ne treuve,  
Et d'une peau en recherche vne neuue ?  
Donques la mort n'est la fin de nos maux,  
Puisqu'en mourant de trauaux en trauaux  
Nous reuiuons pour changer à toute heure  
Errans sans fin, sans repos ny demeure !*

*A tant se teut. Elle qui l'entendit,  
Haute en discours luy contre-respondit  
D'une voix sage. Apollon qui la laisse  
En son bon sens pour vn temps ne la presse,*

*A fin de mieux par raison discourir  
Des hauts segrets qu'elle vouloit ouurir.*

*Prince estrange, tout ce qui vit au monde  
Est composé de la terre & de l'onde,  
D'air & de feu (membres de l'Vniuers)  
Et bien qu'ils soyent quatre elemens diuers  
Ils sont entre-eux liez de telle sorte,  
Que l'un à l'autre enchainé se rapporte,  
Et s'empruntant d'un accord se refont,  
Et changeant d'un en l'autre s'en-reuont.*

*Or' tout ainsi que le corps sans vne ame  
(Ame surgeon de la diuine flame)  
Ne pourroit viure, ains mourroit sans auoir  
Vn esprit vif qui le corps fait mouuoir,  
Et chaud & prompt par les membres a place :  
Ainsi la grande uniuerselle masse  
Verroit mourir ses membres discordans,  
S'elle n'auoit vn esprit au dedans  
Infus par tout qui l'agite & remue,  
Par qui sa course en vie est maintenue,  
Esprit actif meslé dans le grand Tout,  
Qui n'a milieu, commencement ny bout.*

*Des elemens corruptible matiere,  
Et du grand Dieu, dont l'essence est entiere,  
Incorruptible, immortelle, & qui fait  
Viure par luy tout ce monde parfait,  
Vient nostre genre, & les poissons qui noüent  
Et les oiseaux qui parmi l'air se ioüent,  
Les habitans des bocages ombreux,  
Et les serpens qui viuent en leurs creux,  
Voire du Ciel les diuerses puissances,  
Tous les Démons & les intelligences  
Vont de ces deux comme nous se formant,  
De Dieu l'esprit, le corps de l'element.*

De là nous vient la tristesse & la crainte,  
De là la ioye en nos cœurs est emprainte,  
L'amour, la haine & les ambitions :  
De là se font toutes nos passions.

Or de nos corps la qualité diuerse  
Empesche & nuit que nostre ame n'exerce  
Sa viue force enclose en la maison  
De terre, ainçois en la morne prison  
Des membres froids qui la chargent & pressent,  
Et vers le Ciel retourner ne la laissent,  
Tant le fardeau terrestre & ocieux  
Ne luy permet de reuoler aux cieux.  
Elle d'enhaut nostre hostesse venue  
Est par contrainte ici bas detenue,  
Où n'employant sa premiere vigueur,  
Par habitude & par trait de longueur  
Consent au corps, & faut qu'en despit d'elle  
S'estant infuse en la chair corporelle  
Elle se souille & honnisse aux pechez  
Dont les humains ont les corps entachez.

Or quand la mort aux hommes familiere  
Dissipe au vent nostre douce lumiere,  
L'ame pourtant apres le froid trespas  
Laisant son corps, son taq ne laisse pas  
Ny sa souilleure: elle emporte l'ordure  
Empreinte en soy qui longuement luy dure:  
Pource aux Enfers comme vn songe leger  
Elle deualle, à fin de se purger  
Et nettoyer sa macule imprimée  
Qu'elle receut dans le corps enfermée.

En l'air, en l'eau, par le feu, dans le vent  
Vont expiant & purgeant & lauant  
Les vieux delits de leurs fautes commises  
A l'examen de Rhadamant' soumises.



*En ces tourmens ardans & violans  
L'une est mille ans, & l'autre deux mil ans,  
L'autre trois mil, & ne sont soulagées  
Qu'elles ne soyent parfaitement purgées,  
Et que la tache adherante ne soit  
Nette au souffrir du mal qu'elle reçoit.*

*Quand vn long temps de siecles & d'années  
L'une sur l'autre à courses retournées  
Ont nettoyé la macule, & ont fait  
L'esprit diuin estre pur & parfait,  
Et que le feu de tressimple nature  
Ne tient plus rien de la terrestre ordure,  
Tout aussi pur comme il estoit alors  
Que pur & simple il vint en nostre corps,  
Adonc Mercure à la verge d'yuoire  
Les assemblant au fleuve les fait boire,  
Fleuve qui fait toute chose oublier :  
Car autrement ne se voudroyent lier  
A nouveaux corps, & ne voudroyent plus estre  
Pour r'acquérir du mal par tant renaistre.*

*Ainsi qu'aigineaux en troupes amassez  
Par le baston de Mercure poussez  
Les ames vont sur la riue guidées  
Boire le fleuve à friandes ondées :  
Puis à l'instant perdent tout souuenir.  
Lors vn desir les prend de reuenir,  
Et de reuoir leur liaison premiere,  
Et du Soleil la celeste lumiere.*

*A tant se teut : Francion tout soudain  
Prend de rechef vn couteau dans la main,  
Et d'une truye infertile & brehaigne  
Ouvre la gorge : en tombant elle saigne  
A gros bouillons, dont le sang renuersé  
Tiede fuma dans le creux du fossé,*



*Priant Mercure & les sœurs Eumenides,  
Noms crains là bas, vouloir servir de guides  
A ces esprits qui deuoyent quelquefois  
Venir aux corps des Monarques François.*

*Comme il disoit, entre souffres & flames  
Voici venir de l'abyssme les ames.  
Vn tourbillon tournoyant & fumeux,  
Vn feu de poix resineux & gommeux  
Alloit deuant (qui de puante haleine  
Infectoit l'air & les eaux de la plaine)  
Auec grand son, comme vn tonnerre bruit  
Brisant la nue espaisse d'une nuit.  
Adonc Francus ayant l'ame frappée  
De froide peur, au poing saqua l'espée  
Les menaçant : puis se tirant à part  
Sur vn terreau qui pendoit à l'escart  
Pour mieux pouuoir leurs visages cognoistre,  
Sçauoir leurs noms, leurs formes & leur estre,  
Les contemploit, & comme tout transi  
Appelle Hyante, & luy demande ainsi.*

*Quel est celuy de royale apparence  
Qui d'un grand pas tous les autres deuançe,  
Et d'oliuier se couronne le front ?  
Elle respond, C'est le Roy Pharamont,  
Qui des François abaissant un peu l'ire  
Et le desir conceu sous Marcomire  
D'assuiettir les terres & les Rois,  
Adoucira son peuple par les lois,  
Et leur fierté Sicambroïse & Scythique  
Amollira par la douceur Salique,  
Pour retirer du chaud amour de Mars  
Le cœur selon de ses braues soudars.*

*Quel est ce Prince appuyé d'une hache  
Qui tout son chef ombrage d'un panache,*

*Au front feure, aux yeux gros & ardans,  
A longue barbe, à longs cheveux pendans,  
Qui rien qu'horreur ne monstre en son visage?  
C'est Claudion, qui l'ocieux courage  
Des vieux Germains aux armes referra,  
Et leur paresse en guerre eschauferra,  
D'ardeur nouvelle animant leurs poitrines  
A conquerir les provinces voisines.  
Luy tout ardant du feu de guerroyer,  
Enfant de Mars, doit un iour foudroyer  
L'orgueil Romain : puis d'une vertu viue  
Du Rhin Gaulois outrepasser la riue,  
Et la forest Charbonniere percer.  
A forte main doit un iour renuerser  
Les Turingeois, & la muraille ancienne  
De Mont, Cambray, & de Valenciennes,  
Et de Tournay, & doit rougir les bors  
De Somme tiede au carnage des mors :  
Doit bien auant en Gaule faire entrée :  
Nulle puissance en armes rencontrée  
Son masle cœur supporter ne pourra :  
Comme vne foudre en Bourgongne courra,  
Vaincra Tholoze, & les Gots d'Aquitains  
Comme sapins estendra sur la plaine :  
Puis en donnant exemple à ses neueux  
De liberté portera longs cheveux,  
S'esjouissant pour remarque immortelle  
Que Cheuelu toute Gaule l'appelle.*

*Quel est celuy qui marche le premier  
Après ces deux, au visage guerrier,  
Qui tient la face aux astres eleuée?  
C'est le vaillant & iuste Merouée,  
Aspre ennemi des Huns, qui descendront  
Plus dru que gresle, & par force prendront*

Pillant brulant à flames enfumées  
(Mars tout sanglant conduira leurs armées)  
Tréues, Coulongne, & mille forts chasteaux  
Que le grand Rhin abreuve de ses eaux,  
Et ru'ront Mets à l'egal de la terre :  
Cruelle engeance, indontable à la guerre.  
La mer ne iette aux bords tant de sablons,  
Que de soldats hideux en cheueux blons  
S'amasseront trope venant sur trope  
Pour mettre à sac l'Occidentale Europe  
Sous Atila cruel Prince inhumain,  
Extreme fleau de l'Empire Romain.

Contre vn tel peuple espoignoné de rage,  
Tout acharné de meurdre & de carnage,  
Craint comme foudre à trois pointes tortu,  
Ce Merouée opposant sa vertu  
Pres de Chalons abaissera l'audace  
De ces felons : menu dessus la place  
L'un dessus l'autre adentez tomberont,  
Si qu'esendus par les champs ils n'aurent  
Pour leur tombeau que les bestes sauvages  
Soules du sang de leurs puants carnages.  
Luy le premier suiui de ses Troyens,  
Regaignera les bords Parisiens,  
Sens, Orleans & la coste de Loire :  
Puis de ton nom Francus ayant memoire,  
Le nom de Gaule en France changera :  
Ton sang versé par armes vangerà,  
Et nul des tiens chargé de tant de proye  
Ne doit pouffer si haut le nom de Troye,  
Vaillant monarque, inuincible, inuaincu,  
Victorieux : autour de son escu  
(Frayeur, horreur des guerres eschaufées)  
Naistront lauriers & palmes & trofées,

Et le premier fera voir aux François  
Que vaut l'honneur acquis par le harnois,  
« Puis il mourra : car toute chose née  
« Est en naissant à la mort destinée.  
De son grand nom les vieux Sicambriens  
Seront long temps nommez Merouéens,  
Et ses vertus auront tant de louanges,  
Qu'aimé des siens, redouté des estranges  
Après sa mort d'inviolable loy  
Nul tant soit preux, n'aura l'honneur de Roy  
Portant au chef la couronne eleuée,  
S'il n'est yssu de la gent Merouée.

L'autre qui vient baissant vn peu les yeux  
Ensemble triste & ensemble ioyeux  
Est-il des miens ? dy le moy ie te prie.  
C'est Childeric Roy de meschante vie,  
Ord de luxure, infet de volupté,  
Au cœur paillard des vices surmonté,  
Prince prodigue execrable en despenses,  
Qui pour fournir à ses folles boubances  
De ses suiets rongera tous les os,  
Boira le sang, hauffera les impos,  
Tailles tributs, & de si orde iniure  
Faite aux François nourrira sa luxure.  
Il rauira des pucelles la fleur,  
(Honte aux parens des peres la douleur)  
Et sera plein de telle nonchalance,  
Que deniant aux peuples audience  
Consommerá pour neant le Soleil  
Sans voir iamais ny palais ny conseil.  
Pource la France à l'enui coniurée  
Contre sa vie ainsi desmesurée,  
Le chassera de son throne royal :  
Faira banni vers son ami loyal

Roy d'Austrasie, où suivant son usage  
Sans reuerer le saint droit d'hospitalage  
Et Iupiter protecteur d'amitié,  
Opiniastre en toute mauuaitié,  
(Dieux destournez un acte si infame  
Du cueur des Rois!) luy honnira sa femme  
Pour le loyer de l'auoir bien receu.

« L'homme de bien est volontiers deceu!

De Childeric esliront en la place  
Le Duc Gillon d'Italienne race,  
Qui regira les Romains à Soissons,  
Pire que l'autre en cent mille façons.

La France adonc qui son Prince desire,  
Plaignant le Roy chassé de son empire,  
R'appellera Childeric son seigneur.  
Luy se voyant en son premier honneur  
Doit amender par vergongne ses fautes :  
Si que vaillant, plein d'entreprises hautes  
(Pour effacer de ses pechez le nom)  
Brave au combat ne taschera sinon  
Que la vertu par les armes suiuiue  
Perde le bruit de sa premiere vie.  
Adonc suiura Gillon son ennemi  
Par les rochers, les forests & parmi  
Les flots du Rhin: Gillon plein de vergongne  
S'ira sauuer dans les murs de Coulongne,  
Que Childeric (Prince guerrier & caut)  
Le fer au poing emportera d'affaut :  
Puis sans donner aux Romains nulles tréues  
Fera broncher les murailles de Tréues,  
Où ce Gillon vagabond s'enfuira.  
Les fiers Saxons en bataille occira,  
Il tu'ra Paul de nation Romaine,  
Et d'Orleans tirant iusqu'au domaine

*Du riche Anjou, hazardeux aux dangers  
Se fera Roy victorieux d'Angers,  
Et des Romains les armes estoquées  
Au Dieu de Loire appendra pour trofées.*

*Vois-tu Clouis grand honneur des Troyens ?  
Qui le premier abhorrant les Payens  
Et des Gentils les menteuses escoles,  
Pour suiure Christ laissera les idoles,  
Donnant baptesme aux François desuoyez ?  
Et lors du ciel luy seront enuoyez  
Vn Oriflame, estandart pour la crainte  
De ses haineux, & l'Ampouille tressainte  
Huile sacrée onction de tes Rois.  
Son escusson deshonoré de trois  
Crapaux boufis, en changeant de peinture,  
Prendra les Lis à la blanche teinture,  
Present du Ciel : Dieu qui le choisira,  
D'honneur de force & de biens l'emplira !  
Ne vois-tu pas comme son front assemble  
La grauité & la douceur ensemble,  
Ayant le bras armé sans estre armé,  
Ensemble craint ensemble bien aimé ?*

*Nul ne vaincra ce Roy de courtoisie :  
Mais quand l'espée au poing aura saisie,  
Nul conquerant tant soit braue de cœur,  
De ce Clouis ne se dira veinqueur.  
Il poursuiura d'une ardante colere  
Siagre fils de Gillon, qui son pere  
Deposseda, & son camp assaudra  
Si viuement que Soissons il prendra,  
Perdant du tout la puissance Romaine :  
Puis dès le Rhin iusqu'aux riues de Seine,  
De Seine à Loire il sera conquerueur,  
Des Rois voisins le foudre & la terreur.*

« La fortune est d'inconstance emplumée !  
Luy conduisant vne gaillarde armée  
Outre le Rhin contre les Alemans  
Prompts aux combats, aux guerres vehemens,  
Sera pressé d'une si grande suite,  
Que tout honteux de penser en la fuite  
Aura recours tant seulement à Dieu :  
Lors s'eslançant furieux au milieu  
Des Alemans, de sa Françoisse espée  
Rendra de sang la campagne trempée,  
Tu'ra leur Roy, & des peuples dontez  
Tributs par an luy seront apportez.  
Lors enrichi des despouilles conquises  
Au nom de Christ bastira des Eglises.  
Puis se chargeant (comme Prince inuaincu)  
Le dos de fer & le bras de l'escu,  
Ira de Vienne aborder le riuage.  
Vn Cerf chassé monstrera le passage  
Au camp François, grand miracle diuin !  
Pres de Poitiers fera trembler le Clin  
Dessous ses pieds, assaillant de furie  
Alaric Roy des peuples de Gothie.

Desia le vent branle les estandars,  
Pied contre pied se fichent les soudars  
loyeux de sang : tout le cœur leur bouillonne,  
Vne poussiere en rond les environne,  
Et sans relasche au milieu des trauaux  
Sont renuersez cheualiers & cheuaux.  
Le Roy Clouis ardant à la conquête,  
Perçant son camp opposera sa teste  
Contre Alaric : là d'un cœur hazardeux  
Ces puissans Rois s'affronteront tous deux  
Braues, hautains, furieux comme foudres.  
Sous leurs cheuaux deux tourbillons de poudres



Noirciront l'air, & sans avoir repos  
Ici Clouis ici le Roy des Gots  
Poussez tournez de fortune diuerse,  
Seront portez tous deux à la renuerse.  
Le mol sablon imprimera leurs corps :  
Eux releuez plus ardans & plus forts  
Cherchant la mort espandront sur la place  
Gréues cuiffots morions & cuirace,  
Suant tous deux de colere & de coups :  
Mais à la fin Clouis plein de courroux  
Fera du Goth victime à Proserpine,  
D'une grand' playe enfondrant sa poitrine.  
Ainsi Clouis Alaric occira :  
L'ame Gothique aux enfers s'en ira !

Puis s'emparant des thresors de ce Prince,  
Prendra Tholoze & toute la prouince  
D'Alby, Rouargue, Auuergne & Limosin,  
Et le país de Garonne voisin.  
De là pompeux d'une si noble gloire,  
Des Bourguignons raura la victoire,  
Les massacrant d'un courage trop chaut  
Pour le forfait de leur Roy Gondebaut.  
Bref ce Clouis d'invincible puissance  
Doit bouter hors son empire d'enfance,  
Le rendre masle, à fin que tous les Rois  
Tremblent de peur aux armes des François.

De ses vertus l'acquise renommée  
Sera si grande & si haute semée,  
Que ses enfans ne seront maintenus  
- En leur grandeur, que pour estre venus  
D'un pere tel, lequel durant sa vie  
Ne vaincra pas tant seulement l'enuie  
Des Rois vassaux à son glaiue pointu,  
Mais si au large estendra sa vertu,



Qu'enfeveli deſſous la terre ſombre  
 Fera trembler les Princes de ſon ombre :  
 Tant vaut l'honneur d'un Prince apres la mort,  
 Qui en viuant fut equitable & fort !  
 Or pour monſtrer que telle creature  
 Se veſtira de celeſte nature,  
 Avant ſa mort les feux preſageux,  
 Le tremble-terre & les foudres des cieux  
 Esbranleront ſa royale demeure.  
 « Mais quoy ? Troyen, il faut que l'homme meure !  
 « En ſon bateau Caron prend vn chacun,  
 « Et du tombeau le chemin eſt commun.

Voy Childebert & Clotaire ſon frere,  
 Qui tous ardans d'une iuſte colere  
 Que Gondebaut comme Prince cruel  
 Ait fait meurdrir leur oncle maternel,  
 Deſſus ſon fils Sigismond de Bourgongne  
 De telle mort vangeront la vergongne.  
 Ces deux grands Rois à la guerre aſſemblez  
 Donnant bataille aux Bourguignons troublez,  
 Les meurdriront d'une mort tres-amere,  
 Gratifiant aux larmes de leur mere,  
 Qui ſouſpiroit de ne voir point vangé  
 Le corps royal de ſon pere outragé.

Ce Childebert & Clotaire grands Princes  
 Pour augmenter les bords de leurs prouinces  
 Rompant le droit, la nature & la loy,  
 « (Entre les Rois ne dure point la foy,  
 « Tant le deſir de regner leur commande)  
 Freres germains ſuiuſ d'une grand'bande  
 D'hommes armez partiaux & mechans  
 Voudront helas ! de leurs glaiues tranchans  
 S'entre-tuer, & rougir les batailles  
 Du ſang tiré de leurs propres entrailles.

Mais sur le point qu'ils voudront s'affaillir,  
Voicy du iour la lumiere jaillir :  
Neiges & vents & tourbillons & gresle  
Du ciel creué tomberont pesle-mesle  
Entre-semez de foudres & d'esclairs :  
Hommes, cheuaux, morions & bouclairs  
Seront frappez de pluye & de tonnerre.  
Vn tel miracle appaisera la guerre  
De ces germains : le bon Dieu l'a permis :  
Puis de haineux deuenus bons amis,  
Freres de sang & de cueur sans rancune  
Ramasseront leurs puissances en vne,  
Fiers aux combats, inuaincus cheualiers :  
Puis en poussant milliers dessus milliers  
D'hommes armez, par hautes destinées  
Iront gagner les cymes Pyrenées,  
Princes guerriers, inuaincus de trauaux.  
Les monts d'Espaigne au bruit de leurs cheuaux  
Retentiront, & couuerts de gendarmes  
Les champs luiront sous l'esclair de leurs armes.

Lors Almaric Roy des Gots, qui tiendra  
Sous luy l'Espagne, ardant les assaudra  
(Nouveau fuzil de l'ancienne noise)  
Mais pour neant : car la vertu Françoisse  
De pieds de mains & de teste poussant  
Ira des Goths la force renuersant.  
Ce Roy voyant sa puissance coupée  
Du fer Gaulois, sçaura que vaut l'espée  
De Childebert, qui luy persant la peau,  
Costes & cœur, ira iusqu'au pommeau  
D'une grand' playe en la poitrine ouuerte :  
Auec le sang fuira l'ame deserte  
Du corps Gothiq, & franche de ses os  
Ira chercher là bas autre repos.

Ces freres Rois, ains frateur des campagnes,  
 Ardront perdront pilleront les Espagnes,  
 Mettant à sac & peuples & seigneurs :  
 Lors tous enflez de butins & d'honneurs,  
 Et d'une gloire aux François eternelle,  
 Viendront reuoir leur terre paternelle :  
 Puis sans enfans des vieillards le confort,  
 Comme tous Rois, seront pris de la mort.

Quel est cest autre eshonté de la face ?  
 C'est Aribert des-honneur de ta race,  
 Le nourrisson de toute volupté,  
 Qui pour ton fils ne doit estre conté.

L'autre d'apres qui tout morne se fasche,  
 Qui tient sa gorge & qui marchant remasche  
 Mainte menace & resue tout à soy ?  
 C'est Childeric indigne d'estre Roy,  
 Mange-suiet, tout rouillé d'auarice,  
 Cruel tyran, seruiteur de tout vice,  
 Lequel d'imposts son peuple destruira :  
 Ses citoyens en exil bannira  
 Affamé d'or, & par armes contraires  
 Voudra rauir la terre de ses freres,  
 N'aimant personne & de personne aimé :  
 Qui de putains vn serrail diffamé  
 Fera mener en quelque part qu'il aille,  
 Soit temps de paix ou soit temps de bataille :  
 En voluptez consommera le iour,  
 Et n'aura Dieu que le ventre & l'amour.

Les escoliers n'auront les benefices,  
 Les gens de bien ny honneurs ny offices :  
 Tout se fera par flateurs eshontez,  
 Et les vertus seront les voluptez.

Jamais d'enhaut la puissance celeste  
 Ne monstra tant son ire manifeste,

Et l'œil de Dieu qui nous regarde tous,  
 Ne monstra tant aux hommes son courroux.  
 Signes de sang de meurdres & de guerre,  
 De tous costez un tremblement de terre,  
 Horrible peur des hommes agitez,  
 De fond en comble abatra les citez.  
 Jamais les vents la terre ne creuerent  
 En plus de lieux : iamais ne s'eleuerent  
 Plus longs cheueux de Cometes aux Cieux,  
 De son malheur signes presagieux.

Et toutesfois pour ces menaces hautes,  
 Ce mechant Roy n'amendera ses fautes :  
 Mais tout superbe en vices endurci,  
 Contre le Ciel eleuant le sourci,  
 O cœur brûlé d'infame paillardise !  
 Estouffera contre sa foy promise,  
 En honnissant le saint liēt nuptial,  
 Sa propre espouse, espoux tresdesloyal.

Ny liēt ny foy ny la nuit amoureuse  
 Ne defendront Galsonde malheureuse,  
 Qu'en luy pressant le gosier de sa main  
 Ne la suffoque, homicide inhumain :  
 Acte d'un Scythe & non d'un Roy de France,  
 Lequel deuoit s'opposer en defense  
 Pour la sauuer, & luy-mesmes s'offrir  
 Plustost cent fois à la mort, que souffrir  
 De voir sa femme ou captiue ou touchée :  
 Et toutesfois aupres de luy couchée,  
 lointe à son flanc, le baisant en son liēt,  
 Seure en ses bras, l'estranglera de nuit.  
 Cruel tyran ! à qui dessus la teste  
 L'ire de Dieu pend desja toute preste :  
 Son propre sang son crime lauera ;  
 Et sa putain sa femme vangera.

Apres la mort de sa femme Galsonde  
 Doit espouser sa garce Fredegonde,  
 Qui d'un visage eshonté de regars  
 Et de maintiens lubriques & paillars,  
 Et d'un parler entre l'humble & le graue,  
 Fera ce Roy de maistre son esclau,  
 L'abestissant si bien à ses desirs,  
 Qu'il seruira valet de ses plaisirs :  
 Puis doit apprendre aux despens de sa vie  
 « Que l'homme est fol qui aux putains se fie.

Or elle ayant assoté son mari  
 Pour mieux iouir de son ribaud Landri  
 Qui du Royaume auoit toute la charge,  
 Folle d'amour, à deux meurdriers encharge  
 A son retour de la chasse bien tard  
 De luy percer la gorge d'un poignard.  
 Ainsi mourra par les mains de sa femme  
 Ce Chilperic des Princes le diffame.

Elle sans peur ny de Dieu ny de lois,  
 Toute effrontée, ayant encor les dois  
 Rouges du sang de son mari, pour taire  
 Par un beau fait le meurdre & l'adultere,  
 Ira guerriere au milieu des combas,  
 Tiendra son fils de trois mois en ses bras,  
 Traistre pitié! pendant à sa mammelle,  
 Dont son paillard aura pris la tutelle  
 Puis ceste Roine abominable, ainçois  
 Ceste Furie execrable aux François,  
 De qui la teste attendoit le supplice,  
 Comme si Dieu fauorisoit le vice,  
 Viura sept ans en pompes & honneur  
 Auec Landri, des François gouuerneur :  
 Et qui pis est, morte on la fera Sainte.  
 « Ainsi tout va par fraudes & par fainte!

*L'autre qui suit est Clotaire son fils,  
Par qui seront les Saxons desconfis,  
Ne souffrant viure en leur terre occupée  
Masle debout plus grand que son espée,  
Sage guerrier, victorieux & fort,  
Qui pour l'honneur mesprisera la mort.*

*De Brunehaut Princesse miserable  
Punira seul la malice execrable,  
Le corps lié trainant à son cheual.  
Ses vieux cheueux par montaigne & par val  
Seront espars: si que d'elle tirée  
Les chemins pleins de sa peau deschirée  
Voyront saigner cuisses, iambes & flancs,  
Et les buissons s'arrouser de leurs sangs.*

*Bien qu'un grand Roy ne puisse auoir louange  
Quand par la mort d'une femme il se vange,  
Pourtant Clotaire est absous des François  
D'auoir vangé le sang de tant de Rois,  
Que par poison, par glaiue & par cautelle  
Auoit occis ceste Roine cruelle.*

*Les Lestrygons les Cyclopes qui n'ont  
Au front qu'un œil, en leurs rochers ne sont  
Si cruels qu'elle à toute peste née,  
Qui ourdissant menée sur menée,  
Guerre sur guerre & débats sur débats,  
Fera mourir la France par combats:  
Mais à la fin sous les mains de Clotaire  
Doit de ses maux recevoir le salaire.*

*Ce gentil Prince entre ses nobles faits  
Voyant ses gens en bataille desfaits,  
Et Dagobert son fils iusqu'à la taye  
Couure-cerueau atteint d'une grand' playe  
Perdre le sang en longue pasmaison,  
Reuestira son chauue poil grison*

D'un morion, armes de la ieunesse,  
Et tout son corps refroidi de vieillesse  
Reschaufiera d'un cœur ieune & gaillard:  
Puis en brossant les flancs de son bayard  
Chaud de colere & de menace fiere,  
Passant à nou le fil d'une riuere  
Ira trouuer le Roy sur l'autre bord  
Qui se mocquoit de son fils demi-mort.  
Alors ces Rois d'un valeureux courage  
Front contre front sur le premier riuage  
S'acharneront comme loups au combat.  
Le bon Clotaire à la renuerse abat  
Son ennemi, & sa teste coupée  
Embroke droite au bout de son espée,  
Auec grans cris repassant vers les siens:  
AÛte Gaulois, & digne des Troyens,  
De siecle en siecle à iamais memorable,  
Tant vaut un pere à son fils pitoyable!

L'autre qui vient en magnifique arroy,  
Qui de maintien represente un grand Roy,  
Est-il des miens? dy-le moy ie te prie.  
C'est Dagobert fleur de Cheualerie:  
En sa ieunesse aura le cœur hautain,  
Reuesche en mœurs, coupera de sa main  
(AÛte impiteux) la barbe de son maistre.  
Puis par le temps venant son âge à croistre,  
De Prince fier deuiendra gracieux,  
Tant seulement en deux poinÛts vicieux,  
L'un de nourrir par trop de concubines,  
L'autre de faire excessiues rapines  
Sur mainte Eglise, à fin d'enrichir un  
Moustier à part du reuenu commun:  
Au reste accort de bonnes mœurs & sage,  
Qui craindra Dieu, qui punira l'outrage



Des orfelins, qui viura par conseil,  
Qui n'aura point en armes son pareil,  
Prudent guerrier, qui sera sans contrainte  
L'amour des siens, de ses voisins la crainte :  
Qui chassera les peuples circoncis  
De ses païs, par qui seront occis  
Les Esclavons, qui dessus la campagne  
Eftendra morts les peuples d'Allemagne,  
Et les Lombars par guerres destruira :  
Qui les Gascons rudement punira,  
Et qui rendra la nation seruite  
Des Poiteuins, & qui Poitiers leur ville  
Saccagera par glaiues & par feux,  
Et la fera labourer par des bœufs,  
Semant du sel où furent ses murailles :  
Qui destruira les Hongres par batailles  
Tranchant au fer tant de peuples armez.  
Des os des morts les champs seront semez  
Et les chevaux nageront iusqu'au ventre  
Souillez de sang : la riuere qui entre  
Dedans la mer, à peine par ses bords  
Pourra couler, tant elle aura de morts.

Luy tout enflé de gloire militaire  
Rendra sous luy Bretagne tributaire,  
Et leur royaume en Duché changera.  
Tout au contraire ami deschargera  
(Aux vns hautain, aux autres debonnaire)  
Les fiers Saxons surmontez par son pere,  
De trois cens bœufs qu'ils deuoyent tous les ans :  
Puis desliant de ses membres pesans  
L'ame legere, apres mainte victoire  
Rendra son nom d'eternelle memoire.

L'autre qui suit d'honneur enuironné,  
Qui a le front de palme couronné,



Qui ja les Turcs menace de la guerre,  
 Sera Clouis lequel ira conquerre  
 Hierusalem & les Sceptres voisins  
 D'Egypte iointe aux peuples Sarrazins.  
 Outre la mer bien loin de sa patrie  
 Tiendra des luifs l'heureuse seigneurie,  
 Et son ost braue & luy braue à la main  
 Boiront sept ans les ondes du Iourdain :  
 Puis retourné pour quelque trouble en France,  
 De ses enfans punira l'arrogance,  
 Qui par flateurs par ieunes gens deceus  
 Vers celle ingrats qui les auoit conceus,  
 De tout honneur degraderont leur mere,  
 Et donneront la bataille à leur pere.

Leur mere adonc, ah! mere sans merci,  
 Fera bouillir leurs iambes, & ainsi  
 Tous mehaignez les doit ietter en Seine.  
 Sans guide iront où le fleuve les meine  
 A l'abandon des vagues & des vens :  
 Graue supplice! à fin que les enfans  
 Par tel exemple apprennent à ne faire  
 Chose qui soit à leurs parens contraire.  
 Bien que ce Roy soit magnanime & fort,  
 Soit aumosnier, des pauvres le support,  
 Pourtant son ame aux vices inclinée,  
 De trop de vin se verra dominée.  
 L'amour la gueule & les plaisirs qui font  
 Rougir de honte un Prince le feront  
 Esclaue Roy de vilaine luxure,  
 Trompant son nom, soy-mesme & la nature.

Vois-tu ceux-ci qui abaissent les yeux  
 Honteux de voir la lumiere des Cieux,  
 Qui ne deuoyent au monde iamais naistre,  
 Ny moins auoir Hector pour leur ancestre ?

*Clotaire est l'un, & l'autre est Childeri,  
Theodoric l'autre en delices nourri,  
Trois fait-neants, grosses masses de terre,  
Ny bons en paix, ny bons en temps de guerre,  
La maudisson du peuple despité.*

*L'un pour souiller son corps d'oïsiuété,  
Pour n'aller point au conseil, ny pour faire  
Chose qui soit au Prince necessaire,  
Pour ne donner audience à chacun,  
Pour n'avoir soin de soy ny du commun,  
Pour ne voir point ny Palais ny lustice,  
Mais pour rouïller sa vie entre le vice,  
Traïstre à son peuple & à soy desloyal,  
Sans plus monter en son throne royal,  
Ains le fraudant de son naturel guide,  
A Esbrouin en laschera la bride,  
Et le fera soit en guerre ou en paix  
Chef du Conseil & Maire du Palais.*

*Cest Esbrouin aura soin des batailles,  
De la finance & d'augmenter les tailles,  
Et de respondre à tous Ambassadeurs :  
Et son estat aura tant de grandeurs  
Comme chargé d'une peine honorable,  
Qu'il deviendra si craint & redoutable  
(En ce-pendant que les Rois amusez  
A boufonner, des femmes abusez,  
Sans nul conseil, trahis de leur plaïssance,  
Sont Rois de nom, Esbrouin de puissance)  
Qu'en peu de iours ces Maires approuvez  
De tout le peuple, aux honneurs eleuez,  
Puissans de faits de parolle & d'audace,  
Des premiers Rois aboliront la race,  
Et se feront d'autorité pourueus  
Eux-mesmes Rois, leurs fils & leurs neueus.*

Pource, Troyen, ne commets telle faute,  
 « N'eleue point en dignité trop haute  
 « Quelque vassal : ton dommage en depend.  
 « Quand un Roy faut, trop tard il s'en repent.

L'autre second de luxure tout palle  
 Perdra longtemps sa dignité royale,  
 Et sans egard à son sang descendu  
 De tant de Rois, sera Moyne tondue  
 Et r'enfermé dedans un Monastere.

Le tiers qui vient pensif & solitaire,  
 De ses suiets comme peste hay,  
 A contre-cœur des Seigneurs obey,  
 Chaud de colere, à regner mal-habile,  
 Fera foëter le Cheualier Bodille  
 En lieu public lié contre un posteau  
 Tout deschiré de veines & de peau.

Bodille plein d'un valeureux courage,  
 Tousiours pensif en si vilain outrage,  
 Ne remaschant que vengeance en son cœur,  
 Lairra couler quelque temps en longueur :  
 Puis sans respect de Sceptre ou de Couronne  
 (Tant le despit furieux l'espoignonne)  
 Tout allumé de honte & de sureur  
 Fera payer à ce Roy son erreur  
 Par son sang propre, enrougissant sa dextre  
 Dedans le cœur de son Prince & son maistre,  
 Et d'un tel fiel sa vengeance emplira,  
 Que le Roy mort, la Roine il occira  
 Et son enfant enclos en ses entrailles.  
 « Il faut qu'un Roy soit cruel aux batailles,  
 « Mais doux aux siens : il faut que la fierté  
 « Soit aux lions, aux Princes la bonté  
 « Comme mieux-nez & qui ont la nature  
 « Plus pres de Dieu que toute creature.

*Ce Roy doit estre abusé par flatteurs  
Peste des Rois, courtizans & menteurs,  
Qui des plus grans assegeant les oreilles,  
Font les discrets & leur content merueilles.  
Pource, Francus, si le Ciel te fait Roy,  
Sage entretiens des vieillars pres de toy,  
Qui te diront leurs raisons sans feintise  
En longs cheueux en longue barbe grise.*

*Ne vueilles point pour Conseillers choisir  
Ces ieunes fols qui parlent à plaisir.  
Le plus souuent les Princes s'abestissent  
De deux ou trois que mignons ils choisissent,  
Vrais ignorans qui font les suffisans,  
Qui ne seroyent entre les artizans  
Dignes d'honneur, grosses lames ferrées  
Du peuple simple à grand tort honorées,  
Qui viuent gras des impôts & des maux  
Que les Rois font à leurs pauvres vassaux :  
Tant la faueur qui les fautes efface,  
Fait que le sot pour habile homme passe!*

*Quelle fureur, qu'un Roy pere commun  
Doiue chasser tous les autres pour un  
Ou deux ou trois ? & blesser par audace  
Vn masle cœur issu de noble race,  
Sans regarder si le flatteur dit vray ?  
Ce Childeric doit cognoistre à l'essay  
Le mal qui vient de croire à flaterie,  
Perdant d'un coup femme enfant & la vie.*

*Voy, Francion, ces autres Rois dontez  
De vin d'amour de toutes voluptez,  
Qui abestis en un monceau se pressent,  
Et le regard contre la terre baissent.  
Vne grand' nue esparse sur le front  
Les obscurist : regarde comme ils vont*

Effeminez, & d'une alleure lente  
 Monstrent au front vne ame nonchalante.  
 Ah malheureux ! ils seront fils des tiens,  
 Germe maudit, Troyennes non Troyens :  
 Qui tant s'en faut qu'ils soyent en France dignes  
 D'avoir au chef les couronnes insignes,  
 Qu'ils ne sont pas, peste du genre humain,  
 Dignes d'avoir l'aiguillon en la main,  
 Rois sans honneur, sans cœur, sans entreprise,  
 Dont la vertu sera la paillardise.  
 Leur beau royaume acquis par le harnois  
 De tant d'ayeux trefnuincibles Rois,  
 Par la sueur de tant de Capitaines,  
 Par sang par fer par discours & par peines,  
 Tout en un iour par lascheté de cœur  
 Perdra puissance accroissance & vigueur !  
 Ne vois-tu pas comme Clouis en pleure ?

» Tay-toy grand Roy, rien ça-bas ne demeure  
 » En son entier : tant plus le Sceptre est haut,  
 » Et plus il tombe à terre d'un grand saut.

Ces Rois hideux en longue barbe espesse,  
 En longs cheveux ornez presse sur presse  
 De chaisnes d'or & de carquans grauez,  
 Hauts dans un char en triomphe eleuez  
 Vne fois l'an feront voir leur visage :  
 Puis tout le reste ils seront en seruage,  
 Laisant la bride aux Maires du Palais,  
 Dont ils seront esclaves & valets,  
 Masques de Rois, idoles animées,  
 Et non pasteurs ny Princes des armées,  
 Qui se verront honnis de voluptez,  
 De leurs vassaux à la fin surmontez.  
 Appren, Troyen, comme un lasche courage  
 Perd en un iour son Sceptre & son lignage.

» Il ne faut estre aux affaires retif :

» La Royauté est vn mestier actif.

Voy Chilperic le dernier de la race  
De Pharamond, comme il baïsse la face,  
Moyne razé pour sa lubricité,  
Vn fait-neant moisi d'oïsuété,  
Qui ja ce semble aux plaisirs s'abandonne.  
Cestuy perdra le Sceptre & la Couronne  
Du grand Clouis, & son Maire Pepin  
S'en fera Roy par ne sçay quel destin,  
En transferant l'ancien diadesme  
De la maison de son maistre à soy-mesme.  
Bien qu'à grand' peine ait quatre pieds de corps,  
Bas de stature, & de membres peu forts,  
Il aura l'ame active & vigoureuse :  
Et de conseil & de prudence heureuse  
Il dontera la force des plus grans.

Pource, Francus, par tel exemple apprens

« Que tout Royaume augmente en accroissance

« Par la vertu, & non par la puissance :

« Et que Dieu seul qui toute chose peut,

« Perd & maintient les Sceptres comme il veut.

« Pour les garder l'homme en vain se traueille :

« Car c'est luy seul qui les oste & les baille.

Qui sont ces deux qui vont marchant à part ?

Qui de la troupe eslongnez à l'escart

Discourent seuls de grans propos ensemble ?

A voir leur port l'un & l'autre me semble

Sage guerrier, & nul ne s'est monsté

De tant d'honneur ny de gloire illustré.

Celuy, Troyen, qui fait bruire ses armes,

Grand Capitaine & pasteur de gens d'armes,

Qui ja sa main sur vne lance met,

Qui d'un panache ombrage son armet

*Au fier maintien, au superbe courage,  
 Qui rien que Mars ne monstre en son visage,  
 Sera Martel gouverneur des François,  
 Non Roy de nom, mais le maistre des Rois.  
 Dedans le Ciel fera monter l'Empire  
 Du nom Gaulois, & nul devant son ire  
 N'opposera ny lance ny escu,  
 Qu'il ne soit pris ou fuitif ou veincu.*

*Voy quels Lauriers, marque de sa conquête,  
 Vont plis sur plis environnant sa teste!  
 Voy son maintien combien il est gaillard,  
 Et de quels yeux il enfonce un regard!  
 Il occira par bataille cruelle  
 Des forts Saxons la nation rebelle:  
 Ceux de Bauiere à mort desconfira:  
 Les Allemans tributaires fera  
 Jusqu'au Danube, & la terre Frizonne  
 Rendra veinqueur, suiette à sa Couronne:  
 Prendra d'assaut, inueincu Cheualier,  
 Nismes, Marseille, Arles & Montpelier,  
 Beziers, Narbonne, & toute la Prouence  
 Fera seruire à son obeïssance:  
 Prendra Bordeaux, & Blaye, & tous les forts  
 Que la Gironde arrouse de ses bords.*

*Voicy comme Eude Empereur d'Aquitaine  
 Les Sarrazins peuple innombrable ameine  
 Contre Martel, à la guerre conduits  
 Par Abdirame antique sang des luifs,  
 Qui d'Abraham & de Sarra sa femme  
 Se vantera: ce cruel Abdirame,  
 Cruel de mœurs, de visage & de cœur,  
 Des puissans Dieux & des hommes mocqueur,  
 Tout acharné de meurdre & de furie,  
 Enflé d'orgueil, enflé de vanterie,*



*Doit amasser les siens de toutes pars  
Femmes, enfans, vieux & ieunes soudars,  
Valets, bouviers, marchans, à fin que l'onde  
D'un si grand ost effroye tout le monde.*

*Ces Sarrazins au travail obstinez  
Outre-passant les cloistres Pyrenez,  
Et file à file espuisant toute Espagne,  
Se planteront au pied de la campagne  
Avec grands cris, tels que les grues font  
Quand queuë à queuë en ordre s'en re-vont  
Hautes au vent, & déhachant les nuës  
Vont demeurer en leurs terres cognuës  
Fuyant l'hyuer : vn cry tranchant & haut  
Se fait en l'air, tout le ciel en treffaut !  
La mer ne pousse aux riuës tant d'areines,  
De tant de feux les voutes ne sont pleines  
Au ciel la nuit, que de peuples pressez  
Dessous ce Roy se verront amassez.  
Ils tariront le coulant des fontaines :  
Dessous leurs pieds feront trembler les plaines,  
Grands comme pins en hauteur esleuez :  
Prendront Bordeaux & les peuples lauez  
De la Gironde, & d'ardeur violante  
Viendront puiser les eaux de la Charante,  
Ne pardonnant à temples ny moutiers :  
D'auares mains saccageront Poitiers,  
Razant chasteaux & villes enfermées,  
Et pres de Tours camperont leurs armées.*

*Là l'invincible indontable Martel  
Ne s'estonnant de voir vn nombre tel,  
Mais d'autant plus ayant l'ame eschaufée  
Qu'il verra grand le gain de son trofée,  
Chaud de louange & d'honneur hazardoux  
Ira planter son camp au deuant d'eux*



*Les menaçant : la Déesse Bellonne  
Courra deuant, & Mars qui aiguillonne  
Le cœur des Rois, pour sauuer de mechef  
Ce vaillant Duc, luy pendra sur le chef.  
Ce iour Martel aura tant de courage,  
Qu'apparoissant en hauteur d'auantage  
Que de coustume, on dira qu'un grand Dieu  
Vestant son corps aura choisi son lieu.*

*Luy tout horrible en armes flamboyantes,  
Mellant le fifre aux trompettes bruyantes,  
Et de tabours rompant le ciel voisin  
Esueillera le peuple Sarrazin,  
Qui l'air d'autour emplira de vrlées.  
Ainsi qu'on voit les torrens aux valées  
Du haut des monts descendre d'un grand bruit,  
En escumant la rauine se suit  
A gros bouillons, & maïstrisant la plaine,  
Gaste des bœufs & des bouuiers la peine :  
Ainsi courra de la fureur guidé  
Auec grand bruit ce peuple desbordé.  
Mais tout ainsi qu'alors qu'une tempeste  
D'un grand rocher vient arracher la teste,  
Puis la poussant & luy pressant le pas,  
La fait rouler du haut iusques à bas :  
Tour dessus tour, bond dessus bond se roule  
Ce gros morceau qui rompt, fracasse & foule  
Les bois tronquez, & d'un bruit violent  
Sans resistance à bas se va boulant.  
Mais quand sa cheute en tournant est roulée  
Iusqu'au profond de la creuse valée  
S'arreste coy : bondissant il ne peut  
Courir plus outre, & d'autant plus qu'il veut  
Rompre le bord, & plus il se courrousse,  
Plus le rempart le presse & le repousse :*

*Ainsi leur camp en bandes diuisé  
Ayant trouué le peuple baptisé,  
Bien qu'acharné de meurdre & de tu'rie,  
Sera contraint d'arrester sa furie.*

*Chacun de rang en son ordre se met,  
Le pied le pied, l'armet touche l'armet,  
La main la main, & la lance la lance,  
Contre vn cheual l'autre cheual s'eslance,  
Et le pieton l'autre pieton assaut.  
Icy l'adresse, icy la force vaut,  
Sort & vertu pefle-mesle s'assemblent :  
Deffous les coups les armeures qui tremblent,  
Font vn grand bruit : Victoire qui pendoit  
Douteuse au ciel, les combats regardoit.  
Au mois d'Efté quand la pauvre famille  
Du laboureur tient en main la faucille,  
Et se courbant abat de son seigneur  
Les espics meurs, des campagnes l'honneur :  
Tant de moisson, tant de blonde iauelle  
L'une sur l'autre espais ne s'amoncelle  
De tous costez esparses sur les champs,  
Que de corps morts par les glaines tranchans  
Seront occis de la gent Sarrazine.  
En moins d'un iour hostes de Proserpine  
Iront là bas trois cens mille tuez,  
L'un dessus l'autre en carnage ruez.  
Mille ans apres les Tourangelles plaines  
Seront encor' de carcasses si pleines  
D'oz, de harnois, de vuides morions,  
Que les bouuiers en traçant leurs sillons  
N'oirront sonner sous la terre feruë  
Que de grands oz hurtez de la charrue.  
Tel au combat sera ce grand Martel :  
Qui plein de gloire & d'honneur immortel*

Perdra du tout par mille beaux trofées  
Des Sarrazins les races estoufées,  
Et des François le nom victorieux  
Par sa prouëſſe enuoyra iuſqu'aux cieux.

L'autre eſt Pepin heritier de ſon pere  
Tant en vertu qu'en fortune proſpere,  
Qui mari'ra la Juſtice au harnois,  
Et regira les ſiens par bonnes lois.  
Luy bas de corps, de cœur grand Capitaine,  
Par neuf conſlicts aſſaillant l'Aquitaine,  
De Gaïfier occira les ſoudars :  
Il rendra ſerf le Prince des Lombars  
Dontant ſous luy les forces d'Italie.  
Rome qui fut tant de fois aſſaillie,  
Sera remiſe en ſon premier honneur :  
Par luy le Pape en deuiendra Seigneur,  
Et des François prendra ſon accroïſſance :  
Tant le bon zele aura lors de poiſſance !

Par cent combats, par cent mille façons  
Doit renuerſer le peuple des Saxons,  
Peuple guerrier des François aduerſaire,  
Et ſous ſa main le rendra tributaire.  
La loy pendra ſur ſon glaiue pointu  
Craint de chacun : tant vaudra ſa vertu  
De la fortune heureuſe accompagnée !  
Sous luy faudra de Clouis la lignée,  
Si en perdant le ſang tref-ancien  
Des premiers Rois, fera naiſtre le ſien,  
Donnant lumiere à ſa race nouuelle  
Par les hauts faits de ſa dextre immortelle.

« N'eſpere rien au monde de certain :  
« Ainſi que vent tout coule de la main :  
« Enfant d'Heſtor, tout ſe change & rechange :  
« Le temps nous fait, le temps meſme nous mange :

« Princes & Rois & leurs races s'en-vont,  
« De leurs trespas les autres se refont.  
« Chose ne vit d'éternelle durée:  
« La vertu seule au monde est assurée!

FIN DV QVATRIESME LIVRE  
DE LA FRANCIADÉ.

---

L'AVTHEVR PARLE.

*Si le Roy Charles eust vescu,  
l'eusse acheué ce long ourage:  
Si tost que la mort l'eut veincu,  
Sa mort me veinquit le courage.*





## ELEGIE SVR LE LIVRE DE LA CHASSE

DV FEV ROY CHARLES IX. RECVEILLY

& ramassé par la diligence de Monseigneur  
de Villeroy.

*Soit que ce liure icy ne viue qu'un Prin-temps,  
Soit qu'il force la Parque, & viue plus long temps,  
Par maint siecle endurcy contre la faux dentee  
Des ans, dont toute chose à la fin est domtée,  
lamais on ne pourroit (sans ietter larmes d'œil)  
Le lire, en le voyant ainsi vestu de dueil,  
Non comme un orphelin qui a perdu son pere,  
Mais comme un auorton, à qui la main contraire  
De Lucine a tranché le fil, sans auoir sçeu  
Ny cognoistre ny voir celuy qui l'a conceu.*

*Tel enfant & ce liure ont pareille naissance,  
Qui n'eurent de leur pere onques la cognoissance.  
Toutefois vn chacun en contemplant le traict  
De son corps imparfait, voit bien qu'il est extraict  
De royale lignée & de hault parentage,  
Rapportant de sa race au front le tesmoignage.*

*Or son pere ne fut de ceux qui par les champs  
Vont ouurant les sillons de leurs coutres trenchans,*

Ny de ceux qui gardant la troupe camufette  
Des brebis, ont és mains la fluste & la houlette,  
Mais Seigneur des François, en vertus nompareil,  
En la terre aussi grana qu'au ciel est le Soleil,  
Qui pour n'empoisonner les ans de sa ieunesse  
D'amours ny de festins, de jeux ny de paresse,  
Et pour tromper l'ennuy des ciuiles fureurs,  
Aima chiens & cheuaux cognoisseurs & coureurs,  
Et de meute & d'abbois par brusque violence,  
Des forests & des cerfs resueiller le silence.

Il se fait si parfait en l'art de bien chasser,  
Qu'aux heures de loisir il en voulut tracer  
Le projet de ce liure, aimant la renommée  
Qui s'acquier par la plume & par l'encre animée  
Mieux que le vain honneur de bastir des chasteaux,  
Qui tombent à la fin morceaux dessus morceaux.  
Car le temps qui renuerse & sceptres & Empires,  
Egalement abbat & marbres & porphyres.  
Mais la ialouse mort despote d'un tel fait,  
Ne luy permist de voir son ouurage parfaict.  
Ainsi par la tempeste à terre on voit flestrie  
La Rose Adonienne auant qu'estre fleurie.

O Charles, dont le front est vestu de laurier,  
Tu te peux bien vanter que tu es le premier  
Des Monarques François, qui rompant la coustume  
Des Princes, t'es acquis loüange par la plume,  
Allongeant au tombeau d'un renom esclarcy  
Les ans victorieux de ton age accourcy.

Toutefois le labeur de ta plume estendue  
Se fust esuanouy comme poudre perdue,  
Si le tien Villeroy, des Muses le support,  
N'eust arraché ton fils des griffes de la mort,  
Et rauy de ta cendre. Ainsi la main fidele  
De Silene Jauua du ventre de Semele

*Bacchus, germe imparfaict, par la foudre auorté.  
Et si le sentiment là bas ne t'est osté,  
Aggraué du sommeil, & de la tombe vaine,  
Tu le remercieras d'une si docte peine,  
Qui a fait comme Hercule, en forçant le trespas,  
Que toy mort ton labeur au monde ne meurt pas,  
Monstrant par tel exemple aux nations de France,  
Que iamais la vertu ne meurt sans recompense.*

## VERS DV ROY CHARLES IX.

à Ronfard.

*Ronfard, ie cognois bien que si tu ne me vois,  
Tu oublies soudain de ton grand Roy la vois:  
Mais pour t'en souuenir, pense que ie n'oublie  
Continuer tousiours d'apprendre en Poesie:  
Et pource i'ay voulu t'enuoyer cest escrit  
Pour enthousiazier ton phantastique esprit.*

*Donc ne t'amuse plus à faire ton mesnage,  
Maintenant n'est plus temps de faire iardinage:  
Il faut suiure ton Roy qui t'aime par-sus tous  
Pour les vers qui de toy coulent braues & dous:  
Et croy si tu ne viens me trouuer à Amboise,  
Qu'entre nous aduiendra une bien grande noise.*

## RESPONSE AVX VERS PRECEDENS

du feu Roy Charles neuvieme.

*Charles, en qui le ciel toutes graces inspire,  
Qui as le cœur plus grand que n'est grand ton Empire,*

*Vne ame prompte & viue, vn esprit genereux,  
De vertus, de science & d'honneur amoureux,  
Qui passes tes ayeux d'un aussi long espace  
Que l'Aigle les Autours, dont l'aile ne se lasse  
En volant outre l'air d'approcher le Soleil:*

*Ainsin entre les Rois tu n'as point de pareil  
Que François ton grand-pere: & si l'honneste honte  
Le vouloit, ie dirois que Charles le surmonte,  
D'autant que nostre siecle est meilleur que le sien,  
Et que le temps present vaut mieux que l'ancien,  
Et d'autant qu'il fut docte au declin de vieillesse,  
Et tu es tout sçauant en la fleur de ieunesse.*

*Car si ta Maiesté (apres le soin commun  
Qu'elle prend du public, & d'escouter chacun,  
Permettant à ton peuple vne facile entrée)  
Soit en prose ou en vers pour plaisir se recrée,  
Donnant quelque relasche à ton diuin esprit  
Qui se monstre soymesme en montrant son escrit,  
Et rien s'il n'est parfait, ne medite ou compose,  
Ronsard te cede en vers, & Amyot en prose:  
Et suis marry d'auoir si longuement vescu  
Au giron des neuf Sœurs, pour estre ainsi veincu.*

*N'estoit-ce pas assez de m'auoir en cent sortes  
Monstré l'affection que maistre tu me portes,  
Sans encor me vouloir desfier en mon art,  
Et en ryme appeller au combat ton Ronsard,  
Descourant contre moy la fureur de ton stile?*

*Ainsi le grand Auguste escriuoit à Virgile:  
Virgile qui l'esprit de son maistre suiuiot,  
Pour luy donner plaisir luy contre-rescriuoit.*

*Tu m'as donné des vers, tres-magnanime Prince,  
Afin qu'en imitant ton exemple, i'apprinse  
Que peut vn cœur superbe, & pour auoir aussi  
Tousiours l'esprit touché d'un vertueux souci.*



*Toutesfois te iouïant, grand Monarque de France,  
 Tu as plus auancé que ta plume ne pense :  
 Car tes faits quelque iour par le temps periront :  
 En mon liure à iamais tes beaux vers se liront,  
 Que ie veux engrauer enuironnez de gloire  
 Sur l'autel le plus sainct du temple de Memoire,  
 Pour mieux faire cognoistre à la posterité  
 Que Ronsard a vescu regnant ta Maiesté,  
 Et que ta Maiesté deffous elle a veu naistre  
 Sa Muse qui se plaist de seruir vn tel maistr.*

## VERS DV ROY CHARLES IX.

à Ronsard.

*Ronsard, si ton vieil corps ressembloit ton esprit,  
 Je serois bien content d'auouer par escrit  
 Qu'il sympathiseroit en mal avec le mien;  
 Et qu'il seroit malade aussi bien que le tien.  
 Mais lors que ta vieillesse en comparaison ose  
 Regarder ma ieunesse, en vain elle propose  
 De se rendre pareille à mon ieune Printemps :  
 Car en ton froid Hyuer rien de verd n'est dedans.  
 Il ne te reste rien qu'un esprit grand & haut,  
 Lequel comme immortel iamais ne te defaut.*

*Or donc ie te diray que bien-heureux serois  
 Si de ton bon esprit vn rayon ie tirois,  
 Ou bien que sans t'oster rien du tien si exquis,  
 Par estude & labeur vn tel m'estoit acquis.  
 Ton esprit est, Ronsard, plus gaillard que le mien :  
 Mais mon corps est plus ieune & plus fort que le tien.  
 Par ainsi ie conclu, qu'en sçauoir tu me passe',  
 D'autant que mon Printemps tes cheueux gris efface.*

## RESPONSE AVX VERS PRECEDENS

dudit feu Roy Charles IX.

*Charles, tel que ie suis, vous ferez quelque iour :  
L'âge vole tousiours sans espoir de retour.  
Et comme hors des dents la parole sortie  
Ne retourne iamais apres qu'elle est partie :  
Ainsi l'age qui fuit par les siecles cassé,  
Ne retourne iamais quand il nous a laissé.*

*Voyez au mois de May sur l'espine la rose,  
Au matin vn bouton, à vespre elle est escluse,  
Sur le soir elle meurt : ô belle fleur, ainsi  
Vn iour est ta naissance & ton trespas aussi.*

*Si villes, si citez de marbres estofées,  
Si Empires, si Rois, si superbes trofées  
Vieillissent, ie puis bien en imitant le cours  
De nature décroistre, & voir vieillir mes iours.*

*Le vous passe, mon Roy, de vingt & deux années :  
Mais les vostres seront si soudain retournées,  
Qu'au prix du long seiour que fait l'Eternité,  
Qui les siecles deuore en son infinité,  
Vingt, trente, quarante ans accomparez ressemblent  
Vn grain pres d'un monceau où tant de grains s'assemblent :  
Et qui meurt ce iourd'huy, soit riche ou souffreteux,  
Quant à l'Eternité, meurt à l'egal de ceux  
Qu'engloutist le Deluge en l'eau desmesurée.  
« Tout terme qui finist, n'a pas longue durée.  
Et soit tost ou soit tard, il faut voir le trespas,  
Et descendre au parquet des luges de là-bas.*

Heureux trois fois heureux, si vous auiez mon âge,  
 Vous seriez deliuré de l'importune rage  
 Des chaudes passions, dont l'homme ne vit franc  
 Quand son gaillard printemps luy eschauffe le sang.

De là l'ambition, de là la conuoitise,  
 De là vient la chaleur que Venus nous attise,  
 Et l'ire qui abbat le Fort de la raison,  
 Ennemis incognuz du bon pere grison.

Vous verriez, mon grand Prince, en barbe venerable  
 Vostre race Royale autour de vostre table,  
 Comme ieunes Lauriers : & Monarque puissant,  
 Vous verriez deffous vous le peuple obeyssant,  
 Vostre espargne fournie, & vos villes Françoises,  
 Terres haures & ports loin de ciuiles noises,  
 Riches d'honneur, de paix & de biens plantureux,  
 Et vieillard vous seriez plus qu'en ieunesse heureux.

Il ne faut estimer que la mere Nature  
 Les saisons des humains ordonne à l'auanture,  
 Comme vn mechant Comique en son theatre fait  
 Le premier Acte bon, le dernier imparfait :  
 Elle compose tout d'une meure sagesse :  
 Si la ieunesse est bonne, aussi est la vieillesse.

La ieunesse est gaillarde & discourt librement,  
 Vieillesse a la raison, esprit & iugement :  
 L'une a l'opinion, & l'autre la prudence :  
 L'une aime oiseaux & chiens, amour, cheuaux & dance :  
 L'autre aime le bon vin, le bon liët, le bon feu :  
 Ainsi toute saison differe de bien peu,  
 Et presque l'une à l'autre à l'egal se r'apporte :  
 Chacune a son plaisir, mais de diuerse sorte.

Pourquoy en vous moquant me faictes vous ce tort  
 De m'appeller voisin des ombres de la mort,  
 Et de me peindre aux yeux une fin si prochaine,  
 Quand de mon chaud Esté ie ne sors qu'à grand peine ?

*le n'entre qu'en Autonne, & ne peux arriuer  
De quinze ou de seize ans aux iours de mon Hyuer :  
Voire & puis (si le Ciel à ma vie est propice)  
Faire encor' pour le moins vingt bons ans de seruice :  
Et quand le corps seroit de trop d'âge donté,  
L'âge ne peut forcer la bonne volonté.*

*De force & de vigueur mal-gré moy ie vous cede :  
L'escorce au prix de vous, non la fleur ie possède :  
Et ie vous cede encore en genereux esprit  
Qui m'appelle au combat par vn royal escrit.*

*Et bref, s'il vous plaisoit vn peu prendre la peine  
De courtisier la Muse, & boire en la fontaine  
Fille de ce cheual qui fist sourcer le mont,  
Tout seul vous rauiriez les Lauriers de mon front  
Vn second Roy François : de là viendroît ma gloire.  
« Estre veincu d'un Roy c'est gagner la victoire.*



# LE BOCAGE ROYAL

DE P. DE RONSARD.

DEDIE'

A HENRY III. ROY DE FRANCE

ET DE POLOGNE.



*Voicy du Roy HENRY troisiẽsme l'image,  
Qui mesprisa sa vie ennemis & dangers,  
Qui prattiqua les meurs des peuples estrangers,  
Prince tout bon tout saint tout vaillant & tout sage*



# LE BOCAGE ROYAL.

PANEGYRIQUE DE LA RENOMMÉE.

A HENRY III. ROY DE FRANCE

ET DE POLOGNE.

*Tout le cœur me debat d'une frayeur nouvelle :  
l'entens dessus Parnasse Apollon qui m'appelle,  
l'oy sa lyre & son arc sonner à son costé.  
Quelque part que mon pied vagabond soit porté  
Ses Lauriers me font place, & sens ma fantasie  
Errante entre les Dieux se jôuler d'Ambrosie.  
Fuyez peuple fuyez : des Muses fauory  
l'entre sacré poète au palais de HENRY  
Pour chanter ses honneurs : afin que dès l'Aurore,  
De l'Occident, de l'Ourse, & du riuage More  
Sa vertu soit cogneüe, & qu'on cognoisse aussi  
Qu'un si grand Prince auoit mes chansons en soucy.*

*l'ay les yeux esblouys, tout le cerueau me tremble,  
l'ay l'estomac panthois, i'aïse ce me semble  
Sur le haut des citez vne femme debout,  
Qui voit tout qui oyt tout & qui declare tout.  
Elle a cent yeux au front cent oreilles en teste :  
Dans les voutes du Ciel son visage elle arreste,  
Et de ses pieds en terre elle presse les monts,  
Vne trompette enflant de ses larges poumons.*

*le voy le peuple à foule acourir aupres d'elle.  
« Le peuple volontiers se paist d'une nouvelle.  
Elle va commencer, il m'en faut approcher :  
« Le temps ne se doit perdre, il n'y a rien si cher.*

*Peuples qui m'escoutez penduz à ma parole,  
N'estimez mes propos d'une femme qui vole :  
Mais que chacun y donne aussi ferme credit  
Que si les chesnes vieux d'Epire l'auoient dit.*

*La Déesse ennemie aux testes trop superbes,  
Qui les grandeurs egale à la basseur des herbes,  
Qui dedaigne la pompe & le fard des humains,  
A chastié l'orgueil des François par leurs mains.*

*Eux arrogans de voir leurs voiles trop enflées  
Du vent de la Fortune heureusement soufflées,  
D'abonder insolens en succez de bon-heur,  
D'obscurcir leurs voisins d'Empires & d'honneur,  
Geans contre le ciel, d'une audace trop grande  
Ne recognoissoient Dieu qui aux sceptres commande,  
Ains contre sa grandeur obstinant le sourcy,  
Auoient contre sa main le courage endurcy :  
Quand la bonne Adrastie, en vengeance telle iniure  
Citez contre citez de factions coniure,  
Fit le soc & le coudre en armes transformer,  
De leurs vaisseaux rompuz pava toute la mer,  
Les plaines de leurs ôs, renuersa leurs murailles,  
Et mit leur propre glaiue en leurs propres entrailles :*



*Si que leur sang vingt ans aux meurtres a fourny,  
Et David ne vit onq son peuple si puny.*

*Maintenant la Déesse incline à leur priere  
Douce ne iette plus leurs plaintes en arriere,  
Ains pour guarir leurs maux, leur fait present d'un Roy  
Qu'en lieu de Iupiter le Ciel voudroit pour soy :  
Qui par mille vertus en son ame logées,  
Des Rois ses deuanciers les fautes a purgées  
Ainsi qu'une victime expiant le forfait  
Que le peuple a commis, & qu'elle n'a pas fait.*

*Encor que la nature en naissant l'ait fait Prince  
Monarque d'une grande & fertile prouince,  
Qu'il ait dès son enfance avec le lait sucé  
L'honneur qui son renom aux astres a poussé,  
Voire & que sa vertu qui la terre enuironne,  
Luy mette sur le front une double Couronne :  
Encor qu'en sa ieunesse, auant que son menton  
Se frisast de la fleur de son premier cotton,  
Ait (chargé du harnois) deux batailles gagnées,  
Remis sur les autels les Messes dedaignées,  
Rendu la reuerence aux Images brisez,  
Assemblez en accord ses peuples diuisez,  
Et sans bouffir son cœur d'une noire colere  
A tous se soit monsté non pas Prince, mais pere,  
Il ne doit se fascher si le publique son  
De ma trompe luy chante encore une chanson.*

*Le Prince genereux doit les oreilles tendre,  
Et d'ire ne s'enfler quand on le veut apprendre.  
« Dieu ne se voit iamais par la faute assaillir :  
« Le naturel de l'homme est souuent de faillir.*

*Au retour du pays où va soufflant Borée,  
Il trouua sa Couronne en sectes separée,  
L'un tenant cest article, & l'autre cestuy-là :  
Mais si tost que son front en France etincela*

Rayonnant de vertu, chacun à son exemple  
Embrassa nostre Eglise & mesprisa le temple,  
Et ferme ne fut plus de sectes curieux,  
Par luy fait zelateur des loix de ses ayeux.

Si tost le gouuernal ne tourne la nauire  
Errante au gré du vent, que le peuple se vire  
Vers les mœurs de son Prince, & tasche d'imiter  
Le Roy qui va deuant afin de l'inuiter.  
Ny prison, ny exil, ny la fiere menace  
De la corde ou du feu, ny la loy ny la face  
Du Senat empourpré ne poussent tant les cœurs  
Du peuple à la vertu, que font les bonnes mœurs  
Du Prince venerable, & quand le sceptre egale  
La bonne & iuste vie à la force Royale.

Pour atteindre au sommet d'une telle equité  
Il faut la pieté ioincte à la charité,  
Et la religion dont reliez nous sommes,  
Tant elle est agreable & aux dieux & aux hommes !

La loy (toile d'areigne) est trop foible, & ne peut  
Le Prince enuelopper, si son cœur ne le veut,  
S'il ne croit que Dieu seul l'a pour nous approuvée,  
Sans estre inuention par les hommes trouuée,  
S'il ne la garantist, si premier ne la suit,  
Si sa deuotion sur le peuple ne luit.

Quand le ieune Fenix sur son espaule tendre  
Porte le liêt funebre & l'odoreuse cendre,  
Reliques de son pere, & plante sans pareil  
Le tombeau paternel au temple du Soleil :  
Les oiseaux esbahis en quelque part qu'il nage  
De ses ailes ramant, admirent son image,  
Non pour luy voir le corps de mille couleurs peint,  
Non pour le voir si beau, mais pource qu'il est saint,  
Oiseau religieux aux Manes de son pere,  
Tant de la pieté Nature bonne mere

*A planté dès le naistre en l'air & dans les eaux  
La viuace semence és cœurs des animaux!*

*Donques le peuple suit les traces de son maistre :  
Il pend de ses façons, il imite & veut estre  
Son disciple, & tousiours pour exemple l'auoir,  
Et se former en luy ainsi qu'en vn miroir.*

*Cela que les soudars aux espauls ferrées,  
Que les cheuaux flanquez de bardes acerées  
Ne peut faire par force, Amour le fait seulet  
Sans assembler ny camp ny vestir corcelet.*

*Les vassaux & les Rois de mutuels offices  
Se combattent entre-eux, les vassaux par seruices,  
Les Rois par la bonté : le peuple desarmé  
Aime tousiours son Roy quand il s'en voit aimé.  
Il sert d'un franc vouloir, quand il n'est necessaire  
Qu'on le face seruir : plus un Roy debonnaire  
Luy veut lascher la bride & moins il est outré,  
Plus luy mesmes la serre & sert de son bon gré,  
Se met la teste au ioug sous lequel il s'efforce,  
Qu'il secouroit du col s'on luy mettoit par force.*

*C'est alors que le Prince en vertus va deuant,  
Qui monstre le chemin au peuple le suiuant,  
Qu'il fait ce qu'il commande, & de la loy suprême  
Rend la rigueur plus douce obeyssant luy-mesme,  
Et tant il est d'honneur & de loüange epoinct,  
Que pardonnant à tous ne se pardonne point.*

*Quel suiet ne seroit pieteux & charitable .  
Deffous un Roy deuot? quel suiet miserable  
Voudroit de ses ayeux consommer les thresors  
Pour homme effeminer par delices son corps  
D'or, d'argent & de soye, ou d'autre pompe vaine.  
Quand le Prince n'auroit qu'un vestement de laine?  
Et qu'il retrancheroit par edicts redoutez  
Les fertiles moissons des ordes voluptez,*

*Couppant comme Hercules l'Hydre infame des vices  
Par l'honneste sueur des poudreux exercices ?*

*A forcer par les bois vn Cerf au front ramé,  
Enferrer vn Sanglier de defences armé,  
Voir leureter le Lièvre à la iambe peluë,  
Voir pendre les Faucons au milieu de la nuë,  
Faire d'un pied legier poudroyer les sablons,  
Voir bondir par les prez l'enslure des ballons,  
A porter le harnois, à courir la campagne,  
A domter sous le frein vn beau genet d'Espagne,  
A saulter, à luitter d'un bras fort & vouté,  
Voilà les ferremens trenchants l'oïfueté.*

*Mais porter en son ame vne humble modestie  
C'est à mon gré des Rois la meilleure partie.  
Le Prince guerroyant doit par tout foudroyer :  
Celuy qui se maintient, doit bien souuent ployer.  
L'un tient la rame au poing, l'autre espie à la hune :  
En l'un est la prudence, en l'autre est la fortune.  
Toufiours l'humilité gaigne le cœur de tous :  
Au contraire l'orgueil attize le courroux.*

*Ne vois-tu ces Rochers rempars de la marine ?  
Grondant contre leurs pieds toufiours le flot les mine,  
Et d'un bruit escumeux à l'entour aboyant,  
Forcenant de courroux, en vagues tournoyant  
Ne cesse de les battre, & d'obstinez murmures  
S'opposer à l'effort de leurs plantes si dures,  
S'irritant de les voir ne ceder à son eau.*

*Mais quand vn mol sablon par vn petit monceau  
Se couche entre les deux, il flechit la rudeffe  
De la mer, & l'inuite ainsi que son hostesse  
A loger en son sein : alors le flot qui voit  
Que le bord luy faict place, en glissant se reçoit  
Au giron de la terre, appaise son courage,  
Et la lichant se iouë à l'entour du riuage.*

*La Vigne lentement de ses tendres rameaux  
Grimpe s'insinuant aux festes des Ormeaux,  
Et se ploye à l'entour de l'estrangere escorce  
Par amour seulement, & non pas par la force:  
Puis mariez ensemble, & les deux n'estant qu'un  
Font à l'herbe voisine un ombrage commun.*

*La peste des grands Rois sont les langues flatueuses,  
Esponges & corbeaux des terres souffreteuses:  
Mais le mal le plus grand qu'un Prince puisse avoir,  
C'est quand il hait le liure, & ne veut rien sçavoir.*

*Le Roy dont ie vous parle & que le ciel approuue,  
Jamais en sa maison l'ignorance ne trouue.  
Ayant fait rechercher (d'une belle ame espris)  
Par tout en ses pays les hommes mieux appris,  
Pres de luy les approche & les rend venerables,  
S'honorant d'honorer les hommes honorables:  
De parole il les louë, & d'honneurs auancez  
Comme ils le meritoient les a recompensez.*

*Il a voulu sçavoir ce que peult la Nature,  
Et de quel pas marchoit la premiere closture  
Du Ciel, qui tournoyant se ressuit en son cours,  
Et du Soleil qui faiët le sien tout au rebours.*

*Il a voulu sçavoir des Planettes les dances,  
Tours, aspects & vertus, demeures & distances:  
Il a voulu sçavoir les cornes du Croissant,  
Comme d'un feu bastard il se va remplissant,  
Second Endymion amoureux de la Lune.*

*Il a voulu sçavoir que c'estoit que Fortune,  
Que c'estoit que Destin, & si les actions  
Des Astres commandoient à nos complexions.*

*Puis descendant plus bas sous le second estage  
Il a cogneu du Feu la nature volage,  
Il a pratiqué l'Air combien il est subtil,  
Comme il est nourrisier de ce monde fertile,*

*Comme il est imprimé de formes différentes.*

*Il a cogneu la Foudre & ses fleches errantes  
D'un grand bruit par le vague, & si le Soleil peint  
L'arc au ciel en substance, ou s'il apparoiſt feint.*

*Puis il a faiçt passer son esprit sous les ondes,  
A cogneu de Thetis les abyſmes profondes,  
Et du vieillard Protée a conté les troupeaux :  
Il a cogneu le flot & le reſlot des eaux :  
Si la Lune a credit ſur l'element humide,  
Ou ſi l'ame de l'Eau d'elle meſme ſe guide,  
Eſlançant ſon esprit des terres à l'entour  
Pour ne viure en pareſſe & croupir en ſejour.*

*Puis venant ſur la terre a viſité les villes,  
Les hommes & leurs meurs & leurs reigles ciuilles  
Pour ſçauoir à ſon peuple vn ſoleil eſclairer,  
Pour luy laſcher la bride ou pour la luy ſerrer,  
Cognoiſſant par effect toutes vertus morales.*

*Puis entrant ſous la terre aux caues infernales  
A cherché les metaux, & d'esprit diligent  
Sçeu les mines de plomb, de l'or & de l'argent,  
Quelle humeur les engendre és veines de la terre,  
Et le cuiure & le fer inſtrumens de la guerre.*

*Puis d'un ſi haut traual ſe voulant delaiſſer,  
Et d'un braue Laurier ſon ſceptre entrelaiſſer,  
Prenant le Lut en main, que dextrement il guide,  
Se va ſeul ſoulager en l'ancre Pieride,  
Toutes les fleurs d'Euterpe attachant à ſon front.*

*Apollon qui l'eſcoute, & les Muſes qui vont  
Danſant autour de luy, l'inſpirent de leur grace,  
Soit qu'il veille tourner vne chanſon d'Horace,  
Soit qu'il veille chanter en accords plus parfaicts  
Les geſtes martiaux que luy meſmes a faiçts  
Imitateur d'Achille, alors que l'ire outrée  
L'enſammoit en ſa nef contre le fils d'Atrée,*

*Et que le Priamide arrangeant ses soudars  
Rompoit d'un grand caillou la porte des rempars.*

*Nul Prince n'eut iamais l'ame si valeureuse,  
Ny si doué du ciel d'une memoire heureuse.  
De miel en son berceau la Muse l'arrousa,  
Pithon en l'allaittant sa bouche composa  
D'une docte eloquence, afin de faire croire  
Ce qu'il veut aux soudars pour gaigner la victoire,  
Ou pour prescher son peuple, & par graues douceurs  
Leur tirer de sa voix par l'oreille les cœurs  
Comme son deuancier Hercule, dont la langue  
Enchesnoit les Gaulois du fil de sa harenque.*

*Nul Prince, tant soit grand, n'a le bruit aujourd'hui  
De mieux recompenser ses seruiteurs que luy,  
Ny faire tant d'honneur à leurs cendres funebres,  
Les rappelant au iour en despit des tenebres :  
Roy qui ne peult les siens ny viuans oublier,  
Ny quand la mort les vient de leur corps deslier,  
Fauorisant les uns de ses faueurs premieres,  
Les autres d'oraisons, de vœux & de prieres.*

*Quand la Parque ennemie aux Vallois nous rauit  
Charles, Astre du ciel, par toute France on vit  
Les Muses se cacher : Phœbus n'osoit rien dire,  
Ny le Dieu voyageur inuenteur de la Lyre :  
Les Lauriers estoient secs, sec le bord Pimplean,  
Le silence effroyoit tout l'antrè Cyrrhean :  
De limon & de sable, & de bourbe estoupée  
Claire ne couroit plus la source Aganippée.  
Les Muses maintenant honorant son retour,  
Couuertes de bouquets osent reuoir le iour :  
Phœbus n'a plus la main ny la voix refroidie,  
Et des Lauriers fanis la teste est reuerdie,  
Voyant ce grand HENRY des peuples conquercur  
Les aimer, & se plaire en leur douce fureur,*



*Et d'une ame qui vit d'Apollon toute pleine,  
Faire parler Thespie, & couler sa fontaine.*

*Nul poëte François des Muses serviteur  
Ne presenta iamais ouvrage à sa hauteur,  
Qu'il n'ait recompensé d'un present magnifique,  
Honorant le bel art que luy mesme il pratique,  
Et ne l'ait caressé d'acollades ou d'yeux,  
Inuitant l'artizan à faire encores mieux.*

*Tels estoient les bons Rois de l'âge plus fleurie,  
Numa le Sacerdote instruit par Egerie :  
Tel estoit Numitor & ces peres Romains  
Qui auoient du labeur les empouilles es mains :  
Tel Eufrate empalmé de son riuage humide  
Vit Salomon regner sur le throne Isacide,  
Dont les sceptres estoient des peuples redoutez  
Par-la loy que portoient leurs glaiues espointez,  
Ayant en lieu du fer la douceur pour leur marque.*

*Tel fut le Roy François des lettres le Monarque,  
Tel est ce bon HENRY, qui Prince tres-humain  
Porte de ses subieets les cœurs dedans son sein.*

*Ny corcelets ferrez, ny targues, ny heaume,  
Ny cheuaux, ny soudards, ne gardent son Royaume,  
Ny fossiez, ny rempars, mais sa seule vertu  
Qui le peuple combat sans estre combatu.*

*Au contraire Alexandre affamé d'auarice,  
Enflé d'ambition, qui reduit au seruice  
Le sceptre de Cyrus, & qui fist son harnois  
Luire comme une foudre aux riuages Indoïs,  
Et ces fiers Empereurs de la maistresse Romme  
Qui couuroient un aspic sous la forme d'un homme  
Estans Princes cruels eurent cruelle fin  
Ou par le fer meurtrier, ou par le froid venin  
Ont espanché leur vie, & morts sans sepulture  
Ont esté des corbeaux & des chiens la pasture,*



*Sans avoir le loisir que leurs cheueux grisons  
Honorassent leur teste en leurs propres maisons.*

*Le bon Prince Trajan & le bon Marc Aurelle  
Ont vieillars accompli leur vie naturelle,  
Ont veu pour leur trespas la Republique en pleurs,  
Et leurs tombeaux couverts de cheueux & de fleurs.*

*Nature qui peut tout, dont le ventre desserre  
Toutes perfections, ne donne à nostre terre  
Rien si parfait qu'un Roy modeste & moderé,  
Et au poids de vertu iustement mesuré.  
Seul entre les humains il a peinte au visage  
De Dieu la venerable & redoutable image:  
Il en est le mirouër : si par un vilain traict  
De l'image qu'il porte, il souille le pourtrait,  
Si quelqu'un le diffame, empoisonne ou massacre,  
Dieu ialoux de l'honneur de son saint simulacre  
Punira le forfait, sans laisser inuangé  
Quiconque aura mechant son portrait outragé  
Et ne souffrant en terre un seul pas de sa trace,  
Perdra luy ses enfans sa maison & sa race.  
Puis moy qui de ma langue annonce verité,  
En chanteray l'histoire à la posterité.*

*Ainsi dist la Deesse, & de sa bouche ronde  
Enuoya de HENRY les honneurs par le monde.*

### A luy-mesme.

*Si l'honneur de porter deux Sceptres en la main,  
Commander aux François & au peuple Germain  
Qui de l'Ourse Sarmate habite la contrée :  
Si des Venitiens la magnifique entrée,*

*Si auoir tout le front ombragé de Lauriers,  
 Si auoir pratiqué tant de peuples guerriers,  
 Tant d'hommes tant de mœurs tant de façons estranges:  
 Si reuenir chargé de gloire & de louanges,  
 Si ja comme vn Cesar conceuoir l'Vniuers,  
 Vous a fait oublier le chantre de ces vers,  
 Roy dont l'honneur ne peut s'amoindrir ny s'accroistre,  
 Sans vous dire son nom vous le pourrez cognoistre.*

*C'est, Prince, c'est celuy qui d'un cœur courageux  
 Grimpa dessus Parnasse en croupes ombrageux,  
 Importunant pour vous les filles de Memoire,  
 Quand Dieu pres de Iarnac vous donna la victoire,  
 Quand vostre bras armé fut le iour des François,  
 Quand la Charante, fleuve au peuple Saintongeois,  
 Vous veit presque sans barbe, ainsi qu'un ieune Achille,  
 Foudroyer l'ennemi sur sa riue fertile,  
 Remirant en ses eaux vos armes & l'esclair  
 De vostre morion & de vostre bouclair,  
 Qui flamboyent tout ainsi que fait vne Comete,  
 Qui glissant par le Ciel d'une crineuse traite  
 Tombe dessus vn camp, & va signant les cieux  
 De cheueux rougissans d'un feu presagieux.*

*Ce fut quand vostre main à craindre comme foudre,  
 Fist à la gent mutine ensanglanter la poudre:  
 Quand nos autels sacrez reurent leurs bons Saints,  
 Et quand mille estendars tous deschirez, & teints  
 De poussiere & de sang, pour immortels exemples  
 D'un long ordre attachez pendirent à nos temples.*

*Encore qu'un tel acte honoré de bon-heur,  
 Eust besoin de trouuer un superbe sonneur  
 Qui d'un bruit héroïque eust enflé les trompetes:  
 Si est-ce que la voix des plus braues Poëtes  
 De peur fut enrouée, & le vent de leur sein  
 Ne sortit pour enfler la trompette d'airain,*

Chacun craignant sa vie en saison si douteuse :  
Où celuy sans trembler d'une crainte honteuse  
Qui vous escrit ces vers, assure vous chanta :  
Sur le haut d'Helicon vos trionfes planta :  
Et si en combatant vostre lance sceut poindre,  
Celebrant vos honneurs sa langue ne fut moindre,  
Oeuure si agreable à vous Prince veinqueur,  
Que vous louastes l'Hymne & l'appristes par cueur.

Mais quand toute la France à tromper bien-aisée  
D'ardentes factions & de guerre embrasée  
Estoit sous le razouer, & l'horrible mechef  
Soustenu d'un filet nous pendoit sur le chef,  
Et la victoire neutre errant entre les armes  
Partizanne esbranloit le cœur de nos gend'armes,  
Incertains qui seroit par la faueur des Cieux  
Des deux camps si puissans le seul victorieux :  
Vous pour sauuer le Sceptre, & nos Saints tutelaires,  
Nos autels, nos maisons, vous-mesmes & vos freres,  
Et vostre mere, hélas ! qui de peur fremissoit,  
Et tout le Ciel pour vous d'oraisons emplissoit :

Vous, dy-ie, en-orgueilli de forces animées,  
Aupres de Montcontour campastes vos armées,  
Liurastes la bataille, où Dieu vous regardoit,  
Où sa Croix dessus vous IESVS-CHRIST estendoit.

Là furent enuoyez par vos mains martiales  
Seize mille mutins aux ombres infernales  
Victime de Pluton : si que tout Moncontour,  
La riuere de Diue, & les champs d'alentour  
Sonnoient dessus vos coups, qui pauerent les places,  
Champs, chemins & guerets, de puantes carcasses,  
Et d'ossements de morts l'un sur l'autre arrangez.

Les sillons du país en furent si chargez,  
Voire si engraissez de charongneux carnages,  
Et les ventres des chiens & des bestes sauuages

*(Tombeau des ennemis) si gras & si refaits,  
Que l'on peust egaler ce moindre de vos faits  
Au plus grand des Romains, tant merita de gloire  
A l'extreme peril une telle victoire.*

*Celuy qui la chanta, ravi d'esprit alla  
Sur les eaux de Permesse, aux Muses il parla,  
Les entretint de vous, & vous fist un tel hynne,  
Que Daurat grand sonneur de la lyre Latine  
La daigna bien tourner, à fin qu'un double vers  
Semaist vostre renom par ce grand Vniuers.*

*Vn iour qu'il celebroit le feu Roy vostre frere,  
Son Charles son seigneur, Prince tout debonnaire,  
Le tançant luy disoit : N'escruez point de moy,  
Escruez de mon frere, escruez de sa foy,  
Et comme sa vertu prodigue de prouesse  
S'immolant en mon lieu le Sceptre me redresse.*

*Admirant telle amour qu'au monde on ne voit plus,  
Il bastit de Castor le temple & de Pollux,  
Et vous le dedia pour remarque immortelle  
D'une rare amitié si sainte & fraternelle.*

*C'est celuy qui pour vous en cent mille façons  
Fit sonnets & discours, eclogues & chansons,  
Mascarades, tournois, & chiffres & deuises,  
Et bref qui a chanté toutes vos entreprises.*

*Mesme à vostre berceau quand encor vous pendiez  
Dans les bras nourriciers, le iour que vous rendiez  
Comme un nouveau Soleil, l'emplist de hardiesse  
De vous iouër une Ode en si basse ieunesse,  
Et faisiez tout ravi, la teste sou-leuant,  
Semblant, ce luy sembloit, de l'aller approuuant.*

*Quand vous fustes esleu Monarque de Polongne,  
Que Dieu sur vostre teste en posa la Couronne,  
Et qu'il fallut partir d'entre les bras aimez  
De vos plus chers parens en larmes consumez :*

*Qu'il vous fallut laisser le doux air de la France,  
Capitaines, soldats, amis & cognoissance,  
Que chacun vous suiuoit d'une humble affection,  
Il ne chanta iamais de telle Election,  
D'autant qu'elle emportoit des François la lumiere  
Pour en pays estrange esclairer la premiere.*

*Or' à vostre retour, qui luisst comme vn Soleil  
Sortant de l'Ocean en flames nompareil,  
Qui donne iour aux siens dissipant les tenebres,  
Et de nostre feu Roy les complaints funebres :  
Il a gros d'Apollon celebré ce retour.*

*Les hommes volontiers honorent plus le iour  
Que la nuit tenebreuse, & Vesper n'est si belle  
Que l'Aurore au matin qui sort toute nouvelle :  
Aussi vostre apparoitre aux François fait sentir  
Plus d'allegresse au cœur que vostre departir.*

*Mais ainsi que le iour découure toutes choses  
Que l'ombre sommeilleuse en ses bras tenoit closes,  
Brigandages, larcins, & tout ce que la nuit  
Recele de mauuais quand le Soleil ne luit :  
Ainsi nous esperons que les guerres ciuiles,  
Licences de soldats, saccagemens de villes,  
Qui regnoient sans frayeur de vostre Maiesté,  
S'enfuiront esblouis dauant vostre clairté.*

*Chacun d'un œil veillant vos actions contemple :  
Vous estes la lumiere assise au front du Temple.  
Si elle reluit bien, vostre Sceptre luira :  
Si elle reluit mal, le Sceptre perira.*

*« Il faut bien commencer : celui qui bien commence,  
« Son ouurage entrepris de beaucoup il auance.  
Sire, commencez bien à vostre aduenement,  
De tout acte la fin suit le commencement.  
Il faut bien enfourner : car telle qu'est l'entrée,  
Volontiers telle fin s'est tousiours rencontrée.*

*Vous ne venez en France à passer une mer  
Qui soit tranquille & calme & bonasse à ramer :  
Elle est du haut en bas de factions enflée,  
Et de religions diuersément soufflée :  
Elle a le cœur mutin, toutefois il ne faut  
D'un baston violant corriger son défaut :  
Il faut avec le temps en son sens la reduire :  
« D'un chastiment forcé le mechant deuient pire.*

*Il faut un bon timon pour se sçauoir guider,  
Bien calfeutrer sa nef, sa voile bien guinder :  
La certaine Boursolle est d'adoucir les tailles,  
Estre amateur de paix, & non pas de batailles,  
Avoir un bon Conseil, sa iustice ordonner,  
Payer ses creanciers, iamais ne maçonner,  
Estre sobre en habits, estre Prince accointable,  
Et n'ouïr ny flateurs ny menteurs à la table.*

*On espere de vous comme d'un bon marchand,  
Qui gaillard & ruzé va les Indes cherchant,  
Et retourne chargé d'une tres-riche proye,  
Heureux par le trauail d'une si longue voye :  
Il r'apporte de l'or, & non pas de l'airain.  
Aussi vous auriez fait un tel voyage en vain,  
Veu le Rhin, le Danube, & la grande Allemagne,  
La Poulongne que Mars & l'Hyuer accompaigne,  
Vienne qui au Ciel se braue de l'honneur  
D'auoir sceu repousser le camp du Grand-Seigneur,  
Venise marinier, & Ferrare la forte,  
Thurin qui fut François, & Sauoye qui porte  
Ainsi que fait Atlas, sur sa teste les cieux :  
En vain vous auriez veu tant d'hommes tant de lieux,  
Si vuide de profit en une barque vaine  
Vous retourniez en France apres si longue peine.*

*Il faut faire, mon Prince, ainsi qu'Vlysse fit,  
Qui des peuples cognus sceut faire son profit,*



*Comme à vostre retour soigneusement vous faites,  
Honorant vostre Estat des loix les plus parfaites,  
Ayant à vos François, apres mille dangers,  
Enseigné les vertus des peuples estrangers.*

*Mais quoy ? Prince inueincu, le sort ne m'a fait estre  
Si docte que ie puisse enseigner un tel maistre :  
En discours si hautains ie ne doy m'empescher,  
Et ne veux faire ici l'office de prescher.*

*Ma langue se taira : vos Sermons ordinaires,  
La complainte du peuple, & vos propres affaires  
Vous prescheront assez : ce papier seulement  
S'en-va vous saluer, & sçauoir humblement  
De vostre Maiesté, si vous son nouveau maistre  
Le pourrez par sa Muse encores recognoistre.*

*Il n'a pas l'Italie en poste trauersé  
Sur un cheual poussif, suant & harassé,  
Qui a cent fois tombé son maistre par la course :  
Il n'a vendu son bien à fin d'enfler sa bourse  
Pour vous aller trouuer, & pour parler à vous,  
Pour vous baiser les mains, embrasser vos genous,  
Prosterner adorer : il ne le sçauoit faire,  
Son humeur fantastique est aux autres contraire :  
Ceux qui n'ont que le corps sont nez pour tels mestiers :  
Ceux qui n'ont que l'esprit ne les font volontiers.*

*Toutefois sans courir & sans changer de place  
Il est assuré d'estre en vostre bonne grace :  
Encor le desespoir ne l'a pas combatu,  
L'honneur aime l'honneur, la vertu la vertu.*

*S'il vous plaist l'appeller, sans farder vne excuse  
Il vous ira trouuer avec la mesme Muse  
Dont il chanta Henry, son Charles, & aussi  
Vous à present son Roy des Muses le souci :*

*Ou si vostre disgrace à ce coup il essaye,  
Il sera cazanier comme un vieil Morte-paye*



*Qui renferme sa vie en quelque vieil chasteau,  
 Pareffeux, accrochant ses armes au rasteau,  
 Au pais inutile, & veincu de pareffe  
 Pres de son vieil harnois confine sa vieillesse.*

### A luy-mefme.

*A vous race de Rois, Prince de tant de Princes,  
 Qui tenez deffous vous deux fi grandes Prouinces,  
 Qui par toute l'Europe esclairez tout ainfi  
 Qu'un beau Soleil d'Esté de flames esclarci,  
 Que l'estrange admire & le suiet honore,  
 Et dont la maiesté nostre siecle redore :*

*A vous qui avez tout, ie ne sçauois donner  
 Present, tant soit-il grand, qui vous puisse estrener.  
 La terre est presque vostre, & dans le Ciel vous mettre,  
 Ie ne suis pas un Dieu, ie ne puis le promettre,  
 C'est à faire au flateur : ie vous puis mon mestier  
 Promettre seulement de l'encre & du papier.*

*Ie ne suis Courtizan ny vendeur de fumées,  
 Ie n'ay d'ambition les veines allumées,  
 Ie ne sçauois mentir, ie ne puis embrasser  
 Genoux, ny baiser mains, ny suiure ny presser,  
 Adorer bonneter, ie suis trop fantastique :  
 Mon humeur d'Escolier, ma liberté rustique  
 Me deuoyent excuser, si la simplicité  
 Trouuoit aujourd'huy place entre la vanité.*

*C'est à vous mon grand Prince à supporter ma faute,  
 Et me louer d'auoir l'ame superbe & haute,  
 Et l'esprit non seruil, comme ayant de Henry,  
 De Charles, de François trente ans esté nourri.*

*Vn gentil Cheualier qui aime de nature  
 A nourrir des harats, s'il treuve d'auanture  
 Vn Coursier genereux, qui courant des premiers  
 Couronne son seigneur de Palme & de Lauriers,  
 Et couuert de sueur d'escume & de poudriere  
 R'apporte à la maison le pris de la carriere :  
 Quand ses membres sont froids debiles & perclus,  
 Que vieillesse l'assaut que vieil il ne court plus,  
 N'ayant rien du passé que la monstre honorable,  
 Son bon maistre le loge au plus haut de l'estable,  
 Luy donne auoine & foin soigneux de le penser,  
 Et d'auoir bien serui le fait recompenser :  
 L'appelle par son nom, & si quelqu'un arriue,  
 Dit : Voyez ce cheual qui d'haleine poussue  
 Et d'ahan maintenant bat ses flancs à l'entour,  
 l'estois monté dessus au camp de Moncontour,  
 le l'auois à larnac, mais tout en fin se change :  
 Et lors le vieil Coursier qui entend sa louange,  
 Hannissant & frappant la terre, se sou-rit  
 Et benist son seigneur qui si bien le nourrit.*

*Vous aurez enuers moy (s'il vous plaiſt) tel courage,  
 Sinon à vous le blasme, & à moy le dommage :  
 le refuse! vostre main me doit faire sentir  
 Que la maison des Rois ne loge vn repentir.*

*Mais ie suis importun, la personne importune  
 Ne rencontre iamais vne bonne fortune :  
 Laissons faire au destin qui nous donne la loy,  
 Le destin de grand Duc vous a fait vn grand Roy :  
 Puis il ne faut iamais ou parler à son maistre,  
 Ou faut de doux propos les oreilles luy paistre.*

*SIRE, voici le mois où le peuple Romain  
 Qui tenoit tout le monde enclos dedans la main,  
 Donnoit aux seruiteurs, par maniere de rire,  
 Congé de raconter tout ce qu'ils vouloyent dire :*

Donnez-moy (s'il vous plaist) un semblable congé,  
 L'ay la langue de ronge & le palais mangé,  
 Il faut que ie les frotte, ou il faut que ie meure,  
 Tant le mal grateleux me demange à toute heure.  
 Puis voici le Printemps où se purge vn chacun,  
 Il faut que mon humeur se purge sur quelcun :  
 Mais ie ne puis sans vous ! sans vostre faueur, SIRE,  
 Je n'ose enuenermer ma langue à la Satyre.  
 Si est-ce que la rage & l'ulcere chancreux  
 Me tient de composer : le mal est dangereux,  
 Et ne plaist pas à tous : mais si ie vous puis plaire,  
 Il me plaist, vous plaissant, d'escrire & de desplaire.

Qui, bons Dieux, n'escriroit voyant ce temps ici !  
 Quand Apollon n'auroit mes chansons en souci,  
 Quand ma langue seroit sans Muses, & muette,  
 Encores par despit ie deuiendrois Poète.

C'est trop chanté d'Amour, & en trop de façon  
 La France ne cognoist que ce mauuais garçon,  
 Que ses traits, que ses feux : il faut qu'une autre voye  
 Par sentiers incognus sur Parnasse m'enuoye,  
 Pour me serrer le front d'un Laurier attaché,  
 D'autre main que la mienne encores non touché.

Apres que vostre esprit & vos mains diligentes  
 Seront lassés du faix des affaires urgentes,  
 Aux heures de plaisir vous pourrez vostre esprit  
 Esbatre quelquefois en lisant mon escrit.

S'il y a quelque braue ou mutin qui se fasche,  
 Et qui entre ses dents des menaces remasche  
 Pour se voir ou de biens ou de faueur desdit :  
 Si vn plus qu'il ne doit veut monter en credit,  
 Si quelqu'un en faueur de sa faueur abuse,  
 S'il fait le Courtisan & s'arme d'une ruse :  
 Si quelque viloteur aux Princes deuissant  
 Contrefait le boufon, le fat, ou le plaissant :

*Si nos Prelats de Cour ne vont à leurs Eglises,*  
*Si quelque trafiqueur qui vit de marchandises,*  
*Veut gouverner l'Estat faisant de l'entendu :*  
*Si quelqu'un vient crier qu'il a tout despendu*  
*En Polongne, & qu'il braue enflé d'un tel voyage,*  
*Et pour le sien accroistre à tous face dommage :*  
*Si plus quelque valet de quelque bas mestier*  
*Veut par force acquerir tous les biens d'un cartier :*  
*Si plus nos vieux corbeaux gourmandent vos Finances,*  
*Si plus on se destruit d'habits & de despences,*  
*Et si quelque affamé nouvellement venu*  
*Veut manger en un iour tout vostre reuenu,*  
*Qu'il craigne ma fureur, d'une encre la plus noire*  
*le luy veux engrauer les faits de son histoire*  
*D'un long trait sur le front, puis aille où il pourra,*  
*Tousiours entre les yeux ce trait luy demourra.*

*le seray comme un Ours que le peuple aiguillonne,*  
*Qui renuerse la tourbe & mord toute personne,*  
*De grand ny de petit ne me donnant souci*  
*Si l'œuure vous agrée, & qu'il vous plaise ainsi.*  
*l'ay trop long temps suyui le mestier Heroique,*  
*Lyrique, Elegiaq' : ie seray Satyrique,*  
*Disoy-ie à vostre frere, à Charles mon Seigneur,*  
*Charles qui fut mon tout, mon bien & mon honneur.*

*Ce bon Prince en m'oyant se prenoit à sourire,*  
*Me prioit, m'enhortoit, me commandoit d'escrire,*  
*D'estre tout Satyrique instamment me pressoit :*  
*Lors tout enflé d'espoir qui de vent me païssoit,*  
*Armé de sa faueur ie promettois de l'estre :*  
*Ce-pendant i'ay perdu ma Satyre & mon maistre.*  
*Adieu Charles adieu, sommeilles en repos :*  
*Ce-pendant que tu dors ie suiuray mon propos.*

*Il n'y a ny Rheubarbe, Agaric, ny racine*  
*Qui puisse mieux purger la malade poitrine*

De quelque patient fiévreux ou furieux,  
 Que fait vne Satyre vn cerueau vicieux,  
 Pourueu qu'on la destrampe à la mode d'Horace,  
 Et non de Iuuenal qui trop aigrement passe :  
 Il faut la preparer si douce & si à point,  
 Qu'à l'heure qu'on l'aualle on ne la sente point,  
 Et que le mocqueur soit à moquer si adestre,  
 Que le moqué s'en rie, & ne pense pas l'estre.

O Prince mon support, heureux & malheureux :  
 Heureux d'auoir l'esprit si vif & genereux,  
 Et malheureux d'auoir dès la premiere entrée  
 Vostre France rebelle en armes rencontrée,  
 D'ouyr de tous costez resonner le harnois,  
 Violer la iustice & mespriser les lois,  
 Et presque tout l'Estat tomber à la renuerse  
 Par vne destinée à la France peruerse :

Receuez s'il vous plaist, d'un visage serain  
 Et d'un front deridé mon escrit, que la main  
 De la Muse a dicté ceste nouuelle année,  
 Pour en vous estrenant se reuoir estrenée.

Ne la mesprisez pas, bien que soyez yssu  
 D'une race & d'un sang de tant de Rois conceu,  
 Et ne fermez aux vers l'oreille inexorable :  
 Minerue autant que Mars vous rendra venerable.

Homme ne pensez estre heureusement parfait :  
 De mesme peau que nous Nature vous a fait :  
 Dieu tout seul est heureux, nostre nature humaine  
 Misere sur misere en naissant nous ameine :  
 Et ne faut s'esbahir si nous auons icy  
 Pour partage eternal la peine & le soucy.

On dit que Promethée en paistrissant l'argile,  
 Dont il fit des humains l'essence trop fragile,  
 Pour donner origine à nos premiers malheurs,  
 En lieu d'eau la trempa de sueurs & de pleurs :

*Car plus l'homme est heureux, plus Fortune l'espie.  
A telle qualité nous trainons nostre vie.  
Mais c'est trop babillé, il se faut despescher,  
Souuent en voulant plaire on ne fait que fascher.*

*Quand Hercule ou Atlas ont chargé sur l'eschine  
De ce grand Vniuers la pesante machine,  
Que de col & de teste & de bras bien nerueux  
Se bandent sous le faix qui tomberoit sans eux :  
Si quelque fascheux sot arriuoit d'auenture  
Qui vint les amuser d'une longue escriture,  
Ou d'un maigre discours soit en prose ou en vers,  
Offenseroit-il pas contre tout l'Vniuers ?  
Malin i'offenserois contre toute la France,  
Dont vous portez le faix dès vostre ieune enfance,  
S'importun i'amusois vostre diuin esprit  
(Aux affaires bandé) par un fascheux escrit.*

*Dieu ne demande pas (car Dieu rien ne demande)  
Qu'on charge ses autels d'une pesante offrande :  
Il n'aime que le cœur, il regarde au vouloir,  
La seule volonté l'offrande fait valoir.  
Ainsi suyuant de Dieu la diuine nature,  
Vous prendrez mon vouloir, & non mon escriture.*

## SONGE.

### A luy-mesme.

*Nos peres abusez pensoient que le songer  
Du matin, n'estoit point ny faux ny mensonger.  
Au contraire, mon Roy, ie pense que tous songes  
Sans rien signifier, ne sont que des mensonges,*

Et que Dieu ne voudroit (Dieu qui ne peut tromper)  
 De fantosmes confus nostre ame enueloper,  
 S'apparoissant à nous, quand le sommeil commande  
 Au corps enseuely de vin & de viande :  
 Mais plustost en plein iour, alors qu'il est permis  
 De veiller, & d'auoir les sens non endormis,  
 Et sçauoir discerner si l'image legere  
 Qui pousse nostre esprit, est fausse ou mensongere.  
 Or sans tant discourir, ie vous diray le faict :  
 L'ourage commencé s'en va demy-parfaict.

Je songeois l'autre nuit vn peu deuant l'Aurore,  
 Quand du Soleil naissant les cheuaux sont encore  
 En la mer, & leurs crins s'espandent par les cieux,  
 Qu'un buisson espineux se monstroît à mes yeux,  
 De ronces remparé, fortifié d'eau viue  
 Et d'un large fossé, dont la glissante riue  
 Me monstroît que du bas iusqu'au plus haut du bord  
 Le passage estoit clos, tant le parc estoit fort.

Dedans faisoit sa bauge vne beste sauuage,  
 Qui iamais autre part ne cherchoit son gaignage,  
 S'auiantant de glands, qui secs se desfroboyent  
 Des chesnes en Automne, & à terre tomboyent.  
 Les voisins du pays l'appelloyent La merueille :  
 Sa gueulle estoit dentée, effroyable l'oreille,  
 Ventre large & pansu, la peau rude au toucher,  
 Et son front se dresseoit en pointe de clocher.

Il n'y auoit seigneur, marchant, ny gentilhomme,  
 Qui n'eust couru la beste, ainsi qu'on fait à Romme  
 Le Busle par la ville, alors que les Romains  
 De traicts iettez sur luy se desarment les mains.

Transporté d'une forte & chaude frenaisie,  
 Apres tant de coureurs il me prist fantaisie  
 De les deuancer tous, & comme bon veneur,  
 Faire bien mon enceinte, & en auoir l'honneur.



Cela ne m'effroya, ny ne pallit ma face,  
Voyant de mes voisins les chiens morts sur la place,  
Et les autres bleffez au logis reuenir :  
Mais plustost irrita mon courroux à tenir  
Fort contre le Sangler, suuant mon entreprise,  
Ou mourir au combat, ou voir la beste prise.

Je descouplay mes chiens, & for-huant apres  
Les nommant par leurs noms, il n'y eut ny forests,  
Montaignes ny chemins, ny lande inhabitée  
Qui ne fissent vn bruit sous ma chasse amutée.  
Errant esgratigné de ronces par les bois,  
Tantost d'un tram de trompe, & tantost de la voix  
Le leur donnoy courage, & leur monstrois la voye :  
Mais coüars sans la mordre ils aboyoient la proye  
A gueule ouuerte, ainsi que de nuict en resuant  
Ils mordent l'ombre aux dents, & abboient le vent.

Je fis sonner pour chiens : la trompe les assemble.  
Coupables de leur faute ils se rendent ensemble  
Tous craintifs à mes pieds d'un visage abaissé,  
Puis comme des poltrons ainsi ie les tancé.

Chiens indignes de suiure une beste à la trace,  
Chiens gris qui dementez vostre premiere race,  
Dont le bon saint Hubert par les forests cherchoit  
Les sangliers, & leur hure à son huis attachoit :  
Rendez-moy maintenant, rendez la recompense  
Du soin que j'ay de vous, n'espargnant la despense  
Ny le bon traitement pour vous faire nourrir,  
A fin de surpasser les autres à courir.

Auant que le Soleil plonge en la mer sa teste,  
Retournez au logis braues de la conqueste,  
Le muffle ensanglanté, le corps nauré de coups,  
Ou vous serez ce soir le carnage des loups.

Ainsi les menaçant ils monstroyent au visage,  
Abboiant contre l'air, d'auoir meilleur courage.

*Au plus fort du taillis un gros hallier estoit,  
Dedans pour reposer le sanglier se mettoit,  
Hallier que le Soleil de ses rayons ne perse,  
Tant rameaux sur rameaux d'une obscure traaverse  
Ensemble entre-lacez le haut s'espeussiffoit,  
Et le bas plein d'effroy d'ombres se noirciffoit.*

*Au milieu cropiffoit une mare fangeuse,  
Où souloit à midi ceste beste outrageuse  
Fouiller, & tout son corps de bourbe reuestir.  
Là ie pousse mes chiens pour la faire sortir :  
Là l'espieu dans la main, courageux ie deuance  
Ma chasse de vingt pas, ie la tance & retance,  
Ie la presse & la hue allant tout-à-l'entour,  
Mais en vain : car plustost ie vy faillir le iour,  
Qu'elle osast approcher du Monstre pour le mordre :  
Au contraire il s'élance, & les mit en desordre,  
Massacrant la moitié, puis morts les secouant  
Du groin les enleuoit, & s'en alloit iouant.*

*Trois fois recreu d'ahan, ie m'estens sur la place :  
Trois fois reprenant cœur, mes armes & l'audace,  
Ie retourne au combat, de fureur transporté,  
Qu'un sanglier sur mes chiens eust l'honneur emporté.  
Il estoit desjà nuict, & la Lune premiere  
Doroit le haut des bois d'une blonde lumiere,  
Quand regardant son arc nouvellement plié  
D'une corne voutée, ainsi ie la prié :*

*Lune, l'œil de la nuict, qui reluis à trois faces,  
Deesse des veneurs, des chemins & des chasses,  
Tu as courbé trois fois tes voutes en un rond,  
Et trois fois replanté tes cornes à ton front,  
Depuis le iour qu'errant par ces bois ie m'amuse  
A suiure pour-neant une beste qui ruse :  
Guide ma main, Deesse, & m'enseigne le lieu  
D'où ie pourray sanglant retirer mon espieu,*

Et fais par ta faueur que mon souhait aduienne,  
O des astres l'honneur vierge Latonienne.

Comme ainsi ie priois, la Lune m'entendit,  
Qui soudain de son ciel en terre descendit :  
Puis despouillant son front & sa corne argentine,  
Prist la forme & l'habit d'une mienne voisine,  
Qu'on disoit toute nuit parler aux animaux,  
Et par charmes tirer les esprits des tombeaux,  
Enforcer les bleds, & faire à contre-course  
Les ruisseaux esbaïs retourner à leur source.

En me heurtant du coude ainsi me vint tanser :  
Ah malheureux Veneur, tu es sot de penser  
Qu'un monstre si cruel soit né de la nature  
Des autres animaux : quitte ton auanture,  
Et cherche autre parti : ou bien sois diligent  
De trouuer un limier, & des chiens tous d'argent :  
La beste ne se prend sinon en telle sorte.

A tant s'esuanouit : l'air venteux qui l'emporte,  
Fist un bruit par la nuit, & tout soudain la peur  
Escoutant tels propos me vint glacer le cœur.

Comme ie m'estonnois de sa responce obscure,  
Le vous vi, ce me semble, en une clairté pure  
Reluire autour de moy, mesme front, mesmes yeux  
Que vous auez alors qu'entre les demi-dieux  
De vostre saint Conseil administrez iustice,  
Honorant la vertu, & chastiant le vice.

Puis me distes ainsi : Quel sort te menaçant  
Te tient si tard au bois à l'ombre du Croissant,  
Quand les hommes laissez, & quand toute autre chose  
Oubliant le trauail en son liēt se repose ?  
Conte moy ton mechef : c'est le faiēt d'un bon Roy  
D'aider à son suiet en peine comme toy.

O Prince, mais ô Dieu, dont la celeste face  
Ne s'apparust iamais à nostre humaine race

*Sinon pour faire bien, s'il vous plaist me prester  
Vostre oreille, en deux mots ie vous le vais conter*

*Six mois sont ja passez, que suant sous la peine  
Ie pourchasse vn Sanglier d'une esperance vaine.  
Vne vieille m'a dit que ie sois diligent*

*De trouuer vn limier & des chiens tous d'argent,  
Si ie veux telle beste en mes toiles surprendre :*

*Qu'autrement ie m'abuse, & ne faut m'y attendre.*

*Ie suis tout esbahi des propos qu'elle dit,*

*A qui la raison mesme & le sens contredit :*

*Car iamais chiens d'argent ne furent en nature :*

*C'est tout ce que peut feindre vne vaine peinture.*

*Vous respondistes lors : Dieu n'est iamais l'appuy  
D'un cœur qui se desfie & ne s'assure en luy.*

*Les Princes & les Dieux ont pouuoir de tout faire :*

*Heretique est celuy qui pense le contraire.*

*Recouple-moy tes chiens, ie te puis asseurer*

*Que tu voirras bien tost ce miracle auer.*

*En me disant tels mots, d'une blanche houffine  
Que vous auiez és mains, vous frappastes l'eschine  
De mes chiens par trois fois, & soudain sans bouger  
D'une place, en argent ie les vy tous changer.*

*Leur voix estoit d'argent, leurs muffles & leur veüe,*

*Les oreilles, le front, les pattes & la queüe,*

*Et n'auiez Tresorier tant soit ferme & constant,*

*Qui ne les eust bien pris pour bon argent contant.*

*O Prince, si Cerés, si Mars & si Neptune*

*Me commandoyent tous trois contre la loy commune :*

*L'un de faire par l'air des nauires marcher,*

*L'autre d'ensemencer la pointe d'un rocher,*

*Et l'autre sans soudars donner vne bataille,*

*Ie leur obeyrois : il ne faut que l'homme aille*

*Contre la Deité, & ne faut point auoir*

*De doute, que les Dieux nous vueillent deceuoir.*

*le m'en vais rechasser deffous vostre parole  
 Qui iamais sans effect par le vent ne s'en-vole,  
 Et sous vostre promesse, en laquelle douter  
 Ce seroit hors du Ciel les Dieux vouloir oster.  
 Donques souvenez-vous, si la beste me donte,  
 Qu'à vous seul, non à moy, sera toute la honte:  
 Vous estes le motif, ie ne suis seulement  
 Que l'organe qui sert à vostre mandement.*

*Aussi si ie la prens, tout au plus haut du feste  
 De vos portaux sacrez i'en apprendray la teste,  
 Pour donner vn exemple à vos peuples François  
 De ne douter iamais d'obeir à leurs Rois.  
 Puis i'escriray deffous, le celuy, qui les songes  
 N'aguières n'estimois que fables & mensonges,  
 le les croy maintenant, tant vaut la verité  
 D'un miracle en moy fait par une Deité.*

## DISCOVRS DE L'EQUITE' DES VIEUX GAVLOIS.

A luy-mesme.

*La victime estoit preste, & mise sur l'autel,  
 Quand ce vaillant Gaulois de renom immortel,  
 Grand Prince, grand guerrier, grand pasteur des armées,  
 Qui auoit saccagé les plaines Idumées,  
 Et foudroyant les champs d'un armé tourbillon  
 Auoit espouuanté le rocher d'Apollon,  
 Commande à Glythymie : (ainsi s'appelloit celle  
 Qui fut à son espoux espouse mal-fidelle)*

*Prends le pied de l'agneau, & fay pour ton renuoy  
Aux bons Dieux voyageurs des vœus ainsi que moy.*

*Elle pour obeir prend le pied de la beste.  
Lors en lieu de l'hostie il decolla la teste  
De la femme perfide, & le sang qui iaillit,  
Tout chaud contre le front de son mary saillit.  
Ainsi de son forfait elle tomba victime,  
Sans teste dans son sang lavant son propre crime.*

*Le mari spectateur d'un acte si piteux,  
Eut le sein & les yeux de larmes tous moiteux :  
Vne horreur le saisit, il sanglotte son ame,  
Et outré de douleur contre terre se pâme :  
Puis à soy reuenu renfronçant le sourci,  
D'une voix effrayée au Gaulois dist ainsi.*

*Quoy ! est-ce là la foy que tu m'auois promise ?  
Est-ce là ton serment ? est-ce la dextre mise  
En la mienne, ô pariure ? apres auoir receu  
La rançon pour ma femme, ainsi m'as-tu deceu ?*

*Du iour que le harnois sonna sur tes espaules,  
Qu'espuisant la ieunesse & la force des Gaules,  
Et qu'à ton camp nombreux les ondes des ruisseaux  
Ne bastoyent à fournir breuuage à tes cheuaux,  
Et que l'ambition que rien ne ressasie,  
Te faisoit comme vn feu saccager nostre Asie,  
Ie preuy mon malheur, & preuy que nos champs  
Ne seroyent qu'un tombeau par tes glaiues trenchans :  
Mais ie le preuy mieux, oyant la renommée  
Que ton camp assiegeoit nostre ville enfermée.*

*Pres les murs de Milete un temple s'eleuoit,  
Où Cerés ses honneurs & ses autels auoit,  
Et ce iour de fortune on celebroit ses festes.  
Nos femmes couronnant d'espics de bled leurs testes,  
Et portant en leurs mains les premices des fruits  
Que la Terre nourrice en son sein a produits,*



Supplioient la Deesse, & sa Semestre fille,  
Leur donner bons maris, & planté de famille,  
Santé, beauté, richesse, & la grace des Dieux.  
Le parfum de l'encens fumoit iusques aux cieux :  
Autour du Temple alloit la danse mesurée,  
Quand voici comme Loups à la gorge altérée  
Ou du sang des aigneaux, ou du sang des brebis,  
Venir ton camp vestu de flamboyans habits,  
Qui sans crainte du lieu les autels despouillerent,  
Et sans respect d'honneur nos femmes violerent,  
Autant que l'appetit veinqueur le permettoit  
Et la ieune fureur qui sans raison estoit.

On dit que de Cerés le venerable image  
Fremissant & suant abaissa son visage :  
Son autel en trembla, sa couleur en mua,  
Et trois fois de despit la teste remua.

Soudain la Renommée à l'aile bien agile,  
Dessus le mur rampée espouuanta la ville,  
Annonçant aux maris d'une effroyable vois,  
Que leurs femmes estoyent la proye des Gaulois.

Le iour estoit sous l'onde, & la nuit estoilée  
Auoit d'un habit brun la terre emmantelée,  
Quand la clameur se fist, & des enfans pleureux,  
Et des peres priuez de leurs lits amoureux.  
Non autrement de loin s'entendoit la complainte,  
Que si desia la ville eust veu l'image peinte  
De la mort en ses murs, & les feux indontez  
Riblant par les maisons voler de tous costez.

En fin sur la minuiet en la place s'assemblent,  
Où de mille conseils les deux meilleurs leur semblent  
De prier l'ennemi, & d'un soin diligent  
Apporter la rançon, & flechir par argent  
(Poison des cœurs humains) l'arrogance barbare,  
Qui de son naturel est tyrante & auare.



*Le faufconduit venu ayans les pleurs à l'œil,  
Et tristement vestus de noirs habits de dueil,  
Au premier point du iour sortirent de la porte.*

*Mercuré alloit deuant, qui leur seruoit d'escorte,  
D'un air enueloppé. A la fin paruenus  
En ton ost, & voyant tes hommes incognus,  
Harenguerent ainsi d'une douce priere,  
Pour amollir les cœurs de la troupe guerriere,  
Qui braue en son harnois donnoit d'une autre part  
Assurance aux prians d'un paisible regard.*

*Peuples enfans de Mars, heritiers de la guerre,  
Qui courez nostre Asie, ainsi que le tonnerre  
Court grondant parmi l'air, & à vos Dieux Gaulois  
Appendez pour trofée & nous & nos harnois :  
Ne vueillez point souiller, magnanimes gend'armes,  
Vos honneurs illustrez par la splendeur des armes  
Au sang vil & couard de nos femmes, qui n'ont  
Ny corselets au dos, ny morions au front  
Pour reuancher leur peau, de nature amusées  
A filer leur quenouille, & tourner leurs fusées :  
Ou bien, si mesprisant les Dieux & les humains,  
Vivez ainsi que Loups du meurtre de vos mains,  
Tournez le fer trenchant en nos masles poitrines,  
Et courtois pardonnez aux ames feminines :  
Ou si vous craignez Dieu protecteur de la loy,  
Et la Fortune humaine inconstante & sans foy  
(Croyant que vos voisins peuvent raurir les vostres)  
Ainsi qu'en ce pais vous raullez les nostres)  
Vous contre-iniuriant de pareille façon :  
Rendez-les s'il vous plaist, & prenez leur rançon,  
A fin que desormais exemptes du seruage,  
Libres en nos maisons facent nostre mesnage,  
Et sans plus en vostre ost engager leurs beaux ans,  
Aillent faire nos lits, & traiter nos enfans.*

Ils parlerent ainsi. Ces guerriers de leur teste  
 Firent signe aux prians d'accorder leur requeste.  
 « Il n'est rien qui tant l'homme amene à la raison,  
 « Que l'art persuasif d'une douce oraison.

Les unes par argent retournerent troquées :  
 Les autres qui s'estoyent desia domestiquées  
 En l'amour des Gaulois, les pensans plus gaillars  
 Aux combats amoureux que leurs maris vieillars,  
 S'arrestèrent au camp, mesprisant leurs Penates,  
 Liets, enfans & maris, pour suiure les Galates.  
 Ma femme fut rauie. Ambassadeur alors  
 l'estois loin du pais, pour rompre les efforts  
 Et l'instance fureur d'un Martial orage,  
 Qui desia coniuroit contre nostre riuage.

Si tost qu'à mon retour l'histoire i'entendi,  
 Tout le sang me gela, de crainte refroidi :  
 La honte & le despit me fermerent la bouche,  
 A terre renuersé comme une froide souche,  
 Pleurant ma chere espouse, & n'ayant pour confort  
 Remede plus certain que l'espoir de la mort.

En tous lieux que i'allois, où ie l'auois cognue,  
 Soit veillante ou dormante, ou soit en robbe, ou nue,  
 Au iardin, en la chambre, au cabinet segret,  
 Tout le cœur me creuoit de dueil & de regret.  
 D'un pied mal-assuré mille fois en une heure  
 le changeois de logis, de place & de demeure :  
 Mais en vain : car tous lieux me sembloient odieux,  
 Et tousiours sa beauté venoit deuant mes yeux.

En songe toute nuit me reuenoit ma femme,  
 Et tout cela de doux qui nous chatouille l'ame,  
 Et dont le souuenir est plaisant au penser,  
 Qu'Amour me fait au cœur cent fois le iour passer.  
 La face qu'elle auoit quand elle fut rauie,  
 Tousiours me reuenoit : comme elle poursuiuiue

Couroit parmi le temple embrassant les autels  
Et les images saints des hauts Dieux immortels,  
Pasmée, escheuclée, & non plus femme viue,  
Et s'eschappant de l'un, de l'autre estre captiue,  
N'ayant autre confort en son peril sinon  
M'appeller, & d'auoir en sa bouche mon nom :  
Puis tousiours me sembloit qu'elle me venoit tendre  
Ses bras croizez en l'air à fin de la defendre.

Deux fils conceus de nous, germes de nostre chair,  
Vray gage d'amitié aux deux parens si cher,  
Qui du tout resembloyent au portraict de leur mere,  
Assis sur mes genoux redoubloyent ma misere,  
Et de leurs tendres mains touchant mon poil grison,  
Me prioyent de tirer leur mere de prison.

« Affection d'enfans de nature est si grande,  
« Qu'elle obtient de parens tout ce qu'elle demande.

Pour recouurer ma vie, & retrouver mon cœur,  
Sans qui ie viuotois en extreme langueur,  
Le vendi tout mon bien : que m'en seruoit l'usage,  
Quand mon meilleur tresor estoit ailleurs en gage ?  
Tousiours à chaque pas en ma femme resuant,  
Chargé de mon auoir ie mis la voile au vent.  
Le vent en ma faveur, qui poupier se refueille,  
Me poussa de Milete aux riués de Marseille.

Du lieu de ta demeure aux voisins ie m'enquis :  
Mais l'honneur de tes faits par les armes acquis  
M'enseigna le chemin : car il n'y auoit trace  
Qui n'eust ouy sonner le bruit de ta cuirasse.

Entrant en ton Palais d'elle ie fu cognu :  
Puis t'enquerant de moy pourquoy i'estois venu,  
Ainsi ie respondi. L'affection extresme  
Que ie porte à ma femme, hélas ! plus qu'à moy-mesme,  
Les pleurs versez pour elle, & les regrets amers  
M'ont fait vendre mon bien, & passer tant de mers

*A fin de racheter une si chere chose.*

Puis tout soudain du prix avec toy ie compose,  
Et le mis en ta main : mais ton cœur genereux,  
Plus cent fois de l'honneur que de l'or amoureux,  
Forçant ta nation qu'on estime si fiere,  
Ne voulut accepter de moy la somme entiere :  
Tu mis ceste rançon en quatre lots à part,  
Vne quarte à ma femme, & l'autre pour ma part,  
L'autre pour nos enfans & l'autre pour toy maislre.

Tu me fis vn festin, tu m'assis à ta dextre,  
Le beu dedans ta coupe, & d'un front adouci  
Humainement traité tu m'ostas le souci.

Quand le vin fut versé en l'honneur de Mercure,  
Et la Nuiët fut venue à la courtine obscure,  
Tu me liuras ma femme, & me la fis toucher,  
Puis en vn mesme liët ensemble nous coucher,  
Sans plus retenir droit ny pouvoir dessus elle.  
Toutefois ô cruel, ô barbare infidelle,  
Après avoir long temps en ton Palais logé,  
En ta coupe rebeu, à ta table mangé,  
Après mon or baillé, après ta foy promise  
Tu l'as deuant mes yeux cruellement occise.

Le Prince qui long temps ce discours entendit,  
D'un magnanime cœur luy contre-respondit.

Citoyen de Milete, estrangier & mon hôte,  
A fin que hors du cœur l'impression ie t'oste  
Qui pourroit à bon droit t'irriter contre moy,  
Entens toute l'histoire, & l'emporte chez toy.

Aussi tost que l'Aurore au matin fut venue,  
Ta femme toute nuiët entre tes bras tenue,  
Qui t'appelloit son sang, son cœur & son souci,  
Ambrassant mes genoux, me fist sa plainte ainfi.  
« Il est bien mal-aisé de tromper une amante !  
Elle ayant comme femme une ame desfiante

*Et vn cœur soupçonneux (cela leur est fatal)  
Avant qu'il fust venu, coniectura son mal.*

*Après que par le fer tu m'as tienne ravie,  
Que par terre & par mer tes armes i'ay suiuite  
Compagne de ton liét : après t'auoir aimé,  
Après t'auoir cent fois en te baizant armé,  
Baillé ton morion, ta lance & ta rondache,  
Et planté sur ton tymbre vn menaçant pennache :  
Puis venu du combat, du travail ennuyé,  
Après t'auoir cent fois tout le corps essuyé  
Salle d'une poussiere honneste & genereuse,  
Et tes playes succé de ma léure amoureuse :  
Après auoir pensé de mes mains tes cheuaux,  
Tes coursiers compagnons de tes nobles trauaux,  
Les nommant par leur nom, qui souloyent recognoistre  
Ma voix encor plustost que celle de leur maistre :  
Peux-tu bien maintenant tes delices haïr,  
Et pour vn peu de gain perfide me trahir ?*

*Hà ! ce n'est pas la foy, ny la dextre fidelle  
Mise en la mienne, hélas ! quand tremblante & rebelle  
l'ambraffois les autels de Cerés, appellant  
Les Dieux à mon secours contre toy me volant.  
A la fin adioustant la priere à l'audace,  
Par force & par amour ie t'accorday ma grace,  
Pouruen que tu serois d'une inuincible foy,  
Tousiours mon defenseur, sans te fascher de moy.  
Mais ie voy (desmentant ta promesse heroïque)  
Qu'autant comme ton cœur ta parole est Gothique :  
Pourrois-je bien souffrir absente de tes yeux  
Encore vne autre fois vn seruage ennuyeux ?  
Le premier m'estoit doux, & le second en l'ame  
Me seroit vne mort dont le penser me pàsme.*

*Tu estois mon pays, mon pere & mon espous,  
Et tous perdus en toy ie les retrouuois tous :*

*Seul tu estois mon tout, & pour une parole  
Maintenant dans le vent ta promesse s'en-vole.  
Ne crains-tu point les Dieux ? ne crains-tu que les bois,  
Les rochers entournés de naturels effrois,  
Les deserts remparent de longue solitude  
Ne content aux passans ta fiere ingratitude ?*

*Tu me devois tuer quand ta main me rait,  
Et non trahir le cœur qui forcé te suivit :  
Le mourir de ta main valloit mieux que la vie,  
Et raie en ce poinct ie n'eusse esté raie.*

*En tous lieux où le nom des hommes i'entendray,  
Plustost par les forests aux loups ie me rendray  
Qu'en leurs mechantes mains, croyant par coniecture  
Qu'ils sont tous comme toy de mechante nature.*

*Or puis que mon malheur ne se peut reuancher  
De toy cruel ingrat, que par le reprocher,  
le te reprocheray ta semence germée,  
Que tu as par amour en mon ventre semée :  
Tu devois pour le moins avant que me chasser,  
Souffrir que ton enfant peust ton col embrasser,  
Te rebaiser les mains, & t'appeller son pere.  
Les larmes de l'enfant eussent sauué la mere !*

*Baille moy ton poignard pour nous tuer tous deux :  
le te seray defuncte un fantosme hideux,  
le rompray ton sommeil, & contre toy marrie  
le te suiuray tousiours importune Furie,  
Te donnant à manger ton fils pour ton repas :  
Ainsi doux (me vangeant) me sera le trespas !*

*Que dis-ie ? mon amour ne merite un supplice.  
Viurons donc à tes pieds pour te faire seruice,  
Et perdons mon mary ce causeur effronté,  
Qui de tout nostre bien qu'il auoit apporté,  
T'a baillé seulement la moitié de la somme,  
Vray acte de larron, & non pas de preud'homme.*



Elle me dist ainsi. Le sang froid s'assembla  
 Tout au-tour de mon cœur qui soudain me troubla,  
 Douteux si ie devois l'enuoyer tout à l'heure  
 En ces lieux tenebreux où le Trespas demeure:  
 Ou bien si ie devois mon courroux retarder,  
 Et te conter le fait, à fin de te garder.

J'ay feint ce sacrifice, & feint de te conduire  
 Pour immoler ta femme, & aussi pour te dire  
 Que vous estes deceus de blasmer les Gaulois,  
 Vous autres Asiens, comme peuples sans lois,  
 Barbares & cruels, transportez par le vice,  
 Ennemis d'équité, de droict & de iustice.

Deffous la loy escrite enseignez vous vivez,  
 Et doctes en papier le papier vous suiuez:  
 Nous autres nous n'auons que la Loy naturelle  
 Escrite dans nos cœurs par vne encre éternelle,  
 Que nous suiuiuons tousiours sans besoin d'autre escrit,  
 Comme portans nos loix en nostre propre esprit.

En-terre si tu veux, ou laisse aux chiens ta femme,  
 Ou la iette en la mer, ou la donne à la flame:  
 Vn corps tronqué de teste est vn fardeau pesant,  
 Ne remporte en ta ville vn si vilain présent.

Or quant à la rançon que i'ay receu pour elle,  
 Et au reste du bien que ta dextre me celle,  
 Prens tout, ie n'en veux rien, à fin qu'en ton país  
 Tu faces au retour tes voisins esbahis,  
 Leur contant nos vertus: va chercher ta demeure:  
 Adieu, donne la main, va-t'en à la bonne heure.

HENRY, dont le renom n'est seulement allé  
 Aux peuples estendus sous le Pole gelé,  
 Mais de l'Europe entiere a rempli tout l'espace.  
 Tu ne tiens seulement en la Gaule la place  
 Que tenoit ce guerrier, mais aussi l'équité,  
 Les vertus, les honneurs, & la fidelité.



*Je voudrois que ton peuple en armes redoutable  
 Se monstrest enuers toy ou autant equitable  
 Que tu es enuers luy, ou qu'il fust enuers toy  
 Aussi fidele & bon que tu luy es bon Roy :  
 Les guerres tous les ans ne seroyent attendues,  
 Tes villes sous ta main seroyent desia rendues,  
 Les harnois ne seroyent vn faix à nostre dos,  
 Et tes suiets viuroyent en paisible repos.*

*Ce-pendant il te plaist en telle deffiance  
 Veindre non par le fer, mais par la patience :  
 Vy heureux ceste année & cent autres encor,  
 Et en regnant vieilliss autant que fist Nestor,  
 Et m'estreine, grand Roy, ainsi que ie t'estreine.  
 Du labeur profitable agreable est la peine.*

## DISCOVRS OV DIALOGVE

entre les Muses deslogées,

& Ronfard.

*Leuant les yeux au ciel, & contemplant les nues,  
 L'auiſay l'autre iour une troupe de Grues,  
 Qui d'un ordre arrenge & d'un vol bien serré  
 Representoient en l'air vn bataillon carré,  
 D'auirons emplumez & de roides secouſſes  
 Cherchant en autre part autres terres plus douces,  
 Où tousiours le Soleil du rayon de ses yeux  
 Rend la terre plus grasse, & les champs plus ioyeux.*

*Ces oiseaux rebatant les plaines rencontrées  
 De l'air, à grands coups d'aïſle alloient en leurs contrées,  
 Quitant nostre país & nos froides saisons,  
 Pour refaire leur race & reuoir leurs maisons.*

*Les regardant voller, ie disois en moy-mesme :  
 le voudrois bien, oiseaux, pouuoir faire de mesme  
 Et voir de ma maison la flame voltiger  
 De sur ma cheminée, & iamais n'en bouger,  
 Maintenant que ie porte iniurié par l'age,  
 Mes cheueux aussi gris comme est vostre plumage.*

*Adieu peuples ailez, hostes Strymoniens,  
 Qui volant de la Thrace aux Aethiopiens,  
 Sur le bord de la mer rencontre les Pygmées  
 Menez, combat leger, vos plumeuses armées :  
 Allez en vos maisons. le voudrois faire ainsi.*

*« Vn homme sans fouyer vit tousiours en soucy.*

*Mais en vain ie parlois à l'escadron qui volle :  
 Car le vent emportoit comme luy, ma parole,  
 Remplissant de grands cris tout le ciel d'alentour,  
 Aize de retourner au lieu de son sejour.*

*De l'air abaissant l'œil le long d'une vallée,  
 le regarday venir vne troupe hastée  
 Lasse de long trauail, qui par mauuais destin  
 Auoit fait (ce sembloit) vn penible chemin.*

*Elle estoit mal en conche & pauurement vestue :  
 Son habit attaché d'une espine poinctue  
 Luy pendoit à l'espaule, & son poil dédaigné  
 Erroit sale & poudreux, crasseux & mal peigné.*

*Toutefois de visage elle estoit assez belle :  
 Sa contenance estoit d'une ieune pucelle,  
 Vne honte agreable estoit dessus son front,  
 Et son œil esclairoit comme les Astres font :  
 Quelque part qu'en marchant elle tournast la face,  
 La vertu la suyuoit, l'eloquence & la grace,  
 Monstrant en cent façons dès son premier regard,  
 Que sa race venoit d'une royale part,  
 Si bien qu'en la voyant, toute ame genereuse  
 Se rechaufant d'amour en estoit amoureuse.*

*D'avant la troupe alloit un ieune jouvenceau,  
Qui portoit en Courrier des ailes au chapeau,  
Vne houssine en main de serpens tortillée,  
Et deffous pauvre habit une face éucillée :  
Et monstroit à son port quel sang le conceuoit,  
Tant la garbe de Prince au visage il auoit.*

*Tout furieux d'esprit ie marchay vers la bande,  
le luy baise la main, puis ainsi luy demande  
(Car l'ardeur me pouffoit de son mal consoler,  
M'enquerir de son nom, & de l'ouyr parler.)*

Ronsard.

*Quel est vostre pais, vostre nom & la ville  
Qui se vante de vous ?*

*L'une la plus habile  
De la bande respond.*

Mufes.

*Si tu-as iamais veu*

*Ce Dieu, qui de son char tout rayonné de feu  
Brise l'air en grondant, tu as veu nostre pere :  
Grece est nostre pays, Memoire est nostre mere.*

*Au temps que les mortels craignoient les Dèitez  
Ils bastirent pour nous & temples & citez ;  
Montaignes & rochers & fontaines & prées,  
Et grottes & forests nous furent consacrées.  
Notre mestier estoit d'honorer les grands Rois,  
De rendre venerable & le peuple & les lois,  
Faire que la vertu du monde fust aimée,  
Et forcer le trespas par longue renommée :  
D'une flame diuine allumer les esprits,  
Avoir d'un cueur hautain le vulgaire à mespris,  
Ne priser que l'honneur & la gloire cherchée,  
Et tousiours dans le ciel avoir l'ame attachée.*

*Nous eufmes autrefois des habits precieux,  
 Mais le barbare Turc de tout victorieux,  
 Ayant vaincu l'Asie & l'Afrique, & d'Europe  
 La meilleure partie, a chassé nostre trope  
 De la Grece natale, & fuyant ses prisons  
 Errons, comme tu vois, sans biens & sans maisons,  
 Où le pied nous conduit, pour voir si sans excuses  
 Les peuples & les Rois auront pitié des Muses.*

### Ronsard.

*Des Muses ? di-je lors. Estes vous celles-là  
 Que iadis Helicon les neuf seurs appella ?  
 Que Cirre & que Phocide auouoyent leurs maistresses,  
 Des vers & des chansons les sçauantes Déeses ?  
 Vous regardant marcher nuds pieds & mal empoinct  
 l'ay le cueur de merueille & de frayeur espoint,  
 Et me repens d'auoir vostre danse suiuite,  
 Vlsant à vos mestiers le meilleur de ma vie.*

*Je pensois qu'Amalthée eust mis entre vos mains  
 L'abondance & le bien, l'autre ame des humains :  
 Maintenant ie cognois, vous voyant affamées,  
 Qu'en esprit vous païssez seulement de fumées,  
 Et d'un titre venteux, antiquaire & moyssi,  
 Que pour un bien solide en vain auez choisi.*

*Pour suiure vos fureurs, miserables nous sommes.  
 Certes vous ressemblez aux pauvres Gentilshommes,  
 Qui (quand tout est vendu) leuant la teste aux cieux,  
 N'ont plus d'autre recours qu'à vanter leurs ayeux.*

*Que vous sert Iupiter dont vous estes les filles ?  
 Que seruent vos chansons, vos Temples & vos villes ?  
 Ce n'est qu'une parade, un honneur contrefaict,  
 Riche de fantaisie, & non pas en effect.*

*Vertu, tu m'as trompé, te pensant quelque chose!  
 Je cognois maintenant que le malheur dispose  
 De toy qui n'es que vent, puisque tu n'as pouuoir  
 De conseruer les tiens qui errent sans auoir  
 Ny faueurs ny amis, vagabonds d'heure en heure  
 Sans feu, sans lieu, sans bien, sans place ny demeure.*

Muses.

*Hà que tu es ingrat de nous blasmer ainsi!  
 Que fusses-tu sans nous qu'un esprit endurcy,  
 Consumant, casanier, le plus beau de ton âge  
 En ta pauvre maison, ou dans un froid vilage,  
 Incogneu d'un chacun! où t'ayant abreuvé  
 De Nectar, & l'esprit dans le Ciel esleué,  
 Tauons fait desirieux d'honneur & de louanges,  
 Et semé ton renom par les terres estranges,  
 De tes Rois estimé, de ton peuple chery,  
 Ainsi que nostre enfant en nostre sein nourry.*

*Dieu punist les ingrats : à tous coups que la foudre  
 Trebuchera de l'air, tu auras peur qu'en poudre  
 Tu ne sentes ton corps, & ta teste briser  
 Pour la punition d'ainsi nous mespriser.  
 Pource adjoute creance à qui bien te conseille :  
 Ayde nous maintenant, & nous rens la pareille.*

Ronsard.

*Que voulez vous de moy ?*

*L'une des sœurs alors*

*Qui la bande passoit de la moitié du corps,  
 Me contre-respondit.*

Muses.

*Nous auons ouy dire*

*Que le Prince qui tient maintenant vostre Empire,*

*Et qui d'un double sceptre honore sa grandeur,  
Est dessus tous les Roys des lettres amateur,  
Careffe les sçauans, & des liures fait conte,  
Estimant l'ignorance estre vne grande honte :  
Dy luy de nostre part qu'il luy plaise changer  
En mieux nostre fortune, & nous donne à loger.*

### Ronsard.

*Vous m'imposez au dos vne charge inegale :  
L'ay peu de cognoissance à sa grandeur royale,  
C'est vn Prince qui n'aime vn vulgaire propos,  
Et qui ne veut souffrir qu'on trouble son repos,  
Empesché tous les iours aux choses d'importance,  
Soustenant presque seul tout le faix de sa France,  
Meditant comme il doit son peuple gouverner  
Et faire dessous luy l'âge d'or retourner,  
Honorers les Vertus & chastier le vice,  
Deffenseur de la loy, protecteur de iustice.  
Ie n'oze l'aborder, ie crains sa Maïesté,  
Tant ie suis esblouy des raiz de sa clairté :  
Pource cherchez ailleurs vn autre qui vous meine.  
Adieu docte troupeau, adieu belle neuuaine.*

## AV ROY CHARLES IX.

*Au grand Hercule animé de courage  
Vous ressemblez : il auoit son lignage  
De Iupiter, & le vostre est d'un Roy,  
Qui comme un Dieu tint la France sous soy.*

Dés le berceau de sa main enfantine  
 Il estouffa la race serpentine :  
 Vous dès enfance à la mort avez mis  
 La plus grand'part de vos fiers ennemis.

Vn puissant Roy contraignoit sa prouësse :  
 Necessité qui est grande Déesse,  
 Vous a contraint : il eut pour son confort  
 Vn ieune frere, & vous Prince tresfort  
 En avez deux, qui donnent esperance  
 D'estre sous vous les lumieres de France.

Hercule auoit pour habit le plus beau  
 Le rude cuir de l'effroyable peau  
 D'un grand Lion, monstrant par un tel signe  
 Qu'un riche habit des Princes n'est pas digne,  
 Mais la vertu, qui iamais ne se pert,  
 Et qui de robbe en tout âge leur sert.

Vous comme luy, bien que soyez grand Prince,  
 Et riche Roy de si grande prouince,  
 Ayant vertu pour vostre habillement,  
 Allez tousiours acoustré simplement,  
 Blasmant l'orgueil des grands Rois d'Assyrie,  
 Qui tous chargez de riche orféuerie  
 D'argent & d'or, demy-Dieux se monstroient  
 Enflés de pompe à ceux qu'ils rencontroient,  
 Faisant estat de robbe somptueuse,  
 Et non d'auoir vne ame vertueuse :  
 Ainsi masquez reluisoient par-deuant,  
 Mais au dedans ce n'estoit que du vent.

Or cest Hercule à tous labeurs adextre  
 Vne massuë auoit dedans la dextre  
 Dont il fraploit les hommes depravez :  
 Dedans la main le Sceptre vous avez  
 Dont vous domtez l'impudente malice,  
 Gouvernant tout d'une egale police.



*Hercule alloit la terre tournoyant,  
De tous costez les Monstres guerroyant :  
Et vous tournez vostre royaume, Sire,  
Pour saintement nettoyer vostre Empire  
De tout erreur & des Monstres qui vont  
Sans plus auoir la honte sur le front.*

*Hercule aimoit & l'arc & les sagettes :  
Pour passe-temps si bon archer vous estes  
Et si certain, que le trait eslané  
Frappe le but par vos yeux menacé.*

*Sa sœur Pallas Déesse forte & sage  
Le conduisoit bien-heurant son voyage :  
Et vous auez vostre mere qui fait  
Vostre voyage heureusement parfait.*

*Après sa mort Hercule magnanime  
Au ciel monta de soy-mesme victime,  
Estant purgé sur le mont OEtéen :  
Vous despouillé du manteau terréen  
Irez au Ciel à la gloire eternelle.  
Et c'est pourquoy, Sire, ie vous appelle  
Nostre Herculin, qui serez une fois  
Par vos vertus l'Hercule des François :  
Car c'est à vous à qui le Ciel ordonne  
Du monde entier le Sceptre & la Couronne.  
Ainsi de vous l'a promis le destin  
Inexorable, au fuseau aimantin,  
Dur, acéré, d'invincible puissance :  
C'est que seriez en vostre adolescence,  
Estant bien ieune orphelin demeuré,  
Vn peu troublé : car rien n'est assuré.*

*Mais aussi tost que la blonde ieunesse  
Aura doré d'une toison espedse  
Vostre menton, & qu'aux guerres dispos  
Le fort harnois bruiira sur vostre dos,*

Branlant au poing le hampe d'une hache,  
 Et remuant les crestes du panache  
 D'un morion reluisant tout ainsi  
 Qu'un beau Soleil de flames esclarci,  
 Irez veinqueur des prouinces lointaines :  
 Où conduisant vos batailles certaines,  
 Et vos soldats sous le fer fremissans,  
 Et vos cheuaux au combat hanissans,  
 Le lis François planterez sur la riuë  
 Où du Soleil le chariot arriue,  
 Quand vers le soir lassé de ses trauaux  
 Dans l'Ocean abreuve ses cheuaux  
 Fumans, suans & soufflans des narines  
 Le iour tombé dans les ondes marines :  
 Et sur le bord où il sort hors de l'eau  
 Frais gaillard ieune ainsi qu'un iouuenceau  
 Qui pour l'amour de sa belle guerriere  
 Monte à cheual, & passe vne carriere,  
 En ces deux mers le Ciel fera lauer  
 De vos harnois les poudres, & grauer  
 Du bout tranchant de vostre forte lance  
 Le nom sacré de Charles & de France,  
 Et de Henry, & de tous vos ayeux  
 Qui sont au Ciel à la table des Dieux.

Or ce destin qui tel bien vous desire,  
 N'a seulement designé vostre Empire,  
 Faictz vertueux, triomphes de bon-heur,  
 Villes, chasteaux, dont vous serez Seigneur,  
 Terres & mers : mais il a d'auantage  
 Depeint vos mœurs, vos yeux, vostre visage  
 Et vostre taille, afin qu'estant venu  
 Fussiez de tous par vos signes cognu :  
 Et pour remàrque il a bien voulu mettre  
 De vostre nom la capitale lettre,

*Vn C. fatal, lettre qui par neuf fois  
A commencé le beau nom de nos Rois.*

*Ce Roy qui doit (ce dit la Destinée)  
Tenir sous soy la terre dominée,  
Aura le teint comme entre noir & blond,  
Palle-vermeil, le visage vn peu long,  
Les yeux chastains, la taille droite & belle,  
Posé maintien, la grace naturelle,  
Vne voix douce, vn parler sage & prompt,  
Belle la gréue & la main & le front,  
Ayant au corps vne ame genereuse,  
Et la ieunesse active & vigoreuse.  
Au reste humain, non trompeur, non moqueur,  
Non renfrongné, non remply de bas cœur,  
Non abuseur, non controuueur de ruses,  
Et par-sur tout grand hostelier des Muses:  
Qui de la main, en laquelle il aura  
L'estoc sanglant, en sa tente escrira,  
Comme vn Cesar, des liures, dont la gloire  
Des ans veinqueurs combatront la victoire,  
Portant au front deux replis de Laurier,  
Pour estre ensemble & sçauant & guerrier:  
Car pour bien faire il faut qu'un Roy se serue  
De l'une & l'autre excellente Minerue.*

*Or en voyant tous ces signes en vous,  
Je suis certain (ainsi le croyons tous)  
Qu'estes ce Roy de qui la Parque sage  
A tant rendu par escrit tesmoignage,  
Vous ordonnant tout ce grand Vniuers:  
Et c'est pourquoy ie vous offre mes vers  
Avec l'ouurier, qui bouillonne d'enuie  
D'user pour vous ses plumes & sa vie.*

*Doncq' aussi tost que la viue vertu  
Vous armera du fort glaiue pointu,*

Et qu'on orra pour l'honneur de vos Gaules  
 Le corselet sonner sur vos espaules,  
 Ayant la fleur de la ieunesse atteint,  
 Des ennemis comme une foudre craint :  
 Allez combattre, allez à la bonne heure  
 Conquerir tout sous fortune meilleure,  
 Et fait vainqueur r'apportez à foison  
 Mille Lauriers dedans vostre maison.

Moy plus armé de plumes que d'espée,  
 Suiuray du camp la victoire trempée  
 Au sang vaincu. Si quelque Cheualier  
 Fait un beau coup entourné d'un millier  
 Des ennemis, ie feray sous ma plume  
 Sonner son coup comme un fer sur l'enclume,  
 Qu'un noir Vulcan des deux hanches tortu  
 Bat au marteau de flames reuestu.

L'ay d'une ardante & brusque fantaisie  
 Dès la mammelle aimé la Poësie,  
 Ainsi qu'on voit les hommes volontiers  
 Ou par destin suiure diuers mestiers,  
 Ou par l'instinct de leur propre nature  
 L'un la Musique, & l'autre la Peinture,  
 L'un va du ciel les astres recherchant,  
 Et l'autre vit ou guerrier ou marchand.

Moy qui l'honneur plus que les biens estime,  
 Né d'une race antique & magnanime,  
 Franc d'avarice & pur d'ambition,  
 Libre de toute humaine passion,  
 D'un esprit vif, ardent & volontaire.  
 Pour la vertu j'ay quitté le vulgaire,  
 Villes, chasteaux, bourgades & marchez :  
 Et suis allé par les antres cachez,  
 Par les deserts, riuages & montaignes,  
 Suiure les pas des neuf Muses compagnes,

Qui toute nuit m'enseignent par les bois  
 A ne chercher autres maîtres que Rois,  
 Et à pousser iusqu'aux troupes celestes  
 Ceux qui en guerre ont osé de beaux gestes,  
 Et qui d'un cœur auantureux & fort  
 Vne loüange achètent par la mort.

Quiconque aura pour marque memorable  
 Dans l'estomac vne playe honorable,  
 S'en-vienne à moy : son coup si noble & beau  
 Priué d'honneur n'ira sous le tombeau.

Pource mon Roy, s'il vous plaist que ie face  
 Là Franciade, œuvre de long espace,  
 Oyez mes vœux : il seroit bien saison  
 Qu'eussiez esgard à mon cheueul grison,  
 Sur qui desia l'autonnale tempeste  
 A fait grester quarante ans sur la teste :

Bien tost semblable au bon cheual guerrier  
 Qui souloit estre au combat le premier,  
 Et tout couuert d'une belle poussiere  
 Gaignoit veinqueur le pris de la carriere  
 Le chef orné de roses, maintenant  
 Languit poussif à l'estable, prenant  
 Sans nul soucy de fleurs ny de bataille  
 Le peu de foin que son maistre luy baille.

Doncq s'il vous plaist, Sire, n'attendez plus  
 Que ie sois vieil, impotent & perclus,  
 Fascheux, hargneux, ayant l'ame estourdie  
 Et tout le corps de longue maladie.

Mais or' que i'ay tout l'esprit vigoureux,  
 Le genou fort, & le sang genereux,  
 Commandez moy, & m'aimez tout ensemble,  
 Et m'honorez : ces trois poincts (ce me semble)  
 Font le Poëte heureux & glorieux,  
 Le font gaillard, le poussent iusqu'aux cieux.

*Car sans honneur la Muse consommée  
De long trauail s'alambique en fumée,  
Et l'escruiain qui n'a le plus souuent  
Qu'une promesse aussi froide que vent,  
Deuient poussif & retif à l'ouurage :*

*Le seul honneur luy hausse le courage,  
Quand il se voit d'un Prince bien traité,  
Comme ie suis de vostre Majesté.*

### A luy-mesme.

*Si les souhaits des hommes auoient lieu,  
Et si les miens estoient ouys de Dieu,  
Je luy ferois vne requeste, Sire,  
De vous donner, non un meilleur Empire,  
Non plus de grace ou plus grande beauté,  
Non plus de force ou plus de Royauté,  
Ou plus d'honneur pour illustrer vostre âge,  
Mais vous donner six bons ans d'auantage.*

*D'où vient cela qu'au retour des beaux mois  
On voit les fleurs, les herbes, & les bois  
Croistre soudain, & les Rois de la terre  
Qui deffous Dieu ont le second tonnerre,  
Qui doiuent tant de Prouinces tenir,  
Mettre en croissant si long temps à venir ?  
Alors qu'un Prince a pleine cognoissance  
De ses suiets, il a plus de puissance.*

*Quand Iupiter dedans Crete habitoit,  
Et qu'Amalthée en l'antre l'alaitoit,  
Et que petit avecque sa compagne  
Nede rampoit sur l'ide la montagne,*

*Il n'estoit craint, bien que sa maiesté  
Dessus son front monstraist mainte clairté.*

*Mais aussi tost qu'il gaigna le trophée  
Du fort Briare, & du gean Typhée,  
Et qu'il eut mis la foudre entre ses mains,  
Lors il fut craint des Dieux & des humains.*

*Charles, c'est vous à qui le destin donne  
Non seulement la superbe couronne  
Que vos ayeux desur le chef portoient,  
Et de leur nom les peuples surmontoient :  
Le ciel amy de vos vertus, appelle  
Vostre ieunesse à victoire plus belle.*

*Incontinent que vostre beau menton  
Sera doré d'un iaunissant cotton,  
Comme Alexandre, aurez l'ame animée  
Du chaud desir de conduire vne armée  
Outre l'Europe, & d'assauts vehemens  
Oster le Sceptre aux puissans Ottomans,  
Qui sous leurs mains par armes ont saisie  
Tout le meilleur d'Europe & de l'Asie,  
Lesquels hardis d'hommes & de vaisseaux  
Ont d'auirons ia couuertes les eaux  
Qu'on voit flotter dessus la mer Tyrrhene :  
Ont ia campé leurs soldars sur l'arene  
De la Sicile & de Calabre, afin  
Que nostre loy par le Turc prenne fin :  
S'il ne vous plaist d'un valeureux courage  
Vostre puissance opposer à leur rage.*

*Et bien qu'ils soient hautains & glorieux  
De tant de Rois les Rois victorieux,  
Et que d'enflure ils aynt l'ame grosse,  
Si craignent-ils pourtant la Prophetie.*

*C'est qu'un grand Roy de France doit un iour,  
En les dontant & chassant du seiour*



Que Constantin esleut pour sa demeure,  
 Rompre leur Sceptre, & d'une foy meilleure  
 Gagner les cœurs des peuples Asiens,  
 De Circoncis en faire des Chrestiens,  
 François d'habits, de mœurs, & de langage.

le me promets par signe & par presage,  
 Et par augure & par sort, que c'est vous  
 Qui les devez abbatre à vos genous,  
 Et que vous seul en aurez la victoire,  
 Et de Mahom effacerez la gloire.

L'enten desia vos soldars fremissans,  
 Et les cheuaux sautans & hennissans  
 Dessous le faix de vos braues gend'armes :  
 le voy l'esclair du bel acier des armes  
 Sous le Soleil s'esclatter iusqu'aux cieux :  
 le voy vostre ost conduit par les bons Dieux,  
 Sans que la peine ou la peur le surmonte,  
 Desia campé sur le bord d'Hellesponte.

Courage Prince! encor' n'estes-vous pas  
 Le premier Roy de France, qui les pas  
 Aura planté sur la terre Payenne  
 Pour le soustien de nostre foy Chrestienne!

Vn Roy Louys endossé du harnois  
 Y a dressé les honneurs des François.

Ce Godefroy ieune Duc de Lorraine,  
 D'hommes croisez couurit toute leur plaine,  
 Print Cormoran le grand Gean, & fist  
 Si vaillamment qu'apres il desconfist  
 Tous les Payens par la gent baptisée :  
 Cassa leur Sceptre, & leur gloire brisée  
 Dessous ses pieds en triomphe foula,  
 Et combatant se fist Seigneur delà.

Vous plus grand Roy devez bien vous promettre  
 Les faits qu'un Duc à fin a bien sceu mettre,

*Pauvre de biens, & riche de bon-heur,  
Qui par vertu s'acquist si grand honneur.*

*Là vous voirrez tant de villes hautaines  
Fieres du nom de ces vieux Capitaines,  
Alexandrie, Antioche, & aussi  
Celle qui riche esleue le sourci  
Du nom d'Auguste, & celle qui la gloire  
Retient encor' d'une heureuse victoire.*

*Là vous voirrez mille peuples diuers  
D'habits, de mœurs, de langage, couuerts  
L'un de Laurier & l'autre de lierre,  
Vous salüer le Seigneur de leur terre,  
Et remerquant en vous cent Deitez  
Vous presenter leurs cœurs & leurs citez.*

*De l'autre part la Grece qui est telle  
Qu'onque en beauté terre ne fut plus belle,  
Qui a conceu tant de peuples guerriers,  
Et tant de fronts couronnez de Lauriers,  
Mere des Arts, des Philosophes mere,  
Dont l'ame viue ingenieuse & clere  
Abandonna la terre (pesant lieu)  
Et d'un grand cœur s'en-vola iusqu'à Dieu,  
Le voulut voir, le cognoistre & l'apprendre :  
Puis se laissant par les Astres descendre  
Leur fist des noms, & cognut leur vertu,  
Vit le Soleil de flames reuestu,  
De fin argent vit la Lune accoustrée,  
Et son beau char qui conduit la Serée :  
Cognut leurs tours distances & retours,  
Cognut les ans, les heures, & les iours :  
Sceut le Destin, & ce qu'on dit Fortune :  
Cognut le haut & le bas de la Lune,  
L'un immortel, l'autre amy du trespas :  
Sceut la raison pourquoy tombent çà bas*

*Flames, esclairs & foudres & tonnerres :  
Cognut de l'air les accords & les guerres,  
Cognut la pluye & la neige & le vent.*

*Puis tels secrets hautement escriuant  
De main en main les fist à l'homme apprendre,  
Et tout le ciel en terre fist descendre,  
Ne laissant rien en la voute des cieux  
Dont son labeur ne fust victorieux.*

*Bref ceste Grece, œil du monde habitable,  
Qui n'eut iamais, ny n'aura de semblable,  
Demande, hélas ! vostre bras tres-Chrestien  
Pour de son col desserrer le lien,  
Lien Barbare, impitoyable & rude,  
Qui tout son corps geinne de seruitude  
Sous ce grand Turc, qui presque de l'esprit  
Du peuple Grec a chassé Iesus-Christ  
Et luy pillant ses enfans & ses villes  
Le rend esclave à choses tresseruiiles.*

*Or si la Foy vous esmeut à pitié,  
Si vous portez aux pauvres amitié,  
Vous deuez, Sire, armer vos mains fidelles  
Pour racheter tant d'ames immortelles  
Qui sous Mahom s'en-vont desia perir,  
S'il ne vous plaist bien tost les secourir.*

*Ah ! si ie puis iusqu'à tel âge viure  
Que vos combats ma plume puisse suiure,  
Tout au milieu de vos assauts diuers,  
Fifres, tabours, ie chanteray mes vers  
A l'enuy d'eux, si bien qu'on pourra dire  
Que vos canons feront place à ma Lyre.*

*Alors d'Aurat qu'Apollon a nourry,  
Belleau qui est des Musés tant chery,  
Ne me vaincront, non pas Apollon mesme :  
Car plein d'ardeur & d'une enuie extreme*

*De bien chanter, comme tout furieux  
Vostre beau nom i'enuoiray iusqu'aux Dieux.*

*Je chanteray que la bonne Nature,  
Et que le Ciel sur toute creature  
Vous ont formé, & qu'à vous seul ils ont  
Mis dedans l'ame, en l'esprit & au front,  
Ce qu'ils auoient de mil ans en espergne,  
Et que Vertu, non le Sort vous gouuerne.*

*Tandis la paix en voz terres florisse  
Qui vostre peuple & vos Princes nourrisse :  
Florisse aussi la iustice & les lois  
Iusques au iour que le puissant harnois  
Pour le soustien de vos fertiles Gaules  
Face un grand bruit sur vos ieunes espauls :  
Et que tenant les armes en la main  
Soyez l'honneur de tout le genre humain,  
Faisant marcher deuant vous la iustice,  
Pour corriger les meschans & le vice :  
Et lors sera vostre Sceptre puissant  
De iour en iour en vertu florissant,  
Et serez dit comme le bon Auguste,  
Non pas un Roy, mais un pere tres-iuste.*

## DISCOVRS,

à tres-illustre & tres-vertueuse Princesse,

Elizabeth, Royne d'Angleterre.

*Mon cœur esmeu de merueille se serre  
Voyant venir un François d'Angleterre,  
Lors qu'il discourt combien vostre beauté  
Donne de lustre à vostre Royauté :*

Beauté qui est en grace si extrême  
Que rien ne peut la veindre qu'elle mesme,  
Pour estre seule exemple tresparfait  
Sur qui le Ciel si grand miracle a fait :  
Puis en rompit le moule esmerueillable  
Pour n'en refaire au monde de semblable,  
Afin que telle en terre vous fussiez,  
Et que pareille en beauté vous n'eussiez :  
Alors ie dy, si ceste Royne Angloise  
Est en beauté pareille à l'Escoissoise,  
On voit ensemble en lumiere pareils  
Dedans vne Isle esclairer deux Soleils.

On dit qu'au temps que les Dieux visitoient  
Cà bas la terre, & presens la hantoient,  
Que l'Isle vostre alloit libre sur l'onde,  
Comme Delos errante & vagabonde,  
Et que son pied par un nouveau destin  
N'estoit serré d'un lien aimantin,  
Mais sans tenir à nulle chaisne dure  
Flot desur flot erroit à l'auanture.

Souuentefois le nocher Hirlandois  
L'a rencontrée au riuage Flandrois  
Pres de sa nef sur la vague esleuée,  
Puis au retour bien loin l'a retrouvée :

Aucunefois sautant comme un mouton  
S'alloit iouer au riuage Breton,  
Puis en flottant où son pied luy commande,  
Se blanchissoit de l'escume Normande :

Aucunefois s'en-venoit balloyer  
Le flot qui vient à Boulongne ondoyer,  
Puis tout soudain sauteloit à la riue  
Où l'Ocean à Graueline arriue :  
Puis alloit voir les Orcades, apres  
D'un long chemin retournoit vers Calais.

*Vn iour estant vers Calais arrestée,  
Voicy venir le Dieu marin Protée,  
Qui de son gré vagabond s'absentoit  
Bien loin d'Egypte où Prophete habitoit,  
Ayant laissé sa demeure fertile  
Trop irrité contre sa propre fille,  
Qui par present l'auoit mis dans les laz  
(Comme il dormoit) du Prince Menelas.*

*Or il auoit par vn long nauigage  
Desia passé d'Hercule le bornage,  
Razé Marseille, & ia voyoit la mer  
Contre les bords de Gascongne escumer :  
Desia plus bas à la riue voisine  
Voyoit flotter la vague Poiteuine,  
Suiuant tousiours en noüant plus auant  
Le flot qui va la Bretagne lauant.*

*Comme il estoit à la riue qui baigne  
Le port lcin d'une ondeuse campagne,  
Il veit vostre Isle, & si tost qu'il la veit  
Flottant sur l'eau, sa beauté le rauit :  
Lors abaissant contre la mer sa teste  
Fist à Neptune vne telle requeste.*

*Pere Neptune, à qui le flot chenu  
Par sort ietté en partage est venu,  
Lors que vous trois, Saturnien lignage,  
De ce grand Tout diuifiez l'heritage,  
Aux autres Dieux ne laissant rien sinon  
La seule peur d'un si horrible nom :*

*O Pouffe-terre, Embrasse-terre, ô Pere  
Dont le sourcy la marine tempere,  
Et qui trainé d'un char à deux cheuaux  
Voles leger sur la croupe des eaux,  
Et des grands vents appaisant les haleines  
Calmes le front de tant d'humides plaines :*

*Si de ton sang, Pere, ie suis sorty,  
Et que vers toy ma Mere n'ait menty,  
Donne à ma peine une trêue meilleure,  
Et me permets ceste Isle pour demeure.*

*A peine eut dit, que Neptune l'ouyt,  
Et de la voix de son fils s'estouyt :  
Puis fendant l'eau de son eschine bleuë  
Mit sur la mer sa teste cheuelue,  
Et luy respond : Ce n'est pas toy mon fils  
Qu'on doit nier, à qui pere ie fis  
Don des troupeaux qui ronflent sur l'arene  
Dormans aux bords d'Egypte & de Palene :  
Entre en ceste Isle, & en don la reçois  
Qui est, mon fils, assez riche pour toy.*

*Disant ainsi, de toute la puissance  
De son Trident frappa le bord de France,  
Et tellement son bras il estendit,  
Qu'en le frappant en deux parts le fendit :  
Puis desliant de la racine entorse  
Le fondement, le pousse à toute force,  
Et le tirant en arrache un morceau  
Qu'il fist rouller bond à bond desur l'eau  
Iusques à l'Isle, & les unist ensemble :  
Comme un maçon qui de sa chaux assemble  
Pierre à la pierre, & à coups de marteau  
De deux rochers fait sortir un château.*

*Puis en plongeant deffous l'Isle qui erre  
Encor' sous l'eau, la lia contre terre  
D'un estroit nœud, comme un Tisseran fait  
Quand en ouurant sa trame se desfait :  
Adonc il prend des deux trames ensemble  
Les bouts rompus, & d'un nœud les assemble  
Fil contre fil, puis d'un filet entier  
Ourdist parfaite une toile au mestier :*



*Adonc Proté ioyeux en son courage  
D'un tel present, gaigne le bord à nage:  
Baiza la riue, & la terre accolla,  
Puis vray Prophete à l'Isle ainsi parla.*

*Isle qui fus solitaire & deserte,  
D'aspres buissons & d'espines couuerte,  
Haute maison des Sangliers escumeux,  
Et des grands Cerfs au large front rameux,  
Qui n'euz iamais la poitrine ferue  
Du soc aigu de la croche charue:  
Vn temps viendra (& le voicy venir)  
Qu'on te doit voir triomphante tenir  
Le premier rang entre toutes les Isles  
Qui sont en biens & en peuples fertiles:*

*Et quand Neptun' de la mer gouverneur  
Appellera les Isles par honneur,  
Tu marcheras deuant l'Isle de Crete,  
Bien qu'elle soit la nourrice secrete  
De Iupiter, & marcheras aussi  
Deuant Samos, de Iunon le souci,  
Et deuant Rhode ingenieuse, encore  
Que le Soleil sur toutes elle adore.*

*Bien loin bien loin les Orcades viendront  
Après ta queue, & petites tiendront  
Rang après toy, & grande seras telle,  
Que de ton sein à la large mamelle  
Alaicteras mille vaillans Artus,  
Grands Rois armez de fer & de vertus:  
Du sang Tyran les mains auront trempées,  
Et des grands coups de leurs grandes espées,  
En combattant pour l'honneur de l'Amour  
Feront sonner les forests d'alentour.*

*De tels guerriers courra par tout le monde  
L'honneur fameux, & de leur table ronde,*

Grands Palladins de loüange animez,  
Qui aux combats armez & desarmez  
Pour le secours des pauvres Damoiselles  
Hardis feront des emprises si belles  
Que le vieil temps n'en sera le veinqueur,  
Tant vaut l'Amour espris en un bon cœur.

De là viendront les Preux & les Gendarmes,  
De là viendront les escolles des armes,  
Combats, assauts, barrieres & tournois,  
Et de briser le fer sur le harnois.

Entre ces Preux doit regner un Prophete,  
Que vif & sain, une femme parfaite  
En art magiq' enfermera dedans  
Un froid tombeau pour y finer ses ans.

En ce tombeau l'ame sera viuante,  
Et dedans l'ame une voix resonante  
Entre les os, qui dira les destins  
Et les dangers aux nobles Palladins,  
Oyant l'oracle en mainte & mainte sorte  
De la despouille ensemble viue & morte.

De tous les Dieux tu seras en honneur :  
Mesmes lunon respandra le bon-heur  
Dessus tes champs de sa pleine mammelle :  
Un seul Bacchus, hélas ! pour l'amour d'elle  
Te hayra, & comme à tes voisins  
N'enrichira tes coutaux de raisins.

Mais quelque iour Ceres la vagabonde  
Ayant tourné les quatre parts du monde,  
Cherchant sa fille au trauers des humains,  
Tenant deux Pins allumez en ses mains  
Doit arriuer lassée à ton riuage,  
Qui pour du vin te doit faire un breuuage  
Non corrosif, ny violent, ny fort,  
Trouble-cerueau, ministre de la mort,

*Mais innocent à la prouince Angloise :  
Et de Ceres sera nommé Cernoise,  
Qui se pourra si gracieux trouuer  
Que tes voisins s'en voudront abreuuer.*

*Bien tost verras ta terre fructueuse  
Estre en Palais superbe & somptueuse,  
Et en citez & en ports spacieux,  
Dont les sommets voisineront les cieux.*

*Ceste Cerés d'Abondance compaignie,  
Fera iaunir de froment ta campagne,  
Et tous tes champs auront le ventre plein  
De mines d'or & d'argent & d'estain,  
Qu'au plus profond de tes plus riches veines  
Le grand troupeau des Nymphes souterraines  
Iront cherchant, choisissant, affinant,  
Lauant, cuisant, & d'un marteau sonnant  
Desur l'enclume, à la fournaise neuue  
Feront d'argent ondoyer un grand fleuve,  
Qui doit seruir de monnoye à chacun :  
Car à chacun l'argent sera commun.*

*Bien tost courant au trauers de la plaine  
A crins espars, soufflant à grosse haleine,  
Brusque, aspre, allegre, au combat le premier  
Verras hanir le beau cheual guerrier.*

*D'autre costé le long de tes riuages,  
Entre les fleurs au milieu des herbages,  
Ou sur les monts aux verdoyans coupeaux,  
Verras errer mille ieunes troupeaux  
Blancs comme laiët, dont la Lune amoureuse  
De leurs toisons seroit bien desireuse :  
Car comme on dit, la Lune eut le cœur pris  
D'une toison blanche de riche pris.*

*Ainsi qu'on voit desur l'arene blonde  
De la grand mer, une onde suiure une onde,*

Puis sur une autre une autre s'esleuer :  
 Ainsi verras à l'estable arriuer  
 Deuers le soir, ou à midy sous l'ombre,  
 De grands troupeaux une foule sans nombre  
 L'un apres l'autre, & marchant en auant  
 D'un ordre long iront s'entre-suiuant  
 Troupe sur troupe emplissant les estables :  
 Les uns seront d'âge & de poil semblables,  
 Les uns cornus, & les autres laineus,  
 Dont les toisons crespes de mille nœuds  
 Prendront le teint de cent couleurs diuerses,  
 laune, incarnat, grises, noires & perses,  
 Que les grands Rois tourneront en habits  
 Ornez du don de tes riches brebis.

Bien tost verra la Tamise superbe  
 Maint Cygne blanc loger dessus son herbe,  
 Hostes sacrez, puis esleuez aux cieux,  
 Tout à l'entour des bords delicieux  
 letter un chant, pour signe manifeste  
 Que maint Poëte, & la troupe celeste  
 Des Muses sœurs y feront quelque iour,  
 Laisant Parnasse, un gracieux seiour,  
 Pour enuoyer aux nations estranges  
 Des Rois Anglois les fameuses loüanges.

Puis se tournant deuers le pied mangé  
 D'un chesne creux, aduise un camp logé  
 De maints fourmis, qui dedans leur tefniere  
 Brilloient couuerts de paille & de fougere.

Change, Neptune, en peuple (ce dit-il)  
 Tout ce monceau diligent & subtil  
 A trauailler, & à mettre en reserue  
 Le bien qui l'homme & la vie conserue,  
 Pour estre actifs & soigneux tout ainsi  
 Qu'est le fourmy au labeur endurcy.

*A peine eut dit, que le chesne remue  
Sans aucun vent sa perruque menue,  
Et en branlant ses rameaux, accorda  
Ce que Protée en priant demanda.*

*Lors ces fourmis transmuez se trouuerent :  
Vn plus grand corps sur deux pieds esleuerent :  
Aux deux costez des espaules leur pend  
Comme rameaux des grands bras : & plus grand  
Deuint leur chef, & plus grande leur bouche :  
Et pour le creux d'une sauuage jouche  
Vont par les champs de rang, comme ils souloient  
Aller l'esté quand les champs ils pilloient,  
Lors qu'ils chargeoient sur le dos porte-proye  
Les grains de bled par vne estroite voye.*

*Ces animaux de nouveau transformez  
De grands outils se virent tous armez :  
L'un plante aux champs vne forte charrue,  
L'autre en ses mains porte vne bisague,  
L'un tient vn van, l'autre tient vn gateau,  
L'autre vne fourche, & l'autre vn grand couteau :  
Mais la plus-pârt branloit armes guerrieres,  
Haches, poignars, piques, lances fresnieres,  
De grands arcs d'ifs, des fleches, des carquois,  
Et sur le dos leur sonnoit le harnois,  
Race de gens vaillante & magnanime,  
Aspre au combat, & qui guerriere estime  
L'homme estre heureux & comblé de bon-heur  
Quand par la vie il achete l'honneur.*

*Adonc Proté voyant tant de gens d'armes  
Qui desiroient de nature les armes,  
Pareils en âge, en force & en vigueur,  
De tel propos leur mollissoit le cœur.*

*Contentez vous, enfans, de vostre terre,  
Et si ardans ne courez à la guerre :*

Comme amoureux du sang ne bataillez,  
Et vos voisins par armes n'affaillez :  
Par vous ne soient en poignantes espées  
Ny vos rateaux ny vos fauls detrampées,  
Et ne creusez vos sapins en vaisseaux,  
Et pour le gain ne tourmentez les eaux.

Soient vos esprits amoureux de science,  
Du cours du Ciel, ayez experience  
Des Arts humains qui font l'homme courtois :  
Vos grand's Citez ornez de belles Lois,  
Ne les changeant quand elles sont receues  
Pour autres Loix nouvellement conceuës :  
Aimez les bons, chastiez les meschans,  
Et bien-heureux vivez parmy vos champs.  
Las ! i'ay grand peur que ce morceau de terre  
Qui de la France est ioinct à l'Angleterre,  
Cause ne soit de malheur auenir.

Comme estranger ne se pourra tenir  
De retourner au lieu de sa naissance,  
Et vous apres auecq' forte puissance  
Pour le r'auoir franchirez vostre bord,  
Mettant sans fin vos terres en discord.

N'offensez point par armes ny par noise,  
Si m'en croyez, la prouince Gauloise :  
Car bien qn'il fust destiné par les Cieux  
Qu'un temps seriez d'elle victorieux,  
Le mesme Ciel pour elle a voulu faire  
Autre destin au vostre tout contraire.

Le Gaulois semble au Saule verdissant :  
Plus on le coupe, & plus il est naissant,  
Et re-iettonne en branches dauantage,  
Prenant vigueur de son propre dommage  
Pource vivez comme amiables sœurs :  
« Par les combats les Sceptres ne sont sœurs.

Quand vous serez ensemble bien-unies,  
L'Amour, la Foy, deux belles compagnies  
Viendront çà bas le cœur vous eschauffer :  
Puis sans harnois, sans armes & sans fer,  
Et sans le doz d'un corselet vous ceindre,  
Ferez vos noms par toute Europe craindre :  
Et l'âge d'or verra de toutes pars  
Fleurir les Lis entre les Leopars.

Tu ne seras, Isle bien-accomplie,  
Claire d'honneur & de vertu remplie,  
Sinon au iour qu'une Royne naistra,  
Qui comme un Astre icy apparoiſtra :  
Elle aura nom Elizabet, si belle  
Qu'autre beauté ne sera rien pres d'elle.

Ceste Princeſſe au cœur Royal & haut,  
Pleine d'un ſang tout magnanime & chaud,  
Jeune de face & vieille de prudence,  
Par grande ardeur fera la guerre en France :  
Et courra les eſchines des eaux  
De maſts, de fuſts, de voiles, de vaiſſeaux,  
Qui de leurs creux, ſur l'arene ſemée  
Feront eſpandre une moisſon armée  
D'hommes chargez de harnois fremiſſans,  
Et de chevaux aux combats henniſſans,  
Et de pietons, dont les armes ferrées  
Eſclateront ſur les eaux azurées,  
Et ſur les champs un feu brillant & clair  
Comme une foudre, ou comme un long eſclair  
Que Iupiter tout courroucé deſſerre  
Sur une ville en ſigne de la guerre,  
Ou ſur le maſt d'une nauiſſe en mer,  
Pour un ſignal qu'il la veut abyſmer.

Mais rencontrant une Royne prudente  
Qui des François ſera ſage regente,



*Viue d'esprit & meure de conseil,  
Retirera soudain son appareil,  
Après auoir sa gloire accompagnée  
Au premier bord d'une ville gaignée.*

*Puis sans auoir de Mars trop de souci,  
Elle estant Royne, & l'autre Royne aussi,  
Estimeront les Martiales flames  
Duire plustost aux gendarmes qu'aux femmes,  
Qui de nature ont le sexe plus doux,  
Enclin à paix, ennemy de courroux.*

*Pource on verra bien tost fleurir entre elles  
Des amitez pour iamais eternelles,  
Qui les feront plus craindre que les Rois  
Qui sur le dos ont tousiours le harnois,  
D'autant qu'on voit la paix estre meilleure  
Que le discord qui en enfer demeure.*

*A tant se teut le Dieu marin Proté,  
Qui du riuage en la mer est sauté :  
La mer l'enferme, & l'eau qui piroüette,  
Fist mille tours sur le chef du Prophete.*

## DISCOVRS,

à elle-mesme.

LES PAROLES QVE DIST MERLIN

le Prophete Anglois esmerueillé de voir  
Artus en sa ieunesse accomply  
de toutes vertus.

*Quand Iupiter le grand pere des Rois  
Feist naistre Artus ornement des Anglois,*

Pour un chef-d'œuvre & merueille du monde  
Il amassa toute la terre & l'onde,  
Le feu leger, & les Astres qui font  
A tous mortels porter desur le front  
(Comme il leur plaist) cent diuerses fortunes,  
Blanches tantost, tantost noires & brunes,  
Versant sur nous ie ne sçay quel destin  
Qui nous maistrise & suit iusqu'à la fin.

Il choisist l'eau la plus claire & luisante,  
La terre apres la moins dure & pesante :  
Les mist en masse, & en fist du leuain :  
Il la paitrist longuement en sa main  
L'amollissant de son doigt bien agile,  
Comme vn potier amollist son argile.

Tournant la terre en homme la forma,  
Souffla dedans vn feu qui anima  
La masse rude, & de soy paresseuse,  
D'une ame viue ardente & genereuse,  
Semblable au feu qui prompt, chaud & leger  
Fuyant la terre au ciel se va loger.

En ce-pendant les trois Parques chenuës  
Sont à l'entour de l'Image venuës  
Ayant au col trois quenouilles d'airain,  
Fuseaux de fer : puis tirant de leur sein  
Vne fillace & blanche & deliée,  
L'ont tout au rond des quenouilles liée.

Mouillant souuent de salie leurs doigts  
Pinçoient le fil d'un accord toutes trois,  
Et de la trame en tourbillons suiuiie  
D'un beau fuseau filoient sa blanche vie,  
La polissant d'une mordante dent :  
Puis pour durer contre tout accident  
Qui va troublant des mortels le courage,  
D'un triple brin renforçoient tout l'ouurage,

*Afin qu'ensemble il fust & blanc & fort,  
Blanc en beauté, & dur contre l'effort  
Que le malheur ou que l'enuie ameine,  
Brisant le cours de nostre vie humaine.*

*Lors Iupiter qui seul presidoit là,  
A haute voix tous les Dieux appella  
Pour contempler ceste Image parfaite  
Que pour miracle au ciel il auoit faite,  
Leur commandant d'un front paisible & doux  
Qu'elle receust un beau present de tous.*

*Adonc Amour d'une alaigne secousse  
Luy renuersa tous les traits de sa trouffe  
Dedans les yeux: non seulement ses traits,  
Mais ses douceurs, ses graces, ses attraits  
Qui voletoient sur son chef, comme Auettes  
Volent autour des plus douces fleurettes.*

*Venus, d'œillets & de roses a peint  
La couleur viue & fresche de son teint:  
Mars luy donna la taille & la proïesse,  
Pallas prudence, & Iunon la richesse:  
Phæbus luy fist le chef au sien pareil,  
Et Promethé luy donna le conseil,  
L'esprit Mercure, & Pithon la faconde:  
Puis Iupiter le fist descendre au monde.*

*Si tost qu'à bas l'image descendit  
La Renommée aux grands yeux l'entendit.*

*Lors ne souffrant que la belle venuë  
D'un homme tel fust long temps incognue,  
Laiissa couler comme les Nymphes font,  
Ses longs cheveux à l'entour de son front  
Et sur le dos: puis elle prist ses ailes  
A cent couleurs, grandes, longues & belles,  
Faites de rang à cerceaux inegaux,  
Telles qu'on voit celles des Papegaux*

(*Present de l'Inde*) estre toutes couuertes  
 D'azur, de rouge, & de peintures vertes,  
 Et se monstrier diuerses à nos yeux  
 Ainsi qu'ilris en vn temps pluuieux :  
 Elle cacha cent langues en sa bouche,  
 Print son cornet, que soudain elle embouche  
 A iouë enflée, & promptement de là  
 Sur le Palais d'Europe s'en-vola.

Europe auoit sur sa robe engraüée  
 Mainte prouince à fils d'or esleuée,  
 Mainte cité, maints fleuues & maints ports,  
 Et mainte mer seruant de frange aux bords  
 De son habit, mainte droite montaigne,  
 Mainte forest, maint lac, mainte campagne,  
 Et maint sablon sur les plis iaunissant  
 De son habit en or resplendissant :  
 Son œil fut plein, tout son front & sa face  
 De maiesié, de douceur & de grace.

Desur son chef mainte couronne estoit :  
 Dedans la main maint sceptre elle portoit,  
 Et haute assise en vn throne d'yuoire  
 De toutes parts s'environnoit de gloire,  
 Et de ioyaux qui flambans à l'entour  
 De ses beaux doigts faisoient vn autre iour.

Comme elle veut, ceste Europe commande  
 Aux Rois sceptrez assis d'une grand bande  
 Pres de son throne : vn a le front ioyeux,  
 L'autre marry fiche à terre les yeux,  
 L'autre ruzé discourt en sa pensée  
 De mettre à fin la guerre commencée,  
 L'un vit en paix, l'autre ne veut sinon  
 Par le harnois acquerir du renom :  
 L'un est heureux, & l'autre n'est prospere,  
 L'un est Tyran, l'autre regne en bon pere,

*L'un est prudent, l'autre mal-aisé :*

*L'un ramassant de son sceptre brisé  
Les grands esclats miserable s'estonne,  
Et l'autre voit à terre sa couronne :  
L'un est vieillard & l'autre ieune enfant,  
L'un est veincu & l'autre triomphant.*

*Tout à l'entour sont les Ducs & les Comtes,  
Que toy Fortune en un iour tu surmontes,  
Et de pompeux les fais aller seuletts,  
De grands Seigneurs transformez en vallets.*

*Aupres du throne estoient grandes Princeesses,  
Roynes de nom, Marquises & Duchesses,  
Qui venoient voir Europe bien souuent :  
L'une derriere & l'autre alloit deuant  
Selon le rang, le sang & le lignage.*

*Elles ouurant à l'eguille un ouurage  
Brodoient ensemble à traits longs & parfaits  
De leur pays les gestes & les faits  
Et l'origine, & les longues Annales,  
Grand ornement des dignitez Royales.*

*Or aussi tost que l'Europe entendit  
La haute voix que la Fame espandit  
Au ciel, en mer & çà bas en la terre,  
Elle appella sa mignonne Angleterre,  
Luy commandant d'aller voir que c'estoit  
Que ceste voix publiquement chantoit.*

*Tout aussi tost qu'Angleterre eut ouye  
Telle nouuelle, elle en fut resiouye :  
Et supplia la Fame de pouuoir  
(Pour le redire à l'Europe) aller voir  
Ceste belle ame en beauté si parfaite  
Qu'elle cornoit avecques sa trompette.  
La Renommée adonq se mist deuant,  
Et l'Angleterre apres l'alloit suiuant,*

Toujours parlant d'un si plaisant visage  
Dont ia le nom auoit pris son courage.

Incontinent que ceste Nymphe eut veu  
Ce nouveau corps de beauté si pourueu,  
De qui la face & douce & genereuse  
Eust pris les Dieux, elle en fut desireuse,  
Et en dressant les yeux pleins de souci  
Vers Iupiter, fist sa requeste ainsi :

Grand Iupiter qui habites les nuës,  
A qui des cœurs les flames sont cognuës,  
Si j'ay suiuy ta haute maïesté,  
Si j'ay fidele à ton seruice esté,  
Si tu m'as humble en tous lieux rencontrée,  
De si belle ame honore ma contrée.

Ainsi priant la Nymphe demanda,  
Et d'un clin d'œil Iupiter l'accorda.

Incontinent cent mille courtoisies,  
Toutes vertus dedans le Ciel choisies,  
Et tout l'honneur qui sert de lustre aux Rois  
Vint honorer le beau pays Anglois  
Fils de Neptun, tout enuironné d'onde,  
Et separé des malices du monde.

Alors que l'âge aura de ton printemps  
Un peu meury les plaisirs inconstans,  
Et que l'ardeur qui les guerres anime,  
Te rendra Prince & fort & magnanime,  
Toutes forests, tous rochers d'alentour  
Ne parleront que d'armes & d'amour,  
De palefrois, d'escuyers, de querelles,  
Et de venger l'honneur des Damoiselles,  
De nains, combats, & de ponts perilleux,  
D'enchantemens, de hazards merueilleux,  
Le vray subiect de ceste table ronde,  
Qui de son nom doit couvrir tout le monde :

*Et de laquelle, ô tres-vaillant Artus,  
Seras l'honneur pour tes hautes vertus,  
Et de tous Rois, qui bouillans de ieunesse  
Voudront un iour imiter ta prouesse.*

*Aussi es-tu la facture des Dieux.*

*Ne sois pourtant d'un tel heur glorieux:  
Tant plus en haut les choses sont poussées,  
Plus contre bas elles sont abaissées  
Par la fortune, à qui n'est rien si cher  
Que voir d'enhaut les Princes trebucher.*

*Mais toy, qui prens des Dieux mesmes la vie,  
N'es point suieët, comme un peuple, à l'enuie,  
Plus puissant qu'elle, & la voirras mourir,  
Et tes combats heroïques fleurir,  
Sans que sa lime odieuse les ronge.*

*« Toute vertu mesprise la mensonge.*

*Ainsi Merlin d'Artus profetisoit,  
Et vray deuint tout cela qu'il disoit.*

## DISCOVERS

*à trefillustre & vertueux Prince,  
Philebert Duc de Sauoye, & de Piemont.*

*Vous Empereurs, vous Princes, & vous Rois,  
Vous qui tenés le peuple sous vos lois,  
Oyez ici de quelle prouidence  
Dieu regit tout par sa haute prudence.  
Vous apprendrez, tant soyez-vous appris.  
Puis vous aurez vous mesmes à mespris,  
Et cognoistrez par preuue manifeste  
« Que tout se fait par le vouloir celeste,*



« Qui seul va l'homme & haussant & baissant :  
 « Qui d'un berger fist un Roy trespuissant,  
 « Et un grand Roy pour trop se mesconnoistre  
 « Entre les bœufs permist longuement paistre.  
 C'est du grand Dieu le iugement treshaut,  
 C'est son aduis : murmurer il ne faut  
 Contre son vueil, & l'homme à bouche close  
 Doit approuver tout ce que Dieu dispose.

Qui oseroit accuser un potier  
 De n'estre expert en l'art de son mestier,  
 Pour avoir fait d'une masse semblable  
 Un pot d'honneur, l'autre moins honorable ?  
 D'en faire un grand, l'autre plus estre-ci,  
 Plomber celui, & dorer cestui-ci,  
 Ou les fresler, ou bien si bon luy semble,  
 Quand ils jont faits, les casser tous ensemble ?  
 Les pots sont siens, le seigneur il en est,  
 Et de sa rouë il fait ce qui luy plaist.

Qui voudroit donc accuser d'iniustice  
 Le Tout-puissant, comme auteur de malice,  
 Si d'une masse il fait un Empereur,  
 Et de la mesme un pauvre Laboureur ?  
 S'il pousse en bas les Rois & leurs couronnes,  
 Et s'il fait Rois les plus basses personnes ?  
 S'il va tournant les honneurs comme il veut ?  
 « Il est agent, seule cause qui peut,  
 « Nous ses suiets qui recevons la forme  
 « Bonne ou mauvaise ainsi qu'il nous transforme  
 « Aucunesfois il nous leue aux estats,  
 « Des hauts honneurs il nous deuale en bas,  
 « Nous fait fleurir & flestrir en mesme heure,  
 « Et changeant tout sans changement demeure.  
 Il ne faut point pour ma cause approuver  
 Un tesmoignage és histoires trouver,

Ny rechercher les histoires antiques  
 Ny des Romains ny des hommes Attiques.  
 Toy Philebert, Duc des Sauoisïens,  
 M'en fourniras plus que les anciens.  
 Donques à toy ma parolle i'adresse,  
 Mettant à part les histoires de Grece  
 Et des Romains, pour te chanter ici  
 Et ton bon-heur, & ton malheur aussi,  
 Non tout du long, il faudroit vn Homere;  
 Mais discourant i'en diray le sommaire.

Quand par fortune, ou par le vueil des Cieux  
 Le pere tien eut veu deuant ses yeux  
 Tout son pais reduit sous la puissance  
 De son neveu, vn puissant Roy de France  
 Et d'autre-part qu'un Empereur plus fort  
 Le maistrisoit sous ombre de support,  
 Et que ta terre en ce poinct occupée  
 Ne te restoit que la cape & l'espée,  
 Simple Seigneur, ayant de ta maison  
 Perdu le bien contre droit & raison,  
 Tousiours en doute espiant la fortune  
 Qui ne te fut qu'à regret opportune :  
 « (Car volontiers le sort impetueux  
 « Rompt le dessein de l'homme vertueux) :

Qui eust pensé qu'apres tant de trauerses,  
 Que les beaux faits de tes guerres diuerses  
 En ton pais plus grand t'eussent remis,  
 Estant ami de tous tes ennemis ?

Or quand Cesar mit ses gens en campagne  
 Pour chastier les Princes d'Allemagne,  
 Lors ta vertu qui faueur rencontra,  
 Plus que deuant illustre se monstra :  
 Et fis si bien, que l'Empereur, qui ores  
 Ne t'auançoit en nulle charge encores,

*Les faits guerriers de ta main approuva,  
Et aux honneurs les plus hauts t'eleua :  
Mais ton attente estoit desesperée  
De regagner ta terre désirée.*

*Quand des François François le Roy fut mort,  
Son fils regna plus que le pere fort,  
Qui de cheuaux, de pietons, de gendarmes  
Remplit l'Itale, & mit l'Espagne en armes  
Serra l'Anglois en son rempart marin,  
Et courageux alla boire du Rhin :  
Qui par prouesse & par ruze de guerre  
Se fist Seigneur du reste de ta terre :  
Qui fut assez pour perdre tout espoir  
De plus iamais ton doux país reuoir  
Ny tes suiets, comme chose impossible,  
Estant veincu d'un veinqueur inuincible :  
Et toutefois ta vertu tant osa,  
Qu'à la grandeur du veinqueur s'opposa.  
Car quand les Rois & d'Espagne & de France  
L'un contre l'autre armerent leur puissance,  
Par ton moyen l'Espagnol assemble  
Premier son camp, dont la France trembla.*

*Lors tu rompis les murs comme vne foudre  
De Teroüane, & mis Hedin en poudre,  
Et comme un feu qui s'apparoist és Cieux  
Aux nautonniers, signe prodigieux,  
Tu t'apparus, & brulant nos villages  
Tu nous comblas de cent mille dommages :  
Et monstras bien en te montrant veinqueur,  
Perdant ton bien, n'auoir perdu le cœur.  
Long temps apres la Fortune ennemie  
A tes desseins se voulut rendre amie  
Pour te remettre en ton premier honneur,  
Et pour ce faire appella le Bon-heur.*

Bon-heur (dit-elle) il est temps de permettre  
A ce grand Duc qu'il se puisse remettre  
En son pays, ie l'ay trop offensé :  
Il faut qu'il soit par moy recompensé  
D'un double honneur, l'un de veindre à la guerre,  
L'autre d'auoir par amitié sa terre :  
C'est vn guerrier lequel n'a son pareil  
Ny en vertu, en combat, ny conseil,  
A qui ma main si long temps despitée  
A desrobé sa gloire meritée :  
Mais maintenant ie le veux eleuer.  
Pource, Bon-heur, desloge pour trouuer  
En quelque part la Victoire, & la meine  
Où ce grand Duc est campé dans la plaine.  
Vous deux ensemble allez dedans son ost,  
Et le poussant dites luy, que bien tost  
Dresse ses pas vers la forte muraille  
De Saint-Quentin pour gaigner la bataille :  
Faites qu'en ordre il guide les Germains,  
Son plus grand heur doit venir de leurs mains :  
Et que sans crainte il combatte l'armée  
Que i'ay pour luy à la fuite animée.  
De là son heur, de là son bien depend,  
Par ce moyen il se doit faire grand,  
Doit acquerir vne gloire eternelle,  
Et recouurer sa terre paternelle.

A-peine eut dit que Bon-heur s'eleua,  
Et vistement la Victoire trouua.

Victoire auoit de grans ailes dorées,  
Bien peu s'en-faut des Princes adorées :  
Son œil estoit douteux & mal-certain,  
Son front sans poil, inconstante sa main :  
Elle & ce Dieu dedans le camp entrèrent  
Où ce grand Prince en armes rencontrèrent.

*Va (dit ce Dieu) la Victoire est pour toy,  
Va vistement, comba le camp du Roy :  
Tu tourneras tes ennemis en fuite,  
Ayant Victoire & moy pour ta conduite :  
Car autrement sans l'aide de nous deux  
Le fait seroit de ta part hazardeux.*

*A-tant se teut le Bon-heur, qui à l'heure  
Entra chez toy pour y faire demeure.  
De tels propos lors toy espoignoné,  
Ayant ton camp brauement ordonné  
Aussi soudain qu'un torrent des montagnes  
A gros bouillons tombe sur les campagnes  
Perdant l'esperoir du pauvre Laboureur :  
Aussi soudain tout rempli de fureur,  
D'ire, d'ardeur, de cœur & de prouësse  
Tu renuersas la Françoisë ieunesse  
La lance au poing, & pauas tous les champs.  
De morts occis sous tes glaiues trenchans.*

*La Paix adonc, qui du throne celeste  
Veit les effets de la guerre moleste,  
Et que le monde erroit tout dévestu  
De foy, d'honneur, d'amour & de vertu,  
En soupirant s'adressa vers son pere,  
Et de tels mots adoucit sa colere.*

*Si des mortels tu as quelque souci  
Pere eternal, ne les souffres ainsi  
S'entre-tuer comme bestes sauvages,  
Ains d'un accord adouci leurs courages.*

*Le sang versé des meurtres mutuels  
Sied aux Lyons & aux Tygres cruels :  
Non aux humains conuiennent les querelles,  
Que par le nom de tes fils tu appelles,  
Et qui ensemble en fermeté d'esprit  
Sont baptisez en ton fils IESVS-CHRIST :*

*Pource, Seigneur, en ma faueur te plaife  
Flechir leurs Rois, & leurs guerres appaife.*

*Ainsi à Dieu ceste Vierge parla,  
Quand du haut Ciel en terre deuala  
Pour y trouuer vn Charles venerable,  
Vn Anne aussi de France Connestable,  
Ausquels sa voix ainsi elle adressa,  
Et dans leurs cœurs sa parole laissa.*

*Ne souffre plus, toy Charles, qui as prise,  
Grand Cardinal, la charge de l'Eglise,  
Que les Chrestiens de meurtres inhumains,  
Oublians Dieu, ensanglantent leurs mains :  
Tu en auras par les peuples estranges  
De tous costez immortelles louanges,  
Et des François seras en chacun lieu  
Auec ton frere honoré comme vn Dieu.*

*Toy d'autre part Connestable de France,  
Perdant la guerre ourdi vne alliance  
Entre ces Rois, & les conioins amis :  
« Souuent amis on voit les ennemis.  
Je suis la Paix du Ciel vers vous venue.*

*Et ce disant elle rompit la nue  
Qui la couuroit, & de rayons ardans  
Leur enflama tout le cœur au dedans,  
Encouragez du desir de parfaire  
Entre deux Rois vn accord necessaire.*

*Ce qui fut fait : car apres maint discord  
Et maint debat ils ont estraint l'accord  
Qui tient ferrez en amitié nos Princes,  
Donnant repos à toutes ses Prouinces :  
Et par lequel te fut aussi rendu  
Ton beau país que tu auois perdu,  
Estant ami maintenant de la France  
Que tu voulois saccager par outrance :*

Contre laquelle en fureur tu auois  
Ceint ton espée & vestu le harnois  
Pour la destruire: ô iugement des hommes!  
Et maintenant tu aimes, & tu nommes  
Le Roy ton frere, en lieu de le nommer  
Ton ennemi, & ton courroux amer  
En amitié pour tout iamais tu changes,  
Et des François par la paix tu te vanges.

Or tu n'as pas comme par vn destin  
Mis seulement ton entreprise à fin,  
En regaignant tes terres detenues  
Qui sous ta main volontiers sont venues,  
Où tes ayeux vn peu moindres que Rois,  
Par si long temps auoyent donné leurs lois:  
Tu as aussi comme par destinée  
La Sœur du Roy pour espouse emmenée,  
La Marguerite, en qui toute bonté,  
Honneur, vertu, douceur & maiesté,  
Toute noblesse & toute courtoisie  
Ont dans son cœur leur demeure choisie.

Et bien que mille & mille grans Seigneurs,  
Riches de biens, de peuples & d'honneurs,  
La Marguerite en femme eussent requise,  
La destinée à toy l'auoit promise  
Pour iouir seul de ce bien désiré,  
Pour qui maint Prince auoit tant soupiré.

Or ceste vierge en vertus consommée  
D'un cœur treshaut desdaignoit d'estre aimée,  
Et comme vn roc qui repousse la mer,  
Hors de son cœur poussoit le feu d'aimer.

Ainsi qu'on voit vne belle genice,  
A qui le col n'est pressé du seruice,  
Loing des toreaux par les champs se iouant,  
Aller du pié l'arene secouant,



*Hauffer le front & marcher sans servage  
Où son pied libre a guidé son courage,  
Sans point avoir encores alentour  
Du cœur senti les aiguillons d'amour.  
Ainsi marchoit & ieune & toute belle  
Et toute à soy la royalle Pucelle:  
Elle ignorant les faux allechemens  
Du faux Amour & ses attouchemens,  
Ses feux, ses arcs, ses fleches & sa trouffe,  
Et le doux fiel de Venus aigre-douce,  
Suiuoit Minerue, & par elle approuuez,  
Estoyent les arts que Pallas a trouuez.*

*Aucunefois avec ses Damoiselles,  
Comme vne fleur assise au milieu d'elles,  
Tenoit l'aiguille, & d'un art curieux  
Iaignoit la soye à l'or industrieux  
Dessus la toile, ou sur la gaze peinte  
De fil en fil pressoit la laine teinte,  
Et d'un tel soin son ouurage agençoit,  
Que d'Arachné le mestier effaçoit.  
Mais plus son cœur elle addonnoit au liure,  
A la science, à ce qui fait reuiure  
L'homme au tombeau, & les doctes mestiers  
De Calliope exerçoit volontiers,  
En attendant que Fortune propice  
Eust ramené toy son futur Vlysse:  
Seule en sa chambre au logis t'attendoit,  
Et des amans chaste se defendoit.*

*Mais quand tu vis sauteler la fumée  
De ton país, elle in-accoustumée  
Du feu d'aimer, par un trait tout nouveau  
Receut d'Amour tout le premier flambeau,  
Qui deglaça sa froidure endormie,  
Et de farouche il la rendit amie:*

*Flechit son cœur, lequel auoit appris  
D'auoir Venus & ses ieux à mespris:  
Et comme on voit une glace endurcie  
Sous vn Printemps s'escouler addoucie,  
Ainsi le froid de son cœur s'escoula,  
Et en sa place vn Amour y vola:  
Voyant celui auquel ains qu'estre née,  
Pour femme estoit par destin ordonnée.*

*Or vivez donc heureusement vivez,  
Et deuant l'an vn enfant conceuez  
Qui soit à pere & à mere semblable,  
D'un beau pourtrait à tous deux agreable:  
Vivez ensemble, & d'un estroit lien  
loignez tous deux le sang Sauoisien  
Et de Valois en parfaite alliance:  
Si qu'à iamais soupçon & desfiance  
Soit loing de vous, & en toutes saisons  
La paix fleurisse entre vos deux maisons  
De ligne en ligne, & sur les fils qui d'elle  
Naistront apres d'une race eternelle.*

## A TRESILLVSTRE PRINCE CHARLES,

Cardinal de Lorraine.

*l'ay procès, Monseigneur, contre vostre grandeur,  
Vous estes defendeur & ie suis demandeur:  
l'ay pour mon aduocat Calliope, & pour iuge  
Phebus qui vous cognoist, & qui est mon refuge:  
Et pour vostre aduocat vous auez seulement  
Il me plaist, ie le veux, c'est mon commandement.*

Or deuant que plaider il ne faut penser estre  
 Prince ny Cardinal, Monseigneur, ny mon maistre,  
 Issu de Charlemagne, & de ce Godefroy  
 Qui par armes se fist de Palestine Roy,  
 Ny oncle de la Royne, ou celuy qui la gloire  
 Remporta sur Luther d'une sainte victoire :  
 Ou celuy qui ce regne a purgé des mutins,  
 Acte plus grand que ceux des Empereurs Latins.

Mais il faut penser estre vn d'entre le vulgaire,  
 Et personne priuée: autrement mon affaire  
 Auroit mauuaise issue, & sans heureux succès  
 Je serois en danger de perdre mon procès.

Pource ne venez point comme vn Dieu de la France,  
 Aduocat ne prendroit contre vous ma defense.  
 Ne parlez point aussi: car vostre docte vois  
 Qui sçait gagner les cœurs des peuples & des Rois,  
 A qui la triple Grace, & Pithon où abonde  
 L'eloquence, ont versé le miel de leur faconde,  
 Vous faisant vn Nestor, trop disert feroit  
 Que le tort eloquent du droict triompheroit.  
 « Toute mauuaise cause avec art bien plaidée  
 « Est plus que le bon droit souuent recommandée.

Donc sans vouloir par art la mienne desguiser,  
 Mon aduocat vous veut simplement accuser  
 Se fiant en son droit (tout iuge veritable  
 Donne pour l'innocent la sentence equitable:)  
 Et si vous ennuyez de vous voir surmonté,  
 L'en appelle à vous seul, & à vostre bonté.

Or de vous accuser il prend la hardiesse  
 De n'auoir vers Ronsard gardé vostre promesse.  
 « Tout homme qui ne veut sa promesse tenir,  
 « Se doit selon la Loy seuerement punir :  
 « Puis d'autant plus se doit tenir la foy promise,  
 « Qu'elle vient & d'un Prince, & d'un Pasteur d'Eglise,

« Ou ne promettre point : peu d'honneur est receu  
« Quand par le grand seigneur le petit est deceu.

Il dit par ses raisons que dès la sienne enfance  
(Si cela peut servir) eut de vous cognoissance,  
Et en mesme College, & sous mesme Regent :  
Il dit qu'en croissant d'âge il est creu diligent  
A vous faire service, & vous a quant au reste  
En tous lieux honoré comme chose celeste :  
Puis quand les aiguillons d'Apollon & l'erreur  
Dont s'eschauffent les cœurs, le mirent en fureur,  
Et que la Muse Grecque, & la Muse Latine  
Luy eurent viuement enflamé la poitrine,  
Il conceut vos honneurs, & en toute saison  
N'a cessé de chanter vous & vostre maison.

Quand vostre frere aîné, par superbe entreprise  
Engarda que de Mets la cité ne fust prise,  
Et que Cesar enflé de vengeance & d'orgueil  
Vit en lieu d'un trophée, un horrible cercueil  
De ses hommes occis, qui plus ne remportèrent  
L'Aigle, que pour enseigne en son camp ils planterent :  
Il chanta la desfaite, & si haut il volla  
Que son vers genereux la victoire egalla :  
Et si vostre frere eut une belle victoire,  
Ce Ronsard n'eut pas moins en son œuvre de gloire.

Puis quand par la vertu que l'heur accompagna,  
Vostre frere à Renti la bataille gaigna,  
Et que tous les Flamans & les peuples d'Espagne  
A son bras foudroyant quitterent la campagne,  
Il celebra sa gloire, & par son vers fut mis  
La honte doublement au front des ennemis.

Puis quand les chiquaneurs se tourmentoient d'enuie  
Dequoy vous reformiez les procès & leur vie,  
Sans craindre leur fureur, leur fraude & leur courroux,  
Vous sacra la iustice, & la mist dedans vous :

*A Romme vous l'enuoye, où point ne fut deceuë,  
Car elle fut de vous benignement receuë,  
Comme en un cœur gentil de vertus réparé,  
Qui luy estoit du Ciel pour logis préparé.*

*Puis quand vostre parent le grand Duc d'Austrasie  
Eut la fille du Roy pour espouse choisie,  
Et que le palais veuf de procès & de plaids  
Vit, en lieu d'aduocats, diuers peuples espais  
Crier Hymen Hymen, & les fueilles sacrées  
Orner de ses posteaux les superbes entrées :  
Pasteur mena sa Muse au chasteau de Meudon,  
Il celebra la Grotte, & vous en fist un don.  
Au son de son flageol danserent les Naiades,  
Danserent les Syluains, danserent les Dryades,  
Les Satyres cornus, les Faunes & les Pans,  
Et les Cerfs sauteloient à l'entour de leurs fans :  
Tout Meudon tressauta sous les vers qui sonnerent  
Le beau Chant nuptial, les forests l'entonnerent,  
Echo les rechanta, & plus de mille fois  
Vostre nom fut appris aux antres & aux bois :  
Tant vaut le gentil son d'une Muse sacrée,  
Quand par un bon destin aux Princes elle agréa.*

*Lors qu'il fallut changer & tourner le discord,  
Discord hydre testu, en un paisible accord,  
Vous fustes enuoyé comme un sage Mercure  
A chasteau Cambresis, pour en prendre la cure,  
Et vous faire apparoirre au milieu du Flamant,  
De l'Anglois, de l'Ibere un diuin truchemant :  
Il composa vostre Hynne, & comme une pucelle  
Qui va parmi les prez en la saison nouvelle  
Pour charger son panier & son giron de fleurs  
Qui bigarrent les champs de diuerses couleurs :  
Elle ne laisse fleur ny petite ny grande  
Sans en faire un bouquet, puis va trouuer sa bande*

Qui l'attend sur la riue, & versant son giron  
Monstre toutes les fleurs des iardins d'enuiron :  
Ainsin il ne laissa ny grande ny petite  
Vertu qui fust en vous, qu'elle ne fust descrite,  
Il en ourdit vn Hynne, & sortant de ses mains  
Vous en fist vn present, à fin que les Germain,  
L'Espagnol, & l'Anglois, & toute l'assemblée  
(Qui de diuisions erroït toute troublée)  
Apprinsent vos vertus, & qu'il eust ce bonheur  
D'estre aux peuples lointains chantre de vostre honneur.

Quand les François mutins, ains pestes de la France,  
Armerent contre vous l'erreur & l'ignorance :  
Quand le peuple incertain errant deçà-delà  
Tenoit l'un ceste foy, & l'autre ceste-là :  
Et que mille placarts diffamoyent vostre race,  
Il opposa sa Muse à leur felonnie audace,  
Les desfiant tout seul, & hardi tant osa,  
Que sa poitrine nue à leurs coups opposa,  
Bien peu se souciant de leur rage animée,  
Pourueu qu'il fust fauteur de vostre renommée,  
Vn chacun se taisant : car on ne scauoit lors  
Qui des deux camps auroit les destins les plus forts.  
Il refueilla Baïf pour repousser l'iniure  
Qu'on vous faisoit à tort, par sa docte escriture :  
Des Autels & Belleau, & mille autres esprits  
Furent par son conseil de vos vertus esprits.  
Il n'escriuit iamais qu'il n'eust la bouche pleine  
Des illustres vertus de Charles de Lorraine,  
Que mille & mille fois en mille & mille lieux  
Esparfes il sema comme estoiles aux Cieux.  
Quand il auroit serui le plus cruel barbare,  
Encore son seruice & sa plume assez rare  
Eschaufferoit vn Scythe, & benin le voudroit  
Fauoriser sur tous & luy garder son droit.



Adioustez d'autre part qu'il ne vous importune,  
 Et soit bien ou soit mal, il souffre sa fortune,  
 Se confiant en vous sans talonner vos pas,  
 Sans vous suivre au Chasteau, à la chambre, au repas,  
 Comme ce vieil Prelat, las ! qui ne se contente  
 De voir en sa maison cent mille francs de rente,  
 Miserable Prelat ! ny son chef tout grison,  
 Ny le repos aimable en la vieille saison,  
 Ne l'ont peu retirer que serf il ne se rende  
 Et au vouloir d'autrui sa liberté ne vende.

Celuy pour qui ie plaide est d'autre naturel,  
 Bien peu se souciant de ce bien temporel  
 Qui s'enfuit comme vent, & n'estoit la contrainte,  
 Il ne feroit ici par ma bouche sa plainte.  
 Il a le cœur si haut qu'il aime mieux mourir  
 Sans support & sans biens, que de les acquerir  
 Par importunité comme ceux qui vous pressent,  
 Et iamais en repos vos oreilles ne laissent.

Et toutesfois, Seigneur, apres que ce Ronsard  
 A despendu pour vous son labeur & son art  
 A vous rendre immortel, pour toute recompance  
 Vn autre a pris le fruit de sa vaine esperance,  
 Vous ne l'ignorant point : car par vostre moyen  
 (L'ayant mis en oubli) vn autre a pris son bien :  
 Il vous en aduertit & vous en fist requeste :  
 Il tendit les filets, vn autre prist la queste.

Mais fortune & faueur, qui ont la plus grand'part  
 Du monde & de la Court, n'y eurent pas esgard :  
 « Ainsi les gros toreaux vont labourant la plaine,  
 « Ainsi les gras moutons au dos portent la laine,  
 « Ainsi la mousche à miel en son petit estuy  
 « Trauaille en se tuant pour le profit d'autrui.

Tout le bien qu'on amasse avecques trop de peine,  
 Iamais aucun profit au possesseur n'ameine,



Et se tourne en malheur, quand celuy qui le quiert,  
 Auecques trop de peine & de trauail l'acquiert :  
 Et mesme quand il voit que tousiours on differe,  
 Et qu'à la vertu mesme un indigne on prefere.  
 « Aussi trop chèrement un bien-fait est vendu  
 « Quand l'homme pour l'auoir son âge a despendu.  
 Hù! que vous fustes fols pauvres peres, de faire  
 Apprendre à vos enfans le mestier literaire :  
 Mieux vaudroit leur apprendre un publique mestier,  
 Vigneron, laboureur, maçon ou charpentier,  
 Que celuy d'Apollon, ou celuy qui amuse  
 Les plus gentils esprits des bayes de la Muse,  
 Titres ambicieux, qui sans estre auancez  
 Les fait estimer fols, furieux, insensez.

Sainct Gelais qui estoit l'ornement de nostre âge,  
 Qui premier des François nous enseigna l'usage  
 De sçauoir chatouiller les oreilles des Rois  
 Par sa lyre accordante aux douceurs de la vois,  
 Qui au Ciel egalait sa diuine harmonie,  
 Vit (mal-heureux mestier!) vne tourbe infinie  
 De poltrons auancez, & peu luy profitoit  
 Son luth, qui le premier des mieux appris estoit.

Du Bellay qui auoit grimpé dessus Parnase,  
 Qui auoit espuisé toute l'eau de Pegase,  
 Et dedans mesme grotte auecques moy dancé,  
 Ne fut, siecle de fer! d'un seul bien auancé.  
 O cruauté du Ciel, ô maligne contrée,  
 Où iamais la vertu qu'en fard ne s'est monstrée!  
 Puis que les fols, les sots, les ieunes courtisans  
 Sont poussez en credit deuant les mieux disans!

Il faut donner les biens à ceux qui les meritent,  
 Bien qu'ils soyent loin du Prince : ainsi les biens profitent  
 Quand ils sont peu cherchez : de là vient le bon-heur,  
 Et par là se cognoist le vouloir du Seigneur.

Quand le Prince n'avance aux honneurs les Poëtes  
Qui sont du Dieu treshaut les sacrez interpretes,  
Qui sçauent deuiner & songer & preuoir,  
Qui ont l'ame gentile & prompte à s'esmouuoir,  
Comme venant du Ciel, par vengeance diuine  
Tousiours dans le royaume arriue ou la famine,  
La peste, ou le desastre, ou la guerre y prend lieu  
Pour n'auoir honoré les ministres de Dieu.

Je pensois, ô Prelat, qui n'as point de semblable,  
De qui l'esprit est vif, ardent & admirable,  
Que vous seriez fauteur de ce troupeau diuin :  
Mais Phebus en cela me fut mauuais deuin,  
Puis qu'en vostre presence & deuant vostre veüe  
Ceste innocente troupe est par vous despourueüe.

Prelat, ne parlez point, taisez vostre oraison,  
Dont Orateur facond abondez à foison :  
Il ne faut point ouïr vostre docte eloquence,  
Qui pourroit subuertir des luges la sentence :  
Il faut payer l'amende, autrement l'equité  
Ne seroit qu'un nom feint, sans nulle autorité.

Ainsi dit Calliope, & Phebus vous fist taire  
De peur d'estre veinqueur : puis consultant l'affaire  
Auec le bon Nestor Cardinal de Tournon,  
Et le docte Hospital immortel de renom,  
Après auoir tous trois la matiere espluchée,  
Et d'une & d'autre part la raison recherchée,  
Vous fustes condamné à l'amende vers moy,  
A payer mes despens, mon Prelat, & ie croy  
Que vous acquitterez bien tost de vostre déte  
Pour n'encourir l'aigreur d'un mesdisant Poëte.

---

## DISCOVERS

à tresuertueux Seigneur François de Montmorenci,  
Mareschal de France.

*Le petit Aigle, apres auoir esté  
Sans plume au nid tout le long de l'Esté,  
Incontinent que la faim & la mere  
Le vont chassant, la naïue colere  
Le fait sortir hors de l'aire, & s'enfuit  
Où le sang chaud & le cœur le conduit,  
Faire la guerre aux Cygnes de Meandre  
Ou aux Canars, lesquels n'osent attendre  
La ieune ardeur de ce guerrier nouveau,  
Ains froids de peur se cachent deffous l'eau.*

*Le beau Poulain, yssu de bonne race,  
Brusque & gaillard, laissant deffus la face  
Et sur le col pendre ses longs cheueux,  
En desnouant ses jarrets bien nerueux,  
Court de luy-mesme, & brusque en sa furie  
Fait mille bonds le long d'une prairie,  
Se façonnant pour deuenir guerrier,  
Et d'un grand cœur s'eslancer le premier  
Sur l'ennemy, portant entre les armes  
La barde aux flancs, & au dos l'homme d'armes :  
Rendant son maistre & soy-mesmes appris,  
Pour du Laurier ensemble auoir le pris.*

*A l'homme seul il faut plus d'artifice,  
D'autant que l'art à l'honneur est propice.  
Tous animaux, soit ceux qui vont noüant,  
Ceux qui pendus en l'air se vont ioüant,*

Ceux qui priuez, ceux qui sauvages vivent,  
Sans passion leur naturel ensuiuent.  
L'homme sans plus charpentier de ses maux,  
A sa nature adiousté des trauaux,  
L'honneur, le gain, l'ambition, l'enuie,  
Et luy-mesme est le tyran de sa vie.

Vous mon grand Duc, mon grand Montmorenci,  
Comme prudent ne viuez pas ainsi :  
Car eslongné des passions vulgaires,  
Vous n'adioustez aux humaines miseres  
Les maux forains, que les soins temporels  
Vont accouplant aux malheurs naturels.  
L'ambition, le gain & l'auarice,  
Et la vertu qui se farde du vice,  
Menace, peur, ny mesme la prison  
N'ont esbranlé vostre saine raison :  
Et c'est pourquoy, Seigneur, ie vous admire  
Plus du penser que de l'oser escrire.

Aussi, mon Duc, de sage pere yssu,  
Sage & vaillant auez esté conceu,  
Et de nature aimez les choses grandes,  
Cheuaux, soldats, aux champs mener les bandes,  
Dont les harnois au Soleil flamboyans  
Dardent les feux dedans l'air ondoyans.  
Vous auez pris de luy la preuoyance,  
Le iugement, le conseil, la prudence,  
Le meur aduis, la sagesse & l'honneur,  
Et qui plus est, la grace & le bon-heur :  
Puis vous auez la matiere assez ample  
Pour vous former au paternel exemple,  
Patron parfait, qui de luy-mesme fait  
Pour ses enfans vn exemple parfait.

Ainsi Chiron nourrit le ieune Achille,  
Nourrit lason : l'un renuersa la ville

*Du vieil Priam, & remplit d'hommes morts  
Xanthe escumant & sanglant iusqu'aux bords :  
L'autre premier autheur de la Gallée,  
De grands cueillers frappa l'onde salée,  
Fist estonner les Nymphes de la mer  
De voir ainsi des soliueaux ramer  
Desur les eaux aux hommes incognues,  
Et de verser tant d'escumes chenues.*

*Comme ces deux bien-appris & bien-nez,  
Vn rang d'honneur pres du Roy vous tenez,  
Grand gouuerneur de sa ville peuplée  
Qui sous vos loix est conduite & reglée.*

*C'est toy Paris admirable cité,  
Grand ornement de ce monde habité,  
De tes voisins la crainte & la merueille,  
A qui le Ciel n'a donné de pareille,  
Mere d'un peuple abundant & puissant,  
Heureux en biens, en lettres florissant.*

*Dedans le Ciel tu mets la teste fiere,  
Tu as le doz fendu d'une riuiera  
Au large cours, aux grands ports fructueux :  
Tu as le front superbe & somptueux,  
Qui des voyans estonne les courages :  
Ton ventre est plein de mestiers & d'ourages  
Qui acheuez ne trouuent iamaïs bout.*

*O grande en biens, en sçauoir & en tout,  
Ie te salue & celuy qui te guide,  
Laschant, serrant comme il te faut la bride.*

*Quand vn maçon, vn peintre, vn charpentier,  
Vn menuisier, vn orfèvre, vn potier  
Font vne erreur, pource la Republique  
Ne se perd pas, ny l'Estat Politique :  
Si vne veine ou vn muscle ne fait  
Office au corps, le corps n'est pas desfait.*

Mais quand le chef où la raison repose,  
Sans y penser faut en la moindre chose,  
Le peché marche, & la faute descend  
Sur tout le corps, qui tout soudain se sent  
Morne ou perclus, ou tombe en lethargie,  
Et tout d'un coup perd la force & la vie :  
Car par le chef le corps vit seulement,  
Et du cerueau le corps a mouuement.

le m'esbahis des paroles subtiles  
Du grand Platon, qui veut regir les villes  
Par un papier & non par action :  
C'est une belle & docte inuention,  
Qui toutesfois ne sçauroit satisfaire :  
Elle est oisive, il faut venir au faire :

Ainsi que vous qui sçavez contenter  
Par l'effect seul, & non par l'inuenter,  
Tenant Paris dessous vos loix prudentes  
Pleine d'humeurs & d'ames différentes,  
D'hommes diuers : l'un est fier, l'autre est doux,  
L'un est benin, l'autre plein de courroux,  
L'un qui veut tout, l'autre rien ne demande,  
Et si à tous la seule loy commande.

Comme un Pilote à son tillac assis  
Voyant l'escueil, d'un sens froid & rassis  
Guide la nef parmi les vagues perses,  
Bien qu'elle soit de cent pieces diuerses,  
De voiles, masts, de cordages diuers,  
L'un va tout droit, l'autre va de trauers,  
Et toutesfois l'aduis d'un homme sage  
Par artifice est maistre de l'orage :

Tant par-sur tous on doit l'homme estimer  
Qui est prudent en terre & sur la mer,  
Dont le souci bien moderé tempere  
Sous luy le peuple, à la guise d'un pere,

Non d'un tyran de fureur allumé,  
 Craint de chacun & de personne aimé :  
 Car en tous lieux la douce courtoisie  
 Du peuple accort gaigne la fantaisie,  
 L'ame, le cœur, le courage & la main.

La cruauté engendre le desdain  
 Et le mespris, & l'ire qui bouillonne  
 D'une fureur fantastique & felonne.  
 Pource vn tyran ne vit iamais bien seur :  
 » Le vray bouclier d'un Prince est la douceur.

## DISCOVERS

à Monsieur de Foix.

Ton bon conseil, ta prudence & ta vie  
 Seront chantez du docte Outhenouie,  
 A qui la Muse a mis dedans la main  
 L'outil pour faire un vers Grec & Romain.  
 Il est bien vray que seul tu deurois prendre  
 Si beau travail : mais tu n'y peux entendre :  
 Et toutefois la Nature t'a fait  
 En ce mestier excellent & parfait :  
 Puis le labeur de ta charge publique  
 (Où ton esprit soigneusement s'applique)  
 Ne peut souffrir que tu penses à toy,  
 Du tout pensif aux honneurs de ton Roy.  
 Ainsi ta peine heureuse le demande,  
 Et mon deuoir qui est tien, me commande  
 De te louer, & d'un mal-plaisant son  
 Chanter ta gloire en si basse chanson.



Hà, que les Glix sont heureux qui sommeillent  
Six mois en l'an, & point ne se resueillent !  
Helas, de Foix, ie voudrois volontiers  
Avoir dormi trois bons ans tous entiers :

Le n'eusse veu, ô vengeance enragée !  
Par ses enfans la France saccagée :  
Le n'eusse veu le tort bien debatü  
Se desguiser du masque de vertu :  
Le n'eusse veu violer l'innocence,  
Et toute chose aller par impudence :  
Le n'eusse veu les hommes transportez  
De passion faillir des deux costez,  
Sans plus auoir la raison pour leur guide,  
Comme vn cheual qui gallope sans bride.  
Le n'eusse veu nos peuples estonnez  
De cœur, de sens, d'esprit abandonnez,  
Tous esperdus comme atteints de l'orage,  
Trembler de peur sans force ny courage.  
Le n'eusse veu les Ministres soufflez  
D'un nouueau vent & d'impudence enflez,  
Pleins de douceur & de mignoterie,  
Pousser le peuple en ardante furie,  
Plus mitouïns aujourd'huy que ne sont  
Nos Mendians fenestrez par le front.

Le ne di pas que maint & maint Ministre  
Ne soit sçauant, ne face honneur au titre  
Qui pour sa secte a doctement escrit,  
Car les premiers ont tousiours bon esprit :  
Leurs successeurs seront d'une autre sorte,  
De qui la voix & l'espaule peu forte  
S'abaissera deuant qu'il soit dix ans,  
Et ne seront ny prompts ny bien-disans,  
Tenant au peuple en chaire le langage  
Qu'aujourd'huy font nos Prestres de village :

« Car à la fin par vn commun malheur  
« Toujours le pire est maistre du meilleur.

Le Temps ailé en s'ensuyant ameine  
La corruptele à nostre race humaine :  
Et bien qu'au guet soyons de tous costez,  
Si sommes-nous maugré nous emportez  
Par le destin, qui toute chose tire :  
Ainsi qu'on voit la petite navire  
Au fil de l'eau se laisser entrainer,  
Si l'auiron on cesse de mener.

Je n'eusse veu nos terres desolées  
De laboureurs, ny nos citez volées,  
Nos bourgs deserts, las ! & si n'eusse veu  
Ny rauager ny flamboyer le feu  
Sur le sommet des maisons embrazées,  
Ny nos autels profanez de risées,  
Où nos ayeux en la bonne saison  
Souloyent à Dieu faire leur oraison.

Mais sommeillant sous la terre poudreuse  
Peusse dormi d'une mort bien-heureuse,  
Et en ma part ie n'eusse point senti  
Le mal venu d'un siecle peruersti.

De tels malheurs la nouvelle as bien sceüe  
Outre la mer, & present ie l'ay veüe :  
L'ay veu le mal, & en maudi mes yeux  
Tristes tesmoins de faits si vicieux.

Hà, quantes fois ay-ie desiré d'estre  
Dedans un bois un gros chesne champestre,  
Ou un rocher pendu desur la mer,  
Pour n'ouyr point ce vieil siecle nommer,  
Siecle de fer qui la vertu consomme :  
Le hayssant il me faschoit d'estre homme,  
Et maudissoy ma raison qui faisoit  
Que le malheur si vif me desplaisoit.

Or le malheur d'un si fascheux esclandre  
 S'est en tous lieux si loin laissé resandre,  
 Que toy qui fus en Ambassade absent,  
 As enduré autant comme present,  
 Ayant souffert dedans ceste isle Angloise  
 Beaucoup de mal pour la guerre Françoisse,  
 Rigueurs, prisons : aussi est-ce, de Foix,  
 Bien la raison qu'un parent de nos Rois  
 Comme tu es, coure mesme fortune,  
 Et qu'à la leur la tienne soit commune :  
 « Le plus souvent par un mesme mechef  
 « Les membres ont la peine qu'a le chef.

Je suis marri qu'un si cruel naufrage  
 Vienne s'espandre au milieu de nostre âge,  
 Lors qu'on voyoit de maint homme sçauant  
 Et le labeur & le nom en auant,  
 Et la ieunesse assez proprement née  
 Estre du tout aux lettres addonnée :  
 Bien que tousiours les Monarques sceptrez  
 Soyent soupçonneux des peuples si lettrez.

On dit bien vray que lors qu'un populaire  
 Est trop sçauant, que prompt il delibere  
 Vn fait hautain, pour du col secouër  
 Le ioug seruil qui trop le vient nouër,  
 Et pour le rompre il se bande & inuente  
 Mille moyens d'acheuer son attente.

Ce sont ceux-là qu'il faut craindre, & non ceux  
 Qui ont l'esprit grossier & paresseux,  
 Masse de plomb au Ciel non eleuée,  
 Et vrais chartiers à porter la couruée :  
 Toy bien ruzé aux affaires, sçais bien  
 Lisant ces vers, si ie di mal ou bien.

Or il est temps que ce propos ie change  
 Pour re-viser au blanc de ta louange,

*Dont ie m'estois en tirant separé,  
Plein de courroux qui m'auoit esgaré.*

*Toy le premier yssu de haute race,  
Abandonnant du vulgaire la trace,  
As embrassé, rempli d'autorité,  
La Loy qui rend à chacun equité,  
Fait Senateur de ceste Court suprême,  
Qui en sçauoir n'a pareil qu'elle mesme,  
Où tu luisois en vertu tout ainsi  
Qu'un beau Soleil de rayons esclarci,  
Quand balançant d'une main equitable  
Le droit douteux, iuge non corrompable,  
Faisois iustice, & sans egard d'aucun  
Rendois la loy droituriere à chacun.*

*Puis te haussant par merites honnestes,  
De Conseiller fus Maistre des requestes,  
Puis enuoyé en Ambassade, à fin  
Que ton esprit prompt & gaillard & fin  
Ne se rouïllast sans manier affaires  
Qui sont au peuple & aux Rois necessaires.*

*Tu ne seras si soudain arriué,  
Que ja ta place est au Conseil priué :  
Et si ma Muse en ta faueur augure  
Le ne sçay quoy de la chose future,  
Vn iour premier à l'entour de nos Rois  
Auras les Seaux, & garderas leurs lois,  
Quand l'Hospital despouillé de son voille  
Dedans le ciel luira comme vne estoile :  
Car ton esprit courtizan & subtil,  
Accort, prudent, & courtois & gentil,  
Est de ton heur la future trompete,  
Et moy i'en suis le present interprete.*

*Il ne faut point l'Oracle desdaigner  
Qu'Apollon veut par la Muse enseigner.*

Quand vne terre est de nature bonne,  
 Elle produit le froment qu'on luy donne  
 Pleine d'usage : aussi tu as produit  
 A double grain fertilement le fruit,  
 Dont tu auois enssemencé ton âge  
 Par les leçons d'Aristote le sage,  
 Et de Platon, qui te seruent de fort  
 Contre le heurt du Destin & du Sort.

Car en puisant de leur claire fontaine  
 Tant de sçauoir, tu en as l'ame pleine  
 Qui se desgorge, & monstre par effait  
 Aux yeux de tous la verité du fait.

Et c'est pourquoy nostre Royne qui prise  
 Les plus parfaits, d'une meure entreprise  
 T'a bien choisi pour te mettre en honneur  
 Et marier ta fortune au bon-heur.

« Toute vertu n'est que fable commune,  
 « S'elle n'est iointe à la bonne Fortune,  
 « Et la Fortune heureuse ne peut rien  
 « Si la vertu ne luy sert de soustien :  
 Biens que le Ciel en peu d'hommes assemble,  
 Et que tout seul tu possedes ensemble.

FIN

DV PREMIER BOCAGE ROYAL.







## SECONDE PARTIE

DV BOCAGE ROYAL.

---

### A TRESILLVSTRE

& tresuertueuse Princeſſe, la Royne  
Catherine de Medicis,  
mere du Roy.

*Royne, qui de vertus paſſes Artemiſie,  
Et Porcie & Lucrece, à qui la Poëſie  
Et l'outil immortal des bons Hiſtoriens  
Ont fait raur l'honneur des ſiecles anciens,  
Et femme ſurpaſſer les hommes de leur âge  
En puiſſance, en conſeil, en prudence, en courage,  
Monſtrant à leurs ſuiets de parole & de fait  
La vertu de leur ſexe inuincible & parfait.*

*Royne à qui noſtre Roy comme ſils obtempere,  
Deſſous qui le François ſ'entretient & tempere,*



*Qui fise au gouuernal par iugemens prudens  
Sçais reculer la nef des perils euidens  
Pour la conduire au port : car tant plus tu rencontres  
D'erreurs, d'opinions, de sectes & de monstres,  
(Que sage tu occis comme Hercule tua  
L'Hydre qui contre luy cent testes remua)  
Plus ta victoire est grande, & tant plus estofoées  
Tu verras tes vertus d'honneurs & de trofées :  
Attendant que ton fils fauorisé des Cieux  
Porte le sceptre en main que portoyent ses ayeux :  
(Lequel croist deffous toy comme une fleur nouvelle  
Croist pour le passetemps d'une ieune pucelle,  
Que soigneuse elle arrose & la cultiue, à fin  
Qu'une gentille fleur croisse d'un petit brin.)*

*Si à plus haut discours tu n'as presté l'oreille,  
Entens un peu mon conte & tu oirras merueille.*

*L'autre iour que i'estois (comme tousiours ie suis)  
Solitaire & pensif (car forcer ie ne puis  
Mon Saturne ennemi) si loin ie me promeine  
Que seul ie m'esgaray desur les bords de Seine,  
Vn peu deffous le Louure où les Bons-hommes sont  
Enclos estroitement de la riue & du mont.*

*Là comme hors de moy i'accusois la Fortune  
La mere des flateurs, la marastre importune  
Des hommes vertueux, en viuant condamnez  
A souffrir le malheur des Astres mal-tournez :  
Le blasmois Apollon, les Graces, & la Muse,  
Et le sage mestier qui ma folie amuse :  
Puis pensant d'une part combien i'ay fait d'escriis,  
Et voyant d'autre part vieillir mes cheueux gris  
Après trente & sept ans, sans que la destinée  
Se soit en ma faueur d'un seul poinct enclinée,  
Ie hayssois ma vie, & confessois aussi  
Que l'antique vertu n'habitoit plus ici.*

le pleurois du Bellay qui estoit de mon âge,  
De mon art, de mes mœurs, & de mon parentage,  
Lequel apres auoir d'une si docte vois  
Tant de fois rechanté les Princes & les Rois,  
Est mort pauvre chetif, sans nulle recompense,  
Sinon du fameux bruit que luy garde la France.

Et lors tout desdaigneux & tout rempli d'esnoy,  
Regardant vers le Ciel, ie disois à par-moy :  
Quand nous aurions sèrui quelque Roy de Scythie,  
Vn Roy Got ou Gelon, en la froide partie  
Où le large Danube est le plus englacé,  
Nostre gentil labeur seroit recompensé.

Ainsi versant de l'œil des fontaines ameres,  
Dedans mon cerueau creux ie peignois des Chimeres,  
Quand ie vy arriuer vn Deuin qui auoit  
La face de Rembure à l'heure qu'il viuoit :  
Son front estoit ridé, sa barbe mal-rongnée,  
Sa perruque à gros poil ny courte ny peignée,  
Ses ongles tous crasseux, lequel me regarda  
Des pieds iusqu'à la teste, & puis me demanda :

D'où es-tu, où vas-tu, d'où viens-tu à ceste heure?  
De quels parens es-tu? & où est ta demeure?

Le luy respons ainsi : Je suis de Vandomois,  
Je n'ay iamais sèrui autre maistre que Rois,  
L'ay long temps voyagé en ma tendre ieunesse,  
Desireux de louange, ennemi de paresse.

A la fin Apollon & ses Sœurs volontiers  
En l'autre Thesprien m'apprirent leurs metiers,  
A bien faire des vers, à bien pousser la lyre,  
A sçauoir fredonner, à sçauoir dessus dire  
Les louanges des Rois, & en mille façons  
A sçauoir marier les cordes aux chansons :  
Ils me firent dormir en leur grotte secrete,  
Me lauerent trois fois & me firent Poète,

M'enflamerent l'esprit de furieuse ardeur,  
Et m'emplirent le cœur d'audace & de grandeur.

Lors ie n'eü pour suiet les vulgaires personnes,  
Mais hardi ie me pris aux Rois porte-couronnes :  
(O docte Roy François, si tu eusses vescu,  
l'eusse par ta faueur mon noir destin veincu !)  
Ie celebray Henry & ses œuvres guerrieres,  
Voire en tant de façons & en tant de manieres,  
Que les plus nobles Preux qui viuent aujourd'huy  
Par l'encre, ne sont pas tant celebrez que luy :  
Que me vaudroit ici ses louanges redire,  
Puis qu'en mille papiers un chacun les peut lire ?

Après ie celebray en mille chants diuers  
La Royne son espouse, honneur de l'Vniuers,  
Et fis de tous costez aux nations estranges  
Par le vol de ma plume espandre ses louanges.  
Ie chantay la grandeur de ses nobles ayeux,  
Et de terre eleuez ie les mis dans les cieux :  
Ie chantay les eaux d'Arne, & Florence sa fille,  
Comme le beau Phebus nomma la Tusque ville  
Du nom de la pucelle, après auoir esté  
Ardemment ravi des rais de sa beauté,  
Et comme Arne predict du milieu de son onde  
Que Royne elle seroit la plus grande du monde,  
Et que le nom de femme autrefois à mespris,  
Par elle emporteroit sur les hommes le pris.

Mais ainsi que Vesper la Cyprienne estoile  
De plus larges esclairs illumine le voile  
De la nuit tenebreuse, & sur tous les flambeaux  
Dont le Ciel est ardent, les siens sont les plus beaux :  
Ainsi & la vertu, la grace & le merite  
De la sainte & diuine & chaste Marguerite,  
Fille du Roy François & la sœur de Henry,  
Et du Duc d'Orleans qui ieune m'a nourri,

*Me semblerent aux yeux sur les autres reluire.*

*Pource ie la choisi le suiet de ma lyre,  
Laquelle ayant l'esprit de son pere, eut à gré  
Le labeur que i'auois à ses pieds consacré :  
Et comme vertueuse & d'honneur toute pleine,  
S'opposant à mon mal, charitable mist peine  
D'auancer ma fortune, & fille & sœur d'un Roy  
Daigna bien, ô bonté ! se souuenir de moy :  
Mais en perdant, hélas ! sa clairté coustumiere,  
Comme aueugle ie suis demeuré sans lumiere.*

*Toufiours en sa faueur, soit Hyuer, soit au temps  
De la chaude moisson, puisse naistre un Printemps  
Sur les monts de Sauoye, & quelque part qu'elle aille,  
Toufiours deffous ses pieds un pré de fleurs s'esmaille.  
Dedans sa bouche naisse une manne de miel,  
Et luy soit pour iamais fauorable le Ciel.*

*Fleur & perle de pris Marguerite parfaite,  
Après que la bonté de nature t'eut faite,  
Assemblant pour t'orner une confection  
De ce qui est plus rare en la perfection,  
Elle en rompit le moule, à fin que sans pareille  
Tu fusses ici bas du monde la merueille.*

*Que te diray-ie plus ? après auoir usé  
Cordes & luth & fust, ie me suis abusé  
A chanter les Seigneurs : aussi ie n'en rapporte  
En lieu de son loyer qu'une esperance morte.  
» Si est-ce que les vers ont aux hommes mortels  
» ladis fait eriger & temples & autels.  
Cérés n'a pas esté Deesse renommée  
Pour auoir de son bled nostre terre semée,  
Ny Pallas pour auoir monstré l'art de filer,  
Escarder les toisons, ou l'huile distiler :  
Les liures seulement, de mortelles Princeffes  
(Et non pas leurs mestiers) les ont faites Déeses.*

*Les liures ont à Mars les armes fait porter,  
Le trident à Neptun, la foudre à Iupiter,  
Les ailes à Mercure, & leur belle memoire  
Sans les vers periroit au fond de l'onde noire.*

*L'autre iour que j'estois au temple à saint Denis,  
Regardant tant de Rois en leurs cachottes mis,  
Qui n'aguere, pouvoient trembler toute la France,  
Qui tous enflent d'orgueil, de pompe & d'esperance  
Menoient un camp armé, tuoient & commandoient,  
Et de leur peuple auoient les biens qu'ils demandoient,  
Et les voyant couchez, n'ayans plus que l'escorce,  
Comme buches de bois sans puissance ny force,  
« Je disois à par-moy : Ce n'est rien que des Rois :  
D'un nombre que voicy, à peine ou deux ou trois  
Viuent apres leur mort, pour n'auoir esté chiches  
Vers les bons escriuans & les auoir fait riches.*

*Puis me tournant, hélas ! vers le corps de Henry,  
Je disois, O mon Roy, qui viuant as chery  
Les Muses, qui sont sœurs des armes valeureuses,  
Ton ame puisse viure entre les bien-heureuses :  
Au haut de ton cercueil soient tousiours fleurissans,  
Les beaux œillets pourprez & les liz blanchissans,  
Et leur souauë odeur iusqu'au ciel à toy monte,  
Puis que de ton Ronfard tu as fait tant de conte !*

*Je porterois mon mal beaucoup plus aisément,  
Si en fraudant les bons, le sort incessamment  
N'auançoit les meschans : mais quand en mon courage  
Je voy tout aller mal, de dueil presque j'enrage.*

*Je me jasse de voir les hommes estrangers,  
Changeurs, postes, plaisans, usuriers, menfongers,  
Qui n'ont ny la vertu ny la science apprise,  
Posseder auioird'huy tous les biens de l'Eglise :  
De là sont procedez tant d'abus infinis,  
Et tu les vois, ô Dieu, & tu ne les punis !*

Et nous sacré troupeau des Muses, qui ne sommes  
 Usuriers, ny trompeurs, ny assassineurs d'hommes,  
 Qui portons Iesus Christ dans le cœur arresté,  
 Ne sommes avancez sinon de pauvreté :  
 Lambin, Daurat, Turneb, lumieres de nostre âge,  
 Doctes & bien-viuans en donnent tesmoignage.

Que vous estes trompez de vos intentions  
 O pauvres trespassez ! qui par deuotions  
 En fraudant vos parens fondastes de voz rentes  
 A nos riches Prelats les mitres opulentes :  
 Mieux eust vallu ietter vostre argent en la mer,  
 Que pour telle despense en vain le consumer !

Tels biens ne sont fondez pour estre recompense  
 De ceux qui en la guerre ont fait trop de despense,  
 Pour en pourvoir leurs fils : ou les donner à ceux  
 Qui sont aux Cours des Rois des pilliers paresseux.  
 Tels biens ne faut donner par faueur ny priere,  
 Ny à ceux qui plustost sont voler la poussiere  
 Sous les cheuaux de poste, & haletant bien fort  
 Apportent les premiers nouuelles de la mort :

Mais à ceux que lon iuge estre de bonne vie,  
 A ceux qui dès enfance ont la vertu suiuite,  
 Et à ceux qui pourront viuement empescher  
 De ramper l'heresie à force de prescher.  
 Vn nombre bien petit esloigné d'auarice  
 Accomplist aujourd'huy sainement son office,  
 Presche, prie, admoneste, & prompt à son deuoir  
 Auec la bonne vie a conioint le sçauoir.

le me deuls quand ie voy ces ignorantes bestes  
 Porter comme guenons les mitres sur leurs testes,  
 Qui par faueur ou race ou importunité  
 Sont montez, ô vergongne ! en telle dignité.

Bien que de Mahomet la loy soit vicieuse,  
 Si est-ce que du Turc la prudence soigneuse

Choisit entre les siens les plus gentils esprits,  
Et ceux qui ont sa loy plus dextrement appris,  
Et sage les commet comme graues Prophetes  
Pour contenir son peuple, & garder ses Musquetes.

Las ! les Princes d'Europe au contraire de luy  
Des Pasteurs ignorans commettent aujourd'huy  
Sur le sacré troupeau de la Chrestienne Eglise  
Que Iesus par son sang a remis en franchise.  
De là Dieu se courrouce, & delà sont issus  
Tant d'erreurs que l'abus a faussement conceus,  
Enfantez par enfans qui sans mœurs ny sciences  
Sont gardes de l'Eglise & de nos consciences.

Il faudroit les oster, & pour l'honneur de Dieu  
En mettre de meilleurs sans faueur en leur lieu :  
Car le bien de Iesus n'est pas vn heritage  
Qui vient de pere en fils & retourne en partage :  
Il est commun à tous, lequel on peut oster,  
Tantost diminuer & tantost adiouster  
Selon que le ministre en est digne & capable,  
De mœurs non corrompu, de vices non coupable.

Toy qui viens apres moy, qui voirras en meints lieux  
De mes escrits espars le titre ambitieux  
De Francus, Francion, & de la Franciade,  
Qu'égalier ie deuois à la Grecque Iliade :  
Ne m'appelle menteur, paresseux ny peureux,  
L'auois l'esprit gaillard & le cœur genereux  
Pour faire vn si grand œuvre en toute hardiesse,  
Mais au besoin les Rois m'ont failly de promesse :  
Ils ont tranché mon cours au milieu de mes vers :  
Au milieu des rochers, des forests, des deserts  
Ils ont fait arrester par faute d'equipage  
Francus qui leur donnoit Ilion en partage.

Pource i'ay resolu de m'en-aller d'icy  
Pour trainer autre-part ma plume & mon soucy



En estrange pays, servant un autre Prince :  
 « Souuent le malheur change en changeant de prouince.  
 Car que feray-ie icy sans aide & sans support ?  
 L'espoir qui me tenoit, se perdit par la mort  
 Du bon Prince Henry, lequel fut l'esperance  
 De mes vers, & de moy, & de toute la France.

Alors le bon vieillard qui m'arresta le pas,  
 Me mesura le front avecques un compas,  
 Me contempla des mains les lignes qui sont droites,  
 Celles qui sont en croix, celles qui sont estroites,  
 Celles d'autour le poulce, & celles des cinq mons,  
 Les angles malheureux, les angles qui sont bons :  
 Trois fois me fist cracher sur la sèche poussiere,  
 Trois fois esternuer, & trois fois en arriere  
 Me retourna les bras, trois fois les ramena,  
 Et trois fois tout autour d'un rond me promena :  
 Fist des poinçts contre terre, apres il les assemble  
 En meres tout d'un rang & en filles ensemble :  
 Il en fist un sommaire, & en roüant les yeux  
 Trois fois deuers la terre & trois fois vers les cieux,  
 Me dit à basse voix : Mon fils, la Poësie  
 Est un mal de cerueau qu'on nomme frenesie,  
 Ta teste en est malade, il te la faut guarir,  
 Autrement tu serois en danger de mourir.

Tu ressembles aux chiens qui mordent en la ruë  
 La pierre qu'un passant pour les fraper leur ruë :  
 Ainsi tu mors autruy comme fol insensé,  
 Et non toy pauvre sot qui t'es seul offensé.

En quel âge, ô bons Dieux ! ores penſes-tu estre ?  
 Penſes-tu que le ciel pour toy face renaistre  
 Encor le ſiecle d'or, où l'Innocence estoit  
 Sur le haut de la faux que Saturne portoit ?

Ce beau ſiecle est perdu, & noſtre âge enrouillée  
 (Qui des pauures humains la poitrine a ſouillée

*D'avarice & d'erreur) ne permet que le bien  
Aux hommes d'aujourd'huy vienne sans faire rien.*

*Pource avecques travail il faut que tu l'acquies,  
Non en faisant des vers qui ne seruent de guieres,  
Non à prier Phæbus qui est deuenu sourd :  
Mais il te faut prier les grands Dieux de la Court,  
Les suiure, les seruir, se trouuer à leur table,  
Discourir dauant eux vn conte delectable,  
Les courtizer, les voir, & les presser souuent :  
Autrement ton labeur ne seroit que du vent,  
Autrement ta science & ta lyre estimée  
(Pour n'vser d'un tel art) s'en iroit en fumée.*

*Le desastre malin qui tourmenté t'auoit,  
Se tourner deuers toy plus doux ne se deuoit  
Que lors que Catherine avecques sa prudence  
Par naturelle amour gouverneroit la France :  
Ce qui est arriué pour faire refflorir  
L'ancienne vertu qui s'en alloit perir.  
Sans elle & sans sa race en oubly fust Athenes,  
Et tant de noms fameux sacrez par tant de peines  
Platon, Socrate, Homere eussent esté occis  
D'une eternelle mort sans ceux de Medicis.*

*Ceste Royne d'honneur de telle race issuë,  
Ainçois que Calliope en son ventre a conceuë,  
Pour ne degenerer de ses premiers ayeux,  
Soigneuse a fait chercher les liures les plus vieux  
Hebreux Grecs & Latins, traduits & à traduire :  
Et par noble despenfe elle en a fait reluire  
Son chasteau de saint Maur, à fin que sans danger  
Le François fust veincueur du sçauoir estrange.*

*Si sa bonté non feinte, au plus beau du ciel née  
Ne change comme Royne en mieux ta destinée,  
Laisse l'ingrate France, & va chercher ailleurs  
(Si tu les peux trouuer) autres destins meilleurs.*

## A elle-mesme.

*Comme une belle & ieune fiancée  
De qui l'amour refueille la pensée,  
Souspire apres son amy nuit & iour,  
Et triste attend l'heure de son retour :*

*Si chaude ardeur de le voir la transporte,  
Qu'à la fenestre, au chemin, à la porte  
Cent fois le iour & cent va regardant :  
Mais en voyant que le temps ce- pendant  
De sa promesse a ia passé son heure,  
En s'enfermant dedans sa chambre pleure,  
Gemit, souspire & mord le liét en vain.*

*Puis discourant d'un iugement mal-sain  
Sur ce qui peut retarder la presence  
D'un ieune amant, à toute chose pense,  
Resue, discourt, & pleine d'amour fait  
Que son penser n'est iamais satisfait  
Par un douter, qui mal-ferme chancelle,  
Feignant tousiours quelque cause nouvelle.*

*De tel desir toute France qui pend  
De vos vertus, vostre presence attend,  
Et le retour de nos deux ieunes Princes,  
Qui deffous vous cognoissent leurs Prouinces.*

*Mais quand on dit que Phebus aux grands yeux  
Aura couru tous les Signes des cieux,  
Et que la Lune à la coche attellée  
De noirs cheuaux, sera renouuellée  
Par douze fois sans retourner icy,  
Paris lamente & languit en soucy,*

*Et ne sçauroit, quoy qu'il pense ou regarde,  
Songer le poinct qui si loin vous retarde.*

*Seroit-ce point le Rhosne impetueux ?*

*Le cours de Seine aux grands ports fructueux*

*Est plus plaisant. Seroit-ce point Marseille ?*

*Non, car Paris est ville sans pareille :*

*Bien que Marseille en ses tiltres plus vieux*

*Vante bien-haut ses Phocenses ayeux,*

*Qui d'Apollon fuyans l'oracle & l'ire,*

*A son riuage ancrerent leur nauire.*

*L'air plus serein des peuples estrangers*

*Et le doux vent parfumé d'Orangers*

*De leur douceur vous ont-ils point rauie ?*

*La peste hélas ! vous a tousiours suiui.*

*De Languedoc les palles Oliuiers*

*Sont-ils plus beaux que les arbres fruitiers*

*De vostre Aniou ? ou les fruits que Toureine*

*Plantez de rang en ses iardins ameine ?*

*Je croy que non. Y vit-on mieux d'accord ?*

*Mars en tous lieux de vostre grace est mort.*

*Qui vous tient doncq' si loin de nous, Madame ?*

*C'est le desir de consumer la flame*

*Qui peut rester des ciuiles fureurs,*

*Et nettoyer nos prouinces d'erreurs.*

*Vostre vouloir soit fait à la bonne heure :*

*Mais retournez en la saison meilleure,*

*Et faites voir au retour du Printemps*

*De vostre front tous vos peuples contents.*

*Vostre Monceaux tout gaillard vous appelle,*

*Sainct-Maur pour vous fait sa riue plus belle,*

*Et Chenonceau rend pour vous diaprez*

*De mille fleurs son riuage & ses prez :*

*La Tuillerie au bastiment superbe*

*Pour vous fait croistre & son bois & son herbe,*

*Et desormais ne desire sinon  
Que d'enrichir son front de vostre nom.  
Et toutefois par promesse asseurée  
Ils ont ensemble alliance iurée  
De leur vestir de noir habit de dueil  
Iusques au iour que les raiz de vostre œil  
Leur donneront vne couleur plus neuue,  
Changeant en verd leur vieille robe veuue,  
Et que iamais ils ne seront ioyeux,  
Beaux ny gaillards qu'au retour de vos yeux.*

*Si vous venez, vous verrez vos allées  
Dessous vos pas d'herbes renouuellées,  
Et vos iardins plus verds & plus plaisans  
Se raieunir en la fleur de leurs ans :*

*Ou bien, Madame, ils deuiendront steriles,  
Sans fleurs, sans fruit, mal-plaisans, inutiles,  
Et peu vaudra de les bien disposer,  
Les bien planter, & bien les arroser :  
Le iardinier ne pourra faire croistre  
Herbe ne fleur sans voir l'œil de leur maistre.*

*Desia le temps & la froide saison  
Qui vostre chef a fait demy-grison,  
Et les soucis vous commandent de faire  
Honneste chere, & doucement vous plaire.*

*Assez & trop ce Royaume puissant  
A veu son Sceptre en son sang rougissant :  
A veu la mort de trois Rois en peu d'heure,  
Et d'un grand Duc que toute Europe pleure :  
Assez a veu l'audace du harnois  
Vous resister, & corrompre vos lois,  
Et vos citez l'une à l'autre combattre.*

*Or maintenant il est temps de s'esbatre,  
Et de ietter dedans l'air bien-auant  
Tous vos ennuis sur les ailes du vent.*

Qui désormais vous ayant pour maistresse,  
Craindra du Rhin l'effroyable ieunesse,  
Les Espagnols aux guerres animez,  
Ou les Anglois hors du monde enfermez?

Vostre grand nom que la grand' Renommée  
Seme par tout, est plus fort qu'une armée:  
Car sans combattre, avecque la vertu  
Vous avez tout doucement combatu.

Si m'en croyez, vous passerez le reste  
De vos longs iours sans que rien vous moleste.  
Il est bien vray que presidant au lieu  
Que vous tenez deffous la main de Dieu,  
Ne sçauriez estre un quart d'heure sans peine:  
Mais de plaisir il faut qu'elle soit pleine,  
Entre-meslant le doux avec l'amer,  
Et ne laisser vostre esprit consumer  
Sous telle charge aucunement amere,  
Si le plaisir le soucy ne tempere.

Quand voirrons nous quelque tournoy nouveau?  
Quand voirrons nous par tout Fontaine-bleau  
De chambre en chambre aller les mascarades?  
Quand oirrons nous au matin les aubades  
De diuers luths mariez à la vois,  
Et les cornets, les fifres, les haut-bois,  
Les tabourins, les flutes, espinettes  
Sonner ensemble avecque les trompettes?  
Quand voirrons nous comme balles voler  
Par artifice un grand feu dedans l'air?

Quand voirrons nous sur le haut d'une scene  
Quelque lanin ayant la iouë pleine  
Ou de farine ou d'ancre, qui dira  
Quelque bon mot qui vous resjouyra?

Quand voirrons nous une autre Polyneffe  
Tromper Dalinde, & une ieune presse

*De tous costez sur les tapis tendus  
Honnestement aux gironz espandus  
De leur Maistresse, & de douces paroles  
Flechir leurs cœurs & les rendre plus molles,  
Pour saintement vn iour les espouser,  
Et chastement pres d'elles repouser ?*

*C'est en ce point, Madame, qu'il faut viure,  
Laisant l'ennuy à qui le voudra suiure.*

*De vostre grace vn chacun vit en paix:  
Pour le Laurier l'Oliuier est espais  
Par toute France, & d'une estroitte corde  
Auez ferré les deux mains de Discorde.*

*Morts sont ces mots Papaux & Huguenots,  
Le Prestre vit en tranquille repos,  
Le vieil soldat se tient à son mesnage,  
L'artizan chante en faisant son ouurage,  
Les marchez sont frequentez des marchans,  
Les laboureurs sans peur sement les champs,  
Le pasteur saute aupres d'une fontaine,  
Le marinier par la mer se promeine  
Sans craindre rien: car par terre & par mer  
Vous auez peu toute chose calmer.*

*En trauaillant chacun fait sa iournée:  
Puis quand au Ciel la Lune est retournée,  
Le Laboureur deliuré de tout soing  
Se sied à table, & prend la tasse au poing,  
Il vous inuoque, & remply d'alegresse  
Vous sacrifie ainsi qu'à sa Déesse,  
Verse du vin sur la place: & aux cieux  
Dressant les mains & souleuant les yeux,  
Supplie à Dieu qu'en santé tresparsfaite  
Viuiiez cent ans en la paix qu'auuez faite.*



## ELEGIE.

*Je suis certain que vostre bon esprit  
Dira soudain qu'il verra cest escrit,  
Que ie ressemble au marinier qui donne  
Repos au Ciel quand la marine est bonne,  
Et de ses vœux ne va point tourmenter  
Neptune en l'eau, ny au Ciel Iupiter,  
Lors que le vent em-poupe son nauire,  
Faisant chemin où son cœur le desire.*

*Mais quand l'orage en la mer le surprend,  
Et quand sa mort dessus la vague pend,  
Palle & tremblant fait cent mille prieres  
Pour eschapper, aux Nymphes marinières :  
Si qu'en si dure & fascheuse saison  
Toute sa bouche est pleine d'oraison,  
Croize ses bras, & en telle fortune  
Promet en vœux de grands dons à Neptune :*

*Puis s'il se voit eschappé du danger,  
S'enfuit gaillard, sans coupable songer  
Comme il doit rendre aux Dieux sur le riuage,  
Ses vœux iurez au milieu de l'orage.*

*De telle erreur vous pourrez m'accuser,  
Je le confesse, & ne puis m'excuser :  
Je sens ma faute, & sçay bien qu'elle est grande  
Et pour cela pardon ie vous demande.*

*Quand ie suis aise à mon repos icy,  
Sans passion, affaires ou Joucy,  
Enflé de bruit & braue d'esperance,  
Je ne vous fais ny court ny reuerence,*

*Je ne vous cherche, & d'un desir espoit  
De vos honneurs, ie ne demande point  
Si ma Muse est suffisante & propice  
Comme elle doit, à vous faire seruice :  
Je ne vais point troubler vostre repos,  
Rompre vostre aise, ou trancher vos propos :  
Car sans mentir ie ferois conscience  
D'abuser trop de vostre patience.*

*Et si ie faux, comme certe ie faux,  
Du seul deuoir procedent mes defaux,  
Et du respect trop grand que ie vous porte,  
En vous craignant & honorant de sorte  
Que ie ne puis de vos yeux approcher,  
Tant ie les aime & crains de les facher.*

*Non que ie sois de nature grossiere :  
J'ay l'esprit vif, l'ame prompte & legiere :  
Tant seulement la crainte d'ennuyer  
Me vient les pieds & la langue lier.*

*Mais quand fortune icy m'est aduersaire,  
Quand ie ne puis despescher mon affaire,  
Quand quelque ennuy me desrobe l'espoir,  
Quand on ne veut ma Muse recevoir,  
Quand vn fascheux Chrysophile rechine  
A ma priere, ou me tourne l'eschine,  
Ou parle à moy par fraude & par courroux,  
Pour mon support ie me retire à vous,  
Je vous caresse & courtize & supplie,  
Et par escrit, Déesse, ie vous prie  
Comme mon tout, & ne suis abusé :  
Aussi de vous ie ne suis refusé,  
Tant vous auez l'ame gentille & pure  
Qui les vertus aime de sa nature,  
Et qui ne souffre, en despit du malheur,  
Qu'un vertueux soit veincu de douleur.*

*C'est la raison pourquoy ie ne confesse  
Que des vertus la belle troupe espesse  
Soit retournée (ainsi qu'on dit) aux cieux,  
Abandonnant ce monde vicieux.*

*Car vous voyant, De Beaune, en terre suiure  
Toutes vertus, on les peut dire viure  
Toutes en vous, & en vous elles sont  
Apparoissant toutes sur vostre front :  
Si que celuy qui de pres y prend garde,  
Vous regardant, en vous il les regarde.  
En ceste Court la plus-part sont menteurs,  
Trompeurs, causeurs, mesdisans, affronteurs :  
Vous presque seule y estes veritable,  
Phenix d'honneur qui n'a point de semblable.*

## DISCOVRS.

*Ou soit que les marests de l'Egypte feconde  
Soient peres limonneux des hommes de ce monde,  
Soit qu'ils soient engendrez des vieux chesnes plantez,  
Ou soit que des rochers ils naissent enfantez :  
Si est-ce, mon Sanzay, que sans faueur de race  
Les hommes sont yssus d'une pareille masse :  
Ils eurent sang pareil & pareil mouuement,  
Et furent tous egaux dès le commencement :  
Sans point se soucier d'honneur ny de noblesse  
Estoient sans nul mestier, sans art & sans adresse,  
Et viuoient par les bois comme peu courageux,  
Des glans tombez menu des chesnes ombrageux.  
Si tost que les vertus les hommes esueillerent,  
Espoinçonnez d'honneur à l'enuy trauaillerent :*

L'un creusa les sapins, & se donnant au vent  
 Alla trop conuoiteux d'Occident au Levant :  
 L'autre pour agrandir les bornes de sa terre,  
 Fist des picques de fresne, & courut à la guerre :  
 Ils bastirent citez, ils choisirent des Rois,  
 Ils dressèrent des camps, & chargez de harnois,  
 Les armes en la main, au combat se poufferent,  
 Et les grandes Citez à terre renuerserent.

Lors l'honneur qui voloit dessus les camps armez,  
 Les rendoit viuement aux armes animez,  
 De sorte que chacun auoit plus grande enuie  
 De la mort, que sauuer honteusement sa vie :  
 Et plusloft desiroit à la guerre mourir,  
 Que viure en sa maison sans loüange acquerir.  
 « Nostre vie mondaine est caduque & mortelle,  
 « Et la belle loüange est tousiours eternelle.

Celuy qui desiroit de monstrier sa vertu,  
 Portoit sur le harnois dont il estoit vestu,  
 Ou dessus son bouclier, vne recognoissance,  
 Afin que par la presse on cognust sa vaillance.

L'un auoit vn Serpent, l'autre auoit vn Lyon,  
 Vn Aigle, vn Leopard : ainsi vn million  
 Par les siecles passez d'Enseignes sont venues,  
 Que les races depuis pour signe ont retenues,  
 Escussions & Blasons de leurs premiers ayeux,  
 Que la guerre en-noblit par faits victorieux :  
 Aussi pour inciter leurs races à bien faire,  
 A pouffer leur vertu outre le populaire,  
 Et à contregarder par noblesse de cœur  
 L'honneur que leurs parens ont acquis par labeur.

Mais tout ainsi qu'on voit la Fortune mondaine  
 Aller en decadance & n'estre point certaine :  
 Aussi ne voit-on pas en chacune saison  
 Tousiours en mesme estat vne mesme maison,

*Ains souvent elle change & d'armes & de race :  
« Car toute chose humaine en ce bas monde passe.*

*La tienne, mon Sanzay, sans avoir rien mué,  
A toujours son honneur en mieux continué,  
Comme le vis surgeon d'une race eternelle  
Qui sans l'aide d'autrui re-uit toujours en elle :  
Tige du noble sang des Comtes de Poitiers,  
Dont tes predecesseurs furent vrais heritiers :  
Qui aux siecles passez, en prenant alliance  
Es plus riches maisons du Royaume de France,  
Ont iusques aujourd'huy avecq' autorité  
Maintenu leur noblesse & leur antiquité.*

*Or toy qui leurs vertus & leur gloire possedes,  
Et qui de droite ligne à leurs armes succedes,  
Tu n'as voulu souffrir que leur nom en-nobly  
De tant de beaux honneurs fust pressé de l'oubly :  
Mais tirant du tombeau leurs armes & leur gloire,  
Tu as dedans vn liure ordonné leur histoire,  
Portrait leurs Escussions & leurs Blasons, afin  
Que ta noble maison ne prenne iamais fin,  
Et que maugré les ans ta Ligne florissante  
Croisse de fils en fils à iamais renaiissante.*

*Toujours puisse ta race augmenter en honneur,  
Et toujours ta maison soit pleine de bon-heur,  
Illustre de vertus, & toujours puisse viure  
Auecques vn Sanzay vn Ronsard dans ce liure.*

## DISCOVERS A CECILLE

Sicilien.

*Docte Cécille, à qui la Pieride  
A fait goustier de l'onde Aganippide,*

*A descouvert les antres Cirrheans,  
A fait danser sur les bords Pimpleans,  
A mené voir baigner en la fontaine  
Sur Helicon, ceste belle Neufuaine  
Que Iupiter en Memoire conceut,  
Et pour sa race en son Ciel la receut :  
le te confesse heureux en mille sortes,  
Non pour le nom si fameux que tu portes  
Venant de l'Isle, où le Gean Typhé  
Presque de souffre & de foudre estouffé  
(Gean rebelle à souffrir indocile)  
En se tournant esbranle la Sicile,  
Estant lassé de porter d'un costé  
Le souspiral de Vulcan indonté :*

*Non pour autant que le grand fleuve Alphée,  
Ayant d'amour la poitrine eschauffée,  
Reuoit s'amie à cachettes, laissant  
Son bord sacré d'Oliuiers pallissant,  
Et sous la mer sans y mesler son onde  
Coule leger d'une voye profonde,  
Ne se laissant à Neptune enfermer,  
Afin que pur des vagues de la mer  
Vienne embrasser son Arethuse chere,  
Ses Oliuiers luy donnant pour doüaire  
Et son sablon des Athletes cognu,  
Estant de fleuve un plongeon deuenü :*

*Non pour-autant que la Muse Latine,  
La Muse Greque ont mis en ta poitrine  
le ne sçay quoy de grand & de parfait,  
Qui passe en France, & reuerer te fait  
De ces esprits à qui rien ne peut plaire  
S'il n'est du tout eslongné du vulgaire :*

*Non pour-autant que courtois & humain  
Aux estrangers tu ne caches ta main,*

*Mais doucement les traites & caresses,  
Les bien-veignant d'honneurs & de richesses :*

*Mais pourautant que tu vois de plus pres  
Que nous le port & les yeux & les traicts  
De la splendeur de ton Prince, qui passe  
L'Honneur d'honneur, & les Graces de grace.*

*Cecille, on dit qu'apres que les Geans  
Furent bruslez, l'un sur l'autre cheans  
Aux champs de Phlegre, & que l'ardente foudre  
Leur triple eschelle eut brisé comme poudre,  
Foudre que l'Aigle en son bec apportoit :  
Que Iupiter pompeusement estoit  
Hautain, d'auoir deschargé sa vengeance  
Sur si meschante & malheureuse engeance.*

*Et toutefois comme vn veinqueur, douteux  
Qu'il ne restast quelque racine d'eux,  
Qui de nouveau troubleroit sa victoire :  
Pour effacer la race & la memoire  
De telle gent, du haut Ciel deualla,  
Et bras à bras nostre Terre accolla,  
La remplissant de sa semence heureuse,  
Semence forte, ardente & vigoureuse,  
Digne d'un Dieu, que la Terre receut,  
Dont tout soudain les Rois elle conceut,  
Portraits sacrez de la haute iustice,  
Pour chastier les Geans, & leur vice  
S'il en restoit : puis ce Dieu desiroit  
De se mirer aux enfans qu'il auroit,  
Et par les Rois cognoistre sa puissance :  
« Car du grand DIEU les Rois sont la semblance.*

*Quand la douleur d'enfanter la pressa,  
A corps preignant estendre se laissa  
Sous vn grand Palme : & comme en sa gesine  
Trois fois appelle à son secours Lucine,*



Elle inuoca Iupiter, qui des Cieux  
Lettoit sur elle & son cœur & ses yeux :  
Puis au milieu d'une longue tranchée,  
En s'efforçant des Rois est accouchée.

La Maïesté ses grandes mains auoit  
Sous les enfans, la Fortune seruoit  
De sage-femme, & la Vertu chenuë  
Estoit du Ciel pour commere venue.

Tous ces enfans ne se ressembloient pas :  
Les uns auoient petit corps petits bras  
Petites mains : les autres au contraire  
Auoient grands mains & grands bras, pour deffaire  
Sous eux le peuple, & sous eux faire armer  
D'hommes la terre, & de vaisseaux la mer.

L'un en naissant estoit vieillard & sage,  
L'autre n'auoit ny force ny courage,  
Un fait-neant, & l'autre genereux  
Estoit de gloire & d'honneur amoureux,  
Et presque enfant ne pensoit qu'à la guerre  
Et d'abaisser sous luy toute la terre,  
Comme le nostre, à qui les Cieux amis  
Ont de grands dons dès naissance promis  
Pour ioindre un iour par fidele alliance  
Vostre Sicille avecques nostre France.

Incontinent que Iupiter les vit,  
L'ardante amour son courage rait,  
Et bouillonnant en son cœur de grand' aise,  
Impatient les accolle & les baise  
L'un apres l'autre, & d'eux pere commun  
Bailla sa foudre en presens à chacun,  
Disant ainsi : Ma race, ie vous donne  
(Outre l'honneur, le Sceptre & la Couronne  
Que vous tiendrez dessous mon bras puissant)  
Comme à mes fils le foudre punissant :

Non pour blesser ou pour tuer la race  
De l'innocente & simple populace,  
Mais pour punir les Geans serpens-piez  
Si par audace ensemble r'alliez  
Me guerroyoient, ou si gros d'arrogance  
Ils conspiroient contre vostre puissance :  
Lors n'espargnez la foudre & la ruez,  
Et comme moy saccagez & tuez  
D'un feu souffré la race Titanine :  
Renuersez moy Briare sous Arine,  
Et derechef sous Etne renfermez  
Typhé couuert de charbons allumez,  
Et rembarrez Porphyre en Tenarie.

Quand vous voirrez que leur sottie furie  
Sera dontée & serue deffous vous,  
A mon exemple arrestez le courroux,  
Et n'exercez d'une rigueur felonnie  
Toute vengeance ainsi qu'une Lyonne,  
Ou comme un Tygre aux grands ongles tranchans,  
Qui d'Hyrkanie erre parmy les champs :  
Croyez, enfans, que chose tant n'approche  
De ma bonté, que de sauuer son proche,  
Et pardonner à beaucoup qui auront  
Sans y penser trop haut dressé le front.

Si ie voulois toutes les fois qu'en terre  
L'homme m'offense, eslancer mon tonnerre,  
Estant tousiours de courroux animé,  
En peu de temps ie serois defarmé.

Mais pour donner aux peuples une crainte,  
Souuent d'Athos ou la cyme est atteinte  
Ou du Ceraune, ou ie fais trebucher  
Deffous mon bras la teste d'un rocher,  
Ou ie renuerse une tour qui menace  
Mon Ciel moqué de sa voisine audace,

*Ou les forests dont les arbres d'autour  
Sont si espais qu'ils desrobent le iour.*

*Ce sont les buts, sur qui pere ie vise  
Les traits armez de ma cholere esprise,  
Ne respandant à tous coups de ma main  
Mes dards de feu dessus le genre humain.*

*Et c'est à fin que le peuple qui tremble  
De voir morceaux dessus morceaux ensemble  
D'un grand rocher par les champs renuersé,  
Sache que Dieu est là haut courroucé,  
Qu'il regne au Ciel, & qu'il darde la foudre  
Et qu'en son lieu les rochers sont en poudre.*

*Et lors prenant exemple à ma pitié  
S'entre-aimeront vivant en amitié,  
Adoucissant l'ardeur de leurs courages  
Sans se tuer comme bestes sauvages.*

*Disant ainsi il enuoya les Rois  
Ses chers enfans regner en tous endrois,  
Et sur leur chef espandant sa largesse,  
Aux vns donnoit une grande richesse,  
Aux autres moindre, ainsi qu'il luy plaisoit :  
Car à son gré son vouloir se faisoit.*

*Mais par sur tous sa faueur est monstree  
Dessus la France, Espagne & ta contree  
Qu'il couronna de gloire & de bon-heur,  
Et iusqu'au ciel en enuoya l'honneur,  
Sacré berceau de Cérés la tres-belle  
Qui nourrist tout de sa grasse mammelle.  
Tesmoins en sont Archimede, & celui  
Qui courtizan auoit un double estuy,  
L'un plein de vent & l'autre de finance,  
Et ce Pasteur qui fut dès son enfance  
En Arcadie, & sur Menale vit  
Pan qui fleutoit, dont le son le ravit.*

*Or comme on voit que les Rois en ce monde  
Après leur pere ont la place seconde,  
Haut-esleuez en grandeur & en pris :  
Des puissans Rois les hommes fauoris  
Par la vertu, ont la troisiésme place  
Haut-esleuez desur la populace.*

*Ainsi que toy Cecille, dont le nom  
N'est enfermé dessous vn bas renom,  
Mais en volant aux deux bouts de ton Isle  
A fait ta gloire abondante & fertile,  
T'a fait du peuple & des grands bien-aimé :  
Tant vaut l'honneur quand il est renommé.*

*Non seulement ta viue renommée  
N'est chichement de ta mer enfermée,  
Mais franchissant le rempart Sicilois  
S'est apparue au grand peuple Gaulois,  
Et fait cognoistre à mes Muses sacrées,  
Pour te porter en diuerses contrées,  
Et faire aller ton nom par l'univers :  
Car ta loüange est digne de mes vers.*

## A E. DE TROVSSILY

Conseiller du Roy en son grand Conseil.

*Troussily, tous les arts appris en la ieunesse  
Seruent à l'artizan iusques à la vieillesse,  
Et iamais le mestier en qui l'homme est expert,  
Abandonnant l'ouurier, par l'âge ne se pert.*

*Bien que le Philosophe ayt la teste chenue,  
Son esprit toutefois se pousse outre la nue :*

Plus le corps est pesant, l'esprit ardent & chaut,  
 Plus force la matiere, & s'en-vole là haut.  
 L'Orateur qui le peuple attire par l'oreille,  
 Celuy qui disputant la verité resueille,  
 Et le vieil Medecin plus il passe en avant,  
 Plus il a de pratique, & plus devient sçauant.

Mais ce bon-heur n'est propre à nostre Poësie,  
 Qui ne se voit iamais d'une fureur saisie  
 Qu'au temps de la ieunesse, & n'a point de vigueur  
 Si le sang ieune & chaud n'escume dans le cœur :  
 Sang qui en bouillonnant agite la pensée  
 Par diuerses fureurs brusquement eslançee,  
 Et pousse nostre esprit ore bas ore haut,  
 Selon que nostre sang est genereux & chaud,  
 Qui s'enfle dans nos cœurs, nous trouuant d'auanture  
 Au mestier d'Apollon preparez de nature.

Comme on voit en Septembre aux tonneaux Angevins  
 Bouillir en escumant la ieunesse des vins,  
 Qui chaude en son berceau à toute force gronde,  
 Et voudroit tout d'un coup sortir hors de sa bonde,  
 Ardente, impatiente, & n'a point de repos  
 De s'enfler, d'escumer, de iallir à gros flots,  
 Tant que le froid Hyuer luy ait donté sa force,  
 Rembarrant sa puissance és prisons d'une escorce :  
 Ainsi la Poësie en la ieune saison  
 Bouillonne dans nos cœurs, qui n'a soin de raison,  
 Serue de l'appetit, & brusquement anime  
 D'un Poëte gaillard la fureur magnanime :  
 Il devient amoureux, il suit les grands Seigneurs,  
 Il aime les faueurs, il cherche les honneurs,  
 Et plein de passions, en l'esprit ne repose  
 Que de nuit & de iour ardent il ne compose :  
 Soupçonneux, furieux, superbe & desdaigneux,  
 Et de luy seulement curieux & songneux,

*Se feignant quelque Dieu : tant la rage felonne  
De son ieune desir son courage aiguillonne.*

*Mais quand trente cinq ans ou quarante ont perdu  
Le sang chaud qui estoit és veines respandu,  
Et que les cheueux blancs de peu à peu s'auancent,  
Et que nos genous froids à tremblotter commencent,  
Et que le front se ride en diuerses façons :  
Lors la Muse s'enfuit & nos belles chansons,  
Pegase se tarist, & n'y a plus de trasse  
Qui nous puisse conduire au sommet de Parnasse,  
Nos Lauriers sont sechez, & le train de nos vers  
Se presente à nos yeux boiteux & de trauers :  
Tousiours quelque mal-heur en marchant les retarde,  
Et comme par despit la Muse les regarde.  
Car l'ame leur defect, la force & la grandeur  
Que produisoit le sang en sa premiere ardeur.*

*Et pource si quelqu'un desire estre Poète,  
Il faut que sans vieillir estre ieune il souhète,  
Prompt, gaillard, amoureux : car depuis que le temps  
Aura dessus sa teste amassé quarante ans,  
Ainsi qu'un Rossignol tiendra la bouche close,  
Qui pres de ses petits sans chanter se repose.*

*Au Rossignol muet tout semblable ie suis,  
Qui maintenant un vers desgoiser ie ne puis,  
Et falloit que des Rois la courtoise largesse  
(Alors que tout mon sang bouillonna de ieunesse)  
Par un riche bien-faict inuitast mes escrits  
Sans me laisser vieillir sans honneur & sans pris :  
Mais Dieu ne l'a voulu, ne la dure Fortune  
Qui les poltrons esleue, & les bons importune.*

*Entre tous les François i'ay seul le plus escrit,  
Et la Muse iamais en un cœur ne se prit  
Si ardent que le mien pour celebrer les gestes  
De nos Rois, que i'ay mis au nombre des Celestes.*

*Pur mon noble trauail ils sont deuenus Dieux,  
 l'ay remply de leurs noms les terres & les cieux:  
 Et si de mes labeurs qui honorent la France,  
 le ne remporte rien qu'un rien pour recompense.*

## DISCOVRS DV VERRE.

*Ceux que les Sœurs aimeront plus que moy,  
 Comme vn d'Aurat, d'un vers digne de toy  
 Feront sçauoir aux nations lointaines  
 De tes vertus les loüanges hautaines:  
 Quant est de moy, ie n'oseroy, Brinon,  
 Sur mon espaule esleuer ton renom  
 Pour engarder que la mort ne l'enterre:  
 Il me suffist si l'honneur d'un seul verre  
 Lequel tu m'as pour estreines donné,  
 Est dignement en mes vers blasonné.*

*O gentil verre, oseroy-ie bien dire  
 Combien ie t'aime, & combien ie t'admire?  
 Tu es heureux, & plus heureux celuy  
 Qui t'inuenta pour noyer nostre ennuy!  
 Ceux qui iadis les Canons inuenterent,  
 Et qui d'enfer le fer nous apporterent,  
 Meritoient bien que là bas Rhadamant  
 Les tourmentaist d'un iuste chastiment:  
 Mais l'inuenteur, qui d'un esprit agile  
 Te façonna, fust-ce le grand Virgile,  
 Ou les Nochers qui firent sans landiers  
 Cuire leur rost sur les bords marinièrs,  
 Meritoient bien de bailler en la place  
 De Ganymede à Iupiter la tasse,*



*Et que leur verre aussi transparent qu'eau  
Se fist au ciel vn bel Astre nouveau.*

*Non, ce n'est moy qui blasme Promethée  
D'auoir la flame à Iupiter ostée:*

*Il fist tres bien: sans le larcin du feu,*

*Verre gentil, iamais on ne t'eust veu,*

*Et seulement par les bois les Fougères*

*Eussent seruy à nos vieilles Sorcieres.*

*Aussi vrayment c'estoit bien la raison*

*Qu'un feu venant de si bonne maison*

*Comme est le ciel, fust la cause premiere,*

*Verre gentil, de te mettre en lumiere,*

*Toy retenant comme celestiel*

*Le rond, le creux, & la couleur du ciel:*

*Toy, dy-ie toy, le ioyau delectable*

*Qui sers les Dieux & les Rois à la table,*

*Qui aimes mieux en pieces t'en-aller*

*Qu'à ton Seigneur la poison receler:*

*Toy compagnon de Venus la ioyeuse,*

*Toy qui guaris la tristesse espineuse,*

*Toy de Bacchus & des Graces le soin,*

*Toy qui l'amy ne laisses au besoin,*

*Toy qui dans l'œil nous fais couler le somme,*

*Toy qui fais naistre à la teste de l'homme*

*Vn front cornu, toy qui nous changes, toy*

*Qui fais au soir d'un Crocheteur un Roy.*

*Aux cœurs chetifs tu remets l'esperance,*

*La verité tu mets en euidence,*

*Le laboureur songe par toy de nuict*

*Que de ses champs de fin or est le fruiet:*

*Et le pescheur qui ne dort qu'à grand' peine,*

*Songe par toy que sa nacelle est pleine*

*De poissons d'or, & le dur Bucheron*

*Ses fagots d'or, son plant le vigneron.*

Mais contemplons de combien tu surpasses,  
Verre gentil, ces monstrueuses tasses,  
Et fust-ce celle horrible masse d'or  
Que le vieillard Gerinean Nestor  
Boiuoit d'un trait, & que nul de la bande  
N'eust sceu leuer, tant sa panse estoit grande.

Premierement deuant que les tirer  
Hors de leur mine, il faut plus deschirer  
L'antique mere, & cent fois en vne heure  
Craindre le heurt d'une voute mal-seure :  
Puis quand cest or par fonte & par marteaux  
Laborieux, s'arrondist en vaisseaux,  
Tout cizelé des fables poëtiques,  
Et buriné de medailles antiques,  
O Seigneur Dieu ! quel plaisir ou quel fruiet  
Peut-il donner ? sinon faire de nuit  
Couper la gorge à ceux qui le possèdent,  
Ou d'irriter quand les peres decedent,  
Les heritiers à cent mille procez,  
Ou bien à table, apres dix mille excez,  
Lors que le vin sans raison nous delaisse,  
Faire casser par sa grosseur espaisse  
Le chef de ceux qui n'aguères amis,  
Entre les pots deuient ennemis ?  
Comme iadis apres trop boire firent  
Les Lapithois, qui les monstres desfirent  
Demy-cheuaux : Mais toy verre ioly,  
Loin de tout meurtre, en te voyant poly,  
Net, beau, luisant, tu es plus agreable  
Qu'un vaisseau d'or, lourd fardeau de la table :  
Et si n'estois aux hommes si commun  
Comme tu es, par miracle un chacun  
T'estimeroit de plus grande value  
Qu'un diamant, ou qu'une perle estue.

*C'est un plaisir que de voir r'enfrongné  
Un grand Cyclope à l'œuvre embesongné,  
Qui te parfait de cendres de fougere,  
Et du seul vent de son haleine ouuriere.*

*Comme l'esprit enclos dans l'univers  
Engendre seul mille genres diuers,  
Et seul en tout mille especes diuerses,  
Au ciel, en terre, & dans les ondes perses :  
Ainsi le vent par qui tu es formé,  
De l'artizan en la bouche enfermé,  
Large, petit, creux ou grand, te façonne  
Selon l'esprit & le feu qu'il te donne.*

*Que diray plus ? par espreuue ie croy  
Que Bacchus fut iadis lauë dans toy,  
Lors que sa mere atteinte de la foudre,  
En auorta plein de sang & de poudre :  
Et que dès lors quelque reste de feu  
Te demeura : car quiconques a beu  
Un coup dans toy, tout le temps de sa vie  
Plus y re-boit, plus a de boire enuie,  
Et de Bacchus tousiours le feu cruel  
Ard son gozier d'un chaud continuel.*

*Ie te saluë heureux Verre propice  
Pour l'amitié, & pour le sacrifice :  
Quiconque soit l'heritier qui t'aura  
Quand ie mourray, de long temps ne verra  
Son vin ne gras ne poussé dans sa tonne :  
Et tous les ans il verra sur l'Autonne  
Bacchus luy rire, & plus que ses voisins  
Dans son pressouer gennera de raisins :  
Car tu es seul le meilleur heritage  
Qui puisse aux miens arriuer en partage.*

## AMOUR LOGE'.

A N. de Pougny.

*Amour auoit d'un art malicieux  
Surpris la foudre à Iupiter son pere :  
Luy qui pardon à sa faute n'espere,  
Pour eschapper abandonna les Cieux.*

*Dedans la main auoit un pistolet  
Bien esmorcé, la pierre bien assise :  
L'air luy fait voye, & le vent favorise  
A ce grand Dieu qui s'ensuyoit seulet.*

*De l'Orient iusques à l'Occident  
Un iour entier erra de place en place :  
La grande mer qui nostre terre embrasse,  
Sentit combien son brandon est ardent.*

*La froide humeur les poissons ne defend,  
Ny les forests les animaux sauvages :  
Bois & rochers, riuieres & riuages  
Sont enflamez d'un si petit enfant.*

*Il n'espargnoit ny ieune ny grison :  
Prompt à frapper, d'un coup en bleffa mille :  
De bourg en bourg il va, de ville en ville,  
Et peu seruoit aux hommes la raison.*

*Il estoit las d'errer & de tirer,  
Et plus au vent ses ailes il n'allonge,  
Quand sur le poinct que le Soleil se plonge,  
Chercha logis voulant se retirer.*

*Trois quatre fois à l'embrunir du iour  
Il fist sonner le marteau sur ma porte :  
Soudain du liét vers le bruit ie me porte,  
L'entr'ouure l'huis, lors ie cognus Amour.*

*Vne frayeur plus froide qu'un glaçon  
Saisit mes os, ie perdis contenance :  
Car dès long temps i'auois eu cognoissance,  
A mon malheur, de ce mauuais garçon.*

*N'est-ce pas toy qui fus long temps à moy,  
Quand tout ton sang bouillonna de ieunesse,  
Qui te donnay mainte belle Maistresse ?  
Ouure, Ronfard, ie veux loger chez toy :*

*Qui te prestay mes fleches & mes dars,  
Qui te baillay tous mes secrets en garde,  
Qui le premier deuant mon auantgarde  
Portois l'enseigne entre tous mes soldars ?*

*le luy respons, Tu ne m'es estranger :  
Ie te cognois artizan de malice :  
Malheureux est qui vit à ton seruice,  
Et plus maudit qui te daigne loger.*

*Petites mains petits pieds petits yeux,  
Oiseau leger qui voles d'heure en heure,  
Sans foy, sans loy, sans arrest ny demeure,  
Que la paresse a mis entre les Dieux :*

*Sorcier, charmeur, affeté, mesdisant,  
Confit en miel & en fiel tout ensemble,  
Ton coup de fleche au coup d'aiguille semble,  
Petite playe, & le mal bien-cuisant.*

*Tes meilleurs biens ce sont souspirs & pleurs,  
Larmes, sanglots, desespoir & la rage,  
Vne langueur qui trouble le courage,  
Prisons, regrets, complaints & douleurs.*

*Tu perds le temps, finet, à me prier :  
Va-t'en ailleurs, tel Dieu ie ne reuere :  
Tu as besoin d'un hoste plus seuer  
Qui tous les iours te vueille chastier.*

*Ie suis trop doux, il te faut un Seigneur  
Qui te commande & qui foule ta teste,*

*Qui rudement ta ieunesse admoneste :  
Tu ne vaux rien sans un vieil gouverneur.*

*Il me respond, Quelle ville est-ce cy ?  
Est-ce pas Blois ? ie la pense cognoistre :  
l'y pourroy bien pour une nuit repaistre,  
Quelque amoureux aura de moy soucy.*

*Vrayment, Amour, ie te voy bien puny  
D'aller si tard & mendier ton giste :  
Il est minuiet : par-ce marche plus viste,  
Monte au Chasteau, & demande Pougny.*

*Il est gaillard, courtois & genereux,  
Il cognoist bien tes traits & ta nature :  
Ce luy sera bien-heureuse auanture  
Loger Amour comme estant amoureux.*

*Mon cher Pougny, puis que le sort fatal  
Me fait errer, loge moy ie te prie :  
Ainsi tousiours puisses-tu de t'amie  
Avoir faueur sans crainte d'un riuai.*

*Pougny respond, le reuere ton nom,  
Ie suis des tiens, il faut que ie t'enseigne  
Place à loger : va-t'en où pend l'enseigne  
Du Cheualier, le logis y est bon.*

*Tu trouueras en diuerse façon  
Assez de lieux : car la Court n'est pas grande .  
Chasque logis pour hoste te demande,  
Mais le meilleur c'est l'Escu d'Alañon.*

*Si tout est plein, ie veux t'enseigner où  
Tu logeras : & pource ne regrette  
Le temps perdu, la meilleure retraite  
Qui soit icy, c'est à l'hostel d'Anjou.*

*Là tu auras, si tu es arresté,  
Un giste seur : mais si tu es sauuage,  
Fier, desdaigneux, inconstant & volage.  
N'y loge pas, tu serois mal traicté.*

*Ce bel hostel est enrichy d'esmail,  
De perles sont les portes estofées,  
Palmes, lauriers, couronnes & trofées  
Pendent de rang sur le haut du portail.*

*D'un tel logis le seigneur redouté  
Va couronné d'honneur & de ieunesse:  
Mars & Pallas, la vertu, la proïesse,  
Pour compaignie honorent son costé.*

*Le vicieux en ce Palais ne fait,  
Comme lieu sainct, ny entrer ny sortie:  
Telle maison par le Ciel fut bastie  
Pour y loger vn Prince tresparfait.*

*Il dist ainsi, & Amour s'en-alla  
Vers vous Seigneur de la terre Angevine:  
C'est vn enfant de nature maline,  
Qu'en lieu d'amer Amour on appella.*

*Il faut le battre & le faire crier,  
Rompre son arc, luy oster toutes choses,  
Et tant d'œillets, & de chaisnes de roses,  
Iambes & bras esclaué le lier.*

*Et si Venus apportoit en sa main  
Rançon pour luy, prens le fils & la mere,  
Les punissant d'une iuste colere  
Comme ennemis de tout le genre humain.*

*Mais s'ils vouloient tous deux abandonner,  
Craignant ton nom, leurs mauuaises pensées,  
Pardonne, Prince, à leurs fautes passées:  
Vn Prince doit les fautes pardonner.*

## DISCOVRS.

*Vous qui passez en tristesse le iour,  
Affuiettis sous l'empire d'Amour,*



*Cruel tyran des humaines pensées :  
Vous qui vivez d'esperances cassées,  
Vous que Fortune, Amour, & la douleur  
Vont abusant, escoutez mon malheur,  
Malheur estrange, autant esmerueillable  
Qu'en mon tourment ie n'ay point de semblable.*

*Mais par où dois-ie en mes vers commencer  
Le mal qui vient grieuement m'offenser ?  
Comme vn chemin qui en croix se trauerse,  
De mainte voye en carrefours diuerse,  
Fait le pieton du chemin esgarer :  
Ainsi le mal diuers me fait errer  
De mon propos, si que ie ne puis dire  
D'où, ny comment proceda mon martyre :  
Et toutefois icy ie le diray,  
Me declarant le mieux que ie pourray.*

*De mon malheur l'occasion premiere  
Fut la durté de ma cruelle mere,  
Laquelle estant sans cœur & sans pitié,  
Fit auorter ma nouuelle amitié,  
Mere à son fils à tort mal-gracieuse  
Par le rapport d'une vieille enuieuse  
Qui hayssoit ma Maistresse, & faisoit  
Qu'à mes parens mon amour desplaisoit.*

*Quiconque soit ceste vieille maudite,  
Perisse, ô Dieux ! iustement interdite  
Du feu & d'eau, & la clarté des Cieux  
Ne soit iamais agreable à ses yeux.*

*La pauureté tousiours luy face guerre,  
Et sans secours aille de terre en terre  
Cherchant son pain, & trespasse à la fin  
Nuë, affamée, au milieu d'un chemin,  
Où sans honneur d'aucune sepulture  
Soit des mastins & des loups la pasture.*

Son esprit aille errant par les tombeaux,  
Ou reueſtu de plumes de corbeaux  
Sur les maiſons toute nuit ſe lamente,  
Et d'un long cry les voiſins eſpouuente,  
Puis que par fraude elle a voulu bleſſer  
L'honneſte amour qu'on ne doit offeſer.

De mon tourment ie fis certain mon pere :  
Mais luy vieillard, qui du tout obtempere  
Aux paſſions de celle qui me fit,  
Parla pour moy, mais rien à mon profit :  
Car remettant toute l'affaire à celle  
Dont ie naſquis, la rendit plus cruelle  
Contre mon mal, comme ayant ſeule à ſoy  
Pouuoir de pere & de mere ſur moy.  
O cruauté d'une mere obſtinée,  
Qui de ſon fils corrompt la deſtinée!

Ma mere donq' eſt cauſe du tourment  
Que ie reçoÿ, & vous diray comment.  
Ainſi qu'on voit qu'entre ceux d'un lignage  
La priuauté ſ'augmente d'auantage,  
Et l'amitié ſ'enflame plus auant  
Par le moyen de ſe voir bien ſouuent :  
Ainſi voit-on qu'Amour qui tout diſpenſe,  
Souuent ſe meſle entre telle alliance,  
Et tant il eſt gaillard & vigoureux,  
Que des couſins il fait des amoureux.

Comme il aduint à moy qui me lamente,  
Trouuant un iour vne mienne parente  
En un feſtin (parente d'afſez loin)  
Qui fut depuis l'argument de mon ſoin.  
Car eſtimant eſtre choſe ciuile  
D'entretenir vne Dame gentile  
De qui i'eſtois un petit allié,  
Incontinent ie me ſenti lié,

Fait prisonnier de son deuis si sage,  
 Qu'il eust gagné d'un Scythe le courage.  
 Je me vy prendre esclave de ses yeux,  
 Où les Amours courtois & gracieux  
 Estoyent logez, armez de ses willades,  
 Qui d'un seul coup mes sens firent malades :  
 Si qu'en viuant en autrui loin de moy,  
 Plein de souci, de tristesse & d'esmoy,  
 Autre penser n'auois en la pensée  
 Que la beauté que j'auois enlacée  
 Au fond du cœur, qui suiuiot en tous lieux  
 Mon souuenir se montrant à mes yeux,  
 Et ne souffroit, tant me faisoit de presse,  
 Que sur l'amour la raison fust maistresse :  
 Pource ie fus long temps malade ainsi,  
 Sans rencontrer ny pitié ny merci.

Mais comme on voit que la premiere enuie  
 D'un ieune amant est souuent assouuie  
 Ou par l'estude ou par autre moyen,  
 L'entre-rompi le nœu de ce lien,  
 Qui d'autre amour m'auoit serré la voye  
 Estant fort ieune, & aussi que j'auoye  
 Un frere aîné en âge florissant,  
 Qui plus que moy estoit fort & puissant,  
 Et qui deuoit selon sa destinée  
 Aller bien tost sous les loix d'Hyménée.

Or quand la Parque eut ce frere rauy,  
 Et que tout seul de mon nom ie me vy,  
 S'offrant à moy maint riche mariage,  
 L'amour premiere arresta mon courage,  
 Dont ie gardois encores en l'esprit  
 Le souuenir & le portrait escrit.

Pour tout remede un iour ie delibere  
 De raconter mes amours à sa mere,

*La suppliant n'avoir le cœur marry  
Si pour ami ie deuenois mary  
De la beauté de sa fille si belle,  
Qu'autre desir ie n'auois sinon d'elle.*

*La mere adonq' qui mes propos ouit,  
Les accordant tout mon cœur resjouit :  
Mais pour tel heur ne faillit ma misere.  
Car la rigueur de ma fascheuse mere  
Fraudant mon cœur, ma peine & mon espoir,  
Opiniastre opposa son vouloir  
Au mien forcé, & pour mon mal accroistre  
Ne voulut onq' les vertus recognoistre  
Ne la famille où ie voulois parti,  
Ayant son cœur de mon bien diuerti  
Par les rapports d'une vieille Megere  
Contre m'amie infame mensongere :  
Et toutesfois ardent ie ne laissè  
D'entretenir mon dessein commencé,  
Faisant entendre à mon pere la peine  
De trop aimer, dont i'auois l'ame pleine,  
Disant ainsi : Pere s'il te souuient  
Du premier feu qui en ieunesse vient  
Brufler les cœurs de sa flame amoureuse  
(Heureux suiet d'une ame bien-heureuse)  
Ie te supplie aide à mon amitié,  
Et pere, pren de ton enfant pitié,  
De moy qui meurs sans tenir embrassée  
Celle qui vit Royne de ma pensée.*

*Ne fois, mon pere, homicide à grand tort  
De ton seul fils, qui n'attend que la mort,  
S'il ne te plaist qu'il estaigne sa flame  
En si beau lieu qu'il desire pour femme.*

*Las! si tu veux à mon bien consentir,  
Tu me feras vn tel aise sentir,*

*Mettant à fin ma vertueuse enuie,  
Que doublement j'auray de toy la vie,  
Et doublement seras mon pere ici  
Me donnant vie & m'ostant de souci.*

*De tels propos mon pere j'arraisonne:  
Luy qui estoit de nature tresbonne,  
Me dit: Mon fils, j'ay pitié de ton mal,  
Lequel ne trouue en amours son egal,  
Louant beaucoup ta volonté constante,  
Qui ne se doit frustrer de son attante.*

*Mais pour-autant que vieillesse m'a fait  
Par maladie impotent & desfait,  
Je ne sçaurois à ton vouloir complaire:  
Car desormais ce n'est plus mon affaire  
De me mesler de nopces ny de rien:  
Le seul vouloir de ta mere est le mien.*

*Pource mon fils, flechi-la par priere:  
Son cœur n'est point d'une Lionne fiere  
Ny d'un Sanglier, tu pourras par douceur  
En soupirant luy amollir le cœur.*

*Ainsi disoit. Lors ie lamente & crie  
Deuant ma mere, & la prie & reprie,  
Et par douceur j'essaye d'arracher  
En soupirant ce fer & ce rocher  
Qui luy armoit la poitrine si dure,  
Pour n'escouter la peine que j'endure,  
Mettant tousiours au deuant de ses yeux  
L'extreme ennuy de mon mal soucieux,  
La nourriture & beauté de la fille,  
Et les vertus de toute sa famille.*

*Mais pourneant ie cuidois l'enflamer:  
Car mille fois plus sourde que la mer,  
Qui par le vent se roule sur le sable,  
A ma priere estoit inexorable.*

*Alors me dit celle qui m'engendra:  
Ton pere vieil fera ce qu'il voudra,  
Car d'un pere est la puissance bien forte:  
Mais quant à moy, plustost mille fois morte  
l'iray là bas, que te voir marié  
En si bas lieu dont tu es allié.*

*Ce mot estoit le dernier coup d'espée  
Dont ell' pensoit auoir du tout coupée  
Mon esperance, hélas ! qui florissoit  
D'autant plus fort qu'elle la meurdriroit.  
Moy resolu de poursuiure ma prise,  
le fi certains mes parens de l'emprise,  
Qui tous d'accord louerent mon conseil,  
Et mon amour qui n'a point de pareil,  
Et la langueur veritable & non feinte  
D'une amitié si constante & si sainte.*

*Adonq' pensant par le temps acquerir  
Ce plaisant mal lequel me fait mourir,  
Toujours cherchois occasion expresse  
D'aller aux lieux où estoit ma Maistresse.*

*Long temps apres tant de traux passéz  
(Par la douleur l'un sur l'autre amassez)  
Preuoyant bien que ma peine dolente  
Auroit plantée une amour violente  
Dedans le cœur de Madame, & qu'aussi  
Autant que moy elle auroit de souci,  
le resolu, pour soulager ma vie,  
De visiter une si chere amie,  
Dont le portrait dedans l'esprit i'auois,  
Et de luy seul en mourant ie viuois.*

*Or trouuant seule un iour ma seule Aimée  
(Car la maison souuent m'estoit fermée,  
De peur hélas ! que si la priuauté  
D'une si douce & plaisante beauté*

*M'estoit commune, vne enuieuse rage  
 Ne rallumast ma mere dauantage : )  
 le luy contay le feu qui me brusloit,  
 Dont la chaleur aux yeux m'estinceloit :  
 le luy contay que ie mourois sans elle,  
 Que sa beauté me sembloit seule belle,  
 Que de souspirs mon cœur ie nourrissois,  
 Que d'elle seule attristé ie pensois,  
 Qu'elle estoit seule & ma vie & mon ame,  
 Mon jang, mon tout, ma chaleur & ma flame,  
 Et que mon cœur n'auroit autre aliment  
 Que de songer en elle seulement,  
 Et maint propos ie disois, que fait dire  
 Amour alors qu'on conte son martyre.*

*En-ce-pendant à longs traits ie humois  
 De ses beaux yeux les beaux traits que i'aimois,  
 le m'enlaçois en ses treffes dorées,  
 le contemplois ses léures colorées  
 De frais œillets, & son front où estoit  
 Amour au guet qui mon cœur combattoit.*

*le contemplois son maintien & sa grace,  
 Et son beau teint qui les roses efface :  
 le desrobois de ses beautez vn peu,  
 Doux aliment pour en estre repeu  
 En son absence, ainsi que l'homme sage  
 Qui entreprend de faire vn long voyage,  
 Mainte viande amasse dans son sein  
 Pour resister longuement à la faim.*

*Sa mere adonq' suruenant fut ioyeuse  
 De telle amour si sainte & vertueuse,  
 Et approuuant ma longue passion,  
 De tous les deux loua l'affection,  
 Me descourant sa volonté celée,  
 Dont i'eu depuis mon ame consolée.*



*Vn temps apres une nopce suruint,  
O iour heureux! où ma chere ame vint,  
Qui paroissoit au milieu de la presse  
Comme paroist Diane la Deesse  
Par-sur le chœur de ses Nymphes sautant,  
Quand pres d'Eurote elle va s'esbatant.*

*Là ne me pleut ny danse ny aubades,  
Ny balladins aux dispostes gambades,  
Fifres, cornets, ny les haubois qui font  
Aller la danse egalement en rond :  
Ny les festins, les vins, ny les viandes,  
Sucres, douceurs, confitures friandes  
Ne me plaisoyent : seulement me plaisoit  
Ce corps diuin, qui chaste me faisoit  
Viure & mourir, contemplant en presence  
D'un œil goulx toute mon esperance.*

*D'un feu pareil nos soupirs embrasez,  
Et nos desirs furent beaucoup prisez  
Des assistans les plus grans de la bande,  
Qui admiroyent une amitié si grande,  
Et de ma mere accusoyent la rigueur  
Qui s'opposoit si cruelle à mon cœur.*

*La nuit suruint, & Amour qui me ronge,  
Me presenta mes delices en songe,  
Et parmi l'ombre en esprit me fist voir  
Tant de beautez que j'auois veu le soir.*

*Lors ie disois, O songe qui m'abuses,  
Me fortunant de si plaisantes ruses,  
De tout mon bien ie suis tenu à toy,  
Qui sans pitié as eu pitié de moy :  
Si qu'en despit de la fiere rudesse  
Qui tient ma mere, accollant ma Maistresse  
Ie l'ay baisée, & seul tu m'as heuré  
Quand plus mon fait estoit desesperé*

*Le verd pauot ton propre sacrifice  
Sur ton autel à toute heure fleurisse,  
Et puiffes-tu euter le courroux  
De Iupiter, puis que tu m'es si doux.*

*Ainsi viuant en si douteuse attente,  
Des deux costez maint parti se presente  
De mariage, & nul ne vint à fin,  
Estant rompu par un heureux destin.*

*Hà! que serois-je auprès d'une autre femme  
Sinon du plomb sans vigueur & sans ame?  
Que seroit elle auprès d'un autre aussi  
Que froide & morte & palle de souci  
Loin de son cœur? Amour qui nous fait plaindre  
Ne nous sçauroit en autre part conioindre,  
Tant le destin à tous les deux commun  
De nos esprits en naissant ne fist qu'un.*

*Lors m'efforçant d'une complainte amere  
Je retentay le vouloir de ma mere,  
Luy declarant le danger où j'estois:  
Qu'un tel fardeau sur le cœur je portois,  
Qu'en bref veincu je laisserois la vie,  
Et si soudain elle n'auoit enuie  
De m'alleguer ou me donner confort,  
Qu'entre ses bras elle auroit un fils mort.*

*Mais pour-neant je luy fais ma requeste,  
Tant de la vieille elle auoit en la teste  
Les faux rapports qu'elle luy racontoit,  
Que mes propos ny mes pleurs n'escoutoit,  
Estant ioyeuse & braue de ma perte.*

*En-ce-pendant la foire fut ouuerte  
De saint Germain, où ceux qui ont le cœur  
Adoloré d'amoureuse langueur,  
Où ceux qui ont une ardeur vehemente  
D'estre butin d'une nouvelle amante,*

Où ceux qui ont vne ardeur de parler  
A leur Maistresse où ils n'osent aller,  
Où ceux qu'Amour à son conseil demande,  
Vont amoureux d'une gaillarde bande.

Là par bon-heur ma Deesse arriua :  
Mon cœur deuant avecq' elle s'en-va,  
Et puis mon pied me conduit par la presse  
Où ie trouuay ma mortelle Deesse.

Là ie n'auois mon regard attaché  
Ou sur la foule ou desur le marché,  
Ou sur le bien qui pendoit aux boutiques :  
Mais contemplant tant de graces pudiques  
Qui reluisoyent sur le front de mon tout,  
Ie ne trouuois commencement ny bout  
En sa beauté : beauté qu'Amour m'a peinte  
Dedans le cœur comme chose tressainte.

Là deuissant de nos tristes malheurs,  
Elle augmenta plus viues mes douleurs,  
Se lamentant de ma mere cruelle,  
Qui sans raison ne faisoit conte d'elle,  
De ses vertus, de sa condition,  
Et qu'elle auoit mauuaise affection  
En son endroit, se monstrant insensée  
D'offenser ceux qui ne l'ont offensée.

Lors son courroux i'appaisay doucement  
Luy remonstrant son merite, & comment  
Ma folle mere auoit tort de mesdire  
De ses vertus que tout le monde admire.

Vn iour allant, comme souuent i'allois,  
Voir vne Dame à qui parent i'estois,  
Et elle aussi, la mere presque mise  
En desespoir de courroux fut esprise :  
Se lamentoit, pleuroit, & gémissoit,  
Que les vertus de sa fille on passoit

*Dessous silence, & que tel mariage  
Estoit trop long & de trop de voyage.*

*Elle alleguoit en pleurant ne pouvoir  
Sa ieune fille en autre lieu pourvoir,  
Tant elle auoit à mon dire assurance:  
Que ses parens luy en faisoient instance,  
Et qu'asprement tousiours luy reprochoient  
De n'auoir soin de ceux qui luy touchoyent.*

*Pource elle estant d'ennuy attenuée,  
Et de vouloir presque à demi muée,  
Aux champs alla, menant avecques soy  
Mon tout, mon cœur, ma promesse & ma foy :  
Où ie couru d'une course hastée  
Reconforter ceste desconsortée,  
Aussi pour voir les yeux de ceste-là  
Au feu desquels mon cœur se re-brula.*

*A son retour par heureuse rencontre  
En quelque nopce encor' ie la rencontre,  
Où pour sçauoir si du temps la longueur  
Ne m'auoit point effacé de son cœur,  
De maint propos en propos ie l'attire  
Pour la tenter, ne me voulant rien dire,  
Ains retirée en un penser profond,  
Ny bien ny mal froide ne me respond.  
Mais à la fin de mon dire esbranlée,  
Rendit du tout mon ame consolée  
En m'assurant de sa fidelle amour.  
Lors tout rui ie sens naistre à l'entour  
De mon esprit vne ioye incognue  
Qui par sa bouche au cœur m'estoit venue.*

*Donq' pour tousiours à mon aise la voir,  
Soudain ie fis à sa mere sçauoir  
(Pour consommer mon œuvre proposée)  
Qu'elle seroit ma future espousée,*

*La choisissant pour femme desormais,  
Et que pour Dame autre n'aurois iamais :  
le luy contay le danger de ma vie,  
Et la rigueur de ma mere, & l'enuie  
Qu'une flateuse auoit d'un tel parti,  
Dont tout le mal, hélas ! estoit sorti.*

*La mere adonq' de mes raisons esmeuë,  
Sage permit qu'une si douce veuë  
Entre nous deux desormais se feroit :  
Que de sa part meurement penseroit  
Au mariage & à ma foy promise,  
Pour mettre fin à si belle entreprise.*

*Voila comment, Maistresse, i'ay vescu  
Depuis le iour que mon œil fut veincu  
De vos beaux yeux : & soit que la iournée  
Fust au matin des ondes retournée,  
Fust vers le soir quand le Soleil couchant  
Va dans la mer ses cheuaux destachant,  
Ou quand la Lune errante se promeine,  
Pour vostre amour ie n'ay languy qu'en peine.*

*O grand Amour, grand oiseau par le dos,  
Qui t'es logé au profond de mes os,  
Ayant choisi pour maison ma mouëlle,  
Qui es armé d'une fleche cruelle,  
Et d'un flambeau que ie sens dans le sein,  
Oy ma priere & me sois plus humain :  
Fay ie te pri' que ma Maistresse voye  
D'un œil benin ce papier que i'enuoye,  
Où sont depeints la plus part de mes maux :  
Qu'elle ne mette en oubli mes trauaux,  
Et que tousiours elle ait en sa pensée  
Nostre amitié saintement commencée,  
Tousiours mettant au deuant de ses yeux  
De son ami les ennuis soucieux,*

*Et que sa mere autre part ne flechisse,  
Et que le Ciel mon dessein accomplisse.*

*Fay que la mienne au courroux endurci,  
En mon endroit ait le cœur adouci,  
Et qu'en lieu d'estre à tort insupportable,  
S'amolliſſant deuienne plus traitable,  
Sans croire plus les malheureux propos  
De ce vieil chien contraire à mon repos,  
Qui porte enuie aux vertus de la belle  
Qui n'a ſemblable en tout ce monde qu'elle,  
Parfaite autant que mon mal bien-heureux  
Passe l'ennuy de tous les amoureux.*

*Et ſi, ô Dieu, tu parſais ma requête,  
le t'appendray ſur le haut de la teſte  
Comme en trophée vn rameau de Laurier,  
Pour le loyer de ſauuer ton guerrier.*

## DISCOVRS.

*C'eſtoit au poinct du iour (quand les plumes du Somme  
Ne ſillent qu'à demi les yeux laſſez de l'homme,  
Qui veille tout enſemble, & tout enſemble dort,  
Ne pris ny retenu du frere de la Mort)  
Lors que rauï d'eſprit, comme vne idole vaine  
Qui ſans corps ſur le bord d'Acheron ſe promeine,  
le me vy transporté ſur le haut d'un Rocher,  
Duquel on ne ſçauroit ſans ailes approcher,  
Ou bien ſans vn eſprit qui vaut mieux que des ailes,  
Quand gaillard il ſe pouſſe aux choſes immortelles.*

*Au plus haut du ſommet de ce Rocher pointu,  
Eſt vn temple d'airain qu'a baſti la Vertu :*

D'airain en est la porte, & par grand artifice  
D'airain plus clair que verre est parfait l'edifice.

Là de tous les costez de ce grand Vniuers  
Les peuples sont assis en des sieges diuers :  
L'un bas & l'autre haut en son rang y habite,  
Et chacun a son lieu selon qu'il le merite.

Aupres d'elle est assise à son dextre costé  
L'Estude, la Sueur, le Labeur indonté,  
L'Honneur, la Preud'hommie, & ont pour leur voisine  
Andronique & Phronese, & leur sœur Sophrosyne.  
Ce peuple à l'enuiron de la Nymphé espendu,  
De corps, d'esprit & d'ame en elle est esperdu,  
Qui ne se peut souler de la voir : & l'appelle  
Son cœur, ses yeux, son sang, sa maistresse & sa belle,  
Luy offre corps & biens, & tasche à desservir  
Sa grace pour l'aimer & pour la bien seruir.

La Deesse n'est pas de corps effeminée  
Comme celle qui est des flots de la mer née :  
Son œil est doux & fier, son sourcil un peu bas,  
Son regard est semblable à celui de Pallas  
Quand sa main est paisible, & l'horrible Bellonne  
Contre les fiers Geans n'irrite sa Gorgonne.

Tant plus elle est aimée, & tant plus elle prend  
Plaisir à contr'aimer, & iamais ne se rend  
Que par honnesteté, douceur & courtoisie  
N'ait de ses poursuiuans gaigné la fantaisie,  
Et ne leur ait par signe & par preuue monstré  
Qu'en la questé d'amour ils ont bien rencontré.  
Aucunefois sur l'un son regard elle iette,  
Sur l'autre aucunefois : car elle est tant suiette  
Aux passions d'amour, que son cœur ne pourroit  
Viure à son aise un iour s'il ne s'enamouroit.

Quand elle aime quelcun, comme maistresse douce  
Le souleue aux honneurs, aux richesses le pousse,



*Luy donne entre les Rois un honorable lieu,  
Et le fait du vulgaire admirer comme un Dieu :  
Mais à ceux qu'elle hait, comme fiere ennemie,  
Leur promet deshonneur, prison & infamie.*

*Sur tous ses poursuiuans d'un œil vif & ardent,  
Courtoise elle t'alloit doucement regardant  
Mon tresdocte Rouuere, & comme amour la touche,  
Tout ainsi que le cœur elle t'ouurit la bouche,  
Te flattant de ces mots : Ami, que le troupeau  
Des Muses allaita chèrement au berceau  
De leurs propres tetins pour future merueille :  
Puis quand tu deuis grand, l'industriuse abeille  
De son miel amassé sur les fleurs du Printemps,  
En l'autre Thesprien te nourrit bien long temps,  
Où Phebus, & Python, & la belle Cythere,  
Et Mercure qui est des bons esprits le pere,  
Ont si bien ton mortel en diuin transformé,  
Que tu fus dès enfance un miracle estimé,  
Ayant choisi Morel pour vertueuse guide,  
Qui surmonte Chiron le maistre d'Eacide.*

*Tu n'auois pas dix ans, qu'oyant publiquement  
Tes propres oraisons sonner si doctement  
Et t'oyant disputer outre ton âge tendre  
Des Arts qu'on ne sçauroit qu'en la vieillesse apprendre,  
Je fus toute rauie, & dès le mesme iour  
Que ie te vy, ie mis dedans toy mon amour.  
Tu t'en apperceus bien : car tousiours depuis l'heure  
Songneux, tu as cherché la place où ie demeure,  
Où tu es arriué par cent mille trauaux,  
Par rochers, par torrens, par plaines & par vaux,  
Par halliers & buissons, qui les autres retiennent,  
Et recreus du chemin à mon Palais ne viennent  
Ainsi que tu as fait, à fin d'y seiourner :  
Car le souci mondain les en fait retourner.*

*Au bas de ce Rocher au milieu d'une prée  
 Demeure une Deesse en drap d'or accoustrée,  
 Ses bras sont chargez d'or, & son col d'un carcan,  
 Labeur ingenieux des feuures de Vulcan :  
 Son front est attrayant, sa peau tendre & douillette,  
 Son ail traistre & lascif, sa face vermeillette,  
 Et ses cheueux ondez, annelez & tressez  
 Sont de fueilles de Myrte & de rose enlancez :  
 Sa main est molle & grasse, & son ail n'abandonne  
 Le sommeil paresseux que midi ne rayonne :  
 Au reste elle est en danse, en festins & deduit,  
 Et rien fors le plaisir, indiscrete, ne suit,  
 Braue, en-poinct, decoupée, & pour estre apparente  
 Elle a desia vendu le meilleur de sa rente.*

*Tousiours aux grans chemins en cent mille façons  
 Elle ourdist des filets, & tend des hameçons  
 Appasiez de delice, & elle en mainte sorte  
 Aux gestes, à la voix, & aux yeux elle en porte  
 Pour prendre les passans, si bien que le plus fin  
 (Sans l'aide de raison) s'y empestre à la fin :  
 Elle prend bien souuent ma robbe, & si transforme  
 Son masque desguisé en ma naïue forme.*

*On dit qu'un iour Venus sans pere la conceut,  
 Monstre fier & cruel, du dueil qu'elle receut  
 Qu'Hebé ieune Deesse espousoit en lieu d'elle  
 Hercule despouillé de sa robbe mortelle :  
 Et auorta du part, en opprobre & desdain  
 Qu'Hercule de-sur elle auoit mise la main,  
 Et luy auoit laissé au front la cicatrice  
 Qui descouure à chacun son nom & sa malice.*

*Or ceste Volupté (ainsi se fait nommer  
 Celle qui veut sa vie en plaisirs consommer)  
 M'arreste les passans, & tant elle est mignarde,  
 Qu'enyurez de plaisirs, de tels mots les retarde :*

O pauvres abusez, que le nom de Vertu  
 A faussement seduits ! pauvre peuple vestu  
 D'une robe de bouë, à laquelle Nature  
 Trop chiche n'a donné sinon la pourriture !  
 Vous pensez-vous, mortels, faire de nouveaux Dieux,  
 Et de terre chargez voler iusques aux cieux ?

Laissez moy ces desseins qui ne sont que mensonges,  
 Que Chimeres en l'air, que fables & que songes,  
 Et mortels n'esperez sinon que le trespas  
 Qui est vostre heritage, & vous suit pas à pas.

Quelle fureur, humains, quelle ardente manie  
 Vostre sotte raison si follement manie,  
 Que vouloir par travail en cheueux blancs chercher  
 le ne sçay quelle femme assise en vn Rocher,  
 De qui le nom est vain & vaine l'entreprise ?  
 Hé ! qu'en rapportez-vous sinon la barbe grise  
 Pour toute recompense, ou quelque mal soudain  
 Qui vous fait trespasser du iour au lendemain ?  
 En-ce-pendant les ans de la ieunesse tendre  
 Que vous deuriez en jeux & en plaisirs despendre,  
 Se perdent comme vent, & ne r'animent plus  
 Vos corps de longue estude impotens & perclus.

Si Vertu ne filloit vos yeux de piperie,  
 Vous cognoistriez bien tost quelle est sa menterie.  
 La Nature y repugne, & vous monstre combien  
 Vertu pipe vos cœurs sous ombre d'un faux bien :  
 Celuy qui suit Nature est sage, & ne se laisse  
 Seduire des appas de telle enchanteresse.

Qu'acquist iadis Socrate, Aristote & Platon,  
 Pythagore, Thales, Theophraste & Criton  
 Pour aimer la Vertu, fors vne renommée  
 Qui sera par les ans, comme ils sont, consommée ?  
 Dequoy sert le renom au mort qui ne sent rien ?  
 Malheureux est celuy ce-pendant qu'il est sien,

*Qu'il sent, qu'il voit, qu'il oyt, qui ne fait bonne chere  
Sans consumer sa vie en penible misere  
Après ie ne sçay quoy qu'on ne peut acquerir  
Que par longue tristesse, en danger d'en mourir.*

*Que voirrez-vous là haut que ronces & qu'orties ?  
Ici vous ne voirrez que fleurettes sorties  
Du sein du Renouveau : ici le beau Printemps,  
La ieunesse & l'amour habitent en tous temps :  
Ici l'homme vieillist en plaisir delectable,  
Et s'en-va soul de vie ainsi que d'une table.*

*De tels mots Volupté arreste les passans,  
Qui mal-sains du cerueau, ne sont assez puissans,  
Ainsi que tu as fait, de se boucher l'oreille  
Pour iouyr du plaisir qu'ici ie t'appareille.*

*Pource mon cher ami, dès enfance cognu,  
Tu sois en mon Palais le plus que bien-venu,  
Il faut que ie t'embrasse, & que ie te caresse,  
Puis que tu as donté l'ocieuse Pareffe,  
Et sans auoir ouy les chants de Volupté  
Tu es sur mon Rocher par estude monté.*

*Ceste ieune rusée est si fort cauteleuse,  
Qu'en lieu de te fouler d'une douceur mielleuse,  
T'eust présenté du fiel, & comme à son amant  
Donné vn fresle verre en lieu d'un Diamant.*

*Doncques tu m'as aimé pour l'amour de moy-mesme  
Sans espoir de loyer : aussi d'amour extrême  
Ie t'aime en recompense, & n'auras en retour  
De m'aimer de bon cœur sinon que mon amour.*

*Tousiours mes amoureux ont de moy iouissance :  
« Les mondains amoureux viuent en indigence  
« Desirant la beauté, & l'homme desireux  
« Pour n'auoir son souhait, est tousiours malheureux.  
Mais mon fidelle amant sans ardeur inconstante  
Se contente de moy, de luy ie me contente :*

*Et sans plus desirer il a tant de plaisir,  
Que ie suis pour iamais la fin de son desir.*

*Pour me faire l'amour il ne faut qu'on se farde,  
Qu'au miroir paresseux la face on se regarde,  
Qu'on soit bien parfumé, ou qu'on soit bien vestu  
D'un drap d'or par rayons à la soye battu,  
Qu'on face des tournois, qu'on sorte à la campagne,  
Qu'en armes on galope un beau genet d'Espagne,  
Qu'on soit bien gaudronné : le ne veux point cela,  
Mon amour seulement se donne à celui-là  
Qui m'aime plus que luy, qui me suit à la trace,  
Et de rien n'est soigneux que de ma bonne grace.*

*Tel amant est heureux admirable & parfait :  
Il ne pense iamais ny ne dit ny ne fait  
Rien dont il se repente, & en soy-mesme ferme  
Il est son but, sa fin, son limite & son terme,  
Son parfait & son tout : quand le Ciel tomberoit,  
L'esclat sans l'effroyer sa teste frapperoit.*

*Tous humains accidens il desdaigne & mesprise,  
Il desdaigne la flame en sa maison esprise,  
Prison, terre & argent, trahisons de valets,  
Perte d'habillemens, de biens & de Palais,  
De femmes & d'enfans, & constant il se ioüe  
De l'aueugle Fortune, & des tours de sa roüe.  
Il n'a iamais souci du change des saisons :  
Car tout enuelopé d'immobiles raisons  
S'enferme d'un rampart clos de Philosophie,  
Qui mesprise le Temps & Fortune desfie.*

*Il est riche sans biens, il vit heureusement,  
Et parfait de tous poinçts il a contentement :  
Il sçait tout, il voit tout, & la lourde ignorance  
Dedans son estomac ne fait point demeurance :  
Il se cognoist soy-mesme, & ne doute de rien :  
Sans ailleurs s'esgarer il demeure tout sien,*

*Et nulle passion soit d'ire, ou soit d'enuie,  
De douleur ou de peur ne tourmente sa vie.*

*En ceste terre basse il n'estime rien grand :  
Car son esprit au Ciel à toute heure se pend,  
Où la grandeur de Dieu de si pres il aduise,  
Que toute chose humaine en son cœur il meprise :  
Et rien tant soit estrange, ou douteux, ou nouveau,  
Present ou aduenir n'offense son cerueau.*

*Il a chassé de soy toute sorte de vice,  
L'ardante ambition, la vilaine auarice,  
Luxure dissolue, & s'est fait pour m'aimer,  
Vn homme tout parfait qu'on ne scauroit blasmer.*

*Ainsi rien n'apparoist au monde miserable,  
Qui soit fors mon amour eternal & durable.  
La richesse se perd, la force & la beauté,  
Faveur, credit, honneur, noblesse, royauté,  
Comme neige au Soleil, ou comme la fumée  
Qui par le vent soufflée en l'air est consumée :  
Sans plus mon amoureux ne s'esbranle iamais,  
Plus ferme que le roc sur lequel ie le mets.*

*L'infame pauvreté ne ronge sa poitrine,  
Indigence ne faim desur luy ne domine :  
Le monde est son pays, il n'est point estrange,  
Il va iusques à l'Inde, & reuiert sans danger :  
Et quand le Sort malin ou la Fortune dure  
Luy menace le chef, ie m'oppose à l'iniure,  
Et plus est enfondré, plus ie le tire en haut,  
Et iamais mon secours au besoin ne luy faut.*

*le le fais de doctrine & d'honneur l'exemplaire,  
le le tire bien loin des tourbes du vulgaire,  
le l'auance en credit, ie le pousse aux honneurs,  
Et discret ie le rens entre les grans Seigneurs :*

*Ainsi que ie t'ay fait, amiable Rouuere,  
Qui peux entremesler le doux & le seuer,*



*Et qui sçais par un art gracieux & courtois  
Pratiquer les faueurs des Princes & des Rois.*

*Tes mœurs & ta prudence ont fait que lon te voye  
Choisi pour seruiteur du grand Duc de Sauoye  
Et de sa chere espouse (ame heureuse) qui fait  
Nostre âge plus poli, plus diuin & parfait,  
Qui sur toute Princeſſe a franchement ſuiuie  
Moy qui ſuis la Vertu dès le iour de ſa vie.*

*Or ſus embrassez-moy, tant pour auoir ceſt heur  
Que d'estre d'un tel Duc fidelle seruiteur,  
Que d'estre seruiteur de telle Marguerite :  
Et pour-autant auſſi que ta foy le merite,  
Qui ne pourra iamais ſe ſeparer de moy :  
Car iamais un bon cœur ne viole ſa foy.*

*Ainſi te diſt Vertu de ſa bouche vermeille :  
A-tant le iour fut grand, & ſur ce ie m'eſueille.*

## DISCOVRS

A MONSIEVR DE CHEVERNY,

Garde des Seaux de France.

*Celuy qui le premier du voile d'une fable  
Prudent enueloppa la choſe veritable,  
A fin que le vulgaire au trauers ſeulement  
De la nuit viſt le iour & non realement,  
Il ne fut l'un de ceux qu'un corps mortel enſerre,  
Mais des Dieux qui ne vit des preſens de la terre.*

*Les myſteres ſacrez du vulgaire entendus,  
Reſemblent aux bouquets parmi l'air eſpandus,  
Dont l'odeur ſe conſomme au premier vent qui s'offre,  
Et ceux durent long temps qu'on garde dans un coffre.*



*Nostre mere Nature entre les Dieux & nous  
Que fist Deucalion du get de ses caillous,  
Mist la Lune au milieu qui nous sert de barriere,  
A fin que des mortels l'imbecille lumiere  
S'exerce à voir la terre, & d'art audacieux  
N'assemble plus les monts pour espier les Cieux.*

*Pource nos deuanciers ont dit par artifice,  
Qu'autrefois Iupiter receut à son seruice  
Deux hommes differents de mœurs & de destin,  
Dont la diuerse vie eut differente fin.  
Il les repeut tous deux de celeste ambrosie :  
Ils auoyent à sa table vne place choisie :  
Rien n'estoit bon aux Cieux qu'ils n'eussent approuué,  
Et premiers Conseillers de son Conseil priué  
Participoyent ensemble à la grandeur royale.*

*L'un auoit nom Minos, l'autre auoit nom Tantale,  
L'un sage, l'autre fol : ce Tantale effronté  
Aux hommes reuela des Dieux la volonté,  
Pource celuy qui l'air de ses foudres separe,  
Le fist tomber du Ciel au profond du Tartare,  
Mourant de soif en l'eau, de faim entre le fruit.*

*Au contraire, Minos fut sagement instruit,  
Il eut la bouche sobre : & iuge veritable  
S'assit de Iupiter par neuf ans à la table.  
Puis reuenu çà bas fonda de bonnes loix,  
Fut Prince droiturier : si bien que les Cretois  
Le voyant abonder en Iustice suprefme,  
Le pensoyent estre fils du grand Iupiter mesme.  
Voila comme les vieux ont dextrement tasché  
D'emmanteler le vray d'une fable caché.*

*Iupiter ne fut onc ny Minos en la sorte  
Que nos peres l'ont feint : tout cela se rapporte  
Aux Rois, aux Magistrats & à leurs Conseillers  
Qui gouuernent l'oreille, & sont leurs familiers.*

*Ta prudence, Hurault, ton service fidelle,  
Ta bonne conscience, & ton Roy qui t'appelle  
A l'honneur souverain (l'ayant bien meritè)  
T'ont donné des François l'extreme autorité.*

*La France maintenant qui tes actes regarde,  
Te baille nostre Prince & sa Couronne en garde :  
Tu l'as comme en depost, & de luy ce-pendant  
Aux peuples ses subiets tu t'es fait respondant.*

*HENRY ne faudra pas, Hurault fera la faute :  
Pource tu dois preuoir d'une prudence caute  
Quelle Ourse doit sa nef conduire par la mer.  
La vague en sa faueur ne se veut plus calmer,  
La tempeste l'a prinse, & faut beaucoup d'usage  
Pour la mener au port entiere du naufrage.*

*Il faut pour gouverner vn peuple diuisé  
Avoir comme tu as, l'esprit bien aduisé,  
Non pas à faire pendre ou rompre sur la rouë,  
Getter vn corps au feu dont la flamme se iouë,  
A faire vne Ordonnance, à bastir vn Edit,  
Qui souuent est du peuple en grondant contredit :  
C'est la moindre partie où pretend la iustice.  
La iustice (croy moy) c'est de punir le vice,  
Se chastier soy-mesme, estre iuge de soy,  
Estre son propre maistre & se donner la loy.*

*L'aime les gens de bien qui ont ce qu'ils meritent,  
Qui vers eux, vers le peuple & vers le Roy s'acquient,  
Qui au conseil d'estat ne viennent apprentifs,  
Qui donnent audience aux grans & aux petits.*

*Le n'aime point ces Dieux qui font trop grans leurs temples,  
Qui de simples mortels (trompez par faux exemples)  
Veulent, auant purger leurs propres passions,  
Commander aux humeurs de tant de nations,  
Et sans cesser de boire ainsi qu'un hydropique,  
S'en-graïsser seulement, & non la Republique,*

*Harpyes de Phinée, & qui ne font qu'un iour  
De Castor & Pollux attendre le retour.*

*le ne scaurois aimer l'impudente entreprise  
D'un qui cherche fortune en vne barbe grise,  
Et moins vn affetté, vn bateleur de Court,  
Qui la faueur mendie & suit le vent qui court:  
Mais i'aime vn homme droit, non seruiteur du vice,  
Qui presse sous les pieds la Court & l'avarice,  
Qui mieux voudroit mourir que corrompre la Loy,  
Qui aime plus l'honneur qu'un mandement de Roy,  
Qui laisse à sa maison la bonne renommée,  
Et non pas la richesse en vn coffre enfermée:  
Au reste galland homme, & qui prend son plaisir  
Quand sa charge publique en donne le loisir,  
Sans vouloir par faueur aux autres faire croire  
Que la corne d'un Buffle est vne dent d'yuoire.*

*Les fables ont chanté que iadis Phaëthon  
D'un petit poil folet se couurant le menton,  
Deceü d'un ieune cœur qui toute chose espere,  
Entreprist de guider le coche de son pere:  
Mais esblouy des rais qui sortoyent du Soleil,  
Veincu de trop de feu perdit force & conseil,  
Les brides luy coulant de ses mains esperdues,  
Tombant à bras espars, à iambes estendues,  
A cheueux renuersez, haussé de trop d'orgueil,  
Tomba dedans le Po son humide cercueil.*

*Autant en est d'Icare, & de ceux dont l'audace  
Trop pres du grand Soleil font eleuer leur saee.  
S'ils n'attrempent leur vol, tousiours mal à propos  
Leur plumage ciré s'escoule de leur dos.*

*Bien meilleure est souuent la mediocre vie  
Sans pompe, sans honneur, sans embusche d'enuie,  
Que de vouloir passer en grandeur le commun,  
Pour se faire la fable & le ris d'un chacun,*

*Et en pensant siller tous les Argus de France,  
Eux-mesmes s'aveugler en leur propre ignorance.*

*J'ay veu depuis trente ans un nombre d'impudens  
Rapetasseurs de loix courtizans & ardens,  
Qui sans honte, sans cœur, sans ame & sans poitrine  
Abboyent les honneurs à faire bonne mine.*

*Je les ay veus depuis de leur maître mocquez,  
Et des peuples au doigt notez & remarquez.  
Car bien que la faueur qui n'a point de ceruelle,  
Les poussaît en credit, le peuple qui ne celle  
Jamais la verité, sifflait de tous costez  
Le port imperieux de leurs fronts eshontez :  
« C'est autre chose d'estre, & vouloir aparoirstre.  
« L'estre gist en substance, apparoir ne peut estre  
« Qu'imagination : mais en la vanité  
« Souuent l'imaginer corrompt la verité.  
Beaucoup de Phaëthons se sont monstrez en France,  
Dont le vol trop hautain a fraudé l'esperance.*

*Des vieux siècles la fable est histoire aujourdhuy.  
La fortune (croy moy) n'est pas certain appuy,  
Mais la seule vertu qui les malheurs desfie,  
Qui s'arme des couteaux de la Philosophie,  
Qui monstre que la vie est le iouët du sort,  
Et que le vray bonheur ne vient qu'après la mort.*

*Ne vois-tu la plus part des hommes qui te suivent  
A ta table au chasteau ? c'est pour autant qu'ils vivent  
Sous ton autorité, non pour l'amour de toy.  
La faueur a tousiours tels corbeaux pres de soy.  
D'un visage hypocrite en mentant ils t'adorent :  
Où ceux qui de bon cœur t'estiment & t'honorent,  
Ne te pressent iamais, & ne veulent sinon  
Qu'un accueil de ta face, & celebrer ton nom.*

*Or toy qui es nourri par la mesme prudence,  
Aux affaires rompu dès ta premiere enfance,*

Ne seras Phaëthon, volant ainsi qu'il faut  
 Moyen entre deux airs ny trop bas ny trop haut :  
 Et sçauras discerner qui plus d'honneur merite  
 Ou l'homme non fardé, ou le faux hypocrite,  
 Ou celuy que la Muse allaite en son giron,  
 Ou celuy qui s'engendre ainsi qu'un potiron,  
 Qui force son destin, & d'une ame eshontée  
 Tantost à face basse, & tantost remontée.

Ils ont de tous costez des Palais diaprez,  
 Riches en leurs maisons de rentes & de prez,  
 Mangeant en vaisseaux d'or : mais ils ne peuvent faire  
 Qu'ils ne soyent (ce qu'ils sont) remarquez du vulgaire.

Le peuple ne voit pas telles gens de bon gré :  
 Car ils ne sont montez de degré en degré  
 Ainsi que tu as fait, qui as dès ton ieune âge  
 Au conseil des grans Rois fait ton apprentissage,  
 Sans desrober l'honneur, d'où bien souuent il faut  
 Que le ieune ignorant trebuche d'un grand sault.

Voy par nos Rois passez les dignitez données,  
 Et voy leurs officiers depuis quarante années :  
 Tu n'en verras un seul qui ait long temps duré,  
 Ou le peuple contre eux a tousiours murmuré,  
 Ou bannis de la Court ont senti la disgrâce.  
 « Quand la faueur ne rit, la fortune se passe.

Il ne faut pour cela comme un faux citoyen  
 Perdre force ny cœur, mais mettre tout moyen,  
 Artifice & sçauoir, mesme la propre vie  
 Pour aider, secourir & seruir sa patrie :  
 Et des presens des Rois ne se faut retirer  
 Quand ils nous sont donnez, sans trop les desirer.

La France s'esfouiſt qui tes vertus admire,  
 Dequoy tu veux guider le cours de son Nauire,  
 En lieu de voir l'orage & les vagues s'armer  
 Elle espere saint Herme apparoiſtre en la mer :

*Elle espere sous toy se soulager de tailles,  
Et plus de ses citez ne voir les funerailles,  
Et que l'Eglise en paix, sans payer tant de fois,  
Prira comme elle doit pour l'ame de nos Rois :  
Que les gens de sçauoir auront les benefices,  
Les hommes vertueux les grades des offices.  
Car nostre Prince est bon, tref-juste & trefchrestien,  
Qui fera tousiours bien s'on le conseille bien,  
Seul bon pere & bon Roy de sa France loyale.*

*Lors repeu d'ambrosie à la table royale,  
Tu seras le Commis de nostre Iupiter,  
Son prudent conseiller pour luy faire euitier  
Parmi les flots mondains les rades perilleuses,  
Et le mener au port des choses bien-heureuses :  
Puis comme vray Minos, par la splendeur des lois  
Tu seras aussi dit le Phare des François.*

*Les esprits Demi-dieux des Huraults tes ancestres,  
Qui ont eu comme toy nos Princes pour leurs maistres,  
Seront tous resiouis, quand ils oyront là bas  
Que tu suis leurs vertus, leurs gestes & leurs pas.  
Blois s'en resiouira, & ton fleuve de Loire,  
Et moy qui des François celebre la memoire,  
Chanteray nouveau Cygne en mes vers ta grandeur,  
Comme celuy qui vit ton humble seruiteur.*

FIN

DV SECOND BOCAGE ROYAL.







LES  
ECLOGVES ET MA-  
SCARADES DE PIERRE  
DE RONSARD.




A

TRESILLVSTRE ET TRESVERTVEVX  
PRINCE FRANCOIS DE FRANCE DVC  
D'ANIOV, FILS ET FRERE DE ROY.







## A TRESHAVT ET TRESVERTVEVX

PRINCE FRANÇOIS DE FRANCE,

Duc d'Anjou, fils & frere de Roy.

*Tandis que la vaillance, ame d'un bon courage,  
Vous pousse à regagner l'ancien heritage  
Des Princes vos ayeuls, & qu'ami du harnois  
Vous marquez plus auant les bornes des François,  
Aimant mieux la sueur, la poudre & la prouesse,  
Que rouïller au\* Plessis vos beaux ans de paresse :  
Paris me tient ici, où par l'impression  
L'enuoye mes enfans en toute nation  
Conceus de mon esprit par une ardente verue,  
Ainsi que Iupiter du sien conceut Minerue,  
M'ourant (sans emprunter de Vulcan le couteau)  
Par peine & par trauail mon fertile cerueau.  
Les enfans de l'esprit vn long siecle demeurent,  
Ceux des corps iournaliers ainsi que les iours meurent.*

*Je vous ay consacré mes Eclogues, à fin  
Que vostre beau renom ne prenne iamais fin,  
Non plus que les Pasteurs le suiet de mon liure.  
Les Rois & les Pasteurs ont mesme estat de viure :*

*L'un garde les troupeaux, par l'autre sont conduits  
Les peuples sous la loy de leurs sceptres reduits.  
Pource Homere, qui vit par longues renommées,  
Appelloit les grans Rois les Pasteurs des armées.*

*Dauid d'un simple Pastre, & de bas sang issu,  
Par les Prophetes oingt, au thrône fut receu :  
Puis desirant l'honneur où tout Monarque aspire  
Plus outre par la guerre augmenta son Empire.*

*Moyse d'un Bergerot devint Legislateur,  
Devint grand Capitaine, & comme vn grand pasteur  
Guida par les deserts ses troupes vagabondes,  
Et fist passer son peuple entre les murs des ondes.*

*Pource ne dedaignez ce vulgaire present :  
Et croyez, mon grand Duc, que rien n'est si duisant,  
Ny qui tant se conforme aux grandes seigneuries,  
Que l'estat des Bergers & de leurs Bergeries.*



## BERGERIE.

### LES PERSONNAGES.

Le premier joueur de lyre dirá le Prologue.

S'enfuit apres le Chœur des Bergeres.

### ENTREPARLEVRS.

Orleantin, Angelot, Nauarrin, Guifin, Margot.

### PVIS

Le premier Pasteur voyageur. Le second Pasteur voyageur.

### PVIS

Le second ioueur de lyre.

### PVIS

Deux Pasteurs dedans vn antre,

l'un representant la Roynie,

l'autre Marguerite, Duchesse de Sauoye.



## LE PREMIER IOVEVR DE LYRE

COMMENCE.

*Les chesnes ombrageux, que sans art la Nature  
Par les hautes forests nourrist à l'auanture,  
Sont plus doux aux troupeaux, & plus frais aux Bergers  
Que les arbres entez d'artifice és vergers :*

*Des libres oiselets plus doux est le ramage  
Que n'est le chant contraint du Rossignol en cage,  
Et la source d'une eau saillante d'un rocher  
Est plus douce au passant pour sa soif estancher,  
(Quand sans art elle coule en sa riue rustique)  
Que n'est une fontaine en marbre magnifique,  
Iallissant par effort en un tuyau doré  
Au milieu de la court d'un Palais honoré.  
Plus belle est une Nymphé en sa cotte agrafée,  
Aux coudes demy-nuds, qu'une Dame coiffée  
D'artifice soigneux, toute peinte de fard :  
Car tousiours la nature est meilleure que l'art.*

*Pource ie me promets que le chant solitaire  
Des sauvages Pasteurs doit d'auantage plaire  
(D'autant qu'il est naïf, sans art & sans façon)  
Qu'une plus curieuse & superbe chanson*

*De ces maistres enflez d'une Muse hardie,  
Qui font trembler le ciel sous une tragedie,  
Et d'un vers ampoullé d'une effroyable vois  
Redoublent le malheur des Princes & des Rois.*

*Escoutez donc, lecteurs, les musettes sacrées  
De nos Princes seigneurs de diuerses contrées,  
Qui font diuersement tout ainsi qu'il leur plaist  
D'amoureuses chansons sonner ceste forest.*

*Ce ne sont pas Bergers d'une maison champestre  
Qui menent pour salaire aux champs les brebis paistre,  
Mais de haute famille & de race d'ayeux :  
Qui portant en la main le Sceptre en diuers lieux  
Ont defendu l'Europe, & en toute assurance  
Engressé leurs troupeaux par les herbes de France.*

Le Chœur des Bergeres composé de douze, assises  
dedans vn Antre, fix d'une part, & fix de l'autre.

La premiere partie du costé dextre commence en chantant.

*Si nous voyons entre fleurs & boutons  
Paistre moutons,  
Et nos chéureaux pendre sus une roche,  
Sans que le loup sur le soir en approche  
De sa dent croche :  
Si liz florir & roses nous sentons,  
Voyans mourir toute herbe serpentine :  
Si nous voyons les Nymphes à minuit  
En leur simple vasquine  
Mener vn bruit  
Dansant aux bords d'une source argentine :  
Si nous voyons le siecle d'or refait,  
C'est du bienfait  
De la Bergere Catherine.*



L'autre partie fort de l'Antre du costé gauche  
en chantant.

*Quand nous irons baigner les grasses peaux  
De nos troupeaux  
Pour leur blanchir ergots, cornes & laines,  
Semant par tout les roses à mains pleines  
Sur les fontaines  
Et les ruisseaux :  
Quand nous ferons aux Nymphes le service,  
Et d'humble office  
Irons versant le sang d'un aiglelet  
Dedans du lait  
Pour sacrifice :  
Lors nous ferons de gazon un autel  
Tout couuert de branche myrtine,  
Et par un vœu solennel,  
De la Nympe Katherine  
Inuoquerons le renom eternal :  
Puis d'âge en âge  
En humble hommage  
Dedans son temple espandrons mille fleurs,  
Honorant son visage.  
Car tant qu'Amour se nourrira de pleurs  
Et de douleurs,  
Deuant nos yeux nous aurons son image.*

Le Chœur des Nymphes toutes ensemble se prend par  
la main, & dit ceste Chançon en dansant : puis se  
retirent en l'Antre d'où elles estoient forties.

*Nous auons veu d'un Prince la ieunesse,  
D'un Prince fils d'une grande Déesse,*

Dont la beauté, la grace & les valeurs  
 Ornent nos champs, comme au matin l'Aurore  
 Orne le ciel, quand son beau front colore  
 Tout l'Orient de perles & de fleurs.  
 Puissent ses ans croistre comme la rose  
 Qu'une pucelle en diligence arrose  
 Soir & matin pour s'en faire un bouquet,  
 Afin qu'un iour si hautement il croisse,  
 Que sur les Rois autant il apparaisse  
 Qu'une forest par-dessus un bosquet.  
 Au bon Carlin le ciel face la grace  
 De voir çà bas les enfans de sa race  
 Tout courbé d'ans des peuples adoré :  
 C'est ce Carlin promis des destinées,  
 Sous qui courent les meilleures années  
 Du vieil Saturne & du siecle doré.

Les quatre Bergers & la Bergere se presentent  
 ensemble fortans d'un Antre à part.

Orleantin commence.

Puis que le lieu le temps la saison & l'enuie  
 Qui s'eschaufent d'amour, à chanter nous conuie,  
 Chanton donques, Bergers, & en mille façons  
 A ces grandes forests apprenon nos chansons.  
 Icy de cent couleurs s'esmaille la prairie,  
 Icy la tendre vigne aux ormeaux se marie,  
 Icy l'ombrage frais va ses feuilles mouuant  
 Errantes çà & là sous l'haleine du vent :  
 Icy de pré en pré les soigneuses auettes  
 Vont baisant & suçant les odeurs des fleurettes :  
 Icy le gazouillis enroué des ruisseaux  
 S'accorde doucement aux plaintes des oyseaux,

*Icy entre les pins les Zephyres s'entendent.*

*Nos flutes ce-pendant trop paresseuses pendent  
A nos cols endormis, & semble que ce temps  
Soit à nous un Hyuer, aux autres un Printemps.*

*Sus donques en cest Antre ou deffous cest ombrage  
Difons vne chanson: quant à ma part, ie gage  
Pour le prix de celuy qui chantera le mieux,  
Vn cerf appriuoisé qui me suit en tous lieux.*

*le le defrobay ieune au fond d'une vallée  
A sa mere au dos peint d'une peau martelée,  
Et le nourry si bien que souuent le gratant,  
Le chatouillant touchant le peignant & flatant  
Tantost aupres d'une eau tantost sur la verdure,  
En douce ie tournay sa sauuage nature.*

*le l'ay tousiours gardé pour ma belle Thoinon,  
Laquelle en ma faueur l'appelle de mon nom:  
Tantost elle le baise, & de fleurs odoreuses,  
Enuironne son front & ses cornes rameuses,  
Et tantost son beau col elle vient enfermer  
D'un carquan enrichy de coquilles de mer,  
Où pend vne grand' dent de sanglier, qui ressemble  
En rondeur le Croissant qui se reïoint ensemble.*

*Il va seul & pensif où son pied le conduit:  
Maintenant des forests les ombrages il suit,  
Maintenant il se mire aux bords d'une fontaine  
Ou s'endort sous le creux d'une roche prochaine:  
Puis il retourne au soir, & gaillard prend du pain  
Tantost deffus la table, & tantost en ma main,  
Saute à l'entour de moy, & de sa corne essaye  
De coffer brusquement mon mastin qui l'abaye:  
Fait bruire son cleron, puis il se va coucher  
Au giron de Thoinon qui l'estime si cher.  
Il souffre que sa main le cheuestre luy mette  
Plein de houpes de soye, & si douce le traite*

*Que sur le dos priué le bast elle luy met.*

*Elle monte dessus & sans crainte le fait  
Marcher entre les fleurs, le tenant à la corne  
D'une main, & de l'autre en cent façons elle orne  
Sa croupe de bouquets & de petits rameaux :  
Puis le conduit au soir à la fraischeur des eaux,  
Et de sa blanche main seule luy donne à boire.*

*Or quiconques aura l'honneur de la victoire,  
Sera maistre du cerf, bien-heureux & contant  
De donner à s'amie vn present qui vaut tant.*

### Angelot.

*Le gage mon grand bouc, qui par mont & par plaine  
Conduit seul vn troupeau comme vn grand Capitaine :  
Il est fort & hardy, corpulent & puissant,  
Brusque, prompt, esueillé, sautant & bondissant,  
Qui grate en se ioiant de l'ergot de derriere  
(Regardant les passans) sa barbe mentonniere :  
Il a le front seure & le pas mesuré,  
La contenance fiere & l'œil bien assuré :  
Il ne doute les loups tant soient ils redoutables,  
Ny les mastins armez de colliers effroyables,  
Mais planté sur le haut d'un rocher espineux  
Les regarde passer, & si se mocque d'eux.*

*Son front est remparé de quatre grandes cornes :  
Les deux proches des yeux sont droites comme bornes  
Qu'un pere de famille esleue sur le bord  
De son champ qui estoit n'agueres en discord :  
Les deux autres qui sont prochaines des oreilles,  
En douze ou quinze plis se courbent à merueilles  
Comme ondes de la mer, & en tournant se vont  
Cacher dessous le poil qui luy pend sur le front.*

Dés la poincte du iour ce grand bouc ne sommeille,  
 N'attend que le Pasteur tout le troupeau refueille,  
 Mais il fait vn grand bruit dedans l'estable, & puis  
 En poussant le crouillet de sa corne ouure l'huis,  
 Et guide les chéureaux qu'à grands pas il deuance  
 Comme de la longueur d'une moyenne lance,  
 Puis les rameine au soir à pas contez & longs,  
 Faisant sous ses ergots poudroyer les sablons.

Jamais en nul combat n'a perdu la bataille,  
 Ruzé dès sa ieunesse en quelque part qu'il aille  
 D'emporter la victoire: aussi les autres boucs  
 Ont crainte de sa corne, & le reuerent tous.  
 Je le gage pourtant: voy comme il se regarde,  
 Il vaut mieux que le cerf que ta Thoinon te garde.

#### Nauarrin.

J'ay dans ma gibbeciere vn vaisseau fait au tour  
 De racine de buis, dont les anses d'autour  
 Par artifice grand de mesme bois sont faites,  
 Où maintes choses sont diuersement portraittes.

Presque tout au milieu du gobelet est peint  
 Vn Satyre cornu, qui de ses bras estreint  
 Tout au trauers du corps vne ieune bergere  
 Et la veut faire choir deffous vne fougere.

Son couurechef luy tombe, & a de toutes pars  
 A l'abandon du vent ses beaux cheueux espars:  
 Dont elle courroucée, ardante en son courage  
 Tourne loin du Satyre arriere le visage  
 Essayant d'eschapper, & de la dextre main  
 Luy arrache le poil du menton & du sein,  
 Et luy froisse le nez de l'autre main senestre,  
 Mais en vain: car tousiours le Satyre est le maistrre.

Trois petits enfans nuds de iambes & de bras  
 Taillez au naturel tous potelez & gras  
 Sont grauez à l'entour: l'un par viue entreprise  
 Veut faire abandonner au Satyre sa prise,  
 Et d'une infante main par deux & par trois fois  
 Prend celle du Bouquin, & luy ouure les doigts.

L'autre plus courroucé, d'une dent bien aigue  
 Tient ce Dieu rauisseur par la cuisse peluë,  
 Se tient contre sa gréue, & si fort l'a mordu  
 Que le sang sur la cuisse est par tout espandu,  
 Faisant signe du pouce à l'autre enfant qu'il vienne,  
 Et que par l'autre iambe à belles dents le tienne:  
 Mais cest autre garçon pour-neant supplié  
 Se tire à dos courbé vne espine du pié,  
 Assis sur vn gazon de verte pimperlle,  
 Sans se donner soucy de l'autre qui l'appelle.

Vne Genisse aupres luy pend sur le talon,  
 Qui regarde tirer le poignant aiguillon  
 De l'espine cachée au fond de la chair viue,  
 Et tellement est toute à ce fait ententiuë  
 Que beante elle oublie à boire & à manger:  
 Tant elle prend plaisir à ce petit berger,  
 Qui en grinsant des dents, tire à la fin l'espine,  
 Et tombe de douleur renuersé sur l'eschine.

Vn houbelon rampant à bras longs & retors,  
 De ce creux gobelet passamente les bors,  
 Et court en se pliant à l'entour de l'ouurage:  
 Tel qu'il est toutesfois, ie le mets pour mon gage.

Guifin.

Le mets vne houlette en lieu de ton vaisseau.  
 L'autre iour que i'estois assis pres d'un ruisseau,

Radoubant ma Musette avecques mon alesne,  
 le vy desur le bord le tige d'un beau fresne  
 Droit sans nœuds & sans plis: lors me leuant soudain  
 l'empoignay d'alegresse un goy dedans la main,  
 Puis couppant par le pied le tige armé d'escorce,  
 le le fis chanceler & trebucher à force  
 Desur le pré voisin estendu de son long:  
 En quatre gros cartiers i'en fis fier le tronc,  
 Au Soleil ie seichay sa verdeur consumée,  
 Puis i'endurcy le bois pendu à la fumée.

A la fin le baillant à lean, ce bon ouurier  
 M'en fist une houlette, & si n'y a chéurier  
 Ny berger en ce bois, qui ne donnast pour elle  
 La valeur d'un Toreau, tant elle semble belle.  
 Elle a par artifice un million de nouds  
 Pour mieux tenir la main, tous marquez de clous:  
 Et afin que son pied ne se gaste à la terre,  
 Vn cercle fait d'airain de tous costez le serre:  
 Vne poincte de fer le bout du pied soustient,  
 Rempart de la houlette, où le Pasteur se tient  
 Desur la iambe gauche, & du haut il appuye  
 Sa main, quand d'entonner sa Musette s'ennuye:  
 L'anse est faite de cuiure, & le haut de fer blanc  
 Vn peu long & courbé, où pourroient bien de ranc  
 Deux mottes pour ietter au troupeau qui s'esgare,  
 Tant le fer est creusé d'un artifice rare.

Vne Nympe y est peinte, ou vage nompareil,  
 Effuyant ses cheueux aux rayons du Soleil  
 Qui deçà qui delà desur le col luy pendent,  
 Et desur la houlette à petits flots descendent.

Elle fait d'une main semblant de ramasser  
 Ceux du costé senestre & de les retrouffer  
 En frisons sur l'oreille, & de l'autre elle allonge  
 Ceux du dextre costé mignotez d'une esponge



*Et tirez fil à fil, faisant entre ses doigts  
Sortir en pressurant l'escume sur le bois.*

*Aux pieds de ceste Nymphé est un garçon qui semble  
Cueillir des brins de ionc, & les lier ensemble  
De long & de trauers courbé sur le genou :  
Il les presse du pouce, & les serre d'un noud,  
Puis il fait entre-deux des fenestres egales,  
Façonnant vne cage à mettre des Cigales.*

*Loin derriere son dos est gisante à l'escart  
Sa panetiere enflée en laquelle vn Renard  
Met le nez finement, & d'une ruzē estrange  
Trouue le desieuner du garçon & le mange :  
Dont l'enfant s'apperçoit sans estre courroucé,  
Tant il est ententif à l'œuure commencé.*

*Si mettray-ie pourtant vne telle houlette  
Que i'estime en valeur autant qu'une musette.*

### Margot.

*le mettray pour celuy qui gaignera le prix,  
Vn Merle qu'à la glus en nos forests ie pris :  
Puis vous diray comment il fut serf de ma cage,  
Et comme il oublia son naturel ramage.*

*Vn iour en l'escoutant sifler dedans ce bois  
le receu grand plaisir du iargon de sa vois,  
Et de sa robbe noire & de son bec qui semble  
Estre peint de safran, tant iaune il luy ressemble :  
Et pource i'espiai l'endroit où il buuoit  
Quand au plus chaut du iour ses plumes il lauoit.*

*Or' en semant le bord de vergettes gluées,  
Où les premieres eaux du vent sont remuées,  
le me cachay sous l'herbe au pied d'un arbrisseau,  
Attendant que la soif feroit venir l'oiseau.*

Aussi tost que le chaud eut la terre enflammée,  
 Et que les bois fueilluz herissez de ramée  
 N'empeschoient que l'ardeur des rayons les plus chauds  
 Ne vinssent alterer le cœur des animaux,  
 Ce Merle ouvrant la gorge, & laissant l'aile pendre  
 Comme matté de soif, en volant vint descendre  
 Dessus le bord glué, & comme il allongeoit  
 Le col pour s'abreuver (pauvret qui ne songeoit  
 Qu'à prendre son plaisir!) se vit outre coustume  
 Engluer tout le col & puis toute la plume,  
 Si bien qu'il ne faisoit en lieu de s'en-voler  
 Sinon à petit bonds sur le bord sauteler.  
 Incontinent ie cours, & prompte luy desrobbe  
 Sa douce liberté, le cachant sous ma robbe:  
 Puis repliant d'osier un petit laberint,  
 De ma cage seulet prisonnier il deuint.  
 Et fust que le Soleil se plongeast dedans l'onde,  
 Fu<sup>t</sup> qu'il monstrast au iour sa belle tresse blonde,  
 Fust au plus chaud midy, alors que nos troupeaux  
 Estoiert en remaschant couchez sous les ormeaux,  
 Si bien ie le veillay parlant à son oreille,  
 Qu'en moins de quinze iours il fut une merueille:  
 Et luy fis oublier sa rustique chançon  
 Pour retenir par-cœur mainte belle leçon  
 Toute pleine d'amour: i'ay souuenance d'une,  
 Bien que l'inuention en soit assez commune,  
 Je la diray pourtant: car par là se verra  
 Si l'oiseau sera cher à celui qui l'aura.

Xandrin mon doux foucy, mon œillet, & ma rose,  
 Qui peux de mes troupeaux & de moy disposer:  
 Le soleil tous les soirs dedans l'eau se repose,  
 Mais Margot pour t'amour ne sçauroit reposer.

*Il en sçait mille encore & mille de plus belles  
Qu'il escoute en ces bois chanter aux pastourelles :  
Car il apprend par-cœur tout cela qu'il entend,  
Et bien qu'il me soit cher, ie le gage pourtant.*

### Les Chanfons des Pasteurs.

#### Orleantin.

*Quel poignant creue-cœur, quelle amere tristesse  
Vous tenoit, ô forests, quand la blonde ieunesse  
Qui sent tousjours la Bise entrer en son harnois,  
Sans crainte briganda le Sceptre des François ?  
Et s'enflant de l'espoir d'une fausse victoire  
Vint boire en lieu du Rhin les eaux de nostre Loire  
Contre un ieune orfelin, dont le pere indonté  
Auoit leur nation remise en liberté ?*

*En ce temps coniuré la France en despit d'elle  
Portoit desur l'eschine une gent si cruelle,  
Et voyant contre soy tant de guerriers nouveaux  
Soustenoit par despit les pieds de leurs cheuaux.*

*Phœbus se recula, & la saison chargée  
De neiges apperceut ceste troupe enragée  
Saccager nos maisons au milieu de l'Hyuer :  
Car iamais le Soleil ne voulut approuuer  
Si cruel brigandage, abhorrant que le vice  
Allast le front leué sans crainte de iustice.*

*Le peuple auoit perdu toute fidelité,  
Le citoyen estoit bany de sa cité,  
Les autels despoillez de leurs Saincts Tutelaires,  
Les temples ressembloient aux deserts solitaires  
Sans feu, sans oraison, & les Prestres sacrez  
Seruoient de proye aux loups sur l'autel massacrez.*

Nul tant maigre troupeau ne se trainoit sur l'herbe  
 Qu'il ne fust egorgé par l'ennemy superbe,  
 Qui d'une main barbare emportoit pour butin  
 Gras & maigre troupeau, & Pasteur & matin.

Les Faunes & les Pans, & les Nymphes compagnes  
 Se cachèrent d'effroy sous le creux des montagnes,  
 Abominans le sang & les glaiues tranchans,  
 Et nulle Deité n'habitoit plus aux champs.

La honte de mal-faire erroit entre les armes,  
 Et les harnois craquans sur les doz des gendarmes  
 Luiſoient de tous costez : bref il n'y auoit lieux,  
 Tant fussent eslongnez ny reculez des yeux,  
 Il n'y auoit montagne, ou pendante vallée,  
 Ou desert, ou forest de verd emmantelée,  
 Ou rocher si pointu, qui ne sentist la main  
 Et la barbare voix de l'aure Germain.

Les herbes commençoient à croistre par les rues,  
 Oisives par les champs se roüilloient les charues :  
 Car la terre irritée & dolente de voir  
 Ses fils s'entre-tuer, leur nioit son deuoir,  
 Et en lieu de donner des moissons abondantes,  
 Ne pouſſoit que chardons & qu'espines mordantes :

Voire & si du haut ciel quelque bon Dieu n'eust mis  
 Vn remors vergongneux au cœur des ennemis,  
 La France estoit perdue, & sa terre couuerte  
 De tant de gras troupeaux fust maintenant deserte,  
 Et banis de nos champs eussions esté contraints  
 Aller en autre part implorer autres Saints.

Mais un Bourbon qui prend sa celeste origine  
 Du tige de nos Rois, & vne Catherine  
 Ont rompu le discord, & doucement ont fait  
 Que Mars, bien que grondant, se voit pris & desfait.

Ceste Nymphé & Royale, & digne qu'on luy dresse  
 Des autels, tout ainsi qu'à Palés la Déesse,

*La premiere nous dit : Pasteurs, comme deuant  
Entonnez vos chansons & les ioüez au vent,  
Et aux grandes forests si longuement muettes  
R'apprenez les accords de vos vieilles musettes,  
Et menez desormais par les prez vos toreaux,  
Et dormez seurement sous le frais des ormeaux.*

*Elle nous rebailla nos champs & nos bocages,  
Elle nous fist rentrer en nos premiers herbages,  
En nos premiers courtils, & d'un front adoucy  
Chassa loin de nos parcs la peur & le souci.*

*Et pource tous les ans à iours certains de festes  
Donnans repos aux champs, à nous & à nos bestes,  
Luy ferons vn autel tout pareil qu'à lunon,  
Et long temps par les bois sera chanté son nom.*

*Les bois le chanteront & les creuses vallées,  
Et les eaux des rochers contre-bas deualées  
Le diront à l'enuy, & Echo qui l'oïra  
Si souuent rechanter, souuent le redira.*

*Il n'y aura forest où son nom sur l'escorce  
Des chesnes les plus beaux ne soit escrit à force,  
Et qu'à l'entour du nom ne pendent mille fleurs  
En mille chapelets de diuerses couleurs.*

*Il n'y aura Berger, soit qu'au matin il meine,  
Soit qu'il rameine au soir son troupeau porte-laine,  
Qui songeant & pensant & tramant vn discours  
Que d'elle seulement est venu son secours,  
Ne luy verse du miel, & qu'il ne luy nourrisse  
A part dans vne prée vne blanche Genisse :  
Ne luy sacre aux iardins vn Pin le plus espais,  
Vn ruisseau le plus clair, vn Antre le plus frais,  
Et luy offrant ses vœux, hautement ne l'appelle  
La mere de nos Dieux la Françoise Cybelle.*

*O Bergere d'honneur, les saules ne sont pas  
Aux aignelets sêurez si gracieux répas,*

Ny le Printemps n'est point si plaisant aux fleurettes,  
 Ny la rosée aux prez, ny les blondes auettes  
 N'aiment tant à baiser les Roses & le Thin,  
 Que i'aime à celebrer les honneurs de Catin.

### Angelot.

Quand le bon Henriot par fiere destinée  
 Avant la nuit venue accomplist sa journée,  
 Nos troupeaux preuoyans quelque futur danger  
 Languissoient par les champs sans boire ny manger :  
 Et beslans & crians & tapis contre terre  
 Gisoient comme frappez de l'esclat du tonnerre.  
 Toutes choses ça bas pleuroient en desconfort :  
 Le Soleil s'en-nua pour ne voir telle mort,  
 Et d'un cresprouillé cacha sa teste blonde,  
 Abominant la terre en vices si feconde.

Les Nymphes l'ont gemy d'une piteuse vois,  
 Les Antres l'ont pleuré, les rochers & les bois :  
 Vous le sçaez, forests, qui vistes és bocages  
 Les loups mesme le plaindre, & les Lions sauvages.

Ce fut ce Henriot qui remply de bon-heur  
 Remist des Dieux banis le seruice en honneur,  
 Et se monstrant des arts le parfait exemplaire,  
 Esleua iusqu'au ciel la gloire militaire.

Tout ainsi que la vigne est l'honneur d'un ormeau,  
 Et l'honneur de la vigne est le raisin nouveau,  
 Et l'honneur des troupeaux est le Bouc qui les meine,  
 Et comme les espics sont l'honneur de la plaine,  
 Et comme les fruiets meurs sont l'honneur des vergers,  
 Ainsi ce Henriot fust l'honneur des Bergers.

Quantesfois nostre soc depuis sa mort cruelle  
 A fendu les guerets d'une peine annuelle!

*Qui n'ont rendu sinon en lieu de bons espics  
Qu'Yraie, qu'Aubifoin, que Ponceaux inutiles!*

*Les herbes par sa mort perdirent leur verdure.  
Les roses & les lis prindrent noire teinture,  
La belle Marguerite en prist triste couleur,  
Et l'aillet sur sa fueille escriuit son malheur.*

*Pasteurs, en sa faueur semez de fleurs la terre,  
Ombragez les ruisseaux de pampres & de lierre  
Et de gazons herbus en toute saison verts  
Dressez luy son sepulcre & y grauez ces vers :*

*L'ame qui n'eut iamais en vertu son egale,  
Icy laissa son voile allant à son repos :  
Chefnes faites ombrage à la tombe Royale,  
Et vous Manne du ciel tombez dessus ses os.*

*O Berger Henriot, en lieu de viure en terre  
Toute pleine de peur, de fraudes & de guerre,  
Tu vis là haut au Ciel, où mieux que parauant  
Tu vois deffous tes pieds les astres & le vent,  
Tu vois deffous tes pieds les astres & les nues,  
Tu vois l'air & la mer & les terres cognues,  
Comme vn Ange parfait deslié du soucy  
Et du fardeau mortel qui nous tourmente icy.*

*O belle ame royale au Ciel la plus haussée.  
Qui te mocques de nous & de nostre pensée,  
Et des appas mondains qui tousiours font sentir  
Après vn court plaisir vn tres-long repentir.*

*Ainsi qu'un beau Soleil entre les belles ames  
Enuironné d'esclairs, de rayons & de flames  
Tu reluis dans le Ciel, & loin de toute peur  
Fait Ange, tu te ris de ce monde trompeur.*

*Où tu es, le Printemps ne perd point sa verdure,  
L'orage n'y est point, le chaud ny la froidure,*



Mais un air pur & net, & le Soleil au soir  
Comme icy ne se laisse en la marine choir.

Tu vois autres forests, tu vois autres riuages,  
Autres plus hauts rochers, autres plus verts bocages,  
Autres prez plus herbus, & ton troupeau tu pais  
D'autres plus belles fleurs qui ne meurent iamais.

Et pource nos forests, nos herbes & nos plaines,  
Nos ruisseaux & nos prez, nos fleurs & nos fontaines  
Se souuenant de toy, murmurent en tout lieu  
Que le bon Henriot est maintenant un Dieu.

Sois propice à nos vœux : le te feray d'yuoire  
Et de marbre un beau temple au riuage de Loire  
Où sur le mois d'Auril aux iours longs & nouueaux  
Le feray des combats entre les Pastoureaux  
A sauter, à luter sur l'herbe nouuellete,  
Pendant au prochain Pin le prix d'une musette.

Là sera ton lanot qui chantera tes faits,  
Tes guerres, tes combats, tes ennemis desfaits,  
Et tout ce que ta main d'invincible puissance  
Oza pour redresser la houlette de France.

Or adieu grant Berger : tant qu'on verra les eaux  
Soustenir les poissons, & le vent les oiseaux,  
Nous aimerons ton nom, & par ceste ramée  
D'âge en âge suiuant viura ta renommée.

Nous ferons en ton nom des autels tous les ans  
Verds de gazons de terre, & comme aux Egipans,  
Aux Faunes, aux Satyrs, te ferons sacrifice :  
Ton Perrot le premier chantera le seruice  
En long sourpelis blanc, couronné de cyprès,  
Et au son du cornet nous ferons aux forests  
Apprendre tes honneurs, afin que ta loüange  
Redite tous les ans, par les ans ne se change,  
Plus forte que la mort, fleurissante en tout temps  
Par ces grandes forests comme fleurs au Printemps.

## Nauarrin.

*Que ne retourne au monde encore ce bel âge  
Simple, innocent & bon, où le meschant usage  
De l'acier & du fer n'estoit point en valeur,  
Trop en prix maintenant à nostre grand malheur !*

*Hà! bel âge doré, où l'or n'auoit puissance!  
Mais doré pour-autant que la pure innocence,  
La crainte de mal-faire, & la simple bonté  
Permettoient aux humains de viure en liberté.*

*Les Dieux visiblement se presentoient aux hommes,  
Et Pasteurs de troupeaux par ces champs où nous sommes  
Au milieu du bestail ne faisoient que sauter,  
Apprenant aux mortels le bel art de chanter.*

*Les bœufs en ce temps là païsans parmy la plaine,  
L'un à l'autre parloient, & d'une voix humaine,  
Quand les malheurs venoient, predisoient les dangers,  
Et seruoient par les champs d'oracles aux Bergers :  
Il ne regnoit alors ny noise ny rancune,  
Les champs n'estoient bornez, & la terre commune  
Sans semer ny planter, bonne mere, apportoit  
Le fruit qui de soy-mesme heureusement sortoit :  
Les procez n'auoient lieu, la guerre ny l'enuie.*

*Les vieillards sans douleur sortoient de ceste vie  
Comme en songe, & leurs ans doucement finissoient,  
Ou mangeant de quelque herbe ils se raieunissoient :  
Jamais du beau Printemps la saison esmaillée  
N'estoit (ainsi qu'elle est) par l'Hyuer despouillée.*

*Tousiours du beau Soleil les rayons se voyoient,  
Et tousiours par les bois les Zephires s'oyoient :  
Tousiours le Rossignol chantoit par la verdure :  
Tous ces vilains oiseaux d'abominable augure,*

*Orfrayes & Choïans qui sont cornus au front,  
Sur le haut des maisons ne chantoient comme ils font.*

*La terre par le ciel encor' n'estoit maudite :  
Son sein ne produisoit encores l'Aconite,  
Vitriol, Arsenic, ny tous ces vegetaux,  
Ny le pront Argent-vif, principe des metaux,  
Ny tout ce que Pluton cache en son patrimoine,  
Ny des fortes poisons l'execrable Antimoine :  
Mais Myrrhe precieuse & l'Amome qui sent  
Si doucement au nez, & le Basme & l'Encent :  
Chacun se repaissoit deffous les frais ombrages  
Ou de laiët ou de glan ou de fraizes sauvages.*

*Car le bœuf laboureur, apres auoir sué  
Comme il fait sous le ioug, pour lors n'estoit tué,  
Ny la douce brebis qui les robbes nous donne,  
Sa gorge ne tendoit au couteau de personne.*

*O saison gracieuse! hélas, que n'ay-ie esté  
En vn temps si heureux en ce monde alaité?*

*Maintenant on ne voit que Circes, que Medées,  
Que Cacus eshontez aux mains outrecuidées,  
Que Busirs, Geryons, que Vertomnes nouveaux  
Qui se changent en Tygre, en Serpens, en oiseaux,  
Et coulent de la main tout ainsi qu'une Anguille,  
Et aux moissons d'autrui ont tousiours la faucille.*

*Il me souuient vn iour qu'aux rochers de Beart  
l'allay voir une vieille ingenieuse en l'art  
D'appeller les esprits hors des tombes poudreuses,  
D'arrester le Soleil & les sources ondeuses,  
Et d'enchanter la Lune au milieu de son cours,  
Et changer les Pasteurs en Tygres & en Ours :  
Elle preuoyant bien par magique figure  
Que la bonté faudroit en la saison future,  
Me conduit dans vn antre, où elle me montra  
Vn tableau qu'à main dextre attaché rencontra*

Et le lisant m'apprist dès enfance à cognoître  
 Le grand Pan des Bergers de toutes choses maistre :  
 Me monstra mille maux en ceste table escrits,  
 Dont les hommes seroient en peu de temps surpris :  
 La Guerre, le Discord, mainte Secte diuerse,  
 Et le monde esbranlé tomber à la renuerse.

Mais pren cœur (ce disoit :) car tant que les grands Rois  
 De la Gaule aimeront les Pasteurs Nauarrois,  
 Tousiours leurs grastroupeaux paistront sur les montagnes,  
 Le froment iaunira par leurs blondes campagnes,  
 Et n'auront iamais peur que les proches voisins  
 Emportent leurs moissons, ou coupent leurs raisins.

Pource, ieune Berger, il te faut dès enfance,  
 Aller trouuer Carlin le grand Pasteur de France,  
 Ta force vient de luy. Lors suiuant mon destin  
 En France ie vins voir le grand Pasteur Carlin,  
 Carlin que j'aime autant qu'une vermeille rose  
 Aime la blanche main de celle qui l'arrose,  
 Que les prez les ruisseaux, les ruisseaux la verdeur :  
 Car de son amitié procede ma grandeur.

### Guifin.

Houlette qui soulois és plaines Idumées  
 Comme troupeaux rangez conduire les armées,  
 Qui as regi Sicile & les monts Calabrois,  
 Et la ville, tombeau de la serene vois,  
 Maintenant ie te tiens de pere en fils laissée,  
 Qui dure n'as esté par les guerres cassée,  
 Et qui dois gouuerner encores deffous moy  
 Les troupeaux de Carlin mon Pasteur & mon Roy.

Icy les grands forests que les ans renouellent,  
 Icy, Carlin, icy les fontaines t'appellent,

Les Rochers & les Pins, & le Ciel qui plus beau  
 Se tourne pour complaire à ton regne nouveau :  
 Toute chose s'esgayé à ta belle venue,  
 L'air n'est plus attristé d'une fascheuse nuë,  
 La mer rit en ses flots, sans souffles est le vent,  
 Et les Astres au Ciel luisent mieux que deuant.

O grand Pasteur Carlin ornement de nostre âge,  
 Hasté toy d'aller voir ton fertile heritage,  
 Enuironne tes champs & conte tes Toreaux,  
 Et entens desormais les vœux des Pastoureaux.

Katerine ta mere à ta main dextre assise  
 D'un voyage si beau conduira l'entreprise,  
 Et te fera passer par tes villes, ainsi  
 Que passe par le Ciel un bel Astre esclarci.

L'honneur & la vertu iront deuant ta face,  
 Les fleuves, les rochers, les bois te feront place,  
 Et le peuple ioyeux en chantant semera  
 Tous les chemins de fleurs où ton pied passera :  
 Car tu es ce grand Roy que tant de destinées  
 Nous promettoient venir apres longues années  
 Pour gouverner ta France, & pour estre le Roy,  
 Mais plustost le recteur des peuples & de toy,

On dit quand tu nasquis, que les Parques fatales  
 Ayans fuseaux egaux & quenouilles egales,  
 Et non pas le filet & la trame qui est  
 De diuerse façon tout ainsi qu'il leur plaist,  
 Lettant sur ton berceau à pleines mains declofes  
 Des aillets & des lis, du safran & des roses,  
 Commencerent ainsi : Charles qui dois venir  
 Au monde, pour le monde en repos maintenir,  
 Et qui par le destin en France deuois naistre  
 Pour estre des grands Rois le Seigneur & le maisire,  
 Entens ce que le Ciel immuable en sa loy,  
 Et nos fuseaux d'airain ont deuידé de toy.

Deffous ton nouveau regne (auant que l'âge tendre  
 Laisse autour de ta léure vn crespé d'or espandre)  
 L'ambition, l'erreur, la guerre, & le discord  
 Par les peuples courront images de la mort :  
 On fera pour tenir les villes affeurées  
 Des fossez, des rampars, des ceintures murées,  
 Et l'horrible canon par le soulfre animé  
 Vomira de sa bouche vn tonnerre allumé.

On fera de rateaux des poignantes espées,  
 Les faucilles seront en lames detrampées,  
 L'auantureux Nocker d'auarice conduit  
 Ira voir sous nos pieds l'autre Pole qui luit.

D'autres Tiphys naistront, qui pleins de hardiesse  
 Eslliront par la France encore vne ieunesse  
 De Cheualiers errans dans Argon enfermez :  
 Encores on voirra des Achilles armez  
 Combatre deuant Troye, & les riuieres pleines  
 De carcasses de morts, rougir parmy les plaines.

Mais si tost que les ans en croissant t'auront fait  
 En lieu d'un iouuenceau, homme entier & parfait :  
 Lors la guerre mourra, les harnois & les armes,  
 Les querelles mourront, les plaintes & les larmes,  
 Et tout ce qui depend du vieil Siecle ferré  
 S'enfuira, donnant place au bel âge doré.

Les hommes reuoirront les Dieux venir en terre :  
 Le Ciel sans plus s'armer d'un grommelant tonnerre,  
 Sans plus faire la gresle & la neige couler,  
 Fera desur les champs la manne distiler.

Les Pins, vieux compagnons des plus hautes montagnes,  
 En naires creusez ne voirront les campagnes  
 De Neptune venteux : car sans voguer si loin  
 La terre produira toute chose sans soin,  
 Mere qui ne sera comme deuant ferüe  
 De rateaux aiguisez ny de soc de charüe.

*Car les champs de leur gré, sans toreaux mugiffans  
 Sous le ioug, se voirront de froment iauniffans.  
 Les moissons n'auront peur des faucilles voutées,  
 Ny l'arbre de Bacchus des serpettes dentées :  
 Car tousjours par les prez l'ondoyant ruisselet  
 Ira coulant de vin, de nectar & de laiët.*

*Le miel distillera de l'escorce des chesnes,  
 Et les roses croistront sur les branches des fresnes :  
 Le belier en paissant au milieu d'un pré vert  
 Se voirra tout le dos d'escarlate couuert,  
 De pourpre l'aignelet, & la barbe des chéures  
 Deuiendra fine soye à l'entour de leurs léures :  
 Les cornes des toreaux de perles, & encor  
 Le rude poil des boucs iaunira de fin or.*

*Bref tout sera changé, & le monde difforme  
 Des vices du iourd'huy, prendra nouvelle forme  
 Dessous toy, qui croistras pour auoir ce bonheur,  
 O Prince bien-heureux, d'estre son gouuerneur.*

*Ainsi sur ton berceau ces trois Parques chenuës  
 Chantoient, qui tout soudain s'en-volerent és nues :  
 Et alors les Pasteurs en l'escorce des bois  
 Grauerent leur chanson, afin que tous les mois  
 Aux flutes des bergers elle fust accordée,  
 Et parmy les forests dans les arbres gardée.*

### Margot.

*Soleil source de feu, haute merueille ronde,  
 Soleil, l'ame, l'esprit, l'œil, la beauté du monde,  
 Tu as beau t'esueiller de bon matin, & choir  
 Bien tard dedans la mer, tu ne sçauois rien voir  
 Plus grand que nostre France : & toy Lune qui erres  
 Maintenant desur nous, maintenant sous les terres,*



En allant & venant tu ne vois rien si grand  
Que nos Rois, dont le nom par le monde s'espand.

Il ne faut point vanter ceste vieille Arcadie,  
Ses rochers, ny ses Pins: encore qu'elle die  
Que ses Pasteurs sont naiz auant que le Croissant  
Fust au Ciel, comme il est, de nuit apparissant.  
La France la surpasse en antres plus sauvages,  
En rochers, en forests, en sources, en riuages,  
En Nymphes & en Dieux, qui benins sont contents  
De se monstrer à nous & nous voir en tout temps.

O bien-heureuse France abondante & fertile!  
Si l'encens & le basme en tes champs ne distile,  
Si l'Amome Asien sur tes riuës ne croist,  
Si l'Ambre sur les bords de ta mer n'apparoist:  
Aussi le chaud extrême & la poignante glace  
Ne corrompt point ton air: & la meschante race  
Des Dragons, des Lions si fierement marchans  
Comme ils font autre part, ne gaste point tes champs.

Que dirons-nous icy de la haute montagne  
D'Auuergne, & des moissons de la grassë Champagne,  
L'une riche en troupeaux, & l'autre riche en blé  
Au vœu des laboureurs d'usure redoublé?

Que dirons nous d'Anjou & des champs de Touraine,  
De Languedoc, Prouence, où l'abondance pleine  
De sillon en sillon fertile se conduit  
Portant sa riche Corne enceinte de beau fruit?

Que dirons-nous encor de cent mille riuieres  
Qui arrosent les pieds de tant de villes fieres,  
Dont le front nous fait peur en allant au marché,  
Tant il est dans le Ciel superbement caché?

C'est elle, dont le ventre en semence seconde  
A prodigue enfanté les miracles du monde,  
Ces braues Cheualiers aux armes prompts & chauds,  
Ces Trijans, ces Ogers, ces Rolands, ces Renauds,

*Et ce grand Charlemagne & Martel qui deuore  
Les ans par son renom : & toy Charles encore  
Qui crois pour deuenir la splendeur de nos Rois,  
A fin que toute Europe aille deffous tes lois.*

*C'est la mere fertile abondante en la race  
D'hommes masles esprits, qui dedaignant la masse  
De la terre brutale, ont poussé iusqu'aux cieux  
Non seulement le cœur, mais le soin & les yeux  
Aux Astres attachez par la Philosophie,  
Et du grand Iupiter ont gousté l'Ambrosie :  
Vn Turnebe, vn Budé, vn Vatable, vn Tusan,  
Et toy diuin Dorat, des Muses artizan,  
Qui premier anobly de l'honneur de ta peine,  
As aux peuples François detoupé la fontaine  
D'Helicon, & premier par tes vers as tourné  
Permesse en l'eau de Seine au bord non couronné  
De lauriers comme Eurote, ains d'hommes, dont l'enclume  
A forgé tant d'escrips par l'outil de la plume.*

*Adioustez à son los tant de palais dorez,  
Tant de marbres polis, à force elabourez,  
Entrailles des rochers, qui sont par artifices  
Maintenant l'ornement des royaux edifices.  
Iaignez à sa richesse & l'une & l'autre mer  
Qui viennent aux deux bords de la France escumer,  
Et grosses de batteaux apportent des Sauuages  
La nouvelle Amerique à nos premiers riuages.*

*Adioustez d'autre part tant d'arts qui sont meilleurs,  
Engraeurs & fondeurs, imagiers & tailleurs.  
Adioustez la Musique, adioustez la peinture,  
Voire tous les presens que la riche nature  
Et le ciel plus benin ont versé de leurs mains  
Pour embellir la terre & les pauvres humains.*

*Quelle Muse pourroit egaler tes merites ?  
C'est toy qui as nourry deux belles Marguerites,*

Qui passent d'Orient les perles en valeur :  
L'une vit dans le Ciel exempte du malheur  
Que ce siecle a rouillé de sectes & de noïses,  
Ayant regi long temps les terres Nauarroïses.

L'autre prudente & sage & seconde Pallas  
Fidele à son grand Duc, embellist de ses pas  
Les hauts monts de Sauoye, & comme vne Déesse  
Marche par le Piedmont au milieu d'une presse  
Qui court à grande foule, afin de faire honneur  
A ce sang de Vallois qui cause leur bon-heur.

Que dirons-nous encor de la maison de France ?  
Si un pauvre Pasteur se lamente en souffrance,  
S'il a perdu ses Bœufs, s'il est mangé des Ours,  
Ceste noble maison est seule son secours,  
Luy chasse loin de luy sa honte miserable,  
Luy redonne ses bœufs, ses champs & son estable,  
Ou le fait d'estranger domestique Pasteur,  
Luy oste de l'esprit la sombre pesanteur,  
Le rend riche & gaillard, & luy apprend à dire  
Par les hautes forests les chansons de Tityre.

Là fleurist la vertu, l'honneur & la bonté,  
La douceur y est iointe avec la grauité,  
Le desir de loüange & la peur d'infamie,  
Et tout ce qui depend de toute preud'homme.

Là les peres vieillards en barbe & cheueux gris  
Conduisent leurs enfans pour y estre nourris,  
Et pour mettre vne bride à leur ieunesse folle :  
Car de toute vertu la France est vne escolle.

le te saluë heureuse & seconde maison  
Qui fleuris en tout temps sans perdre ta saison,  
Mere de tant de Rois, mere de tant de villes,  
De haures & de ports & de terres fertilles.

Le bon-heur te conduise, & iamais le discord  
Ne pousse tes Bergers au peril de la mort :

*Mais unis d'amitié puissent desur leur teste  
Des ennemis veincus r'apporter la conquête,  
Et puissent en tous lieux se monstrier seruiteurs  
De leur Prince Carlin le maistre des Pasteurs :  
Afin que pour iamais nostre France ressemble  
Aux troupeaux bien unis qui se serrent ensemble.*

*Tousiours ta terre soit abondante en froment :  
La Nielle que l'air en Esté va formant,  
Ne ronge tes espics, & iamais la gelée  
N'enuoye à tes brebis ny tac ny clauelée :  
La famine & la peste aille bien loin de toy,  
Et bien-heureuse vy deffous vn si bon Roy.*

### Le premier Pasteur voyageur.

*L'ardeur qui la ieunesse échaufe de loüange,  
M'a fait errer long temps en mainte terre estrange,  
Pour voir si le merite egaloit le renom  
Des Rois, dont i'ay cognu les faces & le nom.  
I'ay pratiqué leurs mœurs, leurs grandeurs, leurs alteſſes,  
Leurs troupeaus infinis, leurs superbes richesses,  
Leurs peuples, leurs citez, & les diuerſes lois  
Dont se font obeir les Princes & les Rois.*

*le vy premierement le grand Pasteur d'Eſpagne :  
Aſſiſe à son coſté i'apperceu ſa compagne,  
Qui prend ſa noble race & ſon eſtre ancien  
Des Vallois deſcendus du noble ſang Troyen,  
Fille de Henriot, ſœur de Carlin, & fille  
De Catin, le ſourjon de ſi noble famille.*

*le vy ce demy-Dieu en Eſpagne adoré,  
le le vy d'Orient tellement honoré,  
Que pour riche preſent ſon Inde luy enuoye  
Cent vaiſſeaux tous les ans chargez de iaune proye.*

le le vy craint, aimé, reueré, redouté,  
 Plein d'une ame gaillarde & d'un cœur indonté,  
 Roy de tant de troupeaux que ie n'en sçay le conte!  
 Car un nombre si grand la memoire surmonte.

Mais le plus grand plaisir dont ie repeu mon cœur,  
 Ce fut quand ie cognu que ce Prince veinqueur  
 Des hommes & de soy, aimoit tant nostre France,  
 Qu'il soustenoit Carlin appuy de son enfance,  
 Et qu'en lieu de surprendre ou de raurir ses biens,  
 Bon frere luy gardoit ses suieets anciens,  
 Luy prestoit ses guerriers, le couuoit sous son aile,  
 Tant vaut une amitié quand elle est fraternele.

Iamais pour ce bien-fait ne puisses-tu grand Roy  
 Sentir se rebeller tes peuples contre toy,  
 Et iamais en ton liēt ne puisse arriuer noise,  
 Puisque tu es si bon à la terre Françoisse!

Passant d'autre costé i'allay voir les Anglois,  
 Region opposée au riuage Gaulois :  
 le vy leur grande mer en vagues fluctueuse,  
 le vy leur belle Royne honnestes & vertueuse :  
 Autour de son Palais ie vy ces grands Mylords  
 Accorts, beaux & courtois, magnanimes & forts :  
 le les vy tous aimer la France leur voisine :  
 le les vy reuerer Carlin & Catherine,  
 Ayant iuré la paix, & ietté bien-auant  
 La querelle ancienne aux vagues & au vent.

le vy des Escossois la Royne sage & belle,  
 Qui de corps & d'esprit ressemble une immortelle :  
 l'approchay de ses yeux, mais bien de deux Soleils,  
 Deux Soleils de beauté qui n'ont point leurs pareils :  
 le les vy larmoyer d'une claire rosée,  
 le vy d'un beau crystal sa paupiere arrosée  
 Se souuenant de France, & du Sceptre laissé,  
 Et de son premier feu comme un songe passé.

*Qui voirroit en la mer ces deux Roynes fameuses  
En beauté, trauerfer les vagues escumeuses,  
Certes on les diroit, à bien les regarder,  
Deux Venus qui voudroient au riuage aborder.*

*Face bien tost le Ciel que leur ieunesse esclose  
Comme vne belle fleur, ne ressemble à la rose  
Qui fanist sur l'espine, & languissante pend  
Sa teste, & son parfum inutile respend,  
Perdant odeur & teint & grace printaniere  
Pour n'estre point cueillie en sa saison premiere.  
Quand vne tendre vigne est pendante aux ormeaux,  
En force & en vigueur elle estend ses rameaux,  
Fait ombrage aux Pasteurs : mais si rien ne la serre,  
Sans force & sans vigueur elle languist à terre,  
Rampe desur la place, & d'un bras flestrissant  
En soy-mesme languist, le mespris du passant.*

*Soient doncques à deux Rois leurs ieuneses liées  
D'un amo<sup>r</sup> eternal, afin que mariées,  
Roynes sans perdre temps enfantent d'autres Rois,  
Puis que leurs Maiestez aiment tant les François.*

### Le second Pasteur voyageur.

*La mesme ardeur de gloire, & la bouillante enuie  
De voir les estrangers, m'a fait voir l'Italie,  
Terre grasse & fertile, où Saturne habitoit  
Quand le peuple innocent de glan se contentoit.*

*J'ay veu le grand Pasteur de tant d'ames Chrestiennes,  
J'ay veu dedans vn lac les barbes anciennes  
De ces peres Bergers qui gouuernent sous eux  
Par prudence & vertu vn peuple si heureux.*

*J'ay veu le grand Berger de la belle Florence,  
Florence qui se dit de Catin la naissance :*

*l'ay veu le fleuve d'Arne & le Mince cornu,  
 Qui est par le berceau de Tityre cognu,  
 Où le Duc Mantouan ennemy de tout vice  
 Aux peuples ses suiets administre iustice.  
 De là m'en retournant contre-mont, i'allay voir  
 Le beau Palais d'Vrbain, escolle de sçavoir.*

*le vy des Ferrarois le Pasteur & le maistre,  
 Qui se vante d'auoir de Roger pris son estre :  
 le vy sa forte ville & le Pau menaçant,  
 Qui va comme vn Toreau par les champs mugissant :  
 Grands Pasteurs, grands Bergers, qui ont la foy iurée  
 Au grand Prince Carlin d'eternelle durée,  
 Qui aiment sa grandeur, & qui d'un cœur loyal  
 Redressent sa Couronne & son Sceptre Royal.*

*De là m'en retournant ie pris ma droite voye  
 Par les champs de Pledmont, par les monts de Sauoye,  
 Où ie vy ce grand Duc qui n'a point de pareil  
 Sous la voute du Ciel, en armes ny conseil,  
 Animé d'une force & prompte & vigoreuse,  
 Ayant pris des Saxons sa race genereuse,  
 Et du Ciel son esprit, qui magnanime & chant  
 A tousiours pour suiет vn penser grand & haut.*

*A son dextre costé ie vy sa femme assise,  
 Fleur & perle d'honneur que nostre siecle prise,  
 La tante de Carlin que la Grace a nourry,  
 La fille de François, & la sœur de Henry,  
 La mere des vertus qui iustement merite  
 D'estre ensemble vne perle & vne Marguerite.*

*Bien loin de sa maison soit malheur & meschef :  
 Le doux miel sous ses pieds, la manne sur son chef  
 Puisse tousiours couler, & les lis & les roses  
 Au plus froid de l'hyuer soyent pour elles declofes  
 Aux buissons de Piedmont : & en lieu d'un Torrent  
 Le laiçt par la Sauoye aille tousiours courant*



*Murmurant son renom, puis que tant elle estime  
Les chansons des Pasteurs, leurs flutes & leur rime.*

### L'autre Berger voyageur.

*Que faites-vous ici, Bergers qui surmontez  
Les Rossignols d'Auril quand d'accord vous chantez  
Que faites-vous ici ? vous perdez ce me semble  
La parole & le temps à rioter ensemble :  
L'un sur l'autre n'aura le pris victorieux,  
Estans également les chers mignons des Dieux.  
Apollon & Palés & Pan vous fauorisent,  
Et tous à qui mieux mieux vous honorent & prisent :  
Et pource abandonnez vos prix & vos discords,  
Et venez escouter les merueilleux accords  
De deux peres Bergers, qui deffous vne roche  
Vont dire vne chanson dont Tityre n'approche.*

*Tous les Bergers des champs y courent d'un grand pas :  
Tous les chéuriers des monts en descendent à bas,  
Et les plus grans rochers abaissent les oreilles  
Sur l'Antre pour ouyr de si douces merueilles.*

*Maintenant en cherchant mon Belier adiré,  
J'ay veu les deux Bergers dans l'Antre retiré,  
Qui ont desia la flute à la léure pour dire  
le ne sçay quoy de grand qu'Apollon leur inspire.*

*Venez donq' les ouir sans disputer en vain,  
Ostez de vos flageols & la bouche & la main :  
Vous estes tous unis d'amitié mutuelle,  
Puis la paix entre vous vaut mieux que la querelle.*

## Le Chœur des Bergeres.

*J'ay songé sur la mi-nuit  
Ceste nuit  
Quand le doux sommeil nous lie,  
Que mille Cygnes chantoient,  
Qui sortoyent  
Du costé de l'Italie.  
J'en ay veu d'autres apres  
Plus espais  
Venir du costé d'Espagne,  
Et d'autres forts & puissans  
Blanchiffans  
Du costé de l'Allemagne :  
Puis en volant tout en rond  
Sur le front  
De Carlin luy faire feste,  
Et doucement le flatant  
En chantant  
Luy predire vne conqueste.  
J'ay veu presque en mesme temps  
Le Printemps  
Florir deux fois en l'année :  
Dieu ces songes nous permet,  
Qui promet  
Quelque bonne destinée.*

## Le second ioueur de Lyre.

*Vn iour au mesme lieu où nous sommes ici,  
Deux Bergeres ayans de leur race souci,*

Bergeres de renom, de famille excellente,  
 L'une mere du Roy, l'autre du Roy la tante,  
 L'une venant de France & l'autre de Piemont,  
 Se trouuant en cest Antre où ces deux Pasteurs sont,  
 Apres auoir long temps discoursu de grans choses,  
 Qui aux entendemens de tous hommes sont closes,  
 Appellerent Carlin leur petit nourriçon,  
 Et luy firent par ordre vne belle leçon.

Or d'autant que leurs mots contenoient la doctrine  
 Qu'il faut qu'un ieune Roy retienne en sa poitrine,  
 Portant dedans le cœur leur precepte imprimé,  
 S'il veut estre des siens bien craint & bien aimé :

Les Pasteurs d'ici pres, pour ne perdre la gloire  
 De tels enseignemens si dignes de memoire,  
 Par un vœu solennel aux Dieux ont ordonné  
 Qu'en ce mois tous les ans à iour déterminé  
 Courrant l'Antre de fleurs & les prez de carolles,  
 Deux Pasteurs rediroient mot à mot les parolles,  
 Qu'autrefois à Carlin ces Bergeres ont dit,  
 Et que la viue Echo par ces bois respendit :  
 A fin que des Pasteurs la ieunesse nouvelle  
 Apprenne tous les ans vne leçon si belle.

Or ils vont commencer, s'il vous plaist les ouir,  
 D'enseignemens si beaux vous pourrez resiouir,  
 Et vous couchant au soir pres du feu les redire  
 A vos ieunes enfans à fin de les instruire :

« Car ny large moisson, ny troupeaux engraissez,  
 « Ny bleds dans les greniers l'un sur l'autre amassez  
 « Ne valent le sçauoir, de l'esprit l'heritage :  
 « Par la seule leçon le Pasteur deuient sage.

## Le premier Pasteur.

*Puis-que tu es, mon fils, de tant de Pasteurs maître,  
Que Dieu dans ton herbage a mis tant de troupeaux,  
Il ne faut seulement sçavoir les mener paître,  
Sçavoir les engraisser, sçavoir tondre leurs peaus.*

## Le second Pasteur.

*Ce n'est rien de guider mille bœufs en pasture,  
Il faut les conseruer & en auoir souci,  
Il faut de ton bestail cognoistre la nature,  
Corriger tes Bergers, te corriger aussi.*

## I.

*Quand les petits Bergers font aux champs vne faute,  
« Petite elle ne tire vn repentir apres :  
« Mais des maîtres Pasteurs elle deuient si haute,  
« Qu'elle passe en grandeur les plus hautes forests.*

## II.

*Et pource, mon Nepueu, il faut dès ta ieunesse  
Apprendre la vertu, pour guide la suiuant :  
« C'est vn ferme tresor qui les hommes ne laisse,  
« Les autres biens mondains s'en-volent comme vent.*

## I.

*Pour viure bien-heureux, crain Dieu sur toute chose :  
Seul il faut l'adorer & au cœur l'imprimer,  
Et le prier au soir quand le Soleil repose,  
Et dès l'Aube du iour quand il sort de la mer.*

## II.

« Le seul commencement & la fin de science,  
 « Est craindre le Seigneur, & maintenir la foy  
 Des peuples esendus sous ton obeïssance,  
 Qui sont enfans de Dieu aussi bien comme toy.

## I.

Sois paré de vertu, non de pompe Royale :  
 « La seule vertu peut les grans Rois decorer.  
 « Sois Prince liberal : toute ame liberale  
 « Attire à soy le Peuple, & se fait honorer.

## II.

Porte desur le front la honte de mal-faire,  
 Aux yeux la gravité, & la clemence au cœur,  
 La iustice en la main, & de ton aduersaire,  
 Fust il moindre que toy, ne sois iamais moqueur.

## I.

Rens le droit à chacun, c'est la vertu premiere  
 Qu'un Roy doit obseruer : sois courageux & fort :  
 « La force du courage est la viue lumiere  
 « Qui nous fait mespriser nous-mesmes & la mort.

## II.

Ne sois point arrogant, vanteur ne temeraire,  
 Yrongne, opiniastre & superbe à la main,  
 « Mutin, chagrin, despit : le Prince debonnaire  
 « Doit estre gracieux amiable & humain.

I.

*Mesprise la richesse, & toutesfois desire  
Comme Roy valeureux d'augmenter ton bonheur,  
Et par armes un iour agrandis ton Empire  
Moins pour auoir du bien que pour auoir honneur.*

II.

*Sois ferme en ta parole, & de vaine promesse  
N'abuse tes suiets, & aux trompeurs ne croy :  
Celuy qui par le nez ainsi qu'un Ours se laisse  
Mener par les flatteurs, n'est digne d'estre Roy.*

I.

*Sois tardif à courroux, & point ne te conseille  
Par ieunes esuentez qui n'ont appris le bien :  
Mais honore les vieux & leur preste l'oreille,  
Et seul de ton cerueau n'entreprends iamais rien.*

II.

*Sois constant & hardi aux fortunes pressées,  
Magnanime au peril, prompt d'esprit & de main :  
Et iugeant l'auenir par les choses passées  
Serre le temps present, n'attens au lendemain.*

I.

*Chasse l'Oisiveté la mere de tout vice,  
Et grand Seigneur appren les mestiers d'un soldart :  
Sauter, luter, courir, est honneste exercice,  
Bien manier cheuaux & bien lancer le dart.*

## II.

*Exerce ton esprit aux choses d'importance,  
Aux affaires qui sont de ton priué Conseil,  
« L'esprit en est plus sain : l'oiseuse negligence  
« Sille les yeux des Rois d'un malheureux sommeil.*

## I.

*Tu dois cognoistre ceux qui te font du seruice,  
Les aimer les cherir pour leur fidelité :  
Et à fin qu'apres toy honorer on les puisse,  
Hausse-les aux honneurs comme ils ont merité.*

## II.

*Par flatteurs, par menteurs & par femmes ne donne  
Ny presens ny estats, malheur s'en est suiui :  
Que la seule vertu seulement on guerdonne :  
Si tu le fais ainsi, tu seras bien serui.*

## I.

*Ne renuerse iamais l'ancienne police  
Du pays où les loix ont fleuri si long temps :  
Ce n'est que nouueauté qui couue vne malice :  
Si vn s'en resjouist, mille en sont mal-contens.*

## II.

*Iamais, si tu m'en crois, ne souffre par la teste  
De ton peuple ordonner tes statuts ny tes lois :  
« Le peuple variable est vne estrange beste,  
« Qui de son naturel est ennemi des Rois.*



## I.

*N'offense le commun pour aider à toy-mesme,  
Des grans & des petits sois tousiours le support :  
« La propre conscience est une genne extrême,  
« Quand nous auons peché, qui tousiours nous remord.*

## II.

*Et bref, mon cher Nepueu, pour regner prens exemple  
Aux Rois tes deuanciers, Princes cheualeux :  
Si leurs faits pour patron ta ieunesse contemple,  
Tu seras non pas Roy, mais un Dieu bien-heureux.*

## Le Chœur des Bergeres.

*Tout ainsi qu'une prairie  
Est portraite de cent fleurs,  
Ceste neuue Bergerie  
Est peinte de cent couleurs.  
Le Poëte ici ne garde  
L'art de l'Eclogue parfait :  
Aussi la Muse regarde  
A traiter un autre fait.  
Pource Enuie si tu pinces  
Son nom de broquars legers,  
Tu faux : car ce sont grans Princes  
Qui parlent, & non Bergers.  
Il mesprise le vulgaire,  
Et ne veut point d'autre loy  
Sinon la grace de plaire  
A ses Musés & au Roy.*

## ECLOGVE II.

## LES PASTEVRS.

Aluyot &amp; Frefnet.

*Paiſſez douces brebis, paiſſez ceſte herbe tendre,  
Ne pardonnez aux fleurs : vous n'en ſçauriez tant prendre  
Par l'eſpace d'un iour, que la nuit enſuiuant  
Humide n'en produiſe autant qu'au-parauant.*

*De là vous deviendrez plus graſſes & plus belles,  
L'abondance de lait enflera vos mammelles,  
Et ſuffirez aſſez pour nourrir vos aigneaux,  
Et pour faire en tout temps des fromages nouveaux.  
Et toy mon chien Harpaut ſeure & fidele garde  
De mon troupeau camus, leue l'œil & pren garde  
Que ie ne ſois pillé par les loups d'alentour,  
Ce-pendant qu'en ce bois ie me plaindray d'Amour.*

*Or-ſus mon Aluyot, allon ie te ſupplie  
Soulager en chantant le ſoin qui nous ennuye,  
Allon chercher le frais de cet antre mouſſu,  
Creuſé dedans le flanc de ce tertre boſſu :  
Et là nous ſouuenans de nos cheres amies,  
Qui ſont de nos langueurs doucement ennemies,  
Tous deux en deuifant par ordre nous dirons  
Nos plaintes aux rochers qui ſont aux enuirs,  
A fin que quelque vent rapporte à leurs oreilles  
Les ſoucis que nous ſont leurs beautez nompareilles.*

Nous sommes arriuez dedans l'Antre sacré :  
 Je m'en vay le premier (s'ainsi te vient à gré)  
 Te chanter ma complainte : ayant ouy la mienne,  
 Secondant ma douleur, tu me diras la tienne.

## Fresnet.

Ma belle Marion, de qui le souuenir  
 Me fait comme Niobe en rocher deuenir,  
 Pour l'absence de toy ie hay ma propre vie,  
 Qui desdaignant mon cœur, maugré moy t'a suiui,  
 Pour loger en tes yeux, qui ores de si loin  
 Me remplissent le cœur de tristesse & de join.

Rien ne m'est agreable apres si longue absence,  
 L'espere sans espoir : la peur & l'esperance  
 Combatent ma raison, mais l'amoureuse peur  
 Assaut ma patience, & veinc tousiours mon cœur.

Rien ne me resiouist : soit que la belle Aurore  
 De roses & d'œillets l'Orient recolore,  
 Ou soit que le Soleil pende en bas ses cheuaux,  
 Il voit mes yeux en pleurs & mon cœur en trauaux.  
 Quand le soir est venu, ie conte ma fortune  
 Maintenant aux forests, maintenant à la Lune :

l'erre de bois en bois, car en lieu de dormir  
 Impatient d'amour ie ne fais que gemir :  
 Ou si le long trauail de fortune m'assomme,  
 Et me fait par contrainte aux yeux couler le somme,  
 Cent fantosmes diuers s'apparoissent à moy,  
 Qui me font en dormant trembler le cœur d'effroy :  
 Je refuse, ie discours, ie bâille, ie m'allonge :  
 Tantost son beau portrait qui me reuiet en songe,  
 Me fuit, me fuit, me tient, & en le poursuuant  
 Pour le prendre en mes bras, ie ne pren que du vent.

*C'est grand cas que d'aimer ! vne amoureuse playe  
Ne se guarist iamais pour chose qu'on essaye :  
Plus on la veut guarir, & plus le souuenir  
La fait tousiours plus viue en nos cœurs reuenir.*

*L'ay beau me promener au trauers d'un bocage,  
L'ay beau paistre mes bœufs le long d'un beau riuage,  
L'ay beau voir le Printemps desur les arbrisseaux,  
Ouyr les Rossignols, gazouiller les ruisseaux,  
Et voir entre les fleurs par les herbes menues  
Sauter les aignelets sous leurs meres cornuës,  
Voir les boucs se choquer, & tout le long du iour  
Voir les beliers ialoux se battre pour l'amour.*

*Ce plaisir toutefois non-plus ne me contente  
Que si du froid Hyuer la sifflante tourmente  
Auoit terni les champs, & en mille façons  
Rué dessus les fleurs la neige & les glaçons,  
Et que les saints troupeaux de cent Nymphes compaignes  
Ne vinssent plus de nuit dancier en nos montaignes.*

*Bien que mon parc foisonne en vaches & toreaux,  
Et que sous ma faueur viuent cent pastoureux  
Qui sçauent tous iouer des douces Cornemuses,  
Des Nymphes les mignons, des Faunes & des Muses :  
Bien que mon doux Flageol sur tous le mieux appris,  
Quand il me plaist chanter, seul emporte le pris :  
Bien qu'en nulle saison le doux lait ne me faille,  
L'une part deuient crespme, & l'autre part se caille,  
L'autre deuient fromage, vn mol, l'autre seiché,  
Le mol est pour manger, le sec pour le marché :*

*Et bien que mes brebis ne soyent iamais brehaignes,  
Bien que mille troupeaux bestent par les campagnes,  
Je voudrois n'auoir rien, Marion, sinon toy  
Que ie voudrois pour femme en mon antre chez moy,  
Et parmi les forests loin d'honneur & d'enuie,  
Vser en te baisant le reste de ma vie.*

*L'orage est dangereux aux herbes & aux fleurs,  
La froideur de l'Autonne aux raisins qui sont meurs,  
Les vents aux bleds d'Auril : mais l'absence amoureuse  
A l'amant qui espere est tousiours dangereuse.*

*l'ay pour maison vn antre en vn rocher ouuert,  
De Lambrunche sauvage & d'Hierre couuert,  
Qui deçà qui delà leurs grans branches espandent,  
Et droit sur le milieu de la porte les pendent.  
Vn Meslier nouailleux ombrage le portail,  
Où sans crainte du chaud remasche mon bestail :  
Du pié naist vn ruisseau, dont le bruit delectable  
S'enrouë entre-cassé des cailloux & du sable,  
Puis au trauers d'un pré serpentant de maint tour,  
Arrouse doucement le lieu de mon seiour.*

*De là tu pourras voir Paris la grande ville,  
Où de mes pastoureaux la brigade gentille  
Porte vendre au marché ce dont ie n'ay besoin,  
Et tousiours argent frais leur sonne dans le poing.*

*Là s'il te plaist venir, tu seras la maistresse,  
Tu me seras mon tout, ma Nymphe & ma Deesse,  
Nous viurons & mourrons ensemble, & tous les iours  
Vieillissant nous verrons raieunir nos amours :  
Tous deux nous estendrons dessus vn mesme ombrage,  
Tous deux nous menerons nos bœufs en pasturage  
Dés la pointe du iour, les remenant au soir  
Quand le Soleil tombant en l'eau se laisse choir :  
Tous deux les menerons quand le Soleil se couche,  
Et quand de bon matin il sort hors de sa couche :  
A toute heure en tous lieux ensemble nous irons,  
Et dessus mesme loge ensemble dormirons.*

*Puis au plus chaud du iour, estans couchez à l'ombre,  
Après auoir conté de mes troupeaux le nombre,  
Pour chasser le sommeil, ie diray des chansons  
Que pour toy ie compose en diuerses façons.*

Alors toy doucement sur mes genoux assise,  
 Maintenant tu ferois d'une douce feintise  
 Semblant de sommeiller, maintenant tu ferois  
 Semblant de t'esueiller, puis tu me baiserois,  
 Et presserois mon col de tes bras, en la sorte  
 Qu'un orme est enlacé d'une vigne bien forte :  
 Maintenant tu romprois de ton baiser mon chant,  
 Maintenant tu irois de tes léures cherchant  
 A m'oster le flageol hors de la léure mienne,  
 Pour y mettre en son lieu le coural de la tienne :  
 Puis tu me baiserois, & me voulant flater  
 Tu voudrois quelquefois avecque moy chanter :  
 Quelquesfois toute seule, & comme languissante  
 Le te verrois mourir en mes bras pallissante,  
 Puis te resusciter, puis me faire mourir,  
 Puis d'un petit sou-ris me venir secourir,  
 Puis en mille façons de tes léures vermeilles  
 Me rebaiser les yeux, la bouche & les oreilles,  
 Et coup sur coup ietter des pommes dans mon sein,  
 Que i'aurois & d'œillets & de roses tout plein,  
 Pour reietter au tien qui maintenant pommelle  
 Comme fait au Printemps vne pomme nouvelle :  
 Sein où logeoit Amour, qui le trait me tira  
 Au cœur, qui autre nom depuis ne souspira  
 Que le tien Marion, tesmoin en est ce Chesne,  
 Où ces vers l'autre iour i'engrauy d'une alefne :

Les ondes refuiront contremont les ruisseaux,  
 Sans fueilles au Printemps seront les arbrisseaux,  
 Venus fera sans torche, & Amour sans sagette,  
 Quand le Pasteur Fresnet oubli'ra Mariette.

Sus troupeau deslogeon, i'ay d'esclisse & d'osier,  
 Acheuant ma chanson, acheué mon panier :

*Voici la nuit qui vient, il me faut mener boire  
Mon grand bouc escorné qui a la barbe noire.*

*Or adieu Marion, ma chanson, & le iour :  
Le iour me laisse bien, mais non pas ton amour.*

*Ainsi disoit Fresnet : Aluyot au contraire  
Pour l'amour de sa Dame une chanson va faire.*

### Aluyot.

*Ma lanette, mon cœur, dont ie n'ose approcher,  
Tant les yeux sont ardans, plus polie à toucher  
Que la plume d'un Cygne, & plus fresche & plus belle  
Que n'est au mois d'Auril une rose nouvelle,  
Plus douce que le miel, plus blanche que le lait,  
Plus vermeille en couleur que le teint d'un œillet :  
Voici (il m'en souvient) le mois & la journée  
(O douce souvenance heureuse & fortunée !)  
Où premier ie te vey peigner tes beaux cheveux,  
Ainçois filets dorez, mes liens & mes nœuds.  
Ie vy de sa main propre Amour les mettre en ordre,  
Et filet à filet en deux tresses les tordre :  
l'en coupay les plus blons & les plus crespelés :  
Les tournant en cordons i'en fy des brasselés  
Que ie porte à mes bras, signe que tu tiens prise  
En tes crespes cheveux mon cœur & ma franchise :  
Ie les garde bien cher, car en nulle saison  
Ie ne veux eschapper de si belle prison.*

*Mainte fille en voyant ma face ieune & tendre,  
Où la barbe commence encores à s'estendre,  
M'a choisi pour amy : hier mesme Margot  
Qui fait sauter ses bœufs au son du harigot,  
Tu la cognois, lanette, enuoya laqueline  
Vers moy, pour me donner de sa part un beau Cygne,*



*Et me dist, Ceste-là qui te donne ceci,  
Auecque son present à toy se donne aussi :  
Pren son present & elle, assez elle merite,  
Ayant les yeux si beaux, d'estre ta fauorite.*

*Mais ie la refusay : car plustost que d'aimer  
Autre que toy, mon cœur, douce sera la mer,  
Le doux miel coulera de l'escorce d'un Fresne,  
Et les roses croistront sur les branches d'un Chefne,  
Les buissons porteront les œillets rougissans,  
Et les haliers ronceux les beaux lis blanchissans.*

*D'autant que du Printemps la plaisante verdure  
Est plus douce aux troupeaux que la triste froidure,  
D'autant qu'un arbre enté rend un iardin plus beau  
Que le tige espineux d'un rude sauuageau,  
D'autant qu'un Oliuier surpasse en la campagne  
D'un saule pallissant la perruque brehaigne,  
Et d'autant qu'au matin la belle Aube qui luit,  
Surmonte de clarté les ombres de la nuit :  
D'autant, ma laneton, desur toute pucelle  
Tu sembles à mes yeux plus gentille & plus belle :  
Ces Houx m'en sont tesmoins, & ces Pins que tu vois  
Surmonter en hauteur la cyme de ces bois,  
Où m'esbatant un iour i'engraui sur l'escorce  
D'un Chefne non ridé, cest Epigrame à force.*

*Quand Aluyot viura sans aimer laneton,  
Le Bouc se vestira de la peau d'un Mouton,  
Et le Mouton prendra la robbe d'une Chéure  
Et aura comme un Bouc barbe deffous la léure*

*J'ay l'ame toute esmeüe & le cœur tout rai,  
Quand ie pense en ce iour où premier ie te vy  
Porter un beau panier (ainsi qu'une bergere)  
Allant cueillir des fleurs au iardin de ma mere :*

*Si tost que ie te vy, si tost ie fu deceu,  
 Ie me perdi moy-mesme, & depuis ie n'ay sceu  
 Soulager ma douleur : tant l'amoureuse flame  
 Descendant iusqu'au cœur m'auoit embrasé l'ame.  
 Tu auois tes cheueux sans ordre desliez,  
 Frisez crespéz retors, primes & deliez  
 Comme filets de soye : & de houpes garnie  
 Te pendoit aux talons ta belle souquenie.*

*Ta sœur alloit apres, i'allois apres aussi :  
 Et comme ie voulois te conter mon souci,  
 Las ! ie m'esuanouy, & l'amoureux martyre  
 Qui me pressoit le cœur, ne me laissa rien dire.*

*A la fin reuenu de telle pasmaison,  
 Le bouillant appetit surmonta la raison,  
 Ie te contay mon mal : mais toy sans estre atteinte  
 De ma triste douleur, te moquas de ma plainte.*

*Or comme tu cueillois vne fleur de ta main  
 Par feintise, vn bouquet te tomba de ton sein  
 (Où mainte fleur estoit l'une à l'autre arrangée)  
 Lié de tes cheueux & de soye orenagée :  
 Ie l'amasse & l'attache au bord de mon chapeau,  
 Et bien qu'il soit fany, tousiours me semble beau,  
 Comme ayant la couleur de ma face blesnie,  
 Qui maugré mon Printemps se flestrist pour m'amie.*

*Ainsi que ie pleurois pour mon mal appaiser,  
 Tu sautes à mon col, me donnant vn baiser :  
 Ha ie meurs quand i'y pense ! & de ta bouche pleine  
 De roses, me versas dans l'ame ton haleine :  
 Ce doux baiser passa (dont i'ay vescu depuis)  
 Soudain de nerfs en nerfs, de conduis en conduis,  
 De veine en veine apres, de mouëlle en mouëlle,  
 M'allumant tout le sang d'une chaleur nouvelle,  
 Si bien qu'en toutes parts, en toute place & lieux  
 I'ay tousiours ton baiser au deuant de mes yeux :*

*l'en sens tousiours l'haleine, & depuis ma Musette  
N'a peu chanter sinon le baiser de lanette.*

*Doux est du Rossignol la rustique chanson,  
Et celle du Linot & celle du Pinçon :  
Doux est d'un clair ruisseau le sautelant murmure,  
Bien doux est le sommeil sur la douce verdure :  
Mais plus douce est ma flute, & les vers que de toy  
le chante, quand tu es assise aupres de moy.*

*l'oy tousiours dans mon Antre vne belle fontaine,  
Mon lit d'herbes est fait, ma place est toute pleine  
De toisons de brebis, que le vent fist broncher  
L'autre iour contre bas du feste d'un rocher.  
De l'ardeur du Soleil autant ie me soucie,  
Qu'un Amant enchanté des beautez de s'amie  
Se soucie d'ouir son pere le tanser :  
Car Amour ne le fait qu'en sa Dame penser.  
Autant qu'on peut songer en dormant de richesses,  
Autant i'ay de troupeaux : sur leurs toisons espesses  
Tous les iours ie m'endors sans me donner esmoy  
Du froid : car la froideur ne vient pas iusqu'à moy.*

*Mais ce-pendant qu'ici ie chante ma lanette,  
Vesper reluit au Ciel d'une clarté brunnete :  
Le temps coule si tost que ie ne le sens point,  
Le Soleil est couché : mais l'ardeur qui me poingt,  
Ne se couche iamais, & iamais ne s'alente  
(Donnant tréne à mon cœur) tant elle est violente.*

*Remede contre Amour ie ne sçauois trouuer,  
Voire eussé-ie auallé tous les torrens d'Hyuer,  
Et beu tous les glaçons des montaignes Risfées,  
Tant i'ay de sa chaleur les veines eschaufées.  
Ie ne puis qu'en chantant ma douleur contenter :  
Mon confort seulement ne vient que de chanter.*

*La Cigale se plaist du chant de la Cigale,  
Et Pasteur i'aime bien la chanson pastorale :*

*L'Aigneau suit l'herbe courte, & le doux Chéurefueil  
Est suivi de la Chéure, & le bois du Chéureil :  
Chacun suit son desir, & i'aime ma Musette  
Pour y chanter dessus les amours de lanette.*

*Or adieu laneton, le iour & ma chanson :  
D'un ruisseau murmurant si plaisant n'est le son,  
Le sommeil n'est si doux, ny les ieunes fleurettes  
Du Printemps ne sont pas si douces aux Auettes,  
Que les vers me sont doux, voire autant que tes yeux  
Qui font tousiours Amour de moy victorieux.*

## ECLOGVE III.

OV

### CHANT PASTORAL

*sur les nopces de Monseigneur Charles  
Duc de Lorraine, & Madame Claude,  
fille deuxiesme du Roy  
Henry II.*

### LES PASTEVRS.

*Bellot, Perrot, & Michau.*

*Vn Pasteur Angeuin & l'autre Vandomois,  
Bien cognus des rochers, des fleuves & des bois,  
Tous deux d'âge pareils, d'habit & de houlette,  
L'un bon ioieur de flute & l'autre de musette,  
L'un gardeur de brebis & l'autre de chéureaux,  
S'escarterent un iour bien loin des Pastoureux.*

Tandis que leur bestail paiſſoit parmi la plaine  
 Vn peu deſſous Meudon au riuage de Seine,  
 Laiſſerent leurs maſtins pour la crainte des loups,  
 Bien armez de colliers tous heriſſez de clous :  
 Et montant ſur le dos d'une colline droite  
 Au trauers d'une vigne, en une ſente eſtroite,  
 Gagnerent pas à pas la Grotte de Meudon,  
 La Grotte que Charlot (Charlot de qui le nom  
 Eſt ſaint par les foreſts) a fait creuſer ſi belle  
 Pour eſtre des neuf Sœurs la demeure eternelle :  
 Sœurs qui en ſa faueur ont meſpriſé les eaux  
 D'Eurote & de Permeſſe, & les tertres iumeaux  
 Du cheuelu Parnasse, où la fameuſe ſource  
 Priſt du Cheual volant & le nom & la courſe,  
 Pour venir habiter ſon bel Antre eſmaillé,  
 Vne loge voutée en vn roc entaillé.

Si toſt que ces Pasteurs du milieu de la rotte  
 Apperceurent le front de la diuine Grotte,  
 S'enclinerent à terre, & craintifs honoroyent  
 De bien loin le repaire où les Sœurs demeuroyent.

Après l'oraïſon faite, arriuent à l'entrée  
 (Nuds de teſte & de pieds) de la Grotte ſacrée :  
 Car ils auoyent tous deux & ſabots & chapeaux,  
 Reuerant le ſaint lieu, pendus à des rameaux.

Eux deuots arriuez au deuant de la porte  
 Saluerent Pallas qui la Gorgonne porte,  
 Et le petit Bacchus, qui dans ſes doigts marbrins  
 Tient vn rameau chargé de grappes de raiſins :  
 Se lauent par trois fois de l'eau de la fontaine,  
 Se ſerrent par trois fois de trois plis de veruene,  
 Trois fois entournent l'Antre, & d'une baſſe vois  
 Appellent de Meudon les Nymphes par trois fois,  
 Les Faunes, les Syluains, & tous les Dieux ſauuages  
 Des prochaines foreſts, des monts & des bocages :

Puis prenant hardiesse ils entrèrent dedans  
 Le saint horreur de l'Antre, & comme tous ardans  
 De trop de Dèité, sentirent leur pensée  
 De nouvelle fureur brusquement insensée.

Ils furent esbahis de voir le partiment  
 En un lieu si desert, d'un si beau bastiment :  
 Le plan, le frontispice, & les piliers rustiques,  
 Qui effacent l'honneur des colonnes antiques :  
 De voir que la Nature auoit portait les murs  
 De grotesque si viue en des rochers si durs :  
 De voir les cabinets, les chambres & les salles,  
 Les terrasses, festons, guillochis & ouales,  
 Et l'esmail bigarré, qui ressemble aux couleurs  
 Des prez quand la saison les diapre de fleurs :  
 Ou comme l'Arc-en-ciel qui peint à sa venue  
 De cent mille couleurs le dessus de la nuë.

Lors Bellot & Perrot (de tels noms s'appelloient  
 Les Pasteurs qui par l'Antre en reuerence alloient)  
 Ne se peuuent garder de rompre le silence,  
 Et le premier des deux Bellot ainsi commence.

### Bellot.

Printemps, naissiez, croissiez, & de mille façons  
 Couurez les prez nouveaux de fleureuses moissons,  
 A fin qu'en les cuillant fraichement ie façonne  
 Pour le front de Charlot vne belle couronne.

Pasteurs, puis que Charlot nous daigne regarder,  
 Comme nous soulions faire, il ne faut plus garder  
 Pour la crainte des loups, nos brebis camusettes,  
 Qui sans crainte paistront au bruit de nos musettes.  
 Nos chéures sans danger les Saules brouteront,  
 Et nos toreaux sous l'ombre assis remascheront

L'herbage à seureté sous les sons de Tityre :  
Et nous autres bergers ne ferons plus que rire,  
Que iouer, que fluter, que chanter & dancer,  
Comme si l'âge d'or vouloit recommencer  
A regner deffous luy, comme il regnoit à l'heure  
Que Saturne faisoit en terre sa demeure.

Nous luy bastirons d'herbe vn autel comme Pan,  
Nous chommerons sa feste, & au retour de l'an,  
Tout ainsi qu'à Palés, ou à Cerés la grande,  
Trois pleins vaisseaux de laiët luy versant pour offrande,  
Inuokerons son nom : & boiuant à l'entour  
De l'autel, nous ferons vn banquet tout le iour,  
Où lanot Limosin pendra la chalemie  
A tous Bergers venans pour l'amour de s'amie :  
Car c'est vn demi-Dieu, à qui plaisent nos sons,  
Qui fait cas des Pasteurs, qui aime leurs chansons,  
Qui garde leurs brebis de chaud & de froidure,  
Et en toutes saisons les fournit de pasture.

Q elque part que tu sois, Charlot, pour ta vertu  
En tes léures tousiours sauouer puisses-tu  
Le doux sucre & la manne, & manger tout ensemble  
Le miel, qui en douceur à tes propos ressemble,  
Et tousiours quelque part que tu voudrois aller  
Puissent deffous tes pieds les fontaines couler  
De vin & de neëtar, & loin de ton herbage  
Le Ciel puisse ruer sa foudre & son orage :  
Les cornes de tes bœufs se puissent iaunir d'or,  
D'or le poil de tes boucs, & la toison encor  
De tes brebis soit d'or, & les peaux qui herissent  
De tes chéures le dos de fin or se iaunissent.  
Pan le Dieu chéure-pied des Pasteurs gouuerneur,  
Augmente ta maison, tes biens & ton honneur :  
Tousiours puisse d'aigineaux peupler ta bergerie,  
De ruisseaux argentins arrouser ta prairie,



*Et toujours d'herbe espaisse emplir tes gras herbis,  
De toreaux ton estable, & ton parc de brebis,  
Puis que tu es si bon & que tu daignes prendre  
Quelque soin des Pasteurs & leurs flutes entendre.*

*A-tant se teut Bellot, & à peine auoit dit,  
Qu'en pareille Chançon Perrot luy respondit.*

**Perrot.**

*Nymphes filles des eaux, des Muses les compagnes,  
Qui habitez les bois, les monts, & les campagnes,  
Permettez moy chanter vostre Antre de Meudon,  
Que des mains de Charlot vous receustes en don.  
Comme Amphion tira les gros cartiers de pierre  
Pour emmurer sa ville au son de sa guiterre :  
Ainsi ce beau sejour Charlot vous a construit  
De rochers qui suiuyent de sa voix le doux bruit.*

*Ceux qui viendront, Charlot, ou boire en ta fontaine,  
Ou s'endormir aupres, se voirront l'ame pleine  
De sainte Poësie, & leurs vers quelquefois  
Pourront bien resjouir les oreilles des Rois.*

*Ici comme iadis en ces vieux tabernacles  
De Delphe & de Delos, se rendront les oracles :  
Et à ceux qui voudront à la Grotte venir,  
Phebus leur apprendra les choses à venir.  
Charlot ie te suppli' ne rougis point de honte  
De nous simples Bergers faire un petit de conte :  
Apollon fut Berger, & le Troyen Pâris :  
Et le ieune amoureux de Venus, Adonis,  
Ainsi que toy porta au flanc la panetiere,  
Et par les bois sonna l'amour d'une Bergere :  
Mais nul des Pastoureaux en l'antique saison  
Comme toy, n'a basti des Muses la maison.*

Tousjours tout à l'entour la tendre mousse y croisse,  
Le poliot fleuri en tout temps y paroisse :  
Le lierre tortu recourbé de maint tour  
Y puisse sus son front grimper tout à l'entour,  
Et la belle lambrunche ensemble entortillée  
Laisse espandre ses bras tout du long de l'allée :  
L'aette en lieu de ruche agence dans les trous  
Des rustiques piliers, sa cire & son miel roux,  
Et le freslon armé qui les raisins moissonne,  
De son bruit enroüé par l'Antre ne bourdonne :  
Mais les beaux grefillons, qui de leurs cris trenchans  
Salu'ront les Pasteurs à leur retour des champs.  
Mainte gentille Nymphé, & mainte belle Fée,  
L'une aux cheueux pliez, & l'autre descoiffée,  
Auecque les Syluains y puisse toute nuit  
Fouler l'herbe des pieds au son de l'eau qui bruit.

Tousjours ceste maison puisse auoir arrosée  
Le bas d'une fonteine, & le haut de rosée :  
Tousjours soit aux Pasteurs son taillis ombrageux,  
Sans crainte de la foudre ou du fer outrageux :  
Et iamais au sommet quand la nuit est obscure,  
Les Choüans annonceurs de mauuaise aduenture  
Ne s'y viennent percher, mais les Rossignolets  
Voulant chanter plus haut que tous nos flageolets,  
Y desgoisent tousiours par la verte ramée  
Du bon Pasteur Charlot la belle renommée,  
A fin que tous les vents l'emportent iusqu'aux Cieux,  
Et du Ciel puisse aller aux oreilles des Dieux.

Ainsi finist Perrot, & l'un & l'autre ensemble  
(A qui tout le pied droit par bon augure tremble)  
Sortent hors de la Grotte, & à fin de pouuoir  
Mieux chanter à loisir s'en-allèrent affoir  
L'un desur un gazon, l'autre sur vne souche :  
Et lors de tels propos Bellot ouurit sa bouche.

## Bellot.

*Perrot, tous les Pasteurs ne te font que louer,  
Te vantent le premier, soit que vueilles iouer  
Du Cistre ou du Rebec, & la Musette tienne,  
Tant ils sont abusez, comparent à la mienne :  
Je voulois dès long temps seul à seul te trouver  
Loin de nos compagnons, à fin de t'esprouuer,  
Pour maistre te monstrier qu'autant ie te surpasse  
Qu'une haute montagne une colline basse.*

## Perrot.

*Mon Bellot, il est vray que les Pasteurs d'ici  
M'estiment bon Poète, & ie le suis aussi :  
Mais non tel qu'est Michau, ou Lancelot qui sonne  
Si bien de la Musette aux riués de Garonne,  
Et mon chant au prix d'eux est pareil au Pinçon,  
Qui veut du Rossignol imiter la chanson.  
Toutesfois, mon Bellot, ie ne te veux desdire :  
Si tu es bon Thyrsis, ie seray bon Tityre.  
Commence, ie n'ay point le courage failli :  
L'affailleur bien souuent vaut moins que l'affailli.  
Il faut pour le veinqueur que nous mettions un gage :  
Quant à moy, pour le prix ie depose une cage  
Que ie fis l'autre iour voyant paistre mes bœufs,  
Deuisant à Thoinet qui s'egale à nous deux :  
Les barreaux sont de Til, & la perchette blanche  
Qui traaverse la cage, est d'une Coudre franche :  
De pelures de lonc i'ay tiffu tout le bas :  
A l'un des quatre coings la coque d'un Limas  
Pend d'un crin de cheual, voire de telle sorte  
Qu'on diroit à la voir qu'elle mesme se porte.*

*L'ay creusé d'un Sureau l'auge bien proprement,  
 Et les quatre pilliers du petit bastiment  
 Sont d'une grosse ronce en quatre parts fendue :  
 Et le cordon treffé duquel elle est pendue,  
 Belin me l'a donné, houpé tout à l'entour  
 Des couleurs qu'il gaigna de Caton l'autre iour.*

*L'ay dedans prisonniere une ieune Aloüette,  
 Qui desgoise si bien, qu'hier ma Cassandrette  
 Que i'aime plus que moy, m'en offrit un veau gras  
 Au front desia cornu, voire & si ne l'eut pas :  
 Toutesfois tu l'auras si tu me gagnes ores,  
 Mais ie t'asseure bien que tu ne l'as encores.*

### Bellot.

*Pour la cage & l'oiseau ie veux mettre un panier  
 D'artifice enlacé de vergettes d'ozier,  
 Large & rond par le haut, qui tousiours diminüe  
 En tirant vers le bas d'une pointe menüe :  
 L'anse est faite d'un hous qu'à force i'ay courbé :  
 En voulant l'atenuir le doigt ie me coupé  
 Avecque ma serpette : encores de la playe  
 Ie me deuls, quand du doigt mon flageollet i'essaye.  
 Tout ce gentil panier est portrait par-dessus  
 De Mercure & d'Io, & des cent yeux d'Argus :  
 Io est peinte en vache, & Argus en vacher :  
 Mercure est tout aupres, qui du haut d'un rocher  
 Roulle le corps d'Argus, apres auoir coupée  
 Son col du fer courbé de sa trenchante espée :  
 De son sang naist un Paon, qui ses ailes ouurant  
 Va deçà & delà tout le panier couurant.*

*Il me sert à serrer des fraizes & des roses,  
 Il me sert à porter au marché toutes choses :*

*Mon Oliue, mon cœur, desire de le voir,  
Elle me veut donner son mastin pour l'avoir,  
Et si ne l'aura pas : ie te le mets en gage,  
l'en refuse trois fois la vente de ta cage.*

*Mais qui nous ingera ? qui en prendra le soin ?  
Vois-tu ce bon vieillard qui vient à nous de loin ?  
A luy voir au menton la barbe venerable,  
Le chef demi couuert d'un poil gris honorable,  
La houlette en la main d'un noïailleux cormier,  
Le hauqueton d'un Daim, c'est Michau le premier  
Des Pasteurs en sçavoir, auquel font reuerence  
Quand il vient en nos parcs, tous les Bergers de France.*

Perrot.

*Je le cognois, Bellot, ie l'ay ouy chanter :  
Autant comme tu fais, ie l'ose bien vanter :  
Car il a bien souuent daigné prendre la peine  
De louer mes chansons à Charlot de Lorraine.*

Michau.

*Que dites-vous, garçons, des Muses le souci ?  
Ici le bois est verd, l'herbe fleurist ici,  
Ici les petits monts les campagnes emmurent,  
Ici de toutes parts les ruisselets murmurent :  
Ne soyez point oisifs, Enfans, chantez tousiours,  
Mais comme auparauant ne chaniez plus d'amours,  
Eleuez vos esprits aux choses bien plus belles,  
Qui puissent apres vous demeurer immortelles.*

*N'avez-vous entendu comme Pan le grand Dieu,  
Le grand Dieu qui preside aux Pasteurs de ce lieu,*

Par mariage assemble à sa fille Claudine  
 Le beau Pasteur Lorrain, de telle fille digne ?  
 C'est le ieune Charlot, tige de sa maison,  
 Parent de ces Pasteurs qui portent la Toison,  
 Et cousin de Charlot le bon hoste des Muses,  
 Duquel tousiours le nom ense vos cornemuses :  
 Et de ce grand Francin, qui à coups de leuiers,  
 De fondes, & de dars a chassé les bouuiers  
 Qui venoyent d'outre-mer manger nos pasturages,  
 Et menoyent maugré nous leurs bœufs en nos riuages.

Là ne se doit dresser un vulgaire festin :  
 Depuis le soir bien tard iusqu'au premier matin  
 La feste durera, & les belles Nuiades,  
 Les Faunes, les Syluains, Dryades, Oreades,  
 Les Satyres, les Pans tout le iour balleront,  
 Et de leurs pieds fourchus l'herbette fouleront.  
 De ce beau mariage entonnez vos Musettes,  
 Monstrez-vous auioird'huy tels sonneurs que vous estes,  
 Chantez ceste alliance, & ce bon-heur sacré :  
 Les deux freres Lorrains vous en sçauront bon gré.

Pan y tiendra sa Court en Maïesté Royale,  
 Aupres de luy sera son espouse loyale,  
 Et son fils desia Roy, & sa diuine Sœur  
 Qui passe de son nom & la perle & la fleur.

Sus donc chante, Bellot, commence quelque chouse :  
 Tu diras l'espousé, Perrot dira l'espouse :  
 Car il vaut mieux, Enfans, celebrer ce beau iour,  
 Qu'vser vos chalumeaux à chanter de l'Amour.

Bellot.

O Dieu qui prens le soin des nopces, Hymenée,  
 Laisse pendre à ton dos ta chape ensafranée,

Ton pied soit enlacé d'un beau brodequin bleu,  
 Et portes en ta main un clair flambeau de feu :  
 Eternue trois fois, & trois fois de la teste  
 Fay signe de bon-heur à la nociere feste  
 De Claudine & Charlot, à fin que desormais  
 Le mariage soit heureux pour tout iamais.

Ameine avecques toy la Cyprienne sainte  
 D'un demi-ceint tissu dessus les hanches ceinte,  
 Et son enfant Amour tenant l'arc en ses mains,  
 Pour se cacher és yeux du Prince des Lorrains.

Ce n'est pas un Berger, qui vulgaire & champestre  
 Meine aux gaiges d'autrui un maigre troupeau paistre :  
 Mais qui a cent troupeaux de vaches & de bœufs,  
 De boucs & de beliers paissans les prez herbeus  
 De Meuse & de Moselle, & la fertile plaine  
 De Bar, qui se confine aux terres de Lorraine.

Il s'eleue en beauté sur tous les pastoureaux  
 Comme un braue toreau sur les menus troupeaux,  
 Ou comme un Pin gommeux au resonnant fueillage  
 Tient son chef pommelu par-dessus un bocage.  
 Qui plus est, son menton en sa ieune saison  
 Ne se fait que cresper d'une blonde toison.

Bergers, faites ombrage aux fontaines sacrées,  
 Semez tous les chemins de fleurettes pourprées,  
 Despandez la Musette, & de branles diuers  
 Chantez à ce Charlot des chansons & des vers.

Qu'il te tarde beaucoup que Vesper ne t'ameine  
 La nuit où tu mettras une fin à ta peine !  
 Soleil, haste ton cours, accourci ton seiour,  
 Charlot a plus besoin de la nuit que du iour.

L'amitié, la beauté, la grace, & la ieunesse  
 Appresteront ton liêt, & par grande largesse  
 Vne pluye d'œillets dessus y semeront,  
 Et d'ambre bien-sentant les draps parfumeront :



Mille gentils Amours ayant petites ailes  
 Voleront sur le liêt, comme és branches nouvelles  
 Des arbres au Printemps reuolent les oiseaux,  
 Qui se vont esgayant de rameaux en rameaux :  
 Iamais vigne aux ormeaux si fort ne soit liée  
 Comme autour de ton col ta ieune mariée  
 Qui d'un baiser permis ta bouche embasnera,  
 Et d'un autre plaisir ton cœur allumera.

C'est une prime fleur encores toute tendre :  
 Espoux, garde toy bien brusquement de la prendre,  
 Il la faut laisser croistre, & ne faut simplement  
 Que tenter ceste nuit le plaisir seulement.  
 Comme tes ans croistront, les siens prendront croissance :  
 Lors d'elle à plein souhait tu auras iouissance,  
 Et trouueras meilleur mille fois le plaisir :  
 Car l'attente d'un bien augmente le desir.

Or le soir est venu, entrez en vostre couche,  
 Dormez bras contre bras, & bouche contre bouche :  
 La concorde à iamais habite en vostre lit :  
 Chagrin, dissension, ialousie & despit  
 Ne vous troublent iamais, ains d'un tel mariage  
 Puisse naistre bien tost un genereux lignage  
 Meulé du sang Lorrain & du sang de Valois,  
 Qui Partenope un iour remette sous ses lois,  
 Et puisse couronner ses royales armées  
 Sur le bord du Iourdain de palmes Idumées.

A-tant se teut Bellot, & Perrot tout gaillard  
 Enfant son chalumeau, luy respond d'autre part.

Perrot.

O Lucine lunon, qui aux nopces presides,  
 Et de Paons couplez, où il te plaist, tu guides

Ton coche comme vent sur terre & dans les Cieux,  
 Braue de Maiefté, comme Royne des Dieux,  
 Amene Pafithée & la Mufe diuine  
 Qui prefide aux banquets, aux nopces de Claudine.  
 Comme vne belle rofe eft l'honneur du iardin,  
 Qui aux rais du Soleil eft efclofe au matin,  
 Claudine eft tout l'honneur de toutes les Bergeres,  
 Et les paffe d'autant qu'un Chefne les fougeres :  
 Nulle ne l'a gagnée à fçauoir façonner  
 Vn chapelet de fleurs pour fon chef couronner :  
 Nulle ne fçait mieux ioindre au lis la fraifche rofe,  
 Nulle mieux sur la Gaze vn deffein ne compofe  
 De fil d'or & de foye, & nulle ne fçait mieux  
 L'aiguille demener d'un pouce ingenieux.

Comme parmi ces bois volent deux tourterelles  
 Que ie voy tous les iours fe careffer des ailes,  
 Se baifer l'une l'autre, & ne s'entre-eftlongner,  
 Mais constantes de foy tousiours s'accompagner,  
 Qui de leur naturel iufqu'à la mort n'oublient  
 Les premieres amours qui doucement les lient :  
 Ainfi puiffes-tu viure en amoureux repous  
 Iufqu'à la mort, Claudine, avecque ton espous.

Je m'en-vay sur le bord des riuées plus fecrettes  
 Cueillir en mon panier vn monceau de fleurettes,  
 A fin de les femer sur ton liét genial,  
 Et chanter à l'entour ce beau Chant nuptial.

D'une fi belle fille eft heureufe la mere,  
 Ton pere eft bien-heureux, bien-heureux eft ton frere,  
 Mais plus heureux cent fois & cent encor fera,  
 Qui d'un mafle heritier enceinte te fera :  
 Heureux fera celui qui aura toute pleine  
 Sa bouche de ton ris, & de ta douce haleine,  
 Et de tes doux baisers, qui paffent en odeur  
 Des prez les mieux fleuris la plus foudaue fleur :

Heureux qui dans ses bras pressera toute nûe  
 Toy Claudine aux beaux yeux du sang des Dieux venüe,  
 Qui hardi tastera tes tetins verdelets  
 Qui semblent deux boutons encore nouvelets :  
 Et qui licencié d'une liberté franche,  
 Rebaisera ton front, & ta belle main blanche,  
 Et qui démeslera fil à fil tes cheveux  
 Follastrant toute nuit, & faisant mille jeux :  
 Celuy prira la nuit que cent nuits dure encore,  
 Ou bien que de cent iours ne s'esueille l'Aurore,  
 A fin que paresseux long temps puisse couuer  
 Ses amours en ton liët, & point ne se leuer.

Mais le soir est venu, & Vesper la fourriere  
 Des ombres, a versé par le ciel sa lumiere :  
 Il faut s'aller coucher. Quoy ? tu trembles du cœur  
 Ainsi qu'un petit Fan qui tremble tout de peur  
 Quand il a veu le loup, ou quand loin de sa mere  
 Il s'effroye du bruit d'une feuille legere.

Il ne sera cruel : car une cruauté  
 Ne scauroit demeurer avec telle beauté.  
 Demain apres auoir son amitié cognue,  
 Tu voudrois mille fois que la nuit fust venue  
 Pour retourner tenter les amoureux combas,  
 Et pour te rendormir dans le pli de ses bras.

Sus des-habille toy, & comme une pucelle  
 Qui de bien loin sa mere à son secours appelle,  
 N'appelle point la tienne, & vien pour te coucher  
 Pres du feu qui te doit tes larmes desecher.

Celuy puisse conter le nombre des arenes,  
 Les estoiles des cieux & les herbes des plaines,  
 Qui contera les jeux de vos combats si dous,  
 Desquels pour une nuit vous ne serez pas saouls.

Or sus esbatez-vous & en toute lieffe  
 Prenez les passe-temps de la brève ieunesse

Qui bien tost s'enfuira, & au nombre des ans  
 Qui vous suiuent tous deux egalez vos enfans.  
 Ton ventre desormais si fertile puisse estre,  
 Que d'un sang si diuin puisse en bref faire naistre  
 Des filles & des fils : des fils qui porteront  
 Les vertus de leur Pere empreintes sur le front,  
 Et qui dès le berceau donneront cognoissance  
 Que d'un Pere tres-fort auront pris leur naissance :  
 Les filles en beautez en grace & en douceur  
 Par signes donneront un tesmoignage seur  
 De la pudicité de leur mere diuine,  
 Qui de nostre grand Pan reçoit son origine.

Ainsi disoit Perrot, qui retenant le son  
 De son pipeau d'auoine acheua sa chanson.  
 Echo luy respondoit : les bois qui rechanterent  
 Le beau chant nuptial, iusqu'au ciel le portèrent.

Lors Michau s'escriant s'asseit au milieu d'eux,  
 Puis dist en approuuant la chanson de tous deux.

#### Michau.

Vostre fleute, garçons, à l'oreille est plus douce  
 Que le bruit d'un ruisseau qui iaze sur la mousse,  
 Ou que la voix d'un Cygne, ou d'un Rossignolet  
 Qui chante au mois d'Auril par le bois nouuelet.  
 De Manne à tout iamais vos deux bouches soient pleines,  
 De roses vos chapeaux, vos mains de marjolaines :  
 Iamais en vos maisons ne vous defaille rien,  
 Puis que les chalumeaux vous entonnez si bien.

Que chacun par accord s'entre-donne son gage :  
 Perrot, pren le panier, & toy Bellot la cage :  
 Retournez, mes enfans, conduire vos toreaux,  
 Et viuez bien-heureux entre les Pastoreaux.

## CHANT PASTORAL,

à tres-illustre & vertueuse Princesse Madame  
Marguerite de France Duchesse  
de Sauoye.

*Je me faschois de la pompe des Rois,  
Et pour la Court ie viuois par les bois  
Seul à par-moy sauvage & solitaire,  
Loin des Seigneurs, des Rois & du vulgaire :  
Plus me plaisoit vn Rocher bien pointu,  
Vn Antre creux de mousse reuestu,  
Vn long destour d'une seule vallée,  
Vn vif sourjon d'une onde reculée,  
Vn bel esmail qui bigarre les fleurs,  
Voir vn beau pré tapissé de couleurs,  
Ouir iazer vn ruisseau qui murmure,  
Et m'endormir sur la ieune verdure,  
Qu'estre à la Court, & mendier en vain  
Vn faux espoir qui coule de la main.*

*Au mois de May que l'Aube retournée  
Auoit esclose vne belle iournée,  
Et que les voix d'un million d'oiseaux  
Comme à l'enuy du murmure des eaux,  
Qui haut qui bas contoient leurs amourettes  
A la rousée aux vents & aux fleurettes,  
Lors que le ciel au Printemps se sou-rit,  
Quand toute plante en ieunesse fleurit,  
Quand tout sent bon, & quand la douce terre  
Ses riches biens de son ventre desferre  
Toute ioyeuse en son enfantement :  
Errant tout seul tout solitairement*

*l'entre en un pré, du pré en un bocage,  
Et du bocage en un desert sauvage,  
Où j'auisay un Pasteur qui portoit  
Dessus le dos un habit qui estoit  
De la couleur des plumes d'une Gruë:  
Sa panetiere à son costé pendue  
Estoit d'un loup, & l'effroyable peau  
D'un ours pelu luy seruoit de chapeau.*

*Lors appuyant un pied sur sa houlette,  
De son bissac aueind vne Musette,  
La met en bouche, & ses léures enfla,  
Puis coup sur coup en haletant soufla  
Et resoufla d'une forte halenée  
Par les poumons reprise & redonnée,  
Ouvrant les yeux & dressant le sourcy:  
Mais quand par tout le ventre fut grossy  
De la Chéurette, & qu'elle fut egalle  
A la rondeur d'une moyenne balle,  
A coups de coude en repousse la vois,  
Puis çà puis là faisant saillir ses doigts  
Sus les pertuis de la Musette pleine,  
Comme saisi d'une angouisseuse peine,  
Palle & pensif avec le triste son  
De sa Musette ourdit telle chanson.*

*Petits aigneaux qui païssez sous ma garde,  
Plus que deuant il vous faut prendre garde  
De vostre peau pour la crainte des loups,  
Et de bonne heure au soir retirez vous:  
Plus ne verrez sauter parmy les prés  
Ny les Syluains, ny les Muses sacrées:  
Tous nos pastis ne sont plus habitez  
Comme ils souloient des saintes Deitez.*

*Plus ne paistrez poliot ny lauande,  
Le dur chardon sera vostre viande:*

*Et si verrez en toutes les saisons  
La ronce aiguë escarder vos toisons.*

*Et toy Harpaut, qui te soulois defendre  
Contre les loups, maintenant faut apprendre  
D'estre humble & doux, & ne plus abboyer :  
Il faut apprendre à flechir & ployer,  
Et te couchant (puis qu'il n'y a plus d'ordre)  
Flatter les loups quand ils te voudront mordre.*

*Et toy Musette, à qui presque i'auois  
Par sept conduits donné la mesme vois  
Qu'à son flageol auoit donné Tityre,  
Plus tu n'auras ce plaisir d'ouïr dire,  
La belle Nymphé a fait cas de tes chants,  
Car sa grandeur abandonne nos champs.  
Plus ne voudra ceste Nymphé diuine  
A son grand Pan qui la France domine,  
Comme autres fois, tes chansons celebrer.  
Que tardes-tu ? va-t'en te démembler  
De piece à piece, & si tu peux, transforme  
Ton corps venteux en sa premiere forme :  
(Tu fus iadis sur la riue d'une eau,  
S'il m'en souuient, de pucelle un roseau :)  
Et là tousiours, quand tu seras atteinte  
De quelque vent, ne sonne que ma plainte.*

*Dedans le creux d'un rocher tout couuert  
De beaux Lauriers, estoit un Antre vert,  
Où au milieu sonnoit vne fontaine  
Tout à l'entour de violettes pleine.  
Là s'esleuoient les œillets rougissans,  
Et les beaux liz en blancheur fleurissans,  
Et l'ancolie en semences enflée,  
La belle rose avec la giroflée,  
La paquerette & le passe-velours,  
Et ceste fleur qui a le nom d'Amours.*



Ceste fontaine en ruisseaux séparée  
 Baignoit les fleurs d'une course esgarée  
 S'entre-lassant en cent mille tortis,  
 Que ny chéureaux, ny vaches, ny brebis  
 D'ergots fourchus n'auoient iamais foullée,  
 Ny les Pasteurs de leurs léures souillée.

Vn iour d'Esté qu'encores le Soleil  
 N'a ses cheuaux deualléz au sommeil,  
 Et qu'il se monstre encor plus haut qu'une aulne  
 Dedans le ciel tout bigarré de iaulne,  
 De pers, de bleu: ie vey pres d'un rocher  
 Vn grand troupeau de Nymphes approcher,  
 Toutes ayans en leurs belles mains blanches  
 Vn beau cofin tissu de ieunes branches.

En ce-pendant que l'une se baignoit,  
 L'autre sautoit, & l'autre se peignoit,  
 Je vois venir une belle Charite,  
 Que les humains appelloient Marguerite,  
 Des immortels Pasithée auoit nom,  
 Toute diuine en faicts & en renom.

Elle marchant à tresses descoiffées  
 Apparoissoit la Princeesse des Fées:  
 Vn beau surcot de lin bien replié,  
 Frangé, houpé, luy pendoit iusqu'au pié:  
 Et ses talons qui fouloient la verdure,  
 Deux beaux patins auoient pour couuerture  
 Vn Carquan d'or son col enuironnoit,  
 Et son beau sein sans branler se tenoit  
 Pressé bien haut d'une boucle azurée,  
 Telle qu'on voit la belle Cytherée.  
 Elle cent fois d'un seul trait de ses yeux  
 Auoit flechy les hommes & les Dieux  
 Sans se flechir: car la fleche poussée  
 De l'arc d'Amour ne l'auoit point blessée,

*Et sienne & franche auoit tousiours esté  
Parmy les fleurs en toute liberté.*

*A peine auoit dans les ondes voisines  
Laué ses bras & ses iambes marbrines,  
Que tout soudain (ou soit qu'il vinst des cieux,  
Ou soit qu'il fust vn Faune de ces lieux)*

*Je veis venir par estrange auenture  
Vn Dieu caché sous mortelle figure,  
Qui ressembloit le pasteur Delien*

*Gardant les bœufs au bord Amphrysien,  
Ou le Troyen, dont l'ardente ieunesse  
Donna la pomme à Venus la Déesse.*

*Ses beaux cheveux sous vn Zephire mol  
En petits flots ondoyoient à son col :  
Ses yeux, son front, son allure & son geste  
Estoit pareil à celuy d'un celeste :*

*Comme vn Pasteur portoit dedans sa main  
Vne houlette à petits cloux d'airain,  
Où sur le bout dessus l'escorce dure  
De deux beliers se monstroient la figure  
Qui se choquoient, & auprès d'eux estoit  
Vn loup portrait qui les chiens aguettoit.*

*Si tost qu'il veit ceste belle Dryade,  
Blessé d'amour il en deuint malade :  
Et comme vn feu qui aux espics se prend,  
Et de petit apres se fait plus grand,  
Puis tout à coup trouuant matiere preste  
Vient aux forests, & enflame leur teste :  
Ainsi l'amour tellement l'embrasa,  
Que ceste Nymphé à la fin il osa  
Rauir au dos, l'emportant en Sauoye  
Comme vn Lyon le doux suc d'une proye.  
Tant seulement i'en entendy la vois  
Esuanouye au milieu de ces bois,*

Qui paruenoit à mon oreille à peine,  
Comme la voix de quelque Nymphé en peine.

Or en voyant dans ces champs l'autre iour  
Vn pigeon blanc empieté d'un Autour,  
Qui l'emportoit pour luy seruir de proye  
Dessus les monts de la haute Sauoye,  
Le preuy bien l'infortune futur,  
Et l'engrauiy dedans le tige dur  
De ce coudrier : encor l'escorce verte  
De l'engraueure apparoist entre-ouuerte :  
Y adioustant ces vers pleins de soucy  
Qu'encore un coup ie vais redire icy :

A ton depart les gentilles Naiades,  
Faunes, Syluains, Satyres & Dryades,  
Pans, Deitez de ces Antres reclus  
Sont disparus, & n'apparoissent plus.

Loin de nos champs Flore s'en est allée,  
D'un habit noir Pomone s'est voilée,  
Et Apollon qui fut iadis berger,  
Dedans nos champs ne daigne plus loger,  
Et le troupeau des neuf Muses compaignes  
Ainsi qu'en friche ont laissé nos montaignes  
Pour le regret de leur dixieme Sœur  
Qui les passoit de chant & de douceur :  
Bref de nos bois toutes Deitez saintes,  
Cypris la belle, & ses Graces desceintes  
En nous laissant pour si piteux depart  
La larme à l'œil, habitent autre part.  
Plus les rochers ny les Antres rustiques  
Ne seront pleins de fureurs Poëtiques :  
Echo se taist, & ne veut plus parler,  
Tant a regret de te voir en-allér.

Las ! maintenant en ta fascheuse absence  
Le champ ingrat trompera la semence

Se démentant, & en lieu de moissons  
 Ne produira que ronces & buissons :  
 Si que ie crains que malheur ne vous vienne,  
 Qu'en autre fleur vn Ajax ne deuienne,  
 Et que Narcisse encor' ne soit mué,  
 Et d'Apollon Hyacinthe tué,  
 Et qu'en Soulsy ne iaunisse Clytie,  
 Et que la peau du Satyre Marsye  
 Ne saigne tant, que du dos escorché  
 Ne se reface vn grand fleuve espanché,  
 Puis que Manto & la Nymphé Egerie  
 N'ont plus le soin de nostre bergerie.

O demy-Dieux, ô gracieux esprits  
 Qui de pitié le cœur auez espris,  
 O monts, ô bois, ô forests cheueluës,  
 O rouges fleurs, iaunes, palles & bluës,  
 O terre, ô ciel, ô fontaines & vens,  
 Faunes, Syluains, & Satyres, & Pans,  
 Et toy Clion, qui fus iadis ma Muse,  
 Entre mes mains cassé ta Cornemuse,  
 Puis qu'aussi bien sans faueur & sans los  
 Pendroit en vain vne charge à mon dos.

Pasteurs François, n'ensflez plus les Musettes.  
 Pour son depart elles seront muettes :  
 Dedans le ciel leur chant esuanouy,  
 Comme il souloit, ne sera plus ouy :  
 Si m'en croyez, allons en Arcadie,  
 Et flechissons de nostre melodie  
 Roches & bois, tygres, lyons & loups,  
 Puis que la France est ingrate vers nous :  
 Puis que la Nymphé en qui fut l'esperance  
 Des bons sonneurs, s'escarte loin de France,  
 Allons nous-en, sans demourer icy  
 Pour y languir en peine & en soucy.

Qui fera plus d'un annuel office  
 Parmi les bois aux Muses sacrifice ?  
 Qui plus de fleurs les ruisseaux semera ?  
 Qui plus le nom de Palés nommera  
 Parmi les champs ? & qui plus aura cure  
 De nos troupeaux & de nostre pasture ?  
 Qui plus à Pan daignera presenter  
 Les Pastoureaux pour les faire chanter ?  
 Qui de leur flute appaisera les noises ?  
 Qui iugera de leurs chansons Françoises ?  
 Qui donnera le prix aux mieux disans,  
 Et sauvera leurs vers des mesdisans ?

Adieu troupeau qui pres moy soulois viure,  
 Adieu Vandome, adieu, ie la veux suiure  
 Par les rochers, les antres & les bois,  
 Sauoisien en lieu de Vandomois.

Dans le pays où la belle Atalante  
 Mettra les pieds, tousiours dessous sa plante,  
 Fust-ce en hyuer, les roses s'esclouront,  
 Et de laiët doux les fontaines courent,  
 Les chesnes creux parleront les oracles,  
 Plus que iamais on voirra de miracles.  
 Car les rochers nostre langue apprendront,  
 Et les pinçons rossignols deuiendront :  
 Tous les Pasteurs au retour de l'année  
 Luy dedi'ront vne feste ordonnée,  
 Feront des vœuz, & donneront le pris  
 A qui sera de chanter mieux appris :  
 Si qu'à iamais comme vne colombelle  
 Par les Pasteurs volera toute belle  
 De bouche en bouche, & par mille beaux vers  
 Son nom croistra dedans les arbres verts,  
 Qui garderont dans l'escorce entamée  
 A tout iamais sa viue renommée,

Pour deuenir plus vieille quelque iour  
Que ces rochers plantez tout à l'entour.

Tant qu'on voirra sur les Alpes cheuues  
Ou s'appuyer ou degouter les nuës :  
Tant qu'en hyuer on voirra les torrans  
Auec grand bruit encontre-val courans :  
Tant que les cerfs aimeront les bocages,  
L'air les oiseaux, les poissons les riuages :  
Tant que mon sang mon corps animera,  
Tant que ma main ma Musette aimera,  
Tousiours par tout sans repos & sans cesse  
le chanteray ceste belle Déesse

La MARGVERITE, honneur de nostre temps,  
Dont la vertu fleurist comme vn Printemps.

Et toy Chanson si rudement sonnée,  
Demeure icy où ie t'ay façonnée  
Dedans ce bois, au pied de ce rocher :  
Il ne faut plus de la Court approcher,  
Où sans appuy tu rougirois de honte,  
Et de ta voix on feroit peu de conte.

Or sus païssez païssez pauures brebis,  
Allez par l'herbe, emplissez-vous le Pis,  
Broutez broutez ceste douce verdure  
Pour emporter aux aigneaux nourriture,  
Qui en bestant dans le toict ont desir  
De vous sucer le lait tout à loisir.  
Et quoy troupeau ! tu es insatiable,  
La nuit arriue, il faut gaigner l'estable :  
Voicy les loups qui ont accoustumé  
De brigander quand le iour est fermé,  
Ils font le guet, & plus de rien n'ont crainte,  
Car la bonté par les champs est estainte.

A tant le iour peu à peu s'embrunit,  
Et le Pasteur comme le iour finit

*Son chant rural : descendit sa Musette,  
Dedans sa main empoigna sa houlette,  
Chassant deuant le troupelet menu  
Harpaut son chien & son belier cornu.*

## ECLOGVE IIII.

OV

DV-THIER.

LES PASTEVRS.

Bellot, Perrot, Bellin.

*De fortune Bellot & Perrot dessous l'ombre  
D'un vieil chesne touffu auoient serré par nombre,  
L'un à part ses brebis, & l'autre ses chéureaux.  
Et tous deux sur la léure auoient les chalumeaux :  
L'un & l'autre tenoit son eschine appuyée  
Sur l'escorce d'un chesne, & la iambe pliée  
En croix sur la houlette, & leur mastin estoit  
Couché pres de leurs pieds, qui les loups aguettoit.*

*Ce-pendant que Bellot chantoit sa Dianette,  
Et que Perrot faisoit apprendre à sa Musette  
Le saint nom de Charlot, & d'Annot, que les bois,  
Les fleuves & les monts ont ouy tant de fois  
Redire à son flageol, que ces Dieux le cognoissent  
Mieux que les gras troupeaux le Thim dont ils se paissent :  
Voicy venir Bellin, qui seul auoit erré  
Tout un iour à chercher son belier adiré,  
Qu'à peine il ramenoit, ayant lié sa corne  
A un lasset coulant d'un tortis de viorne.*



Or ce Bellin estoit de chanter bon ouurier,  
D'habits & de façons ressembloit vn chéurier,  
Il auoit en la main vne houlette dure:  
Sa Musette pendoit au long de sa ceinture,  
De moëlle de ionc il portoit vn chapeau,  
En lieu d'un paletoc se vestoit d'une peau  
D'un chéureau marqueté de couleur noire & blanche,  
Qu'une boucle d'airain luy serroit sur la hanche:  
D'un chéureul auorté vn baudrier il auoit:  
Son mastin à gros poil pas à pas le suiuiot,  
Qui abayoit son ombre, & mordoit à la fesse  
Le belier qui trainer par la corne se laisse.

Si tost que ie le vy, si tost ie le cognu,  
Et luy criay de loin: Tu sois le bien-venu,  
Couche toy pres de nous, ou si le mol ombrage  
Du chesne te desplait, voy cest Antre sauuage,  
Au fond de ce vallon nous irons si tu veux,  
Et là tu chanteras le tiers avec nous deux.

Au bout de l'Antre sonne vne viue fontaine,  
Ses bords sont pleins de mousse, & le fond d'une arene  
Que l'onde en sautelant fait iallir çà & là,  
Et dit-on qu'autrefois la fontaine parla.

Vne vigne sauuage est rampant sur la porte,  
Qui en se recourbant sur le ventre se porte  
D'une longue trainée, & du haut iusqu'à bas  
D'infertiles raisins laisse pendre ses bras.

Les sieges sont de tuf, & autour de la pierre  
Comme un passément verd court vn sep de lierre.

L'Antre n'est guiere loin, tu le verras d'ici  
Si tu veux t'ergotter, ou te tenir ainsi  
Debout comme ie suis, ou grimper à ce saule,  
Ou bien d'un sault leger monter sur mon espaul.

Mais ne bougeon d'icy, cest ombrage est bien frais,  
Et bien frais est le vent qui vient de ces forés:

*Bien doux est ce ruisseau, bien douces ces Bergeres  
Qui desgoisent leur chant aupres de ces fougeres :  
Ton belier les oit bien, qui ne fait qu'escouter,  
Et depuis leur chançon n'a pas daigné brouter.*

### Bellin.

*Ne bougeon, mon Perrot, l'ombre du chesne est bonne :  
Icy parmi les prez la belle herbe fleuronne,  
Icy les papillons peints de mille couleurs,  
Et les mousches à miel volletent sur les fleurs :  
Icy sur les ormeaux se plaint la tourterelle,  
Icy le colombeau baise la colombelle,  
Philomele se deult, & d'un gentil babil  
Progné d'une autre part lamente son ltyl.*

*De vous deux vne Eclogue à l'envy soit ioüée :  
Perrot, les Loups m'ont veu, ma voix est enroüée,  
Ie ne sçaurois chanter, & quand ie le voudrois  
(Ie iure par ton bouc) encor ie ne pourrois :  
Car on m'a defrobé à ceste matinée  
L'anche de mon bourdon que tu m'auois donnée.  
I'ay bien veu le larron qui s'ensuyoit de moy,  
Et tant plus à Thenot ie le monstrois au doy,  
Plus il gaignoit le bois, & se cachoit derriere  
(Afin qu'on ne le vist) d'une espeffe ronciere.*

### Perrot.

*Ce n'est pas d'aujourd'huy qu'on voit force larrons  
Entre les Pastoureaux ; par tous les enuirons  
De ces prochains taillis on ne voit autre chose :  
C'est pourquoy mon mastin toute nuit ne repose,*

*Et ne fait qu'abayer. Bellot encores hier,  
Comme il dormoit seulet sous l'ombre d'un coudrier,  
Perdit sa chalemie, & son pipeau d'auaine,  
Qui valoient bien d'achat quatre toisons de laine.*

*Depuis ie vy Thoumin, qui dans le carrefour  
Où tu vois cest ormeau, enfloit tout à l'entour  
Les veines de son col, pour vouloir contrefaire  
Bellot: mais le pipeau ne le vouloit pas faire,  
Ains d'un son miserable irritoit par les champs  
Les Geais & les Piuers à respondre à ses chants.*

*Et moy, i'ay bien perdu ma Loure toute entiere,  
Que Pernet desroba dedans ma panetiere.  
Ie haſlay mon mastin apres le larronneau,  
Qui si pres le suiuit, qu'il le prist au manteau:  
Il se sauua pourtant, & de la Loure mienne  
Touſiours sonne depuis, & iure qu'elle est sienne.  
Ianot ſçait bien que non: car il me la bailla,  
Et de nuit & de iour curieux trauailla  
Pour m'en faire iouer, contrefaisant la Muse  
Qui chanta les Bergers és bois de Syracuse.*

*Ne laiſſe pour cela, mon Bellot, de chanter:  
Les bois ne ſont pas ſourds, ils pourront t'eſcouter.  
Echon nous respondra, & nous ferons egales  
Nos rustiques chansons à la voix des Cygales.  
Chanton l'un apres l'autre, & en ceste façon  
Que Phæbus aime tant, difons vne chanson.*

**Bellot.**

*Mes vers au nom de Pan il faut commencer, Muses:  
Pan est Dieu des Pasteurs, il a de moy souci,  
Il daigne bien danser deſſous mes cornemuses,  
Il a ſoin de la France & de mes vers auſſi.*

Perrot.

*Au saint nom de Palès il faut que ie commence :  
Palès ainsi que Pan aime les Pastoureaux,  
Au bruit de mon flageol bien souvent elle danse,  
Elle a soin de mes vers, & de tous mes toreaux.*

Bellot.

*Diane, qui les cerfs va suivant à la trace,  
A qui tout le beau front en Croissant apparôist,  
Ne cognoist pas si bien en courant à la chasse  
La meute de ses chiens, comme elle me cognoist.*

Perrot.

*Phœbus le cheuëlu, Dieu qui preside à Cynthe,  
M'aime plus que son Luth: ie fais sa volonté,  
Toujours ses dons ie porte, au sein son Hyacinthe,  
Son Laurier sur le front, sa trouffe à mon costé.*

Bellot.

*Deux petits ramereaux ie porte à mon Oliue,  
Denichez d'un grand orme à grauir mal-aisé,  
Afin de la baiser s'elle veut que ie viue:  
Autrement ie mourray si ie n'estois baisé.*

Perrot.

*Ie portay l'autre iour deux tourtres à Cassandre,  
Et mon present & moy beaucoup elle prisâ :  
De sa blanchette main l'oreille me vint prendre  
Et plus de mille-fois doucement me baisa.*

Bellot.

*Il ne faut comparer ma Bergere à la tienne,  
Non plus qu'une fleur viue à des boutons faniz :  
La tienne est toute brune, & tu sçais que la mienne  
(Tu la vis l'autre iour) est plus blanche que liz.*

Perrot.

*La couleur blanche tombe, & la couleur brunette  
Est tousiours en saison, & ne se flestrit pas :  
On cueult du Baciet la fleur toute noirette,  
Le liz qui est tout blanc, bien souuent tombe à bas.*

Bellot.

*Je ne veux plus aller où ma Nymphé sejourne,  
L'y pers tousiours mon cœur esgaré qui la suit,  
Comme un bouc adiré qui le soir ne retourne  
A l'estable & d'amour s'esgare toute nuit.*

Perrot.

*Je n'ose voir la mienne, elle m'a fait malade  
Plus de trois iours entiers en extreme langueur :  
Je ne sçay quels amours sortoient de son œillade,  
Qui de cent mille traits me percerent le cœur.*

Bellot.

*Mon mastin, garde bien de mordre ma mignonne  
Si elle vient me voir, ains baise luy les pieds :  
Mais abaye de loin, si de quelque personne  
Au milieu de nos jeux nous estions espiez.*

Perrot.

*J'aime bien mon mastin, par luy ie vy m'amie  
L'autre iour que le chant me faisoit sommeiller:  
Elle iettoit des fleurs sur ma bouche endormie,  
Mon mastin abayoit à fin de m'esueiller.*

Bellot.

*Que tousiours Auanson maugré l'âge fleurisse:  
Car il aime les vers, & tous ceux qui les font.  
Ie pais à son honneur vne belle Genisse,  
Qui de blanche couleur porte vne estoile au front.*

Perrot.

*Mon Du-thier dans le Ciel puisse prendre sa place,  
Il aime ceux qui vont les Muses poursuivant:  
Ie luy pais vn Tureau qui les Pasteurs menace  
De la corne, & du pied pousse l'arene au vent.*

Bellot.

*Quiconque aime Auanson, par ses champs toutes choses  
Luy puissent à souhait venir de toutes pars:  
Quelque part qu'il ira, les aillets & les roses,  
Et fust-ce aux iours d'hyuer, luy naissent sous les pas.*

Perrot.

*Quiconque aime Du-thier, qu'il flechisse les marbres,  
Qu'en parlant le doux miel luy coule de la vois,  
Le Regelice soit racine de ses arbres,  
De sucre ses rochers, de canelle ses bois.*

Bellot.

*S'il est vray que ie chante aussi bien qu'és montaignes  
Chantent au mois de May les doux Rossignolets,  
Nymphes ie vous suppli', païssez par ces campagnes  
D'herbettes & de fleurs mes petits aignelets.*

Perrot.

*S'il est vray que ie chante aussi bien que Tityre,  
Et que du premier rang tousiours vous m'avez mis,  
Nymphes ie vous suppli', que mon troupeau n'empire,  
Païssez-le de bonne herbe, & luy enflez le Pis.*

Bellot.

*De laiët puissent couler les ondes de mon Loire,  
Ses bords soient pour iamais d'hyacinthes semez,  
Et de ces belles fleurs qui gardent la memoire  
Et le beau nom des Rois en elles transformez.*

Perrot.

*Mon Loir coule de miel, son arene soit pleine  
De perles & rubis, & sa riue d'esmail,  
Ses coustaux de raisins, & de froment sa plaine,  
De manne ses forests, & ses prez de bestail.*

Bellot.

*Mais d'où vient que mon bouc, qui sautoit si alaigne,  
Qui gaillard dans ces prez cossoit contre mes bœufs,  
Depuis qu'il vit ta chœure, est deuenu si maigre ?  
Ie ne sçay qu'il auroit, s'il n'estoit amoureux.*



Perrot.

*La chéure que tu dis, sur vne pierre dure  
Auorta l'autre iour, depuis elle ne paist  
Ny saule ne fouteau, c'est vn mauuais augure :  
Bellot, si tu le sçais, dy le moy s'il te plaist.*

Bellot.

*Je cognois des Pasteurs, qui nos bœufs enforcellent  
De regards enchantez : puissent ils arriuer  
Auecques leur troupeau quand les fleurs renouellent,  
Au Printemps en Afrique, en la Thrace l'Hiuer.*

Perrot.

*De ce taillis prochain deux vieilles sont sorties,  
Qui m'ont enforcillé mon pauvre toreau blanc :  
PuisSENT elles dormir au milieu des orties,  
Après auoir gratté leurs corps iusques au sang.*

Bellot.

*Si i'auois mon Oliue, & les barbes des léures  
De mes boucs estoient d'or, & si tant d'or i'auois  
Que de poil se herisse en la peau de mes chéures,  
Le ne voudrois pas estre vn Faune de ces bois.*

Perrot.

*Si mes brebis portoient vne toison dorée,  
Si i'auois ma Cassandre, & mes beliers cornus  
Auoient les ergots d'or, au cœur de ceste prée  
Le bastirois vn Temple à la belle Venus.*

Bellot.

*Ia la chaleur se passe, & le Soleil s'abaisse,  
Les vents sont abaissez, les bois dorment sans bruit:  
Mais la flame d'amour qui iamais ne me laisse,  
Plus s'allume en mon cœur, plus s'approche la nuit.*

Perrot.

*La nuit nourrit le mien que ie ne puis esteindre,  
Aualler toute l'eau de la mer me faudroit:  
Mais pour boire la mer il ne seroit pas moindre,  
Plus ie l'arrouserois & plus il reuiendrait.*

Bellot.

*Desur deux chesneteaux hier à toute force  
Auanson ie grauy avecques un poinçon:  
Les deux chesnes croistront, & la nouvelle escorce  
Portera iusqu'au Ciel le nom de d'Auanson.*

Perrot.

*A la Déesse Echon qui par les bois resonne  
l'apprens le nom Du-thier si souuent & si bien,  
Que parmy les forests ceste Nymphé ne sonne  
Ny entre les rochers, autre nom que le sien.*

Bellot.

*Hou mastin ! va chasser mon bouc que ie voy pendre  
Sur le haut de ce roc, il pourroit trebucher:  
Fay-le icy venir paistre, où l'herbe est la plus tendre.  
Si ie prens ma houlette ! il se fait bien chercher.*

Perrot.

*Pres des meres païssez, païssez parmy l'herbette  
Petit troupeau d'aigneaux, pour la crainte des loups :  
Tousiours deuers le soir la beste vous aguette,  
Ne vous eslongnez pas, elle courra sur vous.*

Bellot.

*Dy moy quelle herbe fait les hommes inuisibles  
Mise desur la langue, à fin de l'esprouuer,  
De qui lanne faisoit des choses impossibles :  
Tu me seras vn Dieu, si tu la peux trouuer.*

Perrot.

*Mais deuine toy-mesme, & tu seras Prophete  
Le plus grand des Pasteurs, de quelle herbe est change  
Le cœur d'vne pucelle, & de cruelle est faite  
Plus douce à son amy, quand elle en a mangé?*

Bellin.

*Il ne faut point entrer en si longue dispute.  
Mon Bellot mon amy, prens de moy ceste Flute :  
Fredel, ce bon ouurier, de Buis la façonna,  
Et par quatre pertuis le vent il luy donna.  
Toy, Perrot, prens aussi ceste belle Chéurette :  
Son ventre est fait de Cerf, son anche de Coudrette,  
Son bourdon de Prunier : iamais ne perd le vent :  
Car elle est bien cirée & derriere & deuant.  
Perrot prist la Chéurette, & seul par les valées  
Et les bords plus secrets des riués reculées*

*Alloit sonnant Du-thier : Du-thier sonnoit sa vois,  
 Et Du-thier respondoient les antres & les bois.  
 Il le sonnoit au soir quand le Soleil se couche,  
 Le sonnoit au matin quand il sort de sa couche,  
 Le sonnoit à midy alors que les troupeaux  
 Remaschent leur viande à l'ombre des ormeaux.  
 Car il aimoit Du-thier, autant que les Auettes  
 Aiment au mois d'Auril les odeurs des fleurettes,  
 Les brebis la rosée : & dès ceste heure-là  
 Perrot laissa les bois, & aux Rois s'en-alla*

## ECLOGVE V.

### LES PASTEVRS.

Carlin, Xandrin, Lanfac.

*Deux freres Pastoureux, qui auoient pris naissance  
 De Pan qui commandoit nagueres à la France,  
 Tous deux d'âge pareils, se rencontrant vn iour  
 Apprindrent aux forests à parler de l'amour :  
 Tous deux auoient appris d'enfler les cornemuses,  
 L'un deffous Amyot le grand amy des Muses,  
 Et l'autre deffous Selue, à qui Phebus donna  
 Sa Lyre & son Laurier quand il le couronna.*

*Tous deux estoient sçavans, bien appris à semondre,  
 Bien appris à chanter, bien appris à respondre :  
 Tous deux apparoiſſoient miracle de leur temps,  
 Faisans naistre des fleurs plustost que leur printemps.*

*Comme Carlin vn iour retournoit de la chasse  
 (L'un auoit nom Carlin, l'autre Xandrin) il passe  
 Aupres d'une fontaine, où son frere Xandrin*

*Païssoit ses gras aigneaux de verd trefle & de thim :  
Aussi tost que Carlin l'apperceut, il s'escrie.*

Carlin.

*Xandrin gentil Pasteur, chanton ie te supplie :  
Tous les Bergers d'icy ont estimé de toy  
Que tu es plus sçauant à bien chanter que moy :  
Ie viens pour t'essayer, & te faire cognoistre  
Qu'en l'art de bien chanter ie ne trouue mon maistre.*

Xandrin.

*Carlin gentil Berger, ie suis prest de chanter :  
Mais auant le combat il ne faut se vanter,  
Approche, me voicy : ie te feray cognoistre  
Qu'en l'art de bien chanter ie ne trouue mon maistre.  
Mais que veux-tu gager ?*

Carlin.

*Tout ce que tu voudras :  
Ie gage deux aigneaux, gage deux chéureaux gras.*

Xandrin.

*En lieu de tes aigneaux ie veux mettre vne tasse  
Qui quatre fois le prix de ton gage surpasse,  
Nouvellement tournée : encores elle sent  
La cire & le burin : vne vigne descent  
Tout à l'entour des bords, qui de raisins chargée  
Est de quatre ou de cinq pucelles vendangée,  
L'une tient vn panier, l'autre tient vn couteau,  
Et l'autre de ses pieds presse le vin nouveau  
Qui semble s'escouler en sa voute profonde.*

*A l'ombre de la vigne est vne Nympe blonde  
A cheueux deliez, qui se couure le flanc*

Et le corps seulement d'un petit linge blanc :  
 Deux Satyres cornus sont aupres de la belle,  
 Qui ont les yeux enflez de trop veiller pour elle,  
 Bleffez de son amour : mais peu se challant d'eux,  
 Quelquefois desur l'un, quelquefois sur les deux  
 Mignarde son regard, & se prend à sou-rire  
 Leur donnant le martel, & ne s'en fait que rire.

Vn Pescheur est assis au bord du Gobelet,  
 Qui courbé fait semblant de ietter un filet  
 Dans la mer pour pescher, puis de toute sa force  
 Et de mains & de nerfs & de veines s'efforce  
 De le tirer sur l'eau : ses muscles grands & gros  
 S'enflent depuis son chef iusqu'au bas de son dos :  
 Tout le front luy degoutte, & bien qu'il soit vieil homme,  
 Le labeur toutefois ses membres ne consomme :  
 Son ret est dessous l'eau, & diriez à le voir  
 Qu'en tirant il ahanne, & ne le peut r'auoir.  
 Ma léure au Gobelet n'a touché pour y boire :  
 Tu l'auras toutefois si tu as la victoire.

Carlin.

Ie gage une Musette au lieu de ton vaisseau,  
 Qui me couste en argent la valeur d'un Toreau,  
 Que d'un ligneul ciré au genouil i'ay fait coudre :  
 Son ventre est peau de Cerf, ses anches sont de Coudre,  
 Son bourdon est de Buis, son pipeau de Prunier.  
 C'est un chef-d'œuvre grand ! Seluin ce bon ouurier  
 En ces bois l'autre iour me la vendit bien chere :  
 Ie la voulois donner à Margot la Bergere,  
 Margot qui par les bois garde icy comme nous  
 Les troupeaux de Catin, & fait la guerre aux Loups.

Ou bien si tu ne veux, ie mets ma panetiere :  
 D'un auorton de Biche est la peau toute entiere :

Et te diray comment j'ay receu ce bon-heur  
Que de l'aouir pour mienne & d'en estre seigneur.

L'autre iour en gardant mes bœufs en ce bocage,  
Je vy qu'un Loup suiuoit vne Biche sauuage,  
Et la pressoit si fort que desia la tenoit,  
Et d'haleine & de poulx moindre elle deuenoit :  
Elle battoit des flancs, sa langue estoit tirée,  
Comme estant ja du Loup la proye désirée :

Quand en prenant mon arc ie le banday soudain,  
Je le courbe en Croissant de la fenestre main,  
Je l'eslongne du front, puis comme bien adextre,  
De l'autre ie l'approche à la mammelle dextre :  
L'arc soudain se desbande, & le trait fait vn son,  
Qui passant viftement de buisson en buisson,  
Sifflant & fendant l'air, entama d'aventure  
La biche sous le cœur de mortelle ouuerture  
Vn peu deffous l'espaule : elle tombe à genoux,  
Et le Loup s'ensuit fremissant de courroux.

L'approche & la decoupe, & comme ie m'arreste  
A vouloir decercler les tripes de la beste,  
Je vy trembler vn Fan, lequel me sembla beau,  
De taches marqueté : i'en escorchay la peau,  
L'en fis ma panetiere, où quatre ou cinq cachettes  
Se trouuent là dedans comme belles chambrettes,  
L'une à mettre le pain, l'autre à mettre des nois,  
L'autre à mettre la fonde & mon vaisseau de bois.  
Or tienne elle sera, si Pan te fauorise,  
Estant victorieux de si belle entreprise.

#### Xandrin.

Qui sera nostre iuge, & voudra sans faueur  
Donner au mieux-disant la victoire & l'honneur ?

Appellon ce Pasteur qui est docte en Musique,  
Qui de tels differents entend bien la pratique :



*C'est celuy que mon chien abbaye : vois-tu pas  
 Comme gaillard il vient deuers nous le grand pas ?  
 A voir sa panetiere & sa grise iaquette,  
 Son chapeau fait de ionc, sa fonde & sa houlette,  
 C'est le Pasteur Lansac, des Muses le soucy,  
 Dont le renom s'honore en autre part qu'icy :  
 Le Tybre l'a cognu, & les eaux argentines  
 De la Touure qui court toute blanche de Cygnes.*

Carlin.

*Juge-nous sans faueur, donne à celuy le prix  
 Qui fera de nous deux à chanter mieux appris :  
 Nostre combat ne vient pour noise ny querelle,  
 C'est pour voir qui aura Maistresse la plus belle.  
 « Tous deux ne sommes qu'un : bien souuent l'amitié  
 « Par un ioyeux combat renforce de moitié.*

Lansac.

*Or-sus assisez-vous, icy l'herbe est fleurie,  
 Icy la vigne tendre aux ormeaux se marie  
 Icy l'ombrage est frais, icy naissent les fleurs,  
 Icy le Rossignol rechante ses douleurs,  
 Icy l'onde murmure, & le gentil Zephire  
 Au trauers de ce bois par les fueilles souspire.  
 Carlin, chante premier, & toy Xandrin apres  
 Fais en luy respondant retentir ces forests.*

Carlin.

*Du puissant Iupiter les Princes ont leur estre,  
 Les Rois au temps passé estoient des Pastoureaux :  
 Apollon & Mercure autrefois ont fait paistre  
 (Fils de Dieux comme nous) icy bas les troupeaux.*

Xandrin.

*Pan preside aux Pasteurs, du ciel il me regarde,  
Il entend ma priere, il escoute mes chants :  
Sur la France & sur moy de bon œil il prend garde,  
Il nourrist mes troupeaux & augmente mes champs.*

Carlin.

*Depuis le mortel coup, qui (tout le cœur me serre  
Làs ! quand il m'en souvient, d'angoisses & de pleurs)  
Enuoya Pan au ciel, la plus fertile terre  
N'a produit que chardons en lieu de belles fleurs.*

Xandrin.

*En lieu de bon Froment est sorty la Nielle,  
Chardons pour Artichaux, Chenarde pour Safran :  
Toute chose est changée, & la Rose nouvelle  
Et les Lis sont flestris aux plus beaux iours de l'an.*

Carlin.

*Que vous estes heureux d'avoir pris accroissance,  
Chesnes qui faites ombre à ces bois d'icy près !  
Les petits buissonnets n'ont force ny puissance :  
le voudrois estre grand comme ces grands forests.*

Xandrin.

*L'âge ne sert de rien, pourueu que le courage  
Soit grand & genereux : ces buissons que tu vois  
Qui ne font aujourd'huy sinon vn peu d'ombrage,  
Deuiendront quelque fois aussi hauts que ces bois.*

Carlin.

*Païssez douces brebis, païssez en ceste plaine  
Bonne herbe, & toy mon chien garde bien mon troupeau :  
Quand j'auray le loisir, toutes en la fontaine  
Le vous iray lauer pour vous blanchir la peau.*

Xandrin.

*Bouc qui frappes du pied, & de la corne pousfes  
Le front de mes chéureaux, sois desormais plus doux :  
Il ne faut irriter mes chéures qui sont douces,  
Autrement tu serois la pasture des Loups.*

Carlin.

*Ne reuiendra iamais ceste saison dorée  
Où les Pasteurs Charlots par les champs fleurissoient ?  
Quand la terre portoit sans estre labourée  
Les bleds qui de leur gré par les champs iaunissoient ?*

Xandrin.

*Entre les hommes vifs tousiours vit l'esperance,  
Pren courage Carlin, ce bon temps reuiendra :  
Les eaux courront de laiçt, le miel prendra naissance  
Des Chesnes, & l'Hyuer le Printemps deuiendra.*

Carlin.

*Fleuves, enfans de l'Air, & vous fleurs bien-aimées,  
Si chantant vos honneurs quelque honneur ie reçois,  
Païssez à mon souhait mes brebis affamées,  
Et si Xandrin y vient, faites luy comme à moy.*

Xandrin.

*Herbes qui fleurissez, douces plantes sacrées,  
Si au son de mes vers ie vous vais esbatant  
Paissez à mon souhait mes aigneaux par ces prés,  
Et si Carlin y vient qu'il en recoiue autant.*

Carlin.

*Nymphes, mon cher soucy, permettez que ie face  
Des vers tels que Francin ce grand Pasteur diuin :  
Ou bien s'il ne vous plaist me faire ceste grace,  
En vœu ie luy pendray mon flageol à ce Pin.*

Xandrin.

*Bergers, d'un verd Laurier faites une couronne  
Pour honorer mon chef : car si le Ciel ialous  
De l'honneur des Pasteurs beaucoup d'âge me donne,  
l'espere quelque iour estre maistre de vous.*

Carlin.

*De mon flageol vn iour puisse-ie tant apprendre,  
Que ie chante à l'enuy les honneurs de Catin  
Qui douce m'a nourry, comme vne mere tendre  
Son enfant le plus cher nourrist de son tetin.*

Xandrin.

*Ainsi que toy ie veux chanter les honneurs d'elle,  
l'espere de sa main des Lauriers triomphans :  
Douce elle m'a nourry, comme autrefois Cybelle  
Sur les monts Ideans nourrissoit ses enfans.*

Carlin.

*Je veux de gazons verds, pour mieux luy faire hommage,  
Luy dresser vn Autel couuert de Poliot,  
Où de Cormier taillé ie mettray son image,  
Celle des deux Francins, celle de Henriot.*

Xandrin.

*Je veux chanter deux vers sur mon tuyau d'auène:  
Le vent les portera le long de ces pastis:*

Catin temporisant souffrit beaucoup de peine  
Pour garder nos troupeaux quand nous estions petits.

Carlin.

*Que ne tiens-ie en mes bras la douce Pastourelle  
Qui le cœur m'a rauy d'un regard gracieux?  
Qui de corps & de taille & de face est si belle,  
Que ie suis trop heureux de languir pour ses yeux?*

Xandrin.

*Je ne voudrois auoir les troupeaux d'Arcadie,  
Ny des plus riches Rois les tresors plantureux:  
Si i'auois seulement vn baiser de m'amie  
Deffous ces verds coudriers, ie serois trop heureux.*

Carlin.

*Si tost que dans ces champs arriue Galatée,  
Les herbes & les fleurs naissent par tout icy:  
Mais si tost qu'autre part sa veuë est escartée  
Pour s'en-aller de moy, les fleurs s'en-vont aussi.*

Xandrin.

*Si tost que dans ces champs arriue Pasithée,  
Par tout où elle va le beau Printemps la suit :  
Mais si tost qu'autre part sa veuë est escartée  
Pour s'enfuir de moy, le beau Printemps s'enfuit.*

Carlin.

*le garde à Galatée vn bel effein d'abeilles,  
Qui bruyant doucement la belle endormiront :  
le luy garde vn Chéureau qui desja fait merueilles  
De bondir desur l'herbe, & de coffer du front.*

Xandrin.

*le garde à Pasithée vne Linote en cage,  
Que i'ay prise à la glus, & si bien l'autre iour  
le luy fis oublier en vn soir son ramage,  
Que maintenant son chant n'est sinon que d'amour.*

Carlin.

*Bouc, le mary barbu de mon troupeau champestre,  
Va dire à Galatée à fin de l'enflamer,  
Que le diuin Protée a souuent mené paistre  
Du grand Prince Neptun les troupeaux sous la mer.*

Xandrin.

*Belier, fidele guide à mes brebis fertiles,  
Va dire à Pasithée (elle chante icy pres)  
Que Pallas toute seule aille habiter les villes,  
le veux avecque Pan habiter les forests.*

Carlin.

*C'est vne chose triste au bois que la froidure,  
Aux Merles l'Esprenier, aux Riuieres l'Esté,  
Au Pasteur amoureux vne Maïstresse dure  
Qui garde apres la mort à Pluton sa beauté.*

Xandrin.

*Seul ie ne sens d'Amour les fleches trop cruelles :  
O pere Iupiter, ô Déeses & Dieux,  
Vous auez tous aimé, & les beautez mortelles  
Vous ont fait autrefois abandonner les Cieux.  
Xandrin auoit finy, quand Carlin qui s'auance  
D'enfler vne autre Flute, à chanter recommence.*

Carlin.

*Loups amis de ces bois, qui de iour & de nuit  
Aguettez le troupeau qui par l'herbe me suit,  
Pardonnez à mes bœufs, pardonnés à mes chœurs  
Et à mes boucs cornus qui portent barbe aux léures.*

*Et quoy mon chien Harpaut, te faut-il sommeiller  
Estant pres d'un enfant quand tu deusses veiller ?  
Brebis, ne vous feignez brouter tout mon herbage :  
Tant plus il est tondu il reuient d'auantage.  
Paissez-vous de bonne herbe & vous enflez le Pis :  
Le lait que vous aurez, sera pour vos petits  
Qui bestent dans le tait. Quoy ? vous ne faites conte  
De les aller penser ? n'avez-vous point de honte  
De vouloir tout le iour par les prez sejourner ?  
Voicy la nuit qui vient, il s'en faut retourner.*

*Carlin vouloit partir, quand Xandrin qui entonne  
Vn autre Chalumeau, telle Chançon luy sonne.*



## Xandrin.

*Tout ainsi qu'un beau fruit est l'honneur d'un verger,  
 Et un troupeau bien gras est l'honneur du Berger :  
 Ainsi, frere Carlin, l'honneur de nostre enfance  
 C'est nostre Catherine, ainçois de toute France.  
 Le miel puisse couler dessus elle en tout temps,  
 Naïsse dessous ses pieds à iamais un Printemps,  
 Que iamais le malheur sa hauteſſe n'abaiſſe,  
 Qu'elle ſoit des François la nouvelle Déeſſe,  
 Qu'elle eſcoute du ciel nos plaintes & nos vœux,  
 Et ſoit garde à iamais de France & de nous deux.*

## Lanſac.

*C'eſt plaisir que d'ouyr gemir vne Geniſſe,  
 D'ouyr le Roſſignol, d'ouyr l'onde qui gliffe  
 A val d'un haut rocher, d'ouyr contre les bords  
 Les flots de la grand mer quand les vents ne ſont forts :  
 Mais c'eſt plus grand plaisir d'entendre vos Muſettes,  
 Qui paſſent en douceur les douceurs des Auettes.*

*Vos bouches à iamais ſe rempliſſent de miel,  
 Et touſiours ſains & gais vous maintienne le ciel  
 En honneurs, en vertus, & en forces egales,  
 Puisque vos deux Chanſons ſurmontent les Cigales.*

*Que l'un donne ſon gage à l'autre de bon cœur,  
 Car l'un n'a point eſlé deſſus l'autre veinqueur :  
 Viuez par les foreſts ſans haine & ſans reproche,  
 Adieu Gentils Paſteurs, adieu, la nuit s'approche.*

## LE CYCLOPE AMOVREUX.

*Contre le mal d'amour qui tous les maux excède,  
L'artifice n'inuente vn plus certain remede  
Que se plaindre de luy & des Sœurs emprunter  
La voix qui peut du cœur les soucis enchanter.  
Mais il se trouue à peine vn homme entre cent mille  
Qui puisse se guarir: car Phebus n'est facile,  
Et ne preste l'oreille à tous les importuns:  
Puis des sçauantes Sœurs les arts ne sont communs,  
Autrement on voirroit leurs chansons triuiales,  
Si de leurs dons à tous se monstroient liberales.*

*Je sçay bien, d'Espिनay, que vous sçauiez comment  
On se peut allegier d'un si gaillard tourment:  
Apollon vous honore, & ceste belle trope  
Qui suit par les rochers les pas de Calliope:  
Puis vous estes courtois, & ie sçay bien aussi  
Que rien ne vous plaist tant qu'un amoureux souci:  
Vous ne fustes conceu dans vn desert rustique  
D'un tigre d'Hyrkanie, ou d'un lion d'Afrique.  
C'est pourquoy de Sicile au riuage Breton  
L'enuoy ce Polyfeme, à qui tout le menton  
Rude s'espaississoit d'une noire filace,  
Qui luy couuroit le front, les temples & la face.  
Car Amour qui resueille en nous les appetits,  
Domte aussi bien les grands comme il fait les petits,  
Par luy vous apprendrez que les Rois & les Princes  
Et les grands Gouverneurs des Royales prouinces,  
Qui ont le cœur hautain & le sang genereux,  
Ne sont pas seulement des beautez amoureux:*

Mais ceux qui les troupeaux conduisent en pasture,  
 Les pauvres idiots, les monstres de Nature  
 Cachent en la poitrine au plus profond du cœur  
 L'ulcere qui prouient d'amoureuse langueur :  
 Comme vn Cyclope fist, qui l'ame auoit dontée  
 De l'amour qu'il portoit à vne Galathée,  
 Naiade de la mer, dont il estoit espoit,  
 Et pour sa recompense elle ne l'aimoit point.

Or ce grand Polyfeme, horreur de la Sicile,  
 Enfant Neptunien, cruel & difficile,  
 Pour se faire plus beau, d'un râteau se peignoit,  
 Et d'une large faulx la barbe se rongnoit,  
 La mer fut son mirouër, sa main estoit pelue,  
 Et de poil herissé sa poitrine velue :  
 Son corps estoit geant, & au milieu du front  
 Il portoit vn grand œil comme vn grand bouclier rond :  
 Il tenoit en son poing au lieu d'une houlette  
 Vn sapin esbranché, il auoit sa Musette  
 Bruyante à cent tuyaux, & du haut du collet  
 Iusqu'au bas des genoux pendoit son flageolet,  
 Dans lequel il flutoit iour & nuict, menant paistre  
 Sur le bord de la mer son gras troupeau champestre.

Sa Maistresse il n'aimoit comme pour des bouquets,  
 Pour des petits anneaux, pour vn tas d'affiquets  
 Que donne le berger simplement à s'amie :  
 Mais comme forcené & tout plein de manie  
 Apres elle enrageoit : mais Amour le plus fin  
 Par l'aide des beaux vers le guarit à la fin.

Vn iour voyant du bord sa cruelle Maistresse  
 Qui se peignoit sur l'onde ainsi qu'une Deesse,  
 S'assist sus vn rocher, & d'un larmoyant son  
 Tourné deuers la mer chanta ceste chanson.

O belle Galathée ensemble fiere & belle,  
 Pourquoy ieune beauté m'estes-vous si cruelle ?

Pourquoy me tuez-vous ? ne vaudroit-il pas mieux  
 Me tuer de cent morts qui viennent de vos yeux  
 Mourant aupres de vous, que languir en seruage  
 Banny de vostre grace, au bord de ce riuage ?  
 Vos yeux dedans les miens ont versé tant d'amour  
 Que pour eux ie souspire & pleure nuit & iour,  
 Et tant suis allumé d'une ardeur incurable,  
 Que mon troupeau tout seul s'en retourne à l'estable  
 Quand le soir est venu, & sans conduite aussi  
 S'en reuient au matin seulet repaistre ici.

Les grans vaisseaux chargez, qu'en mer ie soulois prendre  
 En mes bras qu'au deuant de bien loin i'allois tendre,  
 Font voile au gré du vent sans plus me craindre rien,  
 Qui suis emprisonné dedans vostre lien,  
 Puis qu'il vous plaist, Maistresse, & si n'avez enuie  
 D'un seul petit baiser me soulager la vie,  
 A qui ja la vigueur & la force defaut :  
 Et ce qui plus me deult, c'est qu'il ne vous en chaut !

O montaigne d'Etna que d'ici ie regarde  
 Brusler incessamment d'une flame qui garde  
 Sa nourriture en soy ! comme vous au dedans  
 Amour m'a tout bruslé de ses flambeaux ardans,  
 Dont on peut la chaleur par mes souspirs comprendre.  
 Helas ! vostre brasier se couure d'une cendre  
 Qui par fois se rallume, & couvrir ie ne puis  
 D'une cendre le feu dont embrasé ie suis.

O fontaine Arethuse, amoureuse ancienne  
 De ce Dieu qui preside à l'onde Alpheïenne,  
 Le suis esmerueillé qu'en boiuant de vostre eau,  
 Et me baignant dedans, ie n'esteins le flambeau  
 Qu'Amour dedans le cœur si chaudement m'allume,  
 Et que vostre froideur ma chaleur ne consume !

O rochers endurcis au bord de ceste mer,  
 Le voudrois me pouuoir en pierre transformer

*Pour ne sentir plus rien, comme chose inutile,  
Non plus que fait Niobe au rocher de Sipyle !*

*O forests, que ie porte enuie à vostre bien !  
Et d'autant, ô forests, que vous ne sentez rien,  
Et d'autant que tousiours vostre chef renouvelle  
De Printemps en Printemps sa perruque nouvelle :  
Mais ie ne puis changer mon amoureux esmoy  
Qui tousiours m'accompagne & se vieillist en moy.*

*O mer, bien que soyiez & cruelle & amere,  
Ie ne vous puis haïr : car vous estes la mere  
De celle qui m'occist : on chante que Venus  
Nasquit d'escume blanche entre vos flots chenus,  
Toutefois elle est douce : & par nulle priere  
Ie ne scaurois flechir ceste autre mariniere,  
Ceste Venus seconde, en qui la cruauté  
De la mer apparroist avecques la beauté.*

*L'aime pour mon confort de voir la pierre ponce  
Qui nage dessus l'eau & iamaïs ne s'enfonce  
Non plus que mon penser, qui çà qui là noüant  
Ainsi que Galatée en l'eau se va ioüant.*

*L'aime bien des Daufins la gentille nature,  
Qui mal-gardez des flots, ont senti la pointure  
D'aimer ainsi que moy : mais leur sort amoureux  
Est trop plus que le mien en amour bien-heureux.*

*L'aime l'esponge aussi, d'autant qu'elle est utile  
A m'essuyer le pleur qui de mes yeux distile.*

*L'aime aussi le coural, d'autant qu'il est pareil  
Aux léures de m'amie & à son teint vermeil :  
Seulement ie me hay, desesperé, pour n'estre  
Aimé de ce bel œil qui du mien s'est fait maistre.*

*O Nymfe qui m'avez tout le cœur embrasé,  
Tendez moy vostre bouche à fin d'estre baisé.  
On dit qu'au ciel là haut un grand Iupiter tonne,  
Qui de ses feux ardens tous les peuples estonne :*

Vostre œil m'est Iupiter, qui tout m'a foudroyé  
D'un regard que m'avez dans le cœur enuoyé,  
Et si n'avez souci d'esteindre en nulle sorte,  
Non d'un petit sou-ris la flame que ie porte.

Las ! vous venez ici pour iouer sur les bors  
Quand seule vous voyez que tout seul ie m'endors,  
Et pour me resueiller vous me tirez l'oreille,  
Puis en l'eau vous fuyez si tost que ie m'esueille :  
Tant seulement les chiens qui gardent mon troupeau,  
Courrent apres vostre ombre & la suiuent sur l'eau.

Que maudit soit le iour que ie vous veis premiere  
Cueillir parmi ces prez des fleurs avec ma mere !  
Ie vous seruois de guide, & ie n'ay sceu depuis  
Moy-mesme me guider, tant esgaré ie suis.

De teste & d'estomac ie deuins tout malade,  
Mon œil deuint terni, ma couleur deuint fade :  
Ma mere sceut mon mal, qui iamais ne voulut  
Tant seulement vous dire un mot pour mon salut.  
S'elle vous eust conté ma passion nouvelle,  
Peut estre qu'eussiez fait quelque chose pour elle.

Hà que ie suis marri qu'en naissant ie ne pris  
La forme d'un poisson, à fin d'auoir appris  
A bien nager pour voir deffous les eaux profondes  
Quel plaisir vous auez à iouer sous les ondes !  
Tousiours à pleines mains ie vous eusse porté  
Des roses au Printemps, des œillets en Esté,  
Du safran en Autonne, & non pas tout ensemble,  
Mais comme la saison diuerse les assemble :  
Au-moins i'eusse baisé vostre main & vos bras :  
Car baiser vostre bouche il ne m'appartient pas.

Sortez de l'eau, Maistresse, & sortant qu'on oublie  
De plus s'en retourner, comme Amour qui me lie  
Me fait ici pour vous sur ce bord seiourner,  
Oubliant vers le soir de plus m'en retourner :



Et souffrez deormais que sans vous le riuage  
 De ceste grande mer soit battu de l'orage.  
 Mieux vaudroit en mon Antre avec moy demeurer  
 Pour faire du fromage & le lait pressurer,  
 Tirer deuers le soir le Pis aux vaches pleines,  
 Conduire les aigneaux par les herbeuses plaines,  
 Voir sauter les chéureaux, cossier les bouuillons,  
 Qu'habiter de la mer les steriles fillons.

Sortez donc de vostre Antre, & venez dès ceste heure  
 Habiter le seiour de ma douce demeure :  
 Vous serez à mon œil plus blanche que les lis,  
 Plus vermeille qu'œillels nouuellement cueillis,  
 Plus droite que le ionc, plus verte & plus fleurie  
 Que n'est au mois d'Auril vne ieune prairie,  
 Plus douce que l'ombrage au pasteur reposé,  
 Et plus plaisante à voir qu'un iardin arrosé.

Sinon vous me serez plus dure, ô Galatée,  
 Que n'est vne genice encores non dontée,  
 Plus superbe qu'un Paon, plus volage que vent,  
 Plus fuyarde qu'un Cerf que les chiens vont suiuant  
 Plus aspre que le feu, & plus fausse & menteuse  
 Que n'est de vostre mer l'apparence venteuse :  
 Si vous me cognoissiez, vous viendriez de bon gré  
 Vous-mesmes habiter en mon Antre sacré.

Ie suis riche en troupeaux, soit à corne ou à laine,  
 Les uns errent aux bords, les autres en la plaine,  
 Les autres plus legers grimpent sur le rocher,  
 Et les autres s'en-vont sur les fleurs se coucher,  
 L'un repose à l'estable, & l'autre dessous l'ombre :  
 Bref i'ay tant de troupeaux que ie n'en sçay le nombre,  
 Aussi sans les conter ie sçay que tout est mien :  
 « Pauvre est celuy qui sçait le nombre de son bien.

Ie trouuay l'autre iour le cauerneux repaire  
 D'une Ourse bien pelue, & dedans vne paire



De petits ourselets, qui desia pourront bien  
 Se iouer avec vous sans avoir peur de rien :  
 Ils sont fort esueillez, peu farouches, & semblent  
 Estre freres bessons, tant fort ils se ressemblent :  
 Ie les trouuay pour vous, ie les vous garde aussi  
 S'il vous plaist de venir dessus ce bord ici  
 M'embrasser en vos bras, & pousser hors de l'onde  
 De vostre chef marin la belle tresse blonde.

Venez donques à moy sans vouloir destourner  
 Vos yeux du beau present que ie vous veux donner :  
 Certes ie me cognois, ie ne suis si difforme  
 Que plaisir ie ne prenne à contempler ma forme :  
 Ma face l'autre iour sur l'onde i'esprouuay  
 Quand la mer estoit calme, & beau ie me trouuay.


Si mon chef herissé de ses cheueux ombrage  
 Mon espaule & mon dos comme vn fueillu bocage,  
 Et si velu de crins mon estomac est plein,  
 Ne pensez s'il vous plaist, que cela soit vilain :  
 Vn arbre n'est point beau sans espaisse fueillée,  
 Vn cheual sans longs crins, la laine entortillée  
 Fait belle la brebis, les plumes les oiseaux,  
 Longue barbe & long crin font les hommes plus beaux.

Ie n'ay qu'un œil au front : le Soleil qui nous darde  
 Le iour de ses rayons, d'un seul œil nous regarde.  
 La Lune n'a qu'un œil, ie n'ay qu'un œil aussi :  
 Compaignon du Soleil i'allege mon souci.  
 Adioustez d'autre part que Neptune est mon pere  
 Qui commande à vos eaux : vous l'aurez pour beau-pere  
 S'il vous plaist m'espouser, & si par amitié  
 De ce pauure Cyclope auez quelque pitié,  
 Qui ne trouue allégeance au mal qui le tourmente,  
 Sinon quand il vous voit, ou bien quand il vous chante.

Pauure Cyclope hélas ! quelle fureur a pris,  
 Fureur de trop aimer, follement tes esprits ?

*Il vaudroit mieux penser à ton petit affaire,  
Allaiter tes aigneaux & tes genices traire,  
Et lacer tes paniers sur ce bord tout le iour,  
Que d'estre sans rien faire à chanter de l'amour :  
Ou en aimer une autre, ou feindre dans toy-mesmes  
Que tu es bien aimé de celle que tu aimes.  
Car feindre d'estre aimé (puis que mieux on ne peut)  
Allege bien souvent l'amoureux qui se veut  
Soy-mesmes se tromper, se guarissant la playe  
Aussi bien par le faux que par la chose vraye.*





LES MASCARADES,  
COMBATS ET CARTELS, FAITS A  
PARIS ET AV CARNAVAL  
de Fontaine-bleau.

CARTEL I.

*Après avoir pour l'Amour combatu,  
Suiuant le train d'honneur & de vertu,  
Et fait sçauoir d'une main valeureuse  
Que peut l'ardeur d'une flame amoureuse :  
Après auoir les Dames sceu vanger  
Et trauersé maint pays estranger :  
Plein de ieunesse & d'amitié loyale  
le viens d'Irlande en ceste Court Royale,  
Où de tout temps on voit de toutes pars  
Des Cheualiers aussi vaillans que Mars.*

*Amour qui peut les plus vaillans contraindre,  
Ne m'a conduit ici pour me complaindre,  
Pour accuser ses traits ou sa rigueur :  
Car son bel arc n'offense point mon cœur,  
Ny le souci qui fait naistre les larmes  
De larges pleurs ne baigne point mes armes.*

*Vertu qui est nourrice de mon feu,  
M'a tellement d'une Dame pourueu,  
Qu'en la servant ie ne veux autre attente :  
De ses beaux yeux sans plus ie me contente.*

*En desirant ie ne desire rien,  
Ne iouissant ie iouis de mon bien,  
Tout mon parfait habite en ma parfaite,  
Ma volonté de son vouloir est faite.*

*Ie vis en elle, elle vit dedans moy,  
Ce n'est qu'un cœur, qu'une ame & qu'une foy  
Et qu'un esprit qui tient liez ensemble  
Un double corps qui du tout se ressemble :  
Elle est heureuse, & ie suis bien-heureux,  
Et bien-aimé, ie suis bien amoureux.*

*En son penser vit tousiours ma pensée,  
Son ame en moy, la mienne en foy passée  
Fait que cherchant ie me trouue en ses yeux,  
Et m'y trouuant ie ne cherche pas mieux.*

*Ainsi Amour qui a toute puissance,  
Fait de nos cœurs & de nous une essence,  
Car ie ne veux pour mon contentement  
Sinon l'aimer & la voir seulement,  
Et l'honorer comme chose tressainte.*

*Et c'est pourquoy ie n'ay point l'ame atteinte  
De triste ennuy comme un tas d'amoureux  
Qui sans espoir sont tousiours languoureux.*

*Donc si quelqu'un de la troupe veut dire  
Que la beauté dont la grace m'attire,  
Toutes beautez ne surpasse d'autant  
Que desur tous ie m'estime contant,  
Vienne au combat tenter ma hardiesse :  
Avant partir il faudra qu'il confesse  
Que rien n'approche au pris de sa beauté,  
Ny nulle foy pres de ma loyauté.*

## CARTEL II.

*Ayant l'œil triste & pesant le sourci,  
L'ay mille fois tout rempli de souci,  
Entre les bois, les monts & les riuages  
Conté ma plainte aux bestes plus sauvages,  
Eschaufant l'air de souspirs amoureux,  
Pensant au bien qui me fait malheureux.*

*Il n'y a bois ny roche tant soit dure,  
Antre, desert, ny ruisseau ny verdure  
Las ! qui ne soit tesmoin bien-assuré  
Du mal que j'ay si long temps enduré.*

*Mais cognoissant que les roches desertes,  
Antres & monts, & hautes forests vertes  
(Comme n'ayans ny cœur ny sentiment)  
N'auoyent pouuoir d'entendre mon tourment :  
Je viens des bois aux hommes, pour me faire  
Entendre d'eux, qui seuls de mon affaire  
Peuvent iuger, blasmant la cruauté  
D'une si ieune & parfaite beauté.*

*Quelle assurance est seure entre les Dames,  
Si leur donnant le sang, le corps, les ames,  
Si leur prestant & faueur & support,  
Pour recompense on n'a rien que la mort ?*

*O sexe ingrat & rempli de malice,  
Indigne helas qu'on luy face seruice !*

*O fier destin ! ô ciel infortuné !  
Pourquoy m'as-tu dès ieunesse donné  
Pour me tuer, vne Dame si belle ?  
Elle sçait bien que ie languis pour elle,*

*Que ie l'adore, & que ie l'aime mieux  
Cent mille fois que ie ne fais mes yeux,  
Mon cœur, mon sang : car ie n'aime ma vie  
Sinon d'autant qu'elle en fera seruie.*

*Douce beauté qui fais honte au Soleil,  
Regarde vn peu mon trauail nompareil,  
Ne sois ensemble & si belle & si fiere :*  
« *Toute rigueur s'amollit par priere :*  
« *Tout gentil cœur s'eschauffe d'amitié :*  
*Sois donc plus douce & prens de moy pitié.*

*C'est aux Serpens & aux bestes felonnes,  
Aux Tigres fiers, aux Ours & aux Lionnes  
D'estre cruels, & non pas à tes yeux  
Qui sont si beaux, si doux & gracieux.  
Garde toy bien que Dieu ne te punisse :*  
« *L'ingratitude est vn horrible vice,*  
« *Vice cruel, mechant & malheureux,*  
« *Et non logeable en vn cœur genereux.*

*Las ! si ma foy, si ma douleur extrême,  
Si t'aimer plus mille fois que moy-mesme,  
Si mes souspirs, mes plaintes & mes pleurs  
Pour recompense ont cent mille douleurs,  
Mauuaise chere, esperances trop vaines,  
Refus, dédain, paroles incertaines,  
Et vn propos non iamais asseuré,  
Et vn espoir qui est desesperé :*  
*Si i'ay senti les ruses dont les femmes  
Sçauent tromper les plus gentilles ames,  
Ie veux mourir, pour ne nourrir au cœur  
Si longuement vne telle langueur :*

« *Car par la mort l'ennuy se peut desfaire.*

*Et toutesfois la mort ne sçauroit faire  
Que ie n'honore & prise mon trespas,  
Et qu'aux esprits ie ne conte là bas*

*Que la beauté pour qui ie meurs est telle  
Qu'on n'en voit point au monde de plus belle.*

*Donq' si quelqu'un veut soustenir ici  
Que la douleur où ie suis endurci,  
Ne vaille mieux que toute iouissance,  
Vienne au combat esprouuer ma puissance :  
Ie soustiendray que telle cruauté  
Me rend heureux pour si grande beauté.*

### CARTEL III.

*Si le renom des Cheualiers François,  
Et la vertu des magnanimes Rois  
Dont vous tirez vostre race si belle,  
N'eussent voulu de tout temps soustenir  
Les affligez, vous ne voirriez venir  
Vers vous ici ceste humble Damoiselle :*

*Laquelle vient, Sire, vous requerir  
De nous vouloir au besoin secourir,  
Nous redonnant la liberté rauie :  
Et pour auoir de nous compassion,  
Vous plaise ouir de quelle oppression  
Vn fier Tyran tourmente nostre vie.*

*D'illustre sang & d'antique maison  
Fusmes deux sœurs, qui viuons en prison,  
En bonne grace & en vertus parfaites :  
Heureuses las ! si nous n'eussions porté  
Desur le front tant de ieune beauté,  
Et si le Ciel plus laides nous eust faites !*

*Nostre beauté nous a fait vn grand tort :  
Car pour auoir trop de beautez, trop fort  
D'un grand Tyran helas ! sommes aimées,*



Qui ne pouuant nos chastetez forcer,  
 Son trop d'amour en haine a fait passer  
 Nous retenant en prison enfermées.  
 Ce glorieux d'Arcalaüs yssu,  
 Par artifice edifier a sceu  
 Vne grand tour inaccessible & forte,  
 Où il nous fait cent mille maux sentir,  
 Et pour n'auoir liberté de sortir,  
 Deux Cheualiers a mis deuant la porte.  
 Or nous auons par Vrgande entendu  
 Que le malheur dessus nous descendu,  
 Et la misere où nostre vie abonde,  
 Ne se perdra sinon par les efforts  
 De deux guerriers ieunes, courtois & forts,  
 Enfans d'un Roy le plus vaillant du monde.  
 Et pour-autant, Sire, que la vigueur  
 Qui de prouësse allume vostre cœur,  
 Et celle aussi de Henry vostre frere  
 Vous font ensemble & vaillans & courtois,  
 Nous esperons qu'en vestant le harnois  
 Tous deux pourrez l'entreprise parfaire :  
 Et ne pourront ces deux grans Cheualiers,  
 Bien qu'on les vante aux armes les premiers,  
 Vous resister que n'ayez la victoire  
 Digne du lieu dont vous estes venus :  
 Ainsi serez par le monde cognus  
 Deux grans guerriers pleins de force & de gloire.

### CARTEL IIII.

Demeure, Cheualier, & en la mesme place  
 Arreste ton cheual & retiens ton audace :

*Car soit que la fortune ou soit que le malheur,  
Ou soit que le desir d'esprouuer ta valeur  
Te meine à ce Chasteau, entens les auentures  
Que tu dois acheuer, difficiles & dures.*

*Encores que tu sois vaillant & martial,  
Si tu n'es Cheualier à ta Dame loyal,  
Tu ne pourras passer vne arche qui se treuue,  
Où la fidele amour des Cheualiers s'esprouue.*

*Donques de passer outre essayer il ne faut  
Si la ferme amitié dans le cœur te defaut,  
Et si parfaitement celle tu n'as seruiue  
Que tu deuois tenir plus chere que ta vie.*

*Ce Chasteau que tu vois, n'a seulement le mur  
Sauuage, solitaire, inaccessible & dur,  
Mais il est par dedans encores plus terrible,  
Plein de peur & d'effroy, & d'une crainte horrible  
De fantômes, d'esprits & de brasiers ardans :  
Toutefois agreable à ceux qui sont dedans  
Autant que par dehors à tous il est estrange.*

*Six vaillans Cheualiers d'eternelle louange,  
Fauorisez de Mars, ieunes, auantureux,  
Magnanimes & forts & loyaux amoureux,  
Le gardent nuit & iour, & d'une estrange sorte  
Contre tous assaillans en defendent la porte.*

*Or toy quiconque sois animé de vertu,  
Qui as en mille lieux pour l'amour combatu,  
Regarde en quel danger follement tu te iettes,  
Et au pris de ta vie vn repentir n'achettes.*

*Regarde, Cheualier, auant que t'esprouuer,  
Le moyen d'en sortir si tu en peux trouuer.  
Voy le camp plein de sang de tant de forts gen-d'armes,  
Bordé de tous costez de toutes sortes d'armes,  
Piques, haches, poignards : de toutes tu prendras  
Pour venir au combat celle que tu voudras,*

*A cheual & à pied esprouant ta prouësse  
Contre vn des six armé d'amour & de ieunesse.*

*Or si tu es veincu, l'Amant victorieux  
Portera pour trophé hautain & glorieux  
Ta despouille à sa Dame : & si ton bras surmonte,  
Tu porteras la sienne à celle qui te donte :  
Et ton corps enchainé prisonnier demourra,  
Qui sans pouuoir mourir, cent mille fois mourra.*

*L'ay veu maints Cheualiers, dont la fiere assurance,  
Les gestes & le port donnoient quelque esperance  
D'efforcer le Chasteau, qui en fin s'en reuont  
Remportans pour l'honneur la honte sur le front,  
Et en lieu de la gloire, hà! recompense rude,  
De libres Cheualiers sont mis en seruitude,  
Et tousiours abaissant vers la terre les yeux  
N'osent plus regarder leur Dame ny les cieux.*

*Ce Chasteau que tu vois, par armes n'est forçable,  
Par fraude ou par surprinse : il est inuiolable,  
Il l'a tousiours esté, & le sera tousiours,  
Comme estant le seul fort des fidelles amours.*

*Pource, mon Cheualier, arreste ta furie,  
Et par le sang d'autrui sois sage ie te prie :  
Ne combas point, à fin que n'estant le plus fort  
T'achetes vne honte aux despens de la mort,  
Ou pense bien deuant qu'essayer l'entreprise :  
« Trop tard on se repent quand la faute est commise.*

## LE TROPHEE D'AMOVR

à la Comedie de Fontaine-bleau.

*Je suis Amour le grand maistre des Dieux,  
Je suis celuy qui fait mouuoir les Cieux,*

Je suis celui qui gouverne le monde,  
Qui le premier hors de la masse esclos  
Donnay lumiere & fendi le Chaos  
Dont fut basti ceste machine ronde.  
Rien ne sçauroit à mon arc resister,  
Rien ne pourroit mes fleches euter,  
Et enfant nud ie fais tousiours la guerre:  
Tout m'obeyst, les oiseaux esmaillez,  
Et de la mer les poissons escaillez,  
Et les mortels heritiers sur la terre.  
La paix, la tréue, & la guerre me plaißt,  
Du sang humain mon appetit se paist,  
Et volontiers ie m'abreuue de larmes:  
Les plus hautains sont pris à mon lien,  
Le corselet au soldart ne sert rien,  
Et le harnois ne defend les gend'armes.  
Je tourne & change & renuerse & desfais  
Ce que ie veux, & puis ie le refais,  
Et de mon feu toute ame est eschaufée:  
Je suis de tous le Seigneur & le Roy:  
Rois & Seigneurs vont captifs deuant moy,  
Et de leurs cœurs i'enrichis mon trofée.  
De Iupiter le Sceptre i'ay donté,  
Iusqu'aux enfers i'ay Pluton surmonté,  
Et de Neptune ay blessé la poitrine:  
De rien ne sert aux ondes la froideur,  
Que les Tritons ne sentent mon ardeur,  
Et que mon feu n'embrase la marine.  
La volupté, la ieunesse me suit,  
L'oisiueté en pompe me conduit,  
Je suis aueugle, & si ay bonne veüe,  
Je suis enfant & suis pere des Dieux,  
Foible, puissant, superbe, gracieux,  
Et sans viser ie frappe à l'impourueüe.

*L'homme est de plomb, de rocher & de bois,  
 Qui n'a senti les traits de mon carquois :  
 Seul ie le fais & courtois & adestre :  
 Les cœurs sans moy languissent refroidis,  
 le les rends chauds, animez & hardis,  
 Et bref ie suis de toute chose maistre.  
 Qui ne me voit, au monde ne voit rien :  
 le suis du monde & le mal & le bien,  
 le suis le doux & l'amer tout ensemble,  
 le n'ay patron ny exemple que moy,  
 le suis mon tout, ma puissance & ma loy,  
 Et seulement à moy seul ie ressemble.*

## LE TROPHEE DE LA CHASTETE

en la mesme Comedie.

*Pour mon Trophée en ce char triomphant  
 Pris & captif ie meine cest Enfant  
 Qui des mortels a surmonté la gloire :  
 le vous diray comme ie l'ay veincu  
 Par la vertu d'un merueilleux escu  
 Qui de ce Dieu m'a donné la victoire.  
 Amour voyant que seule entre les Dieux  
 l'auois un trait du sien victorieux,  
 Et que du tout ie n'estois sa suiette,  
 Pour me donter prist l'arc en une main,  
 Le feu en l'autre, & m'assaillant en vain,  
 Perdit d'un coup sa flame & sa sagette.  
 Pour resister à ce Prince animé,  
 D'un fort bouclier l'estomac ie m'armé,*

Fait de constance & de perseuerance,  
 Où l'Amoureux au trauers se miroit,  
 Et tellement iusqu'en l'ame esclairoit,  
 Qu'il cognoissoit d'un regard son offense.  
 Voulant son arc contre moy descocher,  
 Trouua l'escu aussi dur qu'un rocher  
 Tout à l'entour enuironné de glace,  
 Qui de son arc la puissance amortit,  
 Et son ardeur en froideur conuertit,  
 Et tous ses traits brisa desur la place.  
 Lors le voyant sans armes & tout nu,  
 Pour prisonnier ie l'ay depuis tenu,  
 En le menant devant mon char en pompe:  
 Et par despit i'ay cassé son carquois,  
 Estoint son feu, rompu son arc Turquois:  
 C'est bien raison que le trompeur on trompe.

## MASCARADES

faites à Bar-le-Duc.

## LES QUATRE ELEMENS

parlent au Roy.

La Terre.

Ie t'ay donné, Charles Roy des François,  
 Non pas un fleuue, une ville, ou un bois,  
 Mais en t'ouurant ma richesse seconde,  
 De tous les biens que i'auois espargné  
 Depuis mille ans, ie t'ay accompagné  
 Pour estre fait le plus grand Roy du monde.

La Mer.

*Autant que i'ay d'escumes & de flos  
Lors que les vents cheminent sur mon dos,  
Et que le Ciel à Neptune fait guerre,  
Autant de force & d'honneur i'ay donné  
A ce grand Prince heureusement bien-né,  
Pour estre Roy le plus grand de la terre.*

L'Air.

*Je nourris tout, toutes choses i'embrasse,  
Et ma vertu par toute chose passe:  
Je contrains tout, je tiens tout en mes mains:  
Et tout ainsi que de tout je suis maistre,  
Pour commander au monde i'ay fait naistre  
Ce ieune Roy le plus grand des humains.*

Le Feu.

*Ce que i'auois de clair & de gentil,  
De prompt, de vis, de parfait, de subtil,  
Je l'ay donné à Charles Roy de France,  
Pour illustrer son Sceptre tout ainsi  
Qu'on voit le Ciel de mes feux esclairci,  
Et que Dieu mesme a de moy son essence.*

LES QVATRE PLANETES

respondent.

Le Soleil.

*Ce n'est pas toy, Terre, qui ce grand Roy  
As tant rempli de puissance, c'est moy*



*De qui l'aspect aux Rois donne la vie,  
Et peut leur Sceptre en gloire maintenir :  
Donc si tu veux ton dire soutenir,  
Vien au combat, ici ie te desfie.*

Mercure.

*Ie donne aux Rois l'aduis & la prudence,  
Et le conseil qui passe la puissance,  
Comme i'ay fait à Charles ce grand Roy  
Pour gouverner la terre uniuerfelle :  
Et si la Mer veut dire que c'est elle,  
Ie dy que non, soustenant que c'est moy.*

Saturne.

*Ie fais long temps les Royaumes durer,  
Et les grands Rois longuement prosperer,  
Quand d'un bon œil i'esclaire à leur naissance,  
Comme à ce Roy que i'ay fait de ma main,  
Et non pas l'Air, mol, variable & vain :  
S'il le soustient, qu'il se mette en defense.*

Mars.

*Ie fais les Rois valeureux & guerriers,  
Et sur leur front ie plante les Lauriers,  
Quand en naissant mon flambeau leur esclaire :  
Le Feu n'a fait un Prince si gentil :  
Car le Feu est de nature infertil,  
Et s'il le dit ie soustiens le contraire.*

---

## LE IJGEMENT DE IVPITER.

*Appaisez-vous, ne iouez plus des mains  
 Vous Elemens, & vous quatre Planetes  
 Qui sous mon Sceptre aussi humbles vous estes  
 Que deffous vous sont humbles les humains.  
 I'ay, non pas vous, par mes propres deffains  
 Mis en ce Roy tant de vertus parfaites  
 Pour gouuerner les terres que i'ay faites :  
 « Car du grand Dieu les œuures ne sont vains.  
 Et bien qu'il soit encore ieune d'âge,  
 Dés maintenant ie veux faire un partage  
 Auecques luy de ce monde diuers :  
 I'auray pour moy les cieux & le tonnerre,  
 Et pour sa part ce Prince aura la Terre :  
 Ainsi nous deux aurons tout l'Vniuers.*

## STANCES

à chanter sur la lyre, pour l'auant-venue  
 de la Royne d'Espaigne à Bayonne.

### I.

*Soleil, la vie & la force du monde,  
 Grand œil de Dieu, Soleil pere du iour,  
 Monte à cheual, & tire hors de l'onde  
 Ton char qui fait pour nous trop de sejour :  
 Hasté ton cours, & en France accompagne  
 L'autre beau iour qui reluit en Espagne.*

## II.

*Lune, ornement & l'honneur du silence,  
 Qui par le Ciel erres en cent travaux,  
 Retien la nuit, & arreste la dance  
 Des Astres clairs conduits par tes cheuaux :  
 Fay place au iour dont le bon-heur assemble  
 Fils, mere & fille, & deux Sceptres ensemble.*

## III.

*Il ne faut point qu'au iour de la venue  
 Le Soleil luise, vn autre iour viendra  
 Qui de l'Europe esclaireira la nue,  
 Et tout le monde en lumiere tiendra :  
 Tant les vertus du fils & de la mere  
 Et de la fille espondront de lumiere.*

## IIII.

*O siecle heureux, & digne qu'on l'appelle  
 Le siecle d'or, si oncque en fut aucun,  
 Où l'Espagnol d'une amitié fidelle  
 Aime la France, & les deux ne sont qu'un :  
 C'est vn plaisir qu'en l'esprit il faut prendre,  
 Le corps n'est pas digne de le comprendre.*

## V.

*Le Ciel despit de si belle assemblée,  
 Comme ialoux s'en vouloit irriter :  
 Ayant de l'air la fureur redoublée,  
 Faisoit gresler & pleuuoir & venter :  
 Le mois de luin qui desire la gloire  
 De telle veuë, a gagné la victoire.*

VI.

*Parmi les champs croissent les fleurs decloses,  
Car telle veuë est digne du Printemps :  
Entre les lis, les œillets & les roses  
Elle doit estre, & non en autre temps.  
Comme les fleurs croissent en nos prouinces,  
Ainsi croistra l'amitié de ces Princes.*

VII.

*L'autre Printemps la Royne vit sa fille,  
Et ce Printemps son autre elle verra :  
Vne est desia la mere de famille,  
L'autre bien tost d'un beau fils le sera :  
En-ce-pendant sa France elle visite,  
Et par exemple à bien faire l'incite.*

VIII.

*Vn Astre heureux, ô Royne, te fist naistre,  
Car seulement tu n'es mere d'un Roy  
Qui des François tient le Sceptre en la destre,  
Et d'un grand Duc qui promet tant de soy :  
Mais tu es seule entre tant de Princeesses  
Mere de Rois, de Roynes & Duchesses.*

IX.

*Par les chemins où passeront les Dames,  
Naistront les fleurs, & les ruisseaux prendront  
Le goust de miel, les odeurs & les bâmes  
Et les parfums par les champs s'espandront :  
Dessous leurs pieds la campagne arrosée  
S'esjouira de manne & de rosée.*

## X.

*Le vent tiendra son haleine endormie,  
Vulcan és mains n'aura point de marteaux :  
Tant seulement avec Flore s'amie  
Zephyre ira parmi les prez nouveaux :  
Tout sera plein de ioye & d'allegresse  
A l'arriuer d'une telle Princeſſe.*

## XI.

*La charité & l'amour maternelle  
Se desfi'ront d'un combat genereux,  
La mere ayant ſes enfans autour d'elle,  
Et les enfans leur mere à l'entour d'eux :  
C'eſt paſſion qui ſi fort nous enflame,  
Qu'on ne peut dire & qu'on ſent dedans l'ame.*

## XII.

*Si le Lion & le Tigre effroyable  
Par les rochers deſirent voir leurs fans,  
Hà, combien donc l'homme plus raifonnable  
Doit deſirer de reuoir ſes enfans !  
Qui fuit les ſiens, eſt digne qu'on le nomme  
Vn monſtre fier ſous la forme d'un homme.*

## XIII.

*Chaffe la nuit, & te monſtres, Aurore,  
Et de la mer apportes en ton ſein  
Le iour heureux, que par penſer i'honore  
Comme propice à tout le genre humain :  
Puis vole au Ciel, & d'une aile legere  
De ce beau iour ſois aux Dieux meſſagere.*

XIIII.

*Hà le voici, ja voici la barriere  
Du iour declofe & le ciel s'efpanir.  
Sus enuieux reculez-vous arriere,  
Ce n'eft pour vous que ce iour doit venir,  
Qui d'un nœud ferme eftreindra l'alliance  
Plus que iamais de Caftille & de France.*

LES SEREINES

representees au Canal de Fontaine-bleau.

La premiere parle.

*De l'immortel les Rois font les enfans,  
Ils ont par luy leurs Lauriers triomphans,  
Ils font par luy reuerz en la terre,  
Ils ont de Dieu le portrait fur le front :  
Dieu les inspire, & tout cela qu'ils font  
Vient du grand Dieu qui darde le tonnerre.  
Or ce grand Dieu à l'exemple de foy  
Fist pour miracle en France naiftre vn Roy,  
Dont la femence à nulle autre feconde  
Eftoit parfaite, & comme le Soleil  
Qui de clarté ne trouue fon pareil,  
Vesquit fans pair, tant qu'il vesquit au monde.  
Ce fut Henry de tous biens accompli,  
D'une ame viue ayant le corps rempli,  
Semblable aux Dieux de façons & de gestes :  
Son esprit fut embelli de vertu :  
Car en naiffant du Ciel il auoit eu  
Tout le bon-heur des lumieres celestes,*

Il fut en guerre vn Prince tref-vaillant,  
 Soigneux, actif, diligent & veillant,  
 Voire & sembloit que Mars luy fist seruice :  
 En temps de paix son peuple corrigeoit,  
 Chassoit le mal de sa terre, & logeoit  
 Par les citez la crainte de iustice.  
 Or tout ainsi comme il estoit parfait,  
 Tel comme luy son peuple s'estoit fait :  
 Vertu regnoit par toute sa contrée,  
 Qui d'un chacun le rendoit honoré :  
 Et bref c'estoit le bel âge doré  
 Où fleurissoit Saturne avec Astrée.  
 Pour faire honneur à vn siecle si beau  
 (Qui ressembloit à ce monde nouveau  
 Quand nos ayeuls n'estoyent tels que nous sommes)  
 Apparoissoient les Nymphes & les Dieux,  
 Et sans auoir vn voile sur les yeux,  
 Ne desdaignoyent la presence des hommes.  
 Par les forests les Syluains habitoient,  
 Faunes & Pans aux bocages chantoient,  
 Et sur les monts dansoyent les Oreades :  
 La mer auoit son Glauque & son Neptun,  
 Desur les bords venoit iouer Portun,  
 Et les ruisseaux abondoyent des Naiades.  
 Mais quand le Ciel qui ne se peut flechir  
 Par nos sospirs, se voulut enrichir,  
 O Ciel cruel ! de la mort d'un tel Prince,  
 Le monde fut despouruillé de bon-heur,  
 Fut déuestu d'ornement & d'honneur,  
 Et la Vertu laissa nostre prouince.  
 En lieu de paix, d'amour & de bonté  
 Vint la malice au visage eshonté,  
 Haines, discords & factions de villes :  
 Desir de sang les hommes fist armer,



L'ambition apres vint allumer  
 Le grand brazier des querelles ciuiles.  
 Le peuple adonc transporté d'appetit,  
 Tout insensé d'armes se reuestit :  
 Lors la raison deffous les pieds fut mise :  
 Bref le François par sa desloyauté  
 De son pays arracha la beauté,  
 Comme vn iardin sacagé de la Bise.  
 Alors les Dieux d'un tel fait desplaisans,  
 Voyans la Royne & ses fils en bas ans  
 De tous costez tourmentez de la guerre,  
 Pour ne souiller leurs yeux en regardant  
 Le sang versé deffous le fer ardent,  
 Par grand despit se cachèrent sous terre.  
 L'un s'enferma dans le creux d'un rocher,  
 L'autre s'alla dans vn arbre cacher,  
 L'autre en vn antre, & l'autre sous les ondes :  
 Ainsi que nous, qui depuis ce temps-là  
 Que le malheur d'ici nous exila,  
 N'auions au Ciel monstté nos tresses blondes :  
 Sinon ce iour de long temps attendu,  
 Où Charles Roy de Henry descendu,  
 Vray heritier des vertus de son pere  
 Desur son peuple a maintenant pouuoir :  
 Et c'est pourquoy nous venons ici voir  
 Ce ieune Prince en qui la France espere.  
 Nous venons donc, ô Roy, selon raison  
 Te saluer en la belle maison  
 Que ta largesse à ton frere a donnée :  
 Où s'il te plaist, pour te rendre plus seur  
 De l'aduenir, oy les vers de ma Sœur,  
 Qui va chanter toute ta destinée.

---

## PROPHETIE

de la seconde Sereine.

O Prince heureusement bien-né,  
Qui fus beni dès ta naissance  
Par l'Eternel, qui t'a donné  
Toutes vertus en abondance :  
Crois crois, & d'une maïesté  
Monstre toy le fils de ton pere,  
Et porte au front la chasteté  
Qui reluit aux yeux de ta mere.

Car en estant comme tu es  
Aux vertus nourri dès ieunesse,  
Tu passeras tous les mortels  
De bon esprit & de prouësse.

La France se peut affseurer  
De se voir soudain estrenée  
Des honneurs qu'on doit esperer  
D'une Royauté si bien-née.

Et bien qu'on puisse appercevoir  
Par les rayons de ta lumiere,  
L'heureuse fin que doit auoir  
Vn fils nourri de telle mere :

Si veux-ie encor pour l'auenir  
(Des destins Prophetes nous sommes)  
T'ouir ce qui ne peut venir  
En la cognoissance des hommes.

Non seulement pacifiras  
Du tout la France discordante,  
Mais plus que iamais la feras  
De biens & d'honneurs abondante.

Et menant en guerre avec toy  
Ton frere appuy de tes louanges,  
Vainqueur des Rois, le feras Roy  
De maintes nations estranges.  
Sous toy la malice mourra,  
L'erreur, la fraude & l'impudence  
Et la mensongè ne pourra  
Resister deuant ta prudence.  
Puis ayant vescu comme il faut,  
Despouilleras le mortel voile,  
Et pres de ton pere là haut  
Tu seras une belle estoile.  
Et toy mere resiouy toy,  
Mere sur toutes vertueuse,  
Qui as nourri ce ieune Roy  
D'une prudence si soigneuse.  
Bien tost auras de tes trauaux  
La recompense seure & bonne,  
Quand tu verras tous ses vaulx  
S'humilier sous sa Couronne.  
Et toy son frere, en qui respand  
Le Ciel son heureuse influence,  
Ta force & grandeur ne depend  
Qu'à luy porter obeyssance.  
Ton auantage vient du sien,  
Ta gloire sans la sienne est vaine,  
Ton bien procede de son bien  
Comme vn ruisseau de sa fontaine.  
Viuez donc amiablement  
Faisans vos noms par tout esandre,  
Viuez tous trois heureusement  
Charles, Catherine, Alexandre.

---

## CHANSON

recitee par les Chantres.

*A Dieu ressemblent les Rois,  
Qui sous l'ordre de ses lois  
Le cours des Astres enserre,  
Parfait, sans fin, sans milieu :  
A l'exemple du grand Dieu  
Les Rois gouvernent la terre.  
Ils ne sont egaux d'honneurs :  
Les uns sont pauvres Seigneurs  
Ou d'une isle infructueuse,  
Ou d'un lieu chaud & mal-sain :  
Mais le nostre est souverain  
D'une terre bien-heureuse.  
Sous luy sont mille citez,  
Peuples en guerre vsitez,  
Forests, campagnes, valées,  
Et fleuves au large front,  
Qui bruyant Charles, s'en-vont  
Fendre les plaines salées.  
Luy chassant les estrangers,  
Sauvant les siens des dangers  
A rendu sa France viue,  
A tué Mars son meurdrier,  
Faisant naistre d'un Laurier  
Les beaux rameaux de l'Olive.  
Charles des Rois est le grand,  
C'est le grand Roy qui respand  
Sur la France sa lumiere,  
Qui croist ieune, fort & beau*

*Comme un clair Soleil nouveau  
 Qui va prendre sa carrière.  
 Quand Jupiter maria  
 Sa Thetis, il conua  
 Les plus grans Dieux à la feste  
 Pallas, Mercure, Apollon,  
 Neptune & Mars tout felon  
 Que mur ny ville n'arreste.  
 Tout ce que les Cieux pouuoient,  
 Tout ce que les Dieux auoyent  
 D'honneur, richesse, excellence,  
 Fut ce iour en appareil :  
 Mais rien ne se voit pareil  
 Au grand Monarque de France.  
 Io la paix nous chantons,  
 Et de Charles nous vantons  
 Le Sceptre inuincible & riche :  
 Nous rechantons sa douceur,  
 Sa mere, freres & sœur,  
 Et son espouse d'Austriche.*

## COMPARAISON

du Soleil & du Roy, recitee par deux ioueurs de lyre.

### I.

*Le Soleil & nostre Roy  
 Sont semblables de puissance :  
 L'un gouuerne dessous soy  
 Le Ciel, & l'autre la France.*

II.

*L'un du Ciel tient le milieu,  
Des Astres clairté premiere :  
Et l'autre comme un grand Dieu  
Aux terres donne lumiere.*

I.

*L'un n'est iamais offensé  
D'orages ny de tempeste :  
L'obscur est toujours percé  
Des beaux rayons de sa teste.*

II.

*L'autre a toujours combatu  
Les guerres & les enuies,  
Et fait sentir sa vertu  
Aux puissances ennemies.*

I.

*L'un est auteur de la paix  
Chassant le discord du monde,  
Illustrant de ses beaux rais  
La terre, le ciel & l'onde.*

II.

*Et l'autre ayant du discord  
La puissance rencontrée,  
A mis les guerres à mort,  
Et la paix en sa contrée.*

I.

*Tout Astre prend du Soleil  
Sa lumiere tant soit haute :  
Car c'est l'Astre nompareil  
Liberal sans auoir faute.*

II.

*Du Roy vient force & vigueur,  
Honneur & grandeur royale,  
Et tout homme de bon cœur  
Cognoist sa main liberale.*

I.

*Le Soleil est couronné  
De feux qu'en terre il nous darde,  
Et tout Astre bien tourné  
Nostre bon Prince regarde.*

II.

*De nostre Roy la grandeur  
Pareil au Soleil ressemble,  
Qui iette plus de splendeur  
Que les estoiles ensemble.*

I.

*Bref le Soleil esclairant  
Par tout, qui point ne repose,  
De Charles n'est differant  
Seulement que d'une chose.*



## II.

*C'est que le Soleil mourra  
Après quelque temps d'espace,  
Et Charles au Ciel ira  
Du Soleil prendre la place.*

## CARTEL

pour le Roy Charles IX, habillé en forme de Soleil.

*Comme le feu surmonte toute chose  
Qui devant luy pour résister s'oppose,  
Ainsi du fer de mon glaive pointu  
Tout Cheualier à terre est abatu :  
Les plus vaillans redoutent ma puissance,  
Et la mort pend sur le bout de ma lance.  
Amour me pousse errant de toutes pars  
Pour essayer les fortunes de Mars,  
Et de mon nom remplir la terre & l'onde,  
Pour auoir place en ceste Table ronde,  
Où les vieux Preux autrefois auoient eu  
Vn lieu d'honneur, loyer de leur vertu.  
Or desdaignant les hazards de la guerre  
Comme donteur des monstres de la terre,  
Par haut desir au Ciel ie suis monté,  
Où du Soleil j'ay l'habit emprunté,  
Afin de faire aux estoiles celestes  
Comme aux mortels mes vertus manifestes.  
Donc si quelqu'un, soit d'enhaut ou d'embas,  
Veut esprouuer ma puissance aux combas,*

*S'adresse à moy, ie luy feray cognoistre  
A coups ferrez combien poise ma destre,  
En l'univers ne trouuant mon pareil.  
Qui passeroit de vertu le Soleil?*

## CARTEL

fait pour vn combat que fist le Roy en l'Isle du Palais.

*Le fort Soleil ne s'offense des nuës,  
Ny mes vertus par la terre cognuës  
N'ont iamais peur des combats outrageux :  
C'est mon desir, mes esbats, & mes jeux  
Que de porter sur le dos la cuirace,  
Mon ennemy renuerser sur la place,  
Et bien brosser le destrier aux tournois,  
En cent façons esclater le long bois,  
Et de gaigner le prix à la carriere,  
Et d'estre seul veinqueur en la barriere.*

*Et si quelqu'un par vn combat nouveau  
Veut essayer ma puissance sur l'eau,  
Il sentira qu'autant ie sçay de guerre  
Dessus les eaux comme dessus la terre.*

*Ie suis errant, vagabond, estrangier,  
Qui vais cherchant en tous lieux le danger,  
Afin qu'au monde en armes on me voye  
Suiure vertu par toute honneste voye :  
Mon ennemy (auant que le Soleil  
Tombe en la mer) de son sang tout vermeil,  
A son malheur me pourra bien cognoistre,  
Portant au dos les marques de ma destre.*

*Il ne verra mon courage faillir,  
Et l'assaudray en lieu de m'assaillir  
Pour retrancher par le fer son audace :  
« Tel a grand peur qui bien souvent menace.*

## CARTEL

contre l'Amour.

*De deux Amours on voit la terre pleine,  
L'un est sans mal, sans travail & sans peine,  
Prompt & soudain, qui loin de ce bas lieu  
Nos cœurs esleue aux mysteres de Dieu :  
Si que laissant les terres & les nuës,  
Cherche du Ciel les traces incognuës,  
Et par un vol à l'esprit coustumier  
Reloge l'ame en son logis premier,  
Et la ioignant à sa premiere essence,  
De ce grand Tout luy donne cognoissance,  
Si bien que l'homme en contemplant se fait  
Non plus terrestre, ains Celeste parfait.*

*Telle amour est aux vertueux tres-belle,  
Qui d'autant plus toutes amours excelle,  
Que l'esprit est de son bien iouyssant,  
Et que le Ciel la terre va passant.*

*De telle ardeur comme chainons dependent  
Mille autre' ardeurs, qui çà bas se respandent  
Dedans nos cœurs, & nous seruent de loy,  
Comme de craindre & reuerer son Roy,  
Bon citoyen defendre sa patrie,  
Et pour les siens abandonner la vie,*

*Son compagnon en armes secourir,  
Pour le renom les Lauriers acquerir,  
Et mespriser toute fortune extrême,  
Et le publiq' aimer mieux que soy-mesme.*

*Or ie n'appelle Amour, sinon celuy  
Qui nous maintient & nous tire d'ennuy,  
Nous pousse au ciel, nous fait aimer nos Princes,  
Et d'un grand cœur secourir nos prouinces,  
Pour les amis se monstrier hazardueux,  
Afin d'auoir le mesme secours d'eux  
Quand quelque mal outrageux nous offence :  
Pour tel effet l'amitié se commence.*

*Or l'autre Amour qui maistrise les cœurs,  
Est l'artisan de toutes nos douleurs,  
Aueugle enfant, que l'humaine malice  
A mis au ciel pour fauteur de son vice.*

*Mille combats au monde sont venus  
Par le moyen de la folle Venus :  
Thebes & Troye en furent saccagées.  
Car de l'Amour les fureurs enragées  
Par vn despit s'attizans peu à peu,  
D'un petit bois allument vn grand feu.*

*L'homme bien-né se souille de diffame,  
Idolatrant les beautez d'une femme  
Jeune aujourd'huy, demain vieille, & qui n'est  
Belle sinon d'autant qu'elle nous plaist,  
Et par vn teint qui pipe nostre veuë :  
Au reste elle est de bon sens despourueüe,  
Prompte, legere, inconstante, & suiuant  
Le naturel des vagues & du vent.*

*Malheureux est & digne de misere,  
Qui fait appuy de chose si legere,  
Qui momentaine en rien s'esuanouist,  
Et de sa fleur vn printemps ne iouist.*

*Toute beauté n'est que chose fardée,  
Haie autant comme elle est demandée.*

*L'homme grossier les femmes aimera,  
L'homme gaillard ne les estimera,  
Sans valeter une sotte Maistresse,  
Sinon d'autant que l'affaire le presse :  
Pour la contrainte il aura d'elle soin  
Comme cherchant le remede au besoin,  
Se souciant de soy-mesme & non d'elle,  
Laisser la vieille, & prendre une nouvelle,  
Sans passion : car c'est un grand plaisir  
En n'aimant rien de changer & choisir.*

*Donq cheualiers pour chose malheureuse  
Nous detestons une flame amoureuse,  
Et soustiendrons contre tous assaillans  
(Quand ce seroient de ces fameux Rolands)  
Que Cupidon est un Dieu d'iniustice,  
Qui la ieunesse apaste de tout vice,  
Et qu'on le doit comme pernicieux  
Banir bien loin de la terre & des cieux.*

## AVTRE CARTEL

pour l'Amour.

*L'homme qui n'aime est un Scythe sauuage,  
Viuant sans cœur, sans ame & sans courage :  
On ne sçauroit se passer de l'Amour  
Non plus qu'on fait du Soleil & du iour.*

*Ainsi que l'ame en nostre corps entrée  
Esmeut le corps, ainsi l'amour sacrée*

Entrée en l'ame esmeut l'ame par soy  
 Pour luy servir de patron & de loy,  
 Et la pousser aux plus parfaites choses  
 Qui soient en terre ou dans le ciel encloses.

Or cest Amour qui gouverne les cieux,  
 Comme esloigné de l'homme & de ses yeux,  
 Visiblement ne se donne à cognoistre  
 Au sens humain : car il est trop grand maistre.  
 De sa grandeur on ne sçauroit parler :  
 Si haut que luy l'homme ne peut voler  
 Pour concevoir ses diuines puissances :  
 Mais de l'Amour autheur de nos naissances,  
 Terrestre & bas, qui nostre humanité  
 Rend presque egale à la Diuinité,  
 De pere en fils conceuant nos semblables :  
 Pour reparer les siecles perdurables :  
 De ce grand Dieu pere de volupté,  
 Par qui le peuple est doucement donté,  
 Qui nous chatouille & se mesle en nos veines,  
 Maistre & seigneur des affaires humaines,  
 Je veux parler, & dire que sans luy  
 L'homme mourroit plein de soin & d'ennuy.

Vn plus grand bien ne se trouue en la vie,  
 De soy fascheuse & bouillante d'enuie,  
 D'ambition & d'honneur importun,  
 Que de trouuer entre mille quelqu'un  
 Auquel on puisse avecques confiance  
 Dire sans fard cela que l'ame pense.  
 Amour nous fait tel plaisir esprouuer :  
 L'amitié fait le bon amy trouuer.

Comme pourroit vn homme sociable  
 Auoir party qui luy fust agreable  
 Pour viure ensemble en toute loyauté,  
 Sans s'allier à la douce beauté

D'une treffage & vertueuse Dame ?  
 Pour n'estre plus que deux corps en une ame,  
 Vn seul esprit, qui se laisse enflamer  
 Tant seulement du seul honneur d'aimer,  
 Ne cherchant point de son ardeur extrême  
 Autre loyer sinon que l'amour mesme,  
 Qu'en bien aimant de se voir bien aimé ?

Qui autrement a le cœur allumé  
 Ou d'avarice ou d'autre conuoitise,  
 Indigne il est qu'Amour le fauorise :  
 Telle amour est pleine de passion,  
 Qui ne cognoist que la perfection  
 D'amour n'est rien qu'une amour mutuelle,  
 Qui se commence & se finist en elle.

Pource, Seigneurs, qui les armes suiuez,  
 Et aux Palais des grands Princes viuez,  
 Si m'en croyez, apprenez dès ieunesse  
 A bien choisir une belle Maistresse :  
 « N'en prenez point de laides : la laideur  
 « Cache tousiours une lente froideur  
 « Qui hors du cœur la chaleur nous arrache :  
 « Vn corps difforme une ame laide cache.

Or tout ainsi qu'un visage sans fard,  
 Courtois & beau, tout gentil & gaillard,  
 Est le miroïer d'une ame bien parfaite :  
 Ainsi la face horrible & contrefaite  
 Est le miroïer où l'on voit par dehors  
 Estre un esprit aussi laid que le corps.

Pource autrefois les Muses immortelles  
 Ont les Vertus peintes en Damoiselles,  
 Pour faire voir clairement à chacun  
 Que les Vertus & les Dames n'est qu'un.

Les Dames sont des hommes les escolles :  
 Les chastiens de leurs ieunes folles,



*Les font courtois vertueux & vaillants.*

*Tels ont vescu ces superbes Rolands,  
Renauds, Tristans, pleins d'une ame amoureuse,  
Qui desireux de gloire auantureuse,  
Comme les Dieux s'acquirent des autels,  
Faisant par tout des gestes immortels.*

*Ce fut Amour auteur de telle affaire:  
Car sans ce Dieu ils n'eussent sceu rien faire.  
Qui voudra donq soy-mesme se donter,  
Et iusqu'au ciel par loüange monter,  
Et qui voudra son cœur faire paroistre  
Grand par-sur tous, de soy-mesme le maistre,  
Soit amoureux d'une Dame qui sçait  
Rendre l'Amant vertueux & parfait.*

*L'homme mal-né qui les Amours mesprise,  
N'acheuera iamais belle entreprise,  
Ains tout perclus de sens & de raison  
Ne bougera poltron de sa maison.*

*Aux temps passez & lason & Thesée  
De mainte affaire estrange & mal-aisée  
Sont retournez enuironnez d'honneur,  
Ayant Amour pour guide & gouverneur.*

*Les Dames sont pleines de courtoisie,  
Ont le cœur haut, haute la fantaisie.*

*On voit tousiours la femme de moitié  
Surpasser l'homme en parfaite amitié:  
Tesmoin en est la vertueuse Alceste  
Qui se tua pour son espoux Admete,  
Où nul Amant ne se sçauroit trouuer  
Mort de sa main pour sa Dame sauuer.*

*Tout cœur de femme est armé de fiance:  
Celuy de l'homme est plein d'impatience,  
Menteur, pariure, incertain & léger,  
Double, fardé, trompeur & mensonger.*

Or s'il se trouue vne amitié bien faite,  
 D'âge, de mœurs, en loyauté parfaite,  
 C'est vn tresor qui bien-heureux se doit  
 Garder, d'autant que bien rare on le voit,  
 Et que chacun contemple en sa partie  
 La sainte amour dont la leur est sortie,  
 Qu'on ne voit plus comme on souloit icy  
 Depuis le temps que le peuple obscurcy  
 D'erreur, de fraude & de vices infames  
 Ainsi qu'il doit, n'honore plus les Dames :  
 Car tousiours regne au monde le malheur,  
 Quand plus n'y sont les Dames en honneur.

Donq si quelqu'un ennemy de sa vie,  
 Ou trop superbe ou trop enflé d'enuie  
 Veut soustenir comme presomptueux,  
 Qu'aimer n'est point vn acte vertueux,  
 Et qu'on ne doit seruir les Damoiselles,  
 Ou les seruant en prendre de nouuelles,  
 Vienne au combat : ie luy feray sentir  
 Que le mesdire apporte vn repentir,  
 Et vergongneux confesser par contrainte  
 Que bien aimer est vne chose sainte.

## POVR LE ROY

habillé en Hercule, & Pluton trainé deuant luy.

Ce Cheualier d'invincible puissance  
 Est Hercules, qui venant aux Enfers  
 A mis ma porte & mon Sceptre à l'enuers,  
 Et moy Pluton sous son obeyssance.

Luy tout ardent de triomphe & de gloire,  
 Le triple chef de Cerbere enchainé  
 Met sous le ioug, par lequel est trainé  
 Son chariot en signe de victoire.  
 Il a tiré de l'abysme profonde  
 Ces Cheualiers que voyez à l'entour,  
 Et du Tartare où ne luit point le iour,  
 (En me forçant) les rameine en ce monde.  
 Lesquels pour rendre espoissonnez d'enuie  
 Graces au Dieu qui les a rendus francs,  
 Tous Cheualiers qui seront sur les rancs  
 Veulent combattre aux despens de leur vie:  
 Et si leur force au combat ne surmonte  
 Tous assaillans, luy-mesme sa vertu  
 Veut employer pour mettre au combatu  
 Dessus le front la vergongne & la honte.

## CARTEL POVR LE ROY

HENRY III.

Cest habit blanc que ie porte, Madame,  
 Est pour monstrier la blancheur de mon ame  
 Et ceste foy parfaite en loyauté  
 Qu'au cœur ie porte aimant vostre beauté.  
 Toute vertu, tant soit elle admirable,  
 De foy n'est point à la mienne semblable,  
 D'autant qu'on voit assez d'autres vertus.  
 « L'homme loyal icy ne se voit plus  
 Si ce n'est moy, qui dans le cœur rencontre  
 Telle vertu que par dehors ie montre

*A la couleur qui ressemble à la foy  
Que pour suiet en l'ame ie reçoÿ.*

*Que l'incarnat tant qu'il voudra se vante,  
Le iaune aussi qui l'amoureux contante,  
Et le verd-gay que Venus aime tant :  
Telles couleurs ne me plaisent, d'autant  
Qu'un teint fardé leurs beautés a souillées  
L'une dans l'autre estrangement meslées.*

*Comme le simple en tout est plus parfait  
Que le meslé qui de plusieurs se fait :  
Ainsi le blanc comme simple surpasse  
Toute couleur où la mesleure passe.  
Simple est le blanc, le reste est composé,  
Où l'artifice a le fard apposé :  
Car en tombant de sa simple nature  
S'est corrompu par diuerse teinture,  
Et n'est plus beau par la mutation,  
Comme eslongné de sa perfection.*

*Donq qui voudra, pour accoustrement porte  
Un habit peint de mainte estrange sorte,  
Soit bigarré du corps comme du cœur,  
Toute couleur sans la blanche couleur  
N'est à bon droit parfaite ny loüable :  
Le blanc naïf seulement est capable  
De recevoir toutes couleurs, & peut  
Changer sa forme en tout cela qu'il veut,  
Où l'accident des autres n'a puissance  
De retourner en une blanche essence.*

*Le Ciel est blanc, la lune, & le flambeau  
Du grand Soleil pour estre blanc, est beau :  
Pour estre blanche est belle la lumière :  
La couleur blanche est tousiours la premiere.*

## DIALOGUE

pour vne Mascarade.

AMOUR ET MERCURE.

Amour.

*Heraut des Dieux, qu'une fille d'Atlas  
Conceut leger, pren tes ailes cognuës,  
Et trauersant le long chemin des nuës  
Laisse le ciel, & t'en-vole là bas.*

Mercure.

*Fils de Venus, qui portes en tes mains  
L'arc qui aux Dieux & aux hommes commande,  
Pourquoy veux-tu que du ciel ie descende  
Pour aller voir la troupe des humains ?*

Amour.

*Iupiter veut par le conseil des Dieux,  
Qu'ailles trouuer le plus grand de la race  
Des trois commis à conquerir la place  
Et tous les forts du Chasteau perilleux.*

Mercure.

*Quelle contrée a produit ce bon-heur ?  
Qui mettra fin à si haute entreprise ?  
Qui est celuy que le ciel fauorise  
Sur tous les trois, de proüesse & d'honneur ?*

## Amour.

*Je te diray le pays & le nom  
De ce guerrier qui a tant de puissance:  
Charle est son nom, son pays est la France,  
Dont les vertus surpassent le renom.*

## Mercure.

*C'est assez dit: tu me donnes la loy,  
Je vais partir, il faut que j'obeyse,  
Il faut, Amour, qu'on te face service,  
Les plus grands Dieux obeyssent à toy.*

## MONOLOGVE

## de Mercure aux Dames.

*Dames, ie suis le courrier Atlantide,  
Qui trauersant le grand espace humide  
Comme un oiseau de son vol soustenu,  
Porté du vent suis en France venu  
Par le conseil de ce Dieu qui tempere  
Hommes & Dieux, de toute chose Pere,  
Pour enuoyer vn Cheualier François  
Aspre à la guerre, & le plus fort des trois,  
A qui le Ciel sous bonne destinée  
A dés long temps la conqueste ordonnée  
Du fort Chasteau perilleux, que l'Amour  
Tient remparé de perils à l'entour.  
Il ne faut point qu'un Cheualier s'appreste  
Au long labeur d'une telle conqueste,*

*S'il n'est aimé des Dieux & du Destin :  
Quiconque soit qui la doit mettre à fin,  
Sera chery des Cieux & de Nature,  
Et reserué pour si haute auanture.*

*Premierement d'un courage indonté  
Voirra l'Enfer qui flamboye à costé,  
Et baignera ses armes homicides  
Au tiede sang des fieres Eumenides,  
Et des fureurs des Gorgonnes, qui ont  
Vn ail farouche enfoncé sous le front.*

*Rien de Pluton ne vaudra la proïesse,  
Soulfre, fumée, & grosse flame espesse  
Contre celuy, dont le puissant bouclair  
Ne craint ny feu ny flame ny esclair.*

*Victorieux du peril de la destre,  
L'autre peril l'attend à la fenestre :  
Ce sont trauaux & labeurs vehemens,  
Gennes, horreurs, la maison des tourmens :  
Où mainte voix en souspirs estendue  
Horriblement de loin est entendue  
Des malheureux qui autrefois n'auoient  
Gardé la foy qu'aux Dames ils deuoient.*

*Pource, Amoureux, gardez l'amour fidelle  
De peur d'entrer en peine si cruelle.  
Ayant forcé ce danger par vertu  
Et par l'effort de son glaïue pointu,  
Se couronnant de louange & de gloire,  
D'un tel Chasteau gaignera la victoire :  
Puis il doit voir vn beau iardin, ainçois  
Vn Paradis, des delices le chois,  
Ou fleurs & fruiçts en abondance naissent,  
Et à l'enuy l'une sur l'autre croissent :  
Où les plaisirs & les Amours iumeaux  
Vont voletant de rameaux en rameaux.*



*Là le troupeau des Nymphes & des Fées,  
D'æillets, de liz & de roses coiffées,  
Le feront digne au regard de leurs yeux  
Et de la table & de la voix des Dieux,  
En luy donnant entiere iouissance  
De tous les biens qui sont en leur puissance,  
Voire de ceux que ce grand Vniuers  
Fait naistre au iour, pour ses tourmens souffers :  
Tant vne fin de tout plaisir est pleine,  
Quand la vertu l'achete par la peine.*

## POVR VNE MASCARADE.

### IUPITER.

*Je suis des Dieux le Seigneur & le pere,  
Tout element à mon Sceptre obtempere,  
Le cours du Ciel ma reigle va suiuant :  
Dedans la nuë armé de mon tonnerre  
Je fais trembler les ondes & la terre,  
Haut-esleué sur les ailes du vent.  
Bas à mes pieds les peuples ie regarde,  
Rois, Empereurs sont en ma sauuegarde,  
Et par sur tous Charles que i'aime mieux :  
Entre nous deux pour suprême auantage  
Du monde entier auons fait vn partage,  
A luy la terre, & à moy tous les Cieux.  
De ma maison, sans me le faire entendre,  
Mars & Amour ont bien osé descendre,  
Accompagnant trois Cheualiers de nom,  
Qui estrangers sont abordez en France*

Pour le cognoistre, & voir si sa puissance  
 Estoit pareille au bruit de son renom.  
 Or ie cognois ce Prince magnanime  
 Qui les combats plus que la vie estime :  
 Il leur voudra son bras faire sentir,  
 D'un braue cœur assaillant ces gendarmes,  
 Et par l'effort de toutes sortes d'armes  
 Leur attacher au front le repentir.  
 Pource ie vien le soustien de ce Prince,  
 Sans endurer qu'en sa mesme Prouince,  
 Des estrangers puisse estre combatu.  
 Pour son secours Pallas ie luy ameine,  
 Qui punira de vengeance soudaine  
 Mars par la lance, Amour par la vertu.

## PALLAS.

Du haut du Ciel ie suis icy venuë  
 Dessus le dos d'une legere nuë,  
 Traçant en l'air un voyage nouveau,  
 Par la priere en courroux animée  
 De ce grand Dieu, qui me fist toute armée,  
 Malgré Iunon, naistre de son cerueau.  
 Moy sœur des Rois en armes ie proteste  
 Donner secours à ma race celeste,  
 Et d'enfermer mon corps de toutes pars  
 De deux harnois : l'un est fait de sagesse,  
 L'autre trempé d'ardeur & de prouësse,  
 L'un contre Amour, & l'autre contre Mars.  
 Mars furieux tout allumé de rage  
 A mille fois prouoqué mon courage,  
 Et mesprisé ma force en se brauant :  
 Mais quand ma lance au combat le menace,

Il perd le cœur, & s'enfuit de la place  
Loin de mes bras comme une poudre au vent.  
Quand Cupidon par blandice ou cautelle  
Me veut blesser de sa fleche cruelle,  
Ou de mon corps finement approcher,  
Deuant ses yeux ie monstre ma Gorgonne,  
Qui d'un regard telle crainte luy donne,  
Que tout sur l'heure il deuient un rocher.  
Ces ieunes Dieux contre Charles mon frere  
Ont fait armer une force contraire:  
Seule ie puis empescher leur moyen,  
En luy donnant & secours & remede,  
Comme ie fis au vaillant Diomedé  
Qui combattoit deuant le mur Troyen.  
Ie veux ruer ainsi que d'une foudre  
Ce gentil Mars terrassé sur la poudre,  
Et en despit de ses trois Combatans  
Le desarmer au milieu de la guerre,  
Ou l'enuoyer là bas deffous la terre  
Bien loin du Ciel avecques les Titans.  
Et si Amour approche de ma lance,  
A ses despens cognoistra ma vaillance,  
Bien qu'autre part mon bras il ait cognu:  
Ie briseray ses cordes & ses fleches,  
Rompray son arc, esteindray ses flameches,  
Prendray sa trouffe, & l'enuoyray tout nu.

---

## CARTEL

fait promptement, enuoyé à leur Maieſté par le Nain  
des huit Cheualiers eſtranges.

*Huit Cheualiers de nation eſtrange,  
Autant vaillans qu'amoureux de louange,  
Rais du nom qui par le monde court  
De vos vertus, Sire, & de voſtre Court,  
Eſtoient partis eſpoingonnez de gloire  
De remporter des combats la victoire :  
Mais le chemin & le trop long ſejour  
Les a trompez : car ne venant au iour  
De vos Tournois, ont perdu l'eſperance  
De plus monſtrer en armes leur vaillance,  
S'il ne vous plaiſt leur faire ouvrir le Pas,  
Et commander autres nouveaux combas.*

*Donques, grand Roy, que tout le peuple eſtime  
Enfant de Mars, ſi l'honneur vous anime,  
Si la vertu vous eſchauffe le cœur,  
Ne permettez que leur ieune vigueur  
Se refroidiſſe, & leur chaude proüeſſe  
Sans l'employer ſe rouille de pareſſe :  
Ils ſont tous preſts aux combats de montrer  
Que plus vaillans on ne peut rencontrer.*

*Ils combatront comme hardis gendarmes  
Juſqu'à la mort de toutes ſortes d'armes  
Et à cheual & à pied : car ils ont  
La force en main, l'audace ſur le front.*

*Ils ſont veſtus d'une diuerſe ſorte :  
L'un du haut Ciel la riche couleur porte*

Le bleu, qui est signe certain aux yeux  
 Que son esprit est fauory des Cieux.  
 L'un la couleur d'une Colombe a prise,  
 Pour tesmoigner qu'Amour le fauorise :  
 L'autre acoustré d'un habillement blanc,  
 Apparoist iuste & magnanime & franc :  
 L'autre qui prend la noire couuerture  
 Se monstre ferme & constant de nature :  
 Le Cheualier paré d'un habit verd,  
 Est d'esperance & d'amitié couuert :  
 L'autre acoustré de couleur grise, monstre  
 Qu'en bien aimant toute peine on rencontre :  
 Celui qui a l'incarnat dessus soy,  
 Monstre du cœur la constance & la foy :  
 Et le dernier qui l'habit iaune porte,  
 D'un bon espoir son amour reconforte.  
 Voyla les huit qui veulent batailler,  
 S'il vous plaist, Sire, en armes leur bailler  
 Lieu de Tournoy, & ne vouloir defendre  
 Que deffous vous la guerre on puisse apprendre.  
 Or pour-autant que les ieunes soudars  
 Sans Cupidon ne sont cheriz de Mars,  
 Je suppliray les Dames fauorables  
 A ce besoin leur estre secourables :  
 Car bien souuent le plus fort est donté,  
 Alors qu'Amour n'est pas de son costé.

## MASCARADE.

Las ! pour auoir aimé trop haut  
 Et n'auoir seruy comme il faut,

*Amour ce tourment nous accorde  
De nous battre le sein de coups,  
Et vous crier à deux genoux  
Mercy, pardon, misericorde.*

## CARTEL POVR LE ROY

HENRY III.

*J'ay par actes laborieux  
Rendu mon nom si glorieux,  
Si riche de mainte victoire,  
Que ie veux aujourd'huy montrer  
Que ie suis bien digne d'entrer  
Dedans le beau Temple de Gloire.  
Je suis seur qu'on n'en doute pas,  
Tant les honneurs de mes combats  
M'appellent à telle entreprise:  
Sans plus il faut ce mesme iour  
Ioindre mon Mars avec Amour,  
Et que son arc me fauorise.  
Mars rend vn Prince genereux,  
Amour le fait auantureux:  
Heureux qui tous deux les assemble.  
Mes dames, soyez mon support,  
Le cœur d'un guerrier est plus fort  
Quand Mars & Amour sont ensemble.*

---

## AVTRE CARTEL.

Trois guerriers incognus, de nation estrange,  
Ont laissé leur pays desireux de louange,  
Pour venir esprouuer avecque le harnois  
La force & la vertu des Cheualiers François :  
Afin qu'en acquerant honneur par leurs prouësses  
Soient dignes d'estre aimez de leurs belles Maistresses.

Chacun courra trois coups en masque, & qui mettra  
Plus de fois en la bague, Amour luy permettra  
De gaigner seul le pris, n'estant pour rien contées  
Les attaintes qui sont sans effect emportées :  
Et quand les assaillans & les tenans seront  
Egaux & non veincus, derechef ils pourront  
Recommencer la course & retenter la gloire,  
Tant que l'un dessus l'autre emporte la victoire.

Premier que de courir, ces guerriers bien appris  
Iront autour du camp, & toucheront les pris  
Tels qu'ils voudront choisir sans respect de personne,  
Qui seront attachez au haut d'une Colonne :  
La main victorieuse aura le pris touché,  
Que le veincu payra honteux de son peché :  
Suppliant humblement que le Roy nous ordonne  
Des luges pour garder nostre droict, & qu'il donne  
Faveur à la valeur du Cheualier veinqueur :  
La faveur d'un grand Prince est l'ame d'un bon cœur.

---



## MASCARADE.

## Aux Dames.

*Le voirrois à regret la lumiere du iour,  
l'aurois ingrat soldat combatu sous Amour,  
Porté ses estendars, & suyui ses armées,  
Si voyant maintenant ses armes diffamées,  
Et luy fait prisonnier, lié contre vn rocher,  
Le ne venois icy ses liens détacher,  
Et luy rendre aujourd'huy sa liberté passée,  
Comme Andromede l'eust par les mains de Persée.*

*C'est bien fait de domter ces cruels animaux,  
Et ces monstres qui font aux hommes tant de maux,  
Qui de sang & de meurtre ont sanglanté la face:  
Mais d'outrager Amour pere de nostre race,  
Le mener en trofée, & luy serrer les mains,  
C'est ensemble offenser les Dieux & les humains.*

*Celuy succe le lait d'une fiere Lionne,  
Qui Venus iniurie, & son fils emprisonne,  
Sans respecter ce Dieu, qui vengeur doit venir  
Bien tost l'arc en la main à fin de le punir.*

*Dés le premier regard sans autre tesmoignage,  
Voyant son poil, son front, ses yeux & son visage,  
Il deuoit bien penser qu'une diuinité  
Estoit en cest enfant: mais trop de vanité  
Aueugla sa raison pour ses fautes accroistre,  
Comme aux Tyrrheneans qui ne peurent cognoistre  
Bacchus en leur nauire, & depuis en la mer  
Se veirent par leur faute en daufins transformer.  
Ainsi Niobe apprist par son orgueil funeste  
Qu'on ne doit offenser la puissance celeste.*

*Est-ce pas faire au ciel iniure & des-honneur  
De dire que l'Amour, du monde gouverneur,  
Soit meschant & cruel & auteur de tout vice ?  
Et luy attribuer nostre propre malice ?  
Contre sa deïté Geans nous bataillons :  
Amour ne faut iamaïs, nous sommes qui faillons.  
C'est luy qui de grossiers nous a rendus honnestes,  
Qui nous apprinoïsant nous separa des bestes,  
Et de ses beaux desseins remplissant nos raisons,  
Nous apprist à bastir bourgades & maisons.*

*C'est luy qui des vertus nous enseigne la voye,  
C'est luy qui par esprit aux Démons nous enuoye,  
Qui nous rauist de nous, & qui nous loge aux cieux,  
Et nous repaist de manne à la table des Dieux.*

*De son aile porté, esclairé de ses flammes,  
Dessous vostre faueur, ie viens icy, mes Dames,  
Pour venger son iniure, & l'oster hors d'esmoy.  
Le deuoir d'un sujet c'est aider à son Roy.*

## CARTEL

pour le combat à cheual, en forme de Balet.

*Ces nouueaux Cheualiers par moy vous font entendre  
Que leurs premiers ayeuls furent fils de Meandre,  
A qui le fleuve apprit à tourner leurs cheuaux  
Comme il tourne & se vire & se plie en ses eaux.*

*Pyrre en celle façon sur le tombeau d'Achille  
Fit vne danse armée : & aux bords de Sicile  
Enée en decorant son pere de tournois,  
Fit jaunter les Troyens au branle du harnois,*

Où les ieunes enfans en cent mille manieres  
Mestlerent les replis de leurs courses guerrieres.

Pallas qui les conduit, a de sa propre main  
Façonné leurs cheuaux, & leur donna le frein,  
Mais plustost vn esprit, qui sagement les guide  
Par art, obeissant à la loy de la bride.

Tantost vous les voirrez à courbettes danser,  
Tantost se reculer, s'approcher, s'avancer,  
S'escarter, s'esloigner, se serrer, se reioindre  
D'une pointe allongée, & tantost d'une moindre,  
Contrefaisant la guerre au semblant d'une paix,  
Croisez, entrelassez de droit & de biais,  
Tantost en forme ronde, & tantost en carrée,  
Ainsi qu'un Labyrinth, dont la trace esgarée  
Nous abuse les pas en ses diuers chemins.

Ainsi qu'on voit danser en la mer les Dauphins,  
Ainsi qu'on voit voler par le trauers des nuës  
En diuerses façons une troupe de Grues.

Or pour voir nostre siecle, où preside Henry,  
En toute discipline honnestement nourry,  
Où la perfection de tous mestiers abonde,  
Autant qu'il est parfaict & le plus grand du monde,  
Ces Centaures armez à nostre âge incognus,  
Au bruit d'un si haut Prince en France sont venus  
Pour les peuples instruire, & les rendre faciles  
Autant que sous le frein leurs cheuaux sont dociles,  
Et faire de son nom tout le monde raur,  
Afin que toute chose apprenne à le seruir.

---

## CARTEL

pour les Cheualiers celestes, ou Dioscours.

*Nous sommes ces Gemeaux, dont la valeur extresme  
Nous fait estimer fils du grand Iupiter mesme,  
Qui fendismes premiers, compagnons de Iason,  
Neptune d'auirons, allant à la Toison:  
Qui par terre & par mer veinquismes les brauades  
Des Colchiens en terre, en mer des Symplegades,  
Et qui fuyans le peuple & son chemin battu,  
Fusmes astres du ciel conduits par la vertu,  
Dont les rayons pour marque encore sur nos testes  
Reluisent, redoutez des vents & des tempestes.*

*Tous deux memoratifs de nos premiers mestiers,  
Le ciel pour ceste nuit nous quittons volontiers,  
Et desirons encore, immortels que nous sommes,  
R'essayer les combats & les trauaux des hommes.*

*Donc si quelcun vouloit en armes maintenir  
Que les ieunes guerriers que le temps fait venir,  
Passassent de valeur ceux à qui l'âge antique  
Imprimoit dedans l'ame vne ardeur heroïque,  
Et vueille les mortels sur les Dieux esleuer,  
Qu'il vienne sur les rangs : nous voulons luy prouuer  
A combat de cheual, par lance & par espée,  
Que son opinion faussement est trompée,  
Et que les demy-Dieux par la vertu nourris,  
Sur tous les Cheualiers doiuent gaigner le pris,  
Leur faisant confesser par preuue manifeste  
Que l'homme doit ceder à la race celeste.*

## CARTEL

pour les Cheualiers de la Renommée.

*Et ce char triomphant. & sa Dame habillée  
D'azur, qui de cent yeux est tousiours esueillée,  
Et ce courrier eslé qui seul marche dauant,  
Qui enfle la trompette, & la fait bruire au vent,  
De langues ceste robbe & d'oreilles semée,  
Vous enseignent assez que c'est la Renommée,  
Et que ces Cheualiers qui d'elle ont pris le nom,  
Ont par toute l'Europe espandu leur renom.*

*Voyez comme du chef elle frappe la nue,  
Voyez comme son pied presse la terre nue :  
Cela dit que l'honneur des cœurs victorieux  
Se commence en la terre, & se finit aux cieux.*

*La gloire mendiée à l'aide de fortune  
Ne dure pas long temps comme chose commune :  
Mais celle qui s'acquiert par la seule vertu,  
Ne vit iamais son bruit par le temps abbatu.  
L'une a pour fondement la force du courage,  
Et l'autre une esperance incertaine & volage.*

*Ces vaillans Cheualiers, des combats desireux,  
Et de la Renommée immortels amoureux,  
Ont suiuant la vertu, la mere des loüanges,  
Fait sentir leur prouesse aux nations estranges,  
Sectateurs de Thesé, d'Hercule & de Iason,  
Et de ces premiers preux de l'antique saison.*

*Aussi ceste Déesse à sa suite les meine,  
D'honneurs & de faueurs recompensant leur peine,*

Et de l'amour du peuple, ayant bien mérité  
 Que leur nom soit écrit avecq' l'éternité.  
 Desirans consumer aux faicts d'armes leur vie,  
 Poussiez d'une feruente & genereuse enuie,  
 Ils viennent sur les rangs pour la bague courir,  
 Et le prix & l'honneur tout ensemble acquerir,  
 Et faire en ce tournoy preuue de leur ieunesse.  
 Mars aime l'action, les armes, la prouesse.

## CARTEL

pour les Chevaliers des Flammes.

Si les yeux penetroient au profond de nos ames,  
 Nous n'aurions point besoin d'habits chargez de flammes :  
 Dès le premier regard ils voiroient qu'au dedans  
 Nous ne sommes que feux & que braziers ardens :  
 Mais puis que l'œil ne peut nostre accident cognoistre,  
 Il faut par le dehors le vous faire apparoir.

Nos penfers, qui tousiours tournent tout à l'entour  
 De la personne aimée, & se meuuent d'Amour  
 (Comme tout mouuement est chaud de sa nature)  
 Nous enflamment le cœur d'une flamme si pure  
 Et si belle, qu'en lieu de nous faire mourir  
 Nous sentons son ardeur doucement nous nourrir.

Il ne faut s'esbahir, si nostre char se pare  
 D'artifices de feu : si Vesuue & Lipare  
 Semblent braler dedans : chacun suit son desir,  
 Et nous suiuous le feu comme nostre plaisir.

On dit qu'en Cypre estoit iadis une fournaise,  
 En qui la Pyralide au milieu de la braise

*Entretenoit sa vie, & je mouroit alors  
Que la flamme sa mere abandonnoit son corps.*

*Nous en sommes de mesme : ainsi vit & s'engendre  
Aux fourneaux les plus chauds la froide Salemandre.  
Ainsi se paissent d'air maintes sortes d'oiseaux,  
De terre la Couleuvre, & les poissons des eaux.*

*Animaux qui prenez du feu vos origines,  
Venez viure en nos cœurs, venez en nos poitrines,  
Païssez vous des ardeurs que l'Amour verse en nous,  
Et vivez comme nous, d'un aliment si doux,  
D'un si doux aliment, que mesme l'Ambrosie  
Si doucement au ciel les Dieux ne ressasse,  
Viuaus de nostre feu, dont nous sommes contens,  
Comme mousches à miel des moissons du Printemps.*

*Celuy qui fist d'Amour la premiere peinture,  
Luy donnant des brandons, ne fist à l'auenture,  
Mais par raison, voyant que ce Dieu de sa main  
Bruloit & mer & terre, & tout le genre humain.*

*Escoute, grand Amour, grand Daimon chargé d'ailes,  
Quand la mort raura nos despouilles mortelles,  
Par ta sainte faueur deuenus transformez  
Nous voulons luire au Ciel deux flambeaux allumez.*

*Tu n'auras pas grand'peine à nous changer en flammes,  
Puis que les yeux ardens de nos cruelles Dames,  
Et ton trait embrazé qu'au cœur auons receu,  
Auoit nos corps viuaus desja tournez en feu.*

FIN

DES ECLOGVES ET MASCARADES.









## TABLE DES MATIÈRES

CONTENUES DANS LE TROISIÈME VOLUME.

### LES QVATRE PREMIERS LIVRES

DE LA FRANCIADE.

|                                                                                                    | Pages. |
|----------------------------------------------------------------------------------------------------|--------|
| L'Autheur parle. <i>Vn list ce liure pour apprendre.</i> . . . .                                   | 2      |
| De luy-mesme. <i>Les François qui ces vers liront.</i> . . . .                                     | 2      |
| Argumens des liures de la Franciade . . . . .                                                      | 3      |
| Le premier liure de la Franciade . . . . .                                                         | 11     |
| Le second liure de la Franciade. . . . .                                                           | 41     |
| Le troisiésme liure de la Franciade. . . . .                                                       | 83     |
| Le quatriésme liure de la Franciade . . . . .                                                      | 123    |
| L'Autheur parle. <i>Si le Roy Charles eust vesçu.</i> . . . .                                      | 176    |
| Elegie sur le Liure de la Chasse du feu Roy<br>Charles IX. <i>Soit que ce liure icy...</i> . . . . | 177    |
| Vers du Roy Charles IX à Ronfard. . . . .                                                          | 179    |

|                                                                                                    | Pages |
|----------------------------------------------------------------------------------------------------|-------|
| Responſe aux vers precedens du feu Roy Charles neuſieme. <i>Charles, en qui le ciel...</i> . . . . | 179   |
| Vers du Roy Charles IX à Ronſard. . . . .                                                          | 181   |
| Responſe aux vers precedens dudit feu Roy Charles IX. <i>Charles, tel que ie ſuis...</i> . . . .   | 182   |

LE BOCAGE ROYAL DE P. DE RONSARD.

|                                                                                                      |     |
|------------------------------------------------------------------------------------------------------|-----|
| Panegyrique de la Renommee, à Henry III, Roy de France. <i>Tout le cœur me debat...</i> . . . .      | 187 |
| A luy-meſme. <i>Si l'honneur de porter...</i> . . . .                                                | 197 |
| A luy-meſme. <i>A vous race de Rois...</i> . . . .                                                   | 204 |
| Songe. A luy-meſme. <i>Nos peres abuſez...</i> . . . .                                               | 209 |
| Discours de l'Equité des vieux Gaulois. A luy-meſme. <i>La victime eſtoit preſte...</i> . . . .      | 215 |
| Discours ou Dialogue entre les Muſes deſlogees & Ronſard. <i>Leuant les yeux au ciel...</i> . . . .  | 225 |
| Au Roy Charles IX. <i>Au grand Hercule...</i> . . . .                                                | 230 |
| A luy-meſme. <i>Si les ſouhairs...</i> . . . .                                                       | 237 |
| Discours, à tres-illuſtre Princeſſe, Elizabeth, Royne d'Angleterre. <i>Mon cœur eſmeu...</i> . . . . | 242 |
| Discours, à elle-meſme. <i>Quand Iupiter...</i> . . . .                                              | 253 |
| Discours à treſilluſtre & vertueux Prince, Philibert Duc de Sauoye. <i>Vous Empereurs...</i> . . . . | 259 |
| A treſilluſtre Prince Charles, Cardinal de Lorraine. <i>L'ay procéſ, Monſeigneur...</i> . . . .      | 268 |

Pages.

|                                                                                                     |     |
|-----------------------------------------------------------------------------------------------------|-----|
| Discours à tresuertueux S <sup>re</sup> François de Montmorenci. <i>Le petit Aigle...</i> . . . . . | 276 |
| Discours à Monsieur de Foix. <i>Ton bon conseil...</i>                                              | 280 |

## SECONDE PARTIE DV BOCAGE ROYAL.

|                                                                                                          |     |
|----------------------------------------------------------------------------------------------------------|-----|
| A trefillustre & tresuertueuse Princeesse, la Royne Catherine de Medicis. <i>Royne, qui de vertus...</i> | 287 |
| A elle-mesme. <i>Comme vne belle...</i> . . . . .                                                        | 297 |
| Elegie. <i>le suis certain...</i> . . . . .                                                              | 302 |
| Discours. <i>Ou soit que les marests...</i> . . . . .                                                    | 304 |
| Discours à Cecille, Sicilien. <i>Docte Cecille...</i> . . .                                              | 306 |
| A E. de Trouffily Conseiller du Roy en son grand Conseil. <i>Trouffily, tous les arts...</i> . . .       | 312 |
| Discours du verre. <i>Ceux que les Sœurs...</i> . . . .                                                  | 315 |
| Amour logé. A N. de Pougny. <i>Amour auoit...</i> . .                                                    | 319 |
| Discours. <i>Vous qui passez...</i> . . . . .                                                            | 322 |
| Discours. <i>C'estoit au poinct du iour...</i> . . . . .                                                 | 335 |
| Discours à Monsieur de Cheuerny, Garde des Sceaux de France. <i>Celuy qui le premier...</i> . . .        | 343 |

## LES ECLOGVES ET MASCARADES

DE PIERRE DE RONSARD.

|                                                                                                     |     |
|-----------------------------------------------------------------------------------------------------|-----|
| A treshaut & tresuertueux Prince François de France, Duc d'Anjou. <i>Tandis que la vaillance...</i> | 353 |
| Bergerie. <i>Les chefnes ombrageux...</i> . . . . .                                                 | 356 |

|                                                       | Pages |
|-------------------------------------------------------|-------|
| Eclogue II. <i>Païssez douces brebis...</i>           | 394   |
| Eclogue III. <i>Vn pasteur Angeuin...</i>             | 403   |
| Chant pastoral. <i>le me faschois...</i>              | 418   |
| Eclogue IIII ou Du-Thier. <i>De fortune Bellot...</i> | 427   |
| Eclogue V. <i>Deux freres Pastoureux...</i>           | 438   |
| Le Cyclope amoureux. <i>Contre le mal d'amour...</i>  | 450   |

#### LES MASCARADES, COMBATS ET CARTELS.

|                                                                                                      |     |
|------------------------------------------------------------------------------------------------------|-----|
| Cartel I. <i>Après avoir...</i>                                                                      | 458 |
| Cartel II. <i>Ayant l'œil triste...</i>                                                              | 460 |
| Cartel III. <i>Si le renom...</i>                                                                    | 462 |
| Cartel IIII. <i>Demeure, Cheualier...</i>                                                            | 463 |
| Le Trophée d'Amour à la Comedie de Fontaine-<br>bleau. <i>le suis Amour...</i>                       | 465 |
| Le Trophée de la Chasteté en la mesme Co-<br>medie. <i>Pour mon Trophée...</i>                       | 467 |
| Les quatre Elemens. <i>le t'ay donné...</i>                                                          | 468 |
| Les quatre Planetes. <i>Ce n'est pas toy...</i>                                                      | 469 |
| Le iugement de Iupiter. <i>Appaisez-vous...</i>                                                      | 471 |
| Stances à chanter sur la lyre, pour l'auant-venue<br>de la Royne d'Espagne. <i>Soleil, la vie...</i> | 471 |
| Les Sereines représentées au Canal de Fontaine-<br>bleau. La premiere parle. <i>De l'immortel...</i> | 475 |
| Prophetie de la seconde Sereine. <i>O Prince...</i>                                                  | 478 |
| Chançon. <i>A Dieu ressemblent les Rois.</i>                                                         | 480 |
| Comparaison. <i>Le Soleil &amp; nostre Roy.</i>                                                      | 482 |

Pages.

|                                                                                             |     |
|---------------------------------------------------------------------------------------------|-----|
| Cartel pour le Roy Charles IX, habillé en forme<br>de Soleil. <i>Comme le feu...</i>        | 484 |
| Cartel fait pour vn combat que fist le Roy en<br>l'Isle du Palais. <i>Le fort Soleil...</i> | 485 |
| Cartel contre l'Amour. <i>De deux Amours...</i>                                             | 486 |
| Autre Cartel pour l'Amour. <i>L'homme qui n'aime...</i>                                     | 488 |
| Pour le Roy habillé en Hercule. <i>Ce Cheualier...</i>                                      | 492 |
| Cartel pour le Roy Henri III. <i>Cest habit blanc...</i>                                    | 493 |
| Dialogue pour vne Mascarade. <i>Herant des Dieux...</i>                                     | 495 |
| Monologue de Mercure. <i>Dames, ie suis...</i>                                              | 496 |
| Pour vne Mascarade. <i>Iupiter. le suis des Dieux...</i>                                    | 498 |
| — — — — — <i>Pallas. Du haut du Ciel...</i>                                                 | 499 |
| Cartel fait promptement. <i>Huict Cheualiers...</i>                                         | 501 |
| Mascarade. <i>Las! pour auoir aimé trop haut.</i>                                           | 502 |
| Cartel pour le Roy. <i>L'ay par actes laborieux.</i>                                        | 503 |
| Autre Cartel. <i>Trois guerriers incognus...</i>                                            | 504 |
| Mascarade aux Dames. <i>le voirrois à regret...</i>                                         | 505 |
| Cartel. <i>Ces nouveaux Cheualiers...</i>                                                   | 506 |
| Cartel. <i>Nous sommes ces Gemeaux...</i>                                                   | 508 |
| Cartel. <i>Et ce char triomphant...</i>                                                     | 509 |
| Cartel. <i>Si les yeux penetroient...</i>                                                   | 510 |



---

Paris. — Imp. A. LEMERRE, 6, rue des Bergers.











La Bibliothèque  
Université d'Ottawa  
Echéance

The Library  
University of Ottawa  
Date Due

|  |  |  |
|--|--|--|
|  |  |  |
|--|--|--|



a39003



003327847b

CE PQ 1674

oA2 1919 V003

C00 RONSARD, PIE OEUVRES CO

ACC# 1414029

